


國學基
本叢書

景

文

集

二





景文集卷二十一

五言長律

送馬軍范太尉恪

平狄方開府。鏘羌舊著名。君于陝西戰功最多。新提建章騎。入領羽林兵。賜橐千金重。留車兩印榮。已封頭尚黑。休戰裨還生。大旆前驅影。鳴鐃後隊聲。輶壇勝算爵。客飯飫侯鯖。山背迷榆塞。雲披認薊城。介圭朝漢幄。鈞仗侍軒營。悵別疎華恨。勤歸杖杜情。君看畫像處。麟閣近西清。

喜連君錫過郡

稍稍客引去。依依君見過。胡爲困重趼。正欲問無他。古者他爲人患。每相見問無他否。甌黍驚方熟。犀談省舊訛。感餘祇恟恍。衰罷有蹉跎。直取憂襟解。聊從醉弁俄。緩行清白酒。隨意短長歌。旱壤星霜晏。纓環塵垢多。且應留從僕。同賞二山阿。

送聞大夫遊西天

五竺能仁里。重游路不迷。詔辭丹鳳北。身到白龍西。野淨榴花早。林暄貝葉齊。暮雲程次闊。斜月笠前低。燕嶺長銜霧。金河不貯泥。梵王分供食。戍校接征鼙。宰堵方增飾。祇園得徧躋。無容帶歸錫。秦蹕待新題。

覽中丞尙書譙陳二郡新詩

自頃辭台路。陪京擁使珂。遺音追正始。新韻徧中和。贈答劉公數。登臨叔子多。腸迴初有感。耳熱遂成歌。驚夢春塘草。歡顏雪席醅。拍殘吳子夜。唱殺楚陽阿。勝氣籠雲沆。清懷貯月波。無妨爍顏謝。莫獨與羊何。譙里鳴騶入。陳郊露冕過。二邦留雅咏。棠樹共婆娑。

感事寄子明中丞

久玷三雲從。仍叨千石榮。羸軀付多病。怯計會無成。出守非嚴助。何年召邵萌。風摧向陽麓。霜變度江橙。畫閣勤聽訟。春疇力勸耕。遂慙循吏術。姑促縣官征。害馬直宜去。勞魚實恐賴。人心久忘戰。朝議近論兵。戍鎖關南數。邊烽隴右明。將機猶嘆喏。賊膽尙縱橫。說士爭操牘。闕下獻方略者蓋千計謀臣屈請纓。已聞疲轉粟。安得但嬰城。且許和戎利。重尋撓酒盟。安危繫公等。指授盡時英。幸有千金募。須容八陣精。待衰曹劓鼓。長揖亞夫營。刷憤宜修德。時巡況作京。詔以大名府爲北京矢方射蟠冢。力欲斬長鯨。憲紙言常屢。王塗日以清。悉心前席重。直指佞人驚。仗下霜餘凜。班回佩倚鳴。早調黃鉉鼎。催獻惡梟羹。願我罹飛語。于茲類倒行。鬼神慙賈誼。唇舌避君卿。直道今寥落。狂辭先猥并。椎如莫邪鈍。俛若小冠盲。秦俗矜車甲。周詩賦旆旌。會當濡橐筆。企詠二邊平。

寄題外門亭園

外家真大隱。亭圃枕城闈。談樹能留客。飛鷗不畏人。白雲仙嶺曙。脩竹禊堂春。溪遠尋難盡。林幽趣旋新。愛山仍作屐。裁穀便爲巾。僧赴禺中飯。樵歸落照鄰。宅成翻忝相。里舊況依仁。千騎過從數。連章刻翠珉。喜刁從事見過

窮閭久藏疾。有客獨迴輪。密契瞻松茂。羈懷慰蓼辛。猶龍八才子。君家昆仲皆當時之譽嗅雉一畸人。藜藿仍開筵。樵蘇賴庶貧。吾僚青眼舊。今世白頭新。尙倚王陽仕。終彈屋幘塵。

楊都官知隨陽君自蜀守爲計俸既而出郡

棧道迴忠馭。牢盆幹計貲。文書三署草。兄弟五常眉。邊爾分符竹。欣然捧詔芝。疾驅關外傳。奉引漢東旗。夕月同離恨。春膏徧我私。他年五君詠。應記阮咸麾。

和龐丞相

顧我支離甚。惟公念不才。朱顏爲列郡。白髮入中臺。閣道通天祿。宮門拂斗魁。論班元後鄭。作賦或延枚。病肘垂楊老。危心一櫓摧。根愁江北變。葉喜洛陽來。自昔邊州重。當年蜀馭催。燒烽看朔漠。捫井歷崔嵬。粗可繙前史。何能調禁財。流光成浩蕩。孤宦易嫌疑。曲外悲絃剩。機頭謗錦開。無功慙遠志。有吏笑然灰。左轄真虛忝。仙曹復濫陪。門鷓愁眩轉。軒鶴老毵毹。傾否知攸往。成章慙所裁。賈生空問卜。楚客但勞媒。特召依明主。生還揖上台。緹油觀冊府。巾履記翹材。長跪懷人句。徐傳道舊杯。今茲宣父治。終得鑄顏回。

送常熟尉錢訪

雋譽高鄉品。仙姿並國游。新恩紺綸綬。遺社耐金侯。賦閣諸僉筆。塵緇倦客裘。平明僱權鷁。幾信候潮鮪。下鼓蓴鱸箸。持螯酒溢甌。江南三月草。爲子剩離憂。

寄王崇

君年三十餘。棄官隱居高山。

築室占層峯。高眠商嶺東。鉢薰諸佛飯。牕占上皇風。餌桂將成父。搯芝固有童。驚猿參唳鶴。仲鳥雜經熊。客有希何點。人多拜德公。春雲不持寄。誰欲問山中。

詠史

古有容容福。人譏齷齪員。生能巧作奏。死戒直如弦。欲重高門地。非論媚竈天。詩書大儒家。絲竹後堂旃。東閣翻芻馬。西園竊富錢。道謀誰執咎。戶選不因賢。朱鼓成妖日。羌鷄原注音芬。案宋文鑑作雞非是。入賀年。須防反室詔。終取闔門憐。異日譏成錦。先時默似蟬。空貽後人嘆。流涕掩青編。

贈通教大士善升

此心通妙法。他劫待尊顏。水月何嘗動。煙雲相與閒。香浮經葉暗。霜點頰髭斑。施寶上人往。銜花谷鳥還。梵潮鳴夜浦。天柱落秋山。句偈聊持贈。非緣文字間。

奉和長兄歲晏抒懷

天暮雪雲繁。相將客兔園。老從星髮見。歲伴日車翻。別葉晴猶舞。征鴻暝更軒。事君纔寸祿。知我是空言。競進家爭壁。同聲伯有墳。重吟探懷句。更代一狐溫。

寄天休學士

時遞宿館中

春暝蓬山直。知君思緒多。玉蟾吟瀉滴。朱幕臥生波。談麈飄無幾。書刀削久訛。魚沈江上夢。雞唱汝南歌。落帶燈煤暗。雙盤露藥和。烟浮温室樹。雲澹客星河。乍首傳清戲。章溝疊迴壘。子雲惟寂寞。尙自奈嘲何。夏日舊疾間發

老至非無素。憂來詎一源。河魚真得疾。牀蝨誤成喧。咬咀供晨匕。蹒跚逼夕軒。何宜忝蓬觀。祇合令文園。霜挫頰毛禿。雲添眼膜昏。問天寧有禱。依佛卽忘言。燕麥搖風砌。蟻苔壓雨垣。冒榮難自効。三宿戀君恩。

蘭皋亭

張學士充別墅

信美蘭皋地。疏椽構迴軒。山林閒處樂。溪瀨靜中喧。春桂開前塢。秋菘接後園。舟來無盡曲。客到不空罇。夕月生帷鑿。晴雲抱棟痕。主人貪細績。未暇答驚猿。

送胡學士赴益州漕

帝念西南重。頻年輟俊翹。還臨二星野。催駕一封帔。地出褒中險。梯連劍外遙。蹲鳴蔽川沃。流馬餉軍饒。檄去方移蜀。書成遂薦譙。客橙薰露夕。官錦濯霞朝。卓市醪華美。渝僮舞勢趨。省蘭聊罷幄。亭柳重攀條。

煩使資游及歸懷極本朝前知宣布曲即日徧歡謠

羸疾益間呈聶長孺學士

病緒蹇騷騷彌旬曠坐曹綠髮初得損非巧亦成勞計月銷雙臂驚年變二毛隙塵間日滿鑑藥晷時熬顧此逢熙盛紛吾異俊髦濫趨華雉省清舐翠螭毫數米仍能飽槍榆不顧高聊尋祕方枕更繕養生刀夕穗含風月秋禽企露臯比來差勝晤有意伴持螯

予昔游雲臺觀謁希夷先生陳搏祠堂緬想其人今追作此詩〔案〕此詩見華嶽志題作希夷峽

仙館三峯下年華百歲中夢休孤蝶往世言先生善睡蛻在一蟬空有塚在華山下藥笈微言祕霄晨浩氣通丹

遺舐後鼎林遣御餘風市霧沈荒白殮霞委暗紅峨眉有歸約飛步與誰同先生化去前三日語弟子云吾將游峩眉弟子訝不辨候

至期而終

還鄉

自昔去先閨乃今還故廬隴桑濡露外岳桂遣風餘稍識烏衣巷相過栗里輿感存橫涕數道舊愬杯徐水澗溪容耗林殘野氣踈鳥喧晴處陌烟宿暝時墟彭澤期歸去臨邛喜第如擊鮮無久慙趨局畏官書

憶浣花泛舟

早夏清和在晴江沿泝時岸風搖鼓吹波日亂旌旗醉帟牽細蔓游鬢撲絳蕤樹來驚浦近山失悟舟移

雅俗西南盛。歸輶東北馳。此歡那復得。拋恨寄天涯。

大像閣

追碧被層巔。道讀爲追。琢之追。靈姿映大千。天光白毫際。山色鈿螺邊。海客供鬢貝。江神捧坐蓮。銜花馴鹿往。投鉢毒龍眠。影壓中流浪。香飄萬里船。慈威濟終古。何止一長川。

覽蜀宮故城作

國破江山老。人亡岸谷摧。鴛飛今日瓦。鹿聚向時臺。故苑猶霏雪。荒池但劫灰。賴遺糊處壤。闔記數殘枚。恨月窺林下。悲風覓隴來。依城狐獨速。失廈燕裴回。廢社纔存柳。陰垣自上苔。有情惟杜宇。長爲故王哀。

早夏出城書所見成篇

肅駕來墟落。悠然矚霽氛。飛花缺林影。驚鷺破洲羣。牧徑尋還失。羹歌斷更聞。平蕪與天遠。孤日帶霞曛。梁雉今誰嗅。城狐古不熏。楚人矜節物。腰艾鬪蘭芬。

詠石

勝具論終古。尋幽屬政成。待時藏磊落。得地鬪崢嶸。錦駁苔文露。虹浮玉氣明。夢池分到影。牕岫讓吟情。乍恐翻湘燕。眞疑刻漢鯨。滴秋湖溜入。觸曉寺雲生。紫漢仙機遠。西陵客棹輕。映花雕檻接。礙竹翠鞭橫。扣鼓非臨岸。傳書異穀城。願將侯鵠瑞。旦暮奉承平。

春雪

遲旭收天寓，層陰糝雪英。傍階聊積玉，妝樹旋消瓊。越驛兼梅墜，章臺代絮縈。風回飛自急，池暖白猶輕。曉溜承隅滴，寒澌逼沼生。持杯一相勞，膏脉趁春耕。

書局梅聖俞劉仲更二學士計問繼至漕然有感

二子繼淪闕，惜哉難具論。塵毛如昨語，墨蔓未乾痕。髮霧迷歸楫，慌風慘葬原。風流盡逝水，日月促陳根。從古死皆有，由來命罕言。病夫長慟罷，翻幸歸然存。

思歸

心悸真摧櫓，年衰逼異糧。西征何日賦，東走向來狂。遂隔承明謁，虛稱建禮郎。去都魂黯黯，思幄淚浪浪。見菟慙紆綬，逢荷誤索囊。醒無次公酒，老畏侍中香。前席初延問，煩言已中傷。翁眉爭特笑，繞指詎容鋼。事隱或投杼，根危因拔楊。陰收主父草，幾落黨人章。霧露淮天惡，亭臯楚塞長。平時猶有感，爾日固迴腸。溪漲淹蒲牒，洲風挫葑房。芴區晴外遠，山疊暝前蒼。毒虺寒猶蓋，飢豺晝不藏。若爲貪坐閣，自此戒垂堂。淪骨深恩在，雕蟲緒業荒。身孤惟夕夢，時到黼帷傍。

破石寺

袞袞上層巔，飛空寶構聯。山林楚遺塞，樓閣佛諸天。午刹中峯影，晨香衆壑烟。齋淪一水注，開闢二崖穿。

旭日生岳罅。歸雲宿椽邊。吾游常草草。暫對社師蓮。

哭中山公三十韻案中山公即陳元佐

天欲鳴文鐸。公先露上珍。談鋒貫千載。文緯補三辰。海浪扶鵬徙。誰朝筴鷺振。盪邪初奏雅。闢路近還淳。

汗竹刊譌徧。仙藜遞宿勤。漢家方授記。趙世本多神。稍上窆遼禪。親逢堀吻巡。每篇稱陸賈。四頌識崔駰。

東封西廡。公皆第頌有聲。接書來詞禁。軒霞切容宸。祥符大記。公入西掖。金聲兼振玉。絲緒遂成綸。預讀蘭圖字。時參豹尾塵。批

成五色詔。乞守兩朱輪。自外制守黎。虎幄思賢數。鼈山召節新。自淮陽召直入北門。請聞裨帝采。有意靖宮鄰。界虎潛興

譖。猶龍詎肯馴。符魚貪六六。國獬避信信。龍內制。鎮肥上。東震重光啓。南箕哆焰淪。觸邪觀豸久。斂手避驄頻。勇

退寧無謂。斜飛故有因。龍靈司出。鎮額上。終承紫芝召。還返碧桃春。復入北門。承旨。丁直何嘗屈。蘭幽止自紉。歌成接輿

鳳。書止太初麟。修國書。向成。竟遂東平樂。非憂宣子貧。復肥。川。蒙莊祥止止。尼父誨循循。久負騎星望。非圖撤瑟

晨。夜歌忽稀薤。仙壽頓摧椿。奠乏芻如玉。碑須白受辛。成蹊三榜士。始永定。祥符。暨今上。天聖。凡三典。貢部。墜淚四州民。自黎

至肥。凡四郡。自此亡遺直。誰將贖百身。他年虎賁飲。無復老成人。

三泉縣龍洞洞門深數十步呀然復明皆自然而成

虬洞闕靈峯。緣虛一綫通。雲披雙壁敞。樹補半巖空。概竹森烟蘂。飛泉曳玉虹。重蘿不肯晝。陰壑自然風。

嶺斷天斜碧。崖傾日倒紅。浮邱邈難遇。畱恨翠微中。

次韻和李長學士正月二十八日出郊見寄之作

雅俗傳祠日

州人以二十八日祠保壽侯及唐杜丞相於崇真堂

年華重宴辰。初陽澹江霧。

是日雨而不濤。遊人皆集。

客蓋浮輕

吹。齋刀儼後陳。林芳催兔目。原色換龍鱗。壤路歌聲雜。構倡舞疊新。持杯徧酬客。惟欠眼中人。

紀贈致政燕侍郎

中朝鵠髮俊。得謝寵安車。碧落超新秩。承明別舊廬。叔時今老矣。司寇此歸歟。畫有封廚祕。詩多乙牘餘。雲情元自遠。舟意本常虛。酌酒朋三壽。揮金輩二疏。深恩仍給俸。令子復將輿。幾日西清對。留光惇史書。

答程職方冬至前一日江上觀魚

歲晏修漁事。邀賓俯碧流。鳴榔截橫浦。叢柂聚寒洲。舴艋爭離合。鷓鴣巧泛浮。漁子又以鷓鴣捕魚。探頸而取之。魴來比河上。鱖出似搓頭。雪膾供庖俎。梅齋促宴甌。言詩知有意。不爲百金求。

抒懷呈同舍

本自草茆賤。非貪箕斗名。客心摧似櫓。官謗沸如羹。晝役迴腸數。秋扶病體輕。長年書轉忘。多露涕先橫。已分嘲楊吃。頻遭詈楚僮。矜毗兩蝸角。榮辱一基枰。越蟹丹螯美。吳蓴紫線縈。他年五斗米。猶足代寒耕。

自詠

客舍張羅靜。流年激箭過。愁餘驚斛滿。淚盡覺珠多。鵝鳩悲秋極。芎藭奈疾何。振纓清濁水。持酒短長歌。

潘岳傷慘慄。蘇生困揣摩。經綸誰一問。邁軸老中阿。

蜀地海棠繁媚。有思加膩。幹豐條苒弱。可愛北方所未見。諸公作詩流播。西人余素好玩。不能自默。然所道皆在前人陳迹中。如國風申章亦無愧云。

蜀道天餘煦。珍葩地所宜。濃芳不隱葉。併豔欲然枝。襞綵分羣萼。均霞點萬蕤。迴文錦成後。夾煎燎烘時。蜂蕊迎銜密。鶯梢向坐危。淺深雙絕態。啼笑兩妍姿。絳節排煙竦。丹釭落帶垂。童容郭畏薄。便面到憂遲。媚日能徐照。暄風肯遽吹。蜀少疾風。故花愈盛。惜親當晚晚。留恨付離披。麗極都無比。繁多僅自持。損香饒麝柏。照影欠瑤池。畫要精侔色。歌須巧聘辭。舉尊頻語客。細摘玩芳期。

七言長律

送趙御史仲禮之任南臺并柬兼善達公經歷元載王公用道孔公二御史

天子龍沙拜法官。議郎親戴辟邪冠。曉辭漠北冰霜重。秋到江南草樹寒。諫疏頻煩明主聽。題詩長共故人看。應憐閭里誅求急。尙布朝廷禮意寬。幕下清風鳴一鶚。臺端雪霽見雙鸞。寥寥渡海三冬鬪。颯颯空五色翰。晉代新亭蒼蘚合。梁朝舊地上花殘。石城慷慨悲袁粲。別墅風流憶謝安。千里憑高摩綉斧。幾回攬轡竝銀鞍。諍臣事業須公等。努力明時匪素餐。

去年十月去淮陽。今實周一歲歲中。三遷遂直內。禁作詩記其出處。〔案〕祁於慶歷二年移守陳州。次年自杭州留爲翰林。

去年詔赴淮陽郡。手合魚符擁使輶。今歲恩叨玉堂署。頭簪鳳筆從宸游。孤蓬逐吹無時定。倦鳥逢林只自休。暗隙遂容私照日。奔湍信有不沈舟。身歸詎敢夸三組。目眩何能讀九丘。白髮紛垂文思輒。此生榮遇若爲酬。

景文集卷二十二

五言絕句

南郊祠所上章攝事二首

七里城南路。齋祠宿下房。
遠烟晨燎地。斜日夕牲場。
上辛茲攝事。瑞祝本通天。
自此春秋筆。還書大有年。

和人禁中作

鈞曲來深殿。宮花出御溝。
雲天正如畫。壁月在西樓。

太祖永昌陵

石馬開陵道。陰虬結廟阿。
飛雲似不去。疑誤大風歌。

太宗永熙陵

白虎晨湍迴。青龍夕霧和。
漢陵人易識。流水記岷峨。
故老今多喪。嚴祠日愈新。
青青陵上杏。神護五株春。

眞宗永定陵

金石凝虛筍。旌旗落暗塵。唐堯遂不見。空有進羹人。
洛水縈祠外。崧雲泊棟端。橋山何必問。只是葬衣冠。

咏水紅

夏砌綠莖秀。秋簷紅穗繁。終然體不媚。無乃對虞翻。

和王君貺禁中寓直

長樂疎鐘斷。昆池夕照收。晚風生似雨。仙霧爽如秋。
中禁听夕氣甚寒爽

和延州經略龐龍圖八詠〔案〕八詠題迎薰亭供兵磴延利渠柳湖飛蓋園綠雲軒翠漪亭禊堂今缺綠雲軒一首

迎薰亭

飛宇棘南徠。以待風之薰。因君奉揚力。并慰塞下人。

供兵磴

磴湍方電激。麴屑已雲霏。誠哉智者樂。力少功不貲。

延利渠

遵蒙本山下。渠激流且迅。無嫌萬折勞。思迴九里潤。

柳湖

波平柳苒苒。湖與柳共色。攀條弄潺湲。坐送春暉昃。
飛蓋園

千騎亟遊賞。賓蓋紛相隨。不知是日歡。何如清夜時。

翠漪亭

憑欄玩文漪。日與賞心遇。汀篠陵砌繁。沙禽冒波翫。

禊堂

悠悠水周堂。堂上列禊賓。賓勸使君酬。無爲負良辰。

和延州三詠

濟勝橋

溪光倒釣影。釣影跨溪垠。非論權取意。聊訂濟涉仁。

八覽亭

亭軒入空碧。極眺煩慮開。漢樹有葱蒨。隴雲多徘徊。

清潤堂

水容靜若鑑。天影倒虛明。勿使川風動。波生便不平。

漱玉齋前雜卉皆龍圖王至之所植各賦一章凡得八物或賞或否亦應乎至之意歟遂寫寄至之

牡丹

壓枝高下錦攢蕊淺深霞疊綵晞陽媚鮮葩照露斜

澹紅石榴

移植自西南色淺無媚質不競灼灼花而效離離實

蜀葵

紅白相嗣繁色純香亦淺相對庭戶間俗尚焉能免

萱草

修莖無附葉繁萼攢庭首每欲問詩人定得忘憂否

芍藥

有名見鄭風今賞異疇日采花當采根可能治民疾

竹

脩脩稍出類辭卑不肯叢有節天容直無心道與空

菊

纖莖寒始密。秀葉晚逾滋。芳意君須識。羣葩搖落時。

芭蕉

不枝惟葉茂。無幹信中空。所以免摧折。爲依君子風。

春望雜詠

〔案〕原題凡三首。歸鴈一首。遠樹一首。輕烟一首。今缺輕烟一首。

歸鴈

刷羽梁王池。春至欲言歸。牽我東南恨。隨君西北飛。

遠樹

如帷復如薺。歷歷映滄洲。故障千里目。剩作一重愁。

次韻罷相遊故園

戟棨嚴門第。鑲金倦帶圍。如公三事老。從古幾人歸。

脩竹

北戶靜無塵。蕭蕭玩翠筠。此時刀筆手。慙愧殺青人。

濠上

莊生坐濠上。下玩戲魚躍。魚固不知人。人奚謂魚樂。

聞蛙二首

蛙聲直可厭。聒耳橫相干。怒氣何關勇。私鳴不爲官。
膨脝枵怒腹。日夕沸溪干。羣響何容罷。時無牡鞠官。

古來吟

古來韋與杜。闕闕冠當年。今日城南問。惟餘尺五天。

竹

新筍漸盈尺。新梢已鋪瓦。燕雀忽相驚。深沈似隆夏。

九日

長愛鴨陂頭。平波澹不流。相君時獨汎。準擬五湖舟。

古意

肆威矜逐逐。索黨恣狺狺。盜跖真知道。餘財欲汗人。
青松獨受命。停雪待陽春。一遇樵人斧。同成樸檉薪。
虎嘯雲巖下。風生林嶺隅。須防威可假。慎勿逐城狐。
持鷓鴣謀壯。貪蟬鵲意深。漁人一拱手。彈者笑依林。

西齋新植萱草甚多作問答絕句二首

問

膩蘚金英撲。纖蕙玉段抽。萱如解榮悴。爭合自忘憂。

答

我有忘憂號。君爲憂世人。欲憂憂底事。胡不暫怡神。

僧房白蓮

水風披玉蘂。溪露泫瑤津。花意如師意。宗雷社裏人。

重懷和靖林逋

高士非求死。天教隕少微。雲疑隱居在。猶傍嶺頭歸。

秋夕不寤

倦枕回尤數。東方不肯明。只將無睡耳。終夜著蛩聲。

閏九月晦日登舟二首

淮平舟未進。遠緒悵依依。勿謂王孫怨。先如春草歸。
二山皆在眼。未忍去淮津。三宿寧無戀。況非桑下人。

次韻和奉寧大尉相公見寄二首

寶弼昔營野，代工天眷深。此時蕭散樂，卻似住巖陰。
儒蘊披幽笈，仙圖啓祕關。嵩雲爲雨罷，來伴相君閒。

挑燈杖

處膏非自潤，在寸敢矜長。試用郤家暗，迴爲隣壁光。

書齋前柏八株森植翠茂

總總長柯上，離離翠實疎。休誇冒霜雪，僅得守門閭。
古語：松柏爲百木長而守門閭。

一百五日作

雨罷飛花徧，緘愁對晚杯。客心將煬竈，同是一寒灰。
客舍已蕭寂，況逢龍忌辰。何煩申火禁，自有不黔人。

行客

游子何方客，征裾滿素塵。疲驂不進道，還犬復迎人。

小渚

輕烟變渚色，寒浪嚙隄痕。鳥去枝猶動，沙頽水暫渾。

十二月十八日會飲園夫獻桃花二首

今歲臘未破。明年春尙賒。天教催朔氣。先作寒南花。
晚秀尙可惜。早開真謂奇。君看早開處。定是向南枝。

叢菊

烟開容蘂密。霜重放叢斜。插著星星畔。潛郎稱晚花。

反舌

默默過桃園。穿條疊葉翻。夫君猶舌在。時宴便無言。

除夕

歷尾無餘日。更籌促曙躔。持愁賸殘歲。將老入新年。

野渡

行路到溪窮。寒流自浼浼。客立平沙上。篙人艤船待。

木芙蓉盛開四解

木末芙蓉語。當時不謂真。今來木末見。愁殺擬騷人。
麴塵輕抱蕊。宮纈巧妝叢。青女由來妬。憑君淺作紅。
楚辭。攀芙蓉兮木末。蓋指芙蓉假爲喻耳。

浩露津細。尖風獵絳英。繁霜不可拒。慎勿愛空名。雖俗名拒霜花。其實逢霜即悴矣。
千繞青叢外。攜觴只自留。晚花兼素髮。同是一悲秋。

木芙蓉

芙蓉本作樹。花葉兩相宜。慎勿迷蓮子。分明立券辭。齊時童謠云。千金買藥園中。有芙蓉樹。正指此木芙蓉耳。
一作淮南守。再逢霜豔新。花前今日酒。卻是去年人。予去秋已有木芙蓉四曲。故有是句。

夜分

此夕炎氣罷。浩然天意秋。桂華兼月上。槎影帶星流。

觀書

隱几窮千古。披經究萬殊。扶疎曾答客。涉獵恥成儒。

讀史

順諛要領絕。書罷付函封。隸子方求益。君非賣菜傭。
漢囊一需頭。竝薦五處士。由來角立名。獨歸徐孺子。

卽事

我來春已晏。道樾半清陰。崖暗石蹲虎。林明花散金。

湖上二首

秋水自然碧。秋花何意紅。乾坤搖落恨。只是爲西風。
樓迴銜空霧。郊長占暝霏。戲魚晴自擲。寒鷗夜還飛。

客舟

上溪不弛帳。下溪不打槳。上下各有趣。相遇風波上。

柳

濯濯縈春晚。依依帶暝饒。楚宮皆餓死。無計學纖腰。

海棠

薄暝霞烘爛。平明露濕鮮。長衾綉作地。密帳錦爲天。

詠茶蘼

來自蠶叢國。香傳弱水神。析醒疑破鼻。併豔欲留春。

詠棠棣

潘賦幽芳在。周詩榮鄂傳。佛輪千幅細。公帶萬釘圓。

景文集卷二十三

七言絕句

紫宸賜宴

戴斗通歡瑞節來，新年共上萬年杯。
宮花雜珥天心悅，併覺春從殿裏回。
扈從至奉先寺回

寶刹虹幡蔽曙霞，中天凝蹕轉雲車。
不妨歸路王城遠，滿袖飛花雜雨花。

和御製皇太后恭謝太廟

柔極探慈冠古先，謝成宗祏奉齋牲。
欲知太姒嗣音盛，親見周王作雅年。
(案)此詩爲仁宗所嘉賞，事見揮塵錄。

宣室

宣室崔嵬冠未央，殿帷深掩上書囊。
賈生始待虛前席，董偃尋聞獻壽觴。

聞新榜恩除異等輒成自詠

蘭署曾叨異等名，當年不與賦天庭。
塵容此際支離極，慙見唐家千佛經。

詔復制科有謂子應詔者

漢幄思賢尺詔飛。不材充賦諒非宜。就令能奏三千牘。未免長安欲死飢。

試秩祕書

綠底封書喬露光。試名仙局靄芸香。固慙衛國乘軒寵。猶勝唐家脫腕郎。

行香

朱華通奏見晨暉。內寺傳薰得早歸。私舍不應勞薄澣。天花仍在淨名衣。

余將北征先送同解

動地箕風白草乾。旗亭歌闕據征鞍。三冬大雪梁臺路。不敢逢君唱苦寒。

和晏太尉西園晚春

北平心計盡紅牙。五日雕鞍暮到家。林下覓春春已晚。綠楊枝暗不通鷗。

風蘼幡幡續去條。一朝歡盡負霞朝。人間賦筆如公少。借問離愁著底澆。

渦曲攀花泥酒卮。來詩有懷渦曲此亦及之西園春去一凝思。謝公今繫蒼生望。無復東山攜妓時。

和承旨學士喜資政侍郎休退五絕

南闕騰章歸老初。安輪四馬照中都。不知誰在東門外。解道賢哉此丈夫。
聲名自昔拘如鎖。富貴由來薄似雲。今日冥鴻到天外。世間增繳漫紛紛。

倦聽當關報曙光。深藏象笏解荷囊。身閒不傍功名路。方外方知日月長。
高挂塵冠靜拂衣。安貧知退似君稀。門前便是東山路。誰肯功成名遂歸。
翰墨班中推舊老。功名罷後得高眠。欽風最有鼇山長。技癢思歸不待年。

和晏太尉三月初五日

東南郊日上團紅。浩蕩天區望始窮。獨愛暖雲如擘絮。紛紛無事映晴空。

和晏太尉三月十三日錫慶院二首

紺宇傳香鷺序回。南趨別館宴庭開。正因恩厚心先醉。不待君王常滿杯。

酒中優場下調喧。漢震鼓與下調笛合奏。如今鼓吹笛來詩有之。故及此。連天震鼓舞行翻。看終白雪青山技。不覺斜光上縹垣。

和三司晏尙書秋詠

霜繁天白鴈行單。灌莽梢梢蟲早寒。正是河山搖落處。莫輕離思欲憑欄。尙書詩有莫憑高樓。仲遠目之句。

溪澗水淨蓮莖倒。林杪風乾栗罅開。迴眺獨吟俄夕景。畢逋鷓尾過牆來。

和三司尙書宣德門侍觀燈

觚稜南抱綵山連。樓下沈香百炬然。此夜有人之帝所。默裁餘韻記鈞天。

都街見緣幢伎感而成詠二闋

迴望場中百尺竿。趨材飛捷過跳丸。垂堂亦有千金子。不教中衢徒倚看。
子子危樞突倒投。負材驕壓漢場優。如何日到危身地。只丐旁人一笑休。

答客

十年通籍向蒼龍。孤直何緣免諱窮。欲識深心似魚鳥。不將山海換池籠。

承明年老厭文書。尺奏朝通暮剖符。數領近藩君莫笑。猶勝長被鬼揶揄。
羅含爲鬼揶揄曰。只見送人爲郡。不見人送爾作郡。

直舍飲餞楊子奇

杯霞三醕客顏醅。明日離魂伴玉珂。我爲有人輕狗曲。同居不敢唱驪歌。

與獻臣希深伯中源叔景純會飲城東小園

共到東園把酒卮。邀歡只畏酒行遲。尙書有對何能顧。況是尙書無對期。
林間曉日靜暉暉。判共山公倒接羅。不信佳人唱花落。試尋欄畔有空枝。

和參政丁侍郎洛下新植小園寄留臺張郎中二首

名園新景極幽尋。廊廟功名江海心。廣作巖扉容駟馬。他年此路待飛金。
水竹郊園占洛畿。私書素友約忘機。公今已爲蒼生出。雖有雲山那得歸。

答燕侍郎謝與端明李學士見過之什

方外仙卿岸幅巾。三竿紅日照霜晨。當關不用驚鷗唱。共是揚家載酒人。

小雨

雨腳銜山夕照和。簾間涼氣晚來多。濛濛未擬昏城樹。颯颯先能鬧沼荷。

次韻宮師相公南游還舊山及闕下二首

丙御蕭蕭上翠微。故林泉石共光輝。曉猿夜鶴知無怨。得見山中宰相歸。
武當晏席揮金罷。鄭圃聯章驛霧成。莫獨名山藏祕本。別須留副在華京。

湖上

雪後雲歸露晚噉。凍舟猶自滯溪門。潛魚不上湖光靜。漠漠寒沙印鴈痕。

湖上見擔稻者

壓膝霜稻報豐年。鎌響枷鳴野日天。輔郡不知爲水耨。楚農新教命家田。
許人不善種稻。故鄆公鎮許召襄漢佃戶教種公田。

立春

春曉靈旂畫尾斜。漢官青幘待晨霞。宮中綵樹紛無算。不待東風已作花。

憶與唐公游西湖

紅鮮高下照橫溪。勃窣含情欲上隄。手攬緗莖那忍折。戲魚長在葉東西。

荷花深處放舟行。棹觸荷珠碎又成。莫道使君迷醉曲。分明認得採蓮聲。時席上唱漁家傲。予省是臨川公荷花曲。又古樂府有採蓮曲。

使君迷。

西湖席上呈張學士

野菊斑斑岸蓼紅。使旗同駐賞秋風。斜陽更助憑欄勝。高下樓臺波影中。

湖上

蕭蕭露白蒹葭老。索索風乾楊柳疎。坐見漁舟歸浦盡。小篷明滅上燈初。湖上烟光九月天。于今墟落古西偏。風波罷後汀洲靜。兩兩鳧鷖曝翅眠。嵩隴凌秋爽氣來。川原高下一屏開。溪雲盡日無還意。正自天邊作雨回。

和晏尚書出城口占四首

沆莽團紅上曉原。露英風葉隔塵喧。天邊一寄冥鴻意。越乙荆鳥判自翻。古諺有黃鸝留。著一麥椹熟。柳栗婆娑晝影圓。披襟凝眺此翛然。鷗留便作林間伴。正是甦黃椹紫天。古諺有黃鸝留。著一麥椹熟。千里梁陳一眺分。古愁今恨枉相聞。早須跋馬收清思。莫看沈西日暮雲。終年羈束厭華紳。暫到林墟似出塵。盡是機心可忘處。爭教魚鳥不留人。

題提舉公會亭

一翬軒翼四簷通。草樹依然接舊宮。苑外自飄新歲雪。臺邊誰識故王風。

郡將夜醮分貺齋耐

殊庭夜醮肅真儀。奏罷雲章月已低。自笑談賓真俗骨。不齋猶得醉如泥。

郡將病免檄委郡事

郡將將書臥閣頻。假提千騎出班春。校中寧免時髦誚。欲作宣明面向人。

州將和丁內翰寄題延州龍岡新開柳湖五園

湖中新水照春輝。綠徧垂楊千萬枝。此地得非名細柳。暖烟偏照亞夫旗。
閒駐春旛玩碧潄。波光杳杳樹陰陰。使將寒下風沙意。回作江南烟水心。
浚湖栽柳重城下。弄水攀條三歲中。誰見使君欷帽處。鴨頭波上雪花風。
弱柳毵毵湖上天。天青湖碧此留連。東方千騎浮雲駿。折得春枝便作鞭。
昔人楊柳詠依依。曾與征夫說戍期。看盡春條君莫歎。湖邊雨雪是歸時。

三年

三年官牒託東侯。旌蕩危心斛貯愁。一命鴻毛徒許國。單身螢火若驚秋。

鄰郡移書覆獄

堀堞征塵敝客裾。曉盤貪飯魯人蔬。多年養病先黃老。豈辨司空城旦書。

漢南使君數以公醪見問

江上春陰柳萬條。離人無處不無慆。阮生塊壘胸中極。故待兵廚著酒澆。

重陽前二日喜雨答泗州郭從事

晚秋嘉樹潤焦原。楚老相歡萬井喧。須信甘膏皆帝力。使君虛憑黑熊軒。
非下車六旬而蒙甘雨。非百里隨軒之應明矣。

雨洗淮天旱始摧。正堪憑遠上高臺。萸津菊潤齋醅熟。共助重陽辟惡杯。

相國寺祈雨馬上口占

青鴛剝下天香集。丞相車前佛月低。知有風人無限思。火城催向五門西。

黃羅襪

宋明帝病甚。詔褚彥回到曰。召卿欲使著黃羅襪耳。黃羅襪。乳母服也。謂令輔導幼主。後與袁粲同受顧命云。

袁褚聲華約略同。到頭忠佞兩成功。先皇謾賜黃羅襪。不識明眸有貫虹。

李樹

曾見繁英出縹牆。更將朱實奉華堂。蹊桃得地偏相映。莫損清陰欲代僵。

二月一日次利州見桃李盛開

蜀天寒破讓芳晨。雪蘂霞跗次第新。解把清香與行路。教人長憶故園春。

祇答晏尙書懷寄之什

赤白邊書費坐籌。尙餘清暇寄冥搜。知公擷句多情意。虛憶盧諶唱和流。

寄君貺王學士

雞檄防邊未得休。久停歡酌爲前籌。良辰併賞何憂晚。他日三公尙黑頭。

齊雲亭

憑高徙倚不成下。把酒直送斜陽曛。遮回西北望鄉眼。遭箇亭亭車蓋雲。
歸雲片片鳥行沒。晚日寸寸城陰生。林下本無蘇合彈。棲鳥何事向人驚。

中屏燕侍郎烟嵐曉景

澹峯危木掃天春。青到屏端憶故人。一丈輕綃千里思。爲君今日拂流塵。

桃

春香搖曳夏陰繁。蹊曲愔愔靜可攀。不是仙園三食罷。何緣靈核到人間。
絳棗迎春五出齊。開時未識早鶯啼。不應盡占游人賞。留取餘芳付李蹊。

爲就東君得早紅。年年開趁落梅風。凌寒拂曉相看意。爭合尊中放酒空。
荒齋書坐爲鳴鳶所聒

喜鈔寒鴟六翮輕。蕭條墟落恣飛鳴。屠鄰腐肉知無限。少作揚州餓箭聲。
海棠

萬萼霞乾照曙空。向來心賞已多同。未如此日家園樂。數徧繁枝袞袞紅。
行樂

日烘霞底未成昏。拊物驚年併慘魂。李樹已僵生意苦。秋蟲何忍食桃根。
落花

前溪夜雨錦張紅。墜萼殘英繞暗叢。已與吹開復吹謝。無情畢竟是春風。
蟬

曉腹清呼飽露津。本求仙蛻遠囂塵。貂溫范蜜非吾族。枉共花冠託此身。
答梵才見賀忝承旨之作

玉署重來訪舊游。蟠桃熟徧碧城秋。不知身是真仙未。上到鼇山最上頭。
春日溪上

溪上和風吹薄雲。溪邊花木亦欣欣。州人未散煩攜酒。行樂先須讓使君。
春日溪上示南正四首

春雲拂拂柳搖搖。盡日相望似見招。此意只應人未會。自持杯酒上溪橋。
少華山頭雪未消。東風先已入花梢。今朝懶到溪邊看。林下流鶯似見嘲。
莫言雨後長蓬蒿。恍惚溪邊見小桃。待得數朝開爛漫。更須防避晚風號。
繞溪臺榭據丘陵。試對春風日日登。蘋藻鳧魚無舊恨。主人今是柳吳興。
尋春溪上

溪上尋春春已來。小桃初似剪刀裁。今朝判與諸人醉。暫見芳菲眼亦開。
挾彈林下

挾柝行吟涉庾園。鵲林驚繞果林寒。幕中病客殊真俠。虛費游童逐彈丸。
甲申歲首

故歲時光漏中去。新正甲子卷頭開。迎新送故祇如此。且盡燈前盞尾杯。
四日汎舟馬家園

淺蒲垂蔓兩厓深。閒刺烟篙到碧潯。會待乘春留襖帖。茂林脩竹似山陰。

觀鄰人賣餅大售

初日關門照上旌，芬香無算客庖盈。本源漸大囊錢足，不復還家唱渭城。
昔有窮人常歌渭城樂，後本源既大，心計轉贏，不復唱渭城矣。

曹景宗

快馬如龍度埽塵，射聲放飲藉汀蘋。鼻頭出火風生耳，寧願揚州作貴人。

秋夕不寐

風颭危檣浪拍船，三更殘月下空弦。離鴻過盡啼烏困，猶自愁人不得眠。

八月望夜不見月有感

素波涼暈淡層城，悵悵三年此夜情。
在淮南三年，逢中秋俱不見月。獨捲疏帷成默坐，暗蟲相應作秋聲。

九晏含爽助清輝，萬里重陰誤賞期。正恨浮雲無意緒，世間偏惱最明時。

北牆董羽水

萬疊雲濤墨海間，天機地軸共回環。悠然便有滄溟意，況在靈鼇首冠山。

馮家溪二首

穿竹尋溪到窮處，一泓寒碧澹無情。誰令巖竇有高下，瀉作潺潺鳴玉聲。
疊甃分渠激磴輪，雲噴餘溜下通津。莫辭滿掬雲湍碧，聊灑征夫纓上塵。

哀江南

病魂招得未渾全。暝倚秋屏豈是禪。一夢忽成霜蝶去。草深三逕若爲眠。
鬼化斯文念賈生。精神瑠瑤坐寒更。一書草就兼衣臥。恨煞東方不肯明。
龍山戲馬賞秋光。多少新詩入錦囊。磨滅英雄豈勝數。千年依舊一花香。

池蛙

越國車前矜勇甚。子陽井底太驕生。乘時不羨雲溟樂。口作儀同鼓吹聲。
齊張狗兒將拜儀同口自作鼓吹聲。

景文集卷二十四

七言絕句

和中丞晏尙書憶譙渦二首

幪幪行艫破練光。提鞭舊岸接回塘。使君幾作臨波醉。猶省當時問葛彊。
春波漫處尋他浦。晚潦清時覓故洲。使舸忽歸心賞罷。後來風浪但驚鷗。

重陽不見菊

戲馬佳辰菊未黃。有人惆悵獨持觴。心知不作忽忽意。故欲凌寒報早霜。
蜀地秋高未擬寒。翠苞如粒露華乾。重陽已過君休恨。留取金英晚節看。

柳絮

萬縷金長暖絮縈。雪乾雲困徧春城。衝風力盡飛應怯。試與鴻毛較重輕。

儒林

窮巷空傷老治經。由來命薄是諸生。正須盡力排黃老。刺彘纔能得利兵。

江上阻風

百尺危檣倚曙空。古祠簫鼓隔丹楓。誰將一隻仙人箭。換作樵溪旦暮風。

招希元奕

飽食南榮曝書曦。小星聯影人枯槁。座賓只待王郎至。爲判南風不競時。

昌雨晚歸馬上口占

滿蓋繁聲結暝涼。獨驅歸馬向閒坊。囂塵暫息非無意。半作衝泥污錦韉。

雜興

不學詩書君勿嗤。人間情僞古難知。第看陵麥青青句。盡是當年發冢詞。商君要術惟強國。孟子深心肯信書。大抵空言是糟粕。斲輪甘苦定何如。

讀桓伊傳

上前奏笛串奴髯。自倚哀箏詠刺譏。大傅一聞流涕久。使君于此信非凡。

途次清明

漠漠輕花著早桐。客甌餽粥對禺中。遙知闕下頒新火。百炬青烟出漢宮。

三月晦日送春

倏忽韶光第九旬。無花何處覓殘春。長繩萬尺非難具。誰與天邊絆日輪。

朱雲傳〔案〕韻語陽秋作詠漢史。

朱游朱雲小字英氣凜生風。瀕死危言悟帝聰。殿檻不修旌直諫。安昌依舊漢三公。

七夕

烏鵲橋頭羽蓋移。秋風長有隔年期。七襄終日難成報。不是星娥織作遲。

庠局觀書偶呈同舍

蠹簡時披落暗塵。書窗風冷冰蟾津。不須長歎夫差事。恐有鄰房儂和人。

和人禁中作

前殿籠童畫鼓賒。對論兵食近袍紗。此時刻意言頗牧。不爲雲中首級差。來詩云可能頗牧不重生。

題比郭巨然山水

鈿點峯頭蟲太虛。遠帆遙岸水平鋪。不知真到雲波上。得似工毫可愛無。

叢祠樹木尤岑蔚

祠憑怪神樹不伐。樹得岑陰神託威。鄉人奠酒女巫醉。祠樹不知誰是非。

西壁畫松

數株森立寫皴堅。霜骨鱗膚千萬年。秦帝從官徒自苦。取封不及大夫賢。

對菊有感

吹菊佳辰念物華。顏生不飯重咨嗟。故園舊種猶存否。露損風搖著幾花。

淮山

不見當年叢桂枝。空山嶮峯但霞霏。眼看春草萋萋徧。身是王孫未得歸。

答道卿舍人桐竹之嘲

桐竹連雲阿閣西。脩莖濃葉蔽璇題。本來鸞鷲排翔地。正恐羈禽不借栖。

竹

除地牆陰植翠筠。纖莖潤葉與時新。賴逢醉日終無損。正似得全于酒人。種樹家以五月十三日爲竹醉日。移之多盛茂。

擬西出陽關無故人

雨中柳色醉中迷。上馬彎弓散馬蹄。陽關門外故人遠。獨有殘陽相伴西。

人日

綵勝香羹樂上春。我懷前事悵佳辰。瞿曇尙笑浮生假。況鏤黃金假作人。

早秋二絕

斜規脈脈霞底去。早涼蕭蕭林際歸。年華搖落適誰怨。伯勞燕子東西飛。

離騷何苦怨鷓鴣。鷓鴣本因搖落鳴。寒蟬驚鶴亦無謂。要是愁人聞自驚。
驚鳥

遠夢回時路已迷。三更霜月倚樓西。驚鳥有底無窮恨。取向琴中作夜啼。

柏樹

昔記孤根百仞溪。何年移植對芳蹊。雲巖烈麝相思久。悵望清香未滿臍。
翠柏童然雜礫間。簿書餘暇獨來看。不須更共春葩競。留取青青待歲寒。

木芙蓉

寒圃蕭蕭雨氣收。斂房障葉似凝愁。情知邊地霜風惡。不肯將花剩占秋。

晚春

露花萼萼開還徧。風絮飛飛去不休。春解無情春亦老。欲將寥落與誰愁。

房陵舊第

謫去房陵席尚溫。回看北第已消魂。當時賀厦翩翩者。今日張羅不過門。

蘆

袅娜脩莖青玉攢。鳧翁濯罷翠痕乾。湘君直寄江湖樂。要作風汀雨瀨看。

我慙散質山中養。君結孤根江上來。相對中園兩無用。菰蘆何處有奇才。溪蘆得種庭軒下。翠色雖新野色銷。要待九秋風雨後。冷梢危葉作蕭蕭。

過玉蓮湯

平日宮中賜浴時。玉蓮香目湧華漪。錦鳧繡鴈今安在。汨汨餘湯自入池。

出野觀農二首

杏蘂莖芽正及春。風烟萬頃縹陂勻。果然莊腹三殮飽。悒悒深耕不顧人。炊饌中林烟火遲。勸農官吏駐春旗。蓬蒿意盛陽膏動。正是陳根可拔時。

過摩訶池二首

十頃隋家舊鑿池。池平樹盡但回隄。清塵滿道君知否。半是當年濁水泥。池邊不見帛闌船。麥隴連雲樹繞天。百歲興衰已如此。爭教東海不爲田。

危語

奔車下山朽索轡。倒行垂踵臨無地。碁子十二卵相疊。手探驪珠觸龍睡。

樂府

花外超超百尺樓。碧簾深下蒜條鉤。石城何似盧家好。曲裏分明兩莫愁。

次望喜驛始見嘉陵江得子友天章張文裕西使日詠嘉陵江詩刻于館壁有感別之歎予因戲答
二章他日見文裕以爲一笑

江流東去各西行。江水無情客有情。此地懷歸心自苦。不應空枉夜灘聲。
東流江水鴨頭春。南隔高原背驛塵。便使灘聲能怨別。此愁不獨北歸人。
入蜀

劍峯重疊抱巴天。從昔奸雄竊慨然。白腹黃牛餘識歎。漢家尋用五銖錢。
除夕作

四十九年今日到。來驩往戚是歟非。牀頭周易有深意。自此恐須三絕韋。
夜分不寐二首

晴缸紅花久未落。耿耿秋思饒端倪。傾荷破月共天宇。女子牆高烏夜啼。
西風已飄上林葉。北斗直掛建章城。愁人底事最堪恨。絡緯啼時無婦驚。
御愛山

翠嶂奔騰一氣間。六飛畱賞暫怡顏。君王草草非真愛。心愧東方檢玉山。
詠史

一馬浮江擁瑞圖。青規羣彥倚長裾。本緣獻替居門下，不爲江蝦與鰾魚。
偶記洛下舊遊

洛陽三月見梨花。遙認清香識鈿車。今日風光兩無賴，莫愁應已嫁盧家。

虛名

身外虛名莫妄求。強關事事判悠悠。試看雲將三年役，止博鴻蒙一掉頭。

早春近野

紫苞如紐綴榆繁。春意悒悒徧近原。霽嶺浮烟含縹翠，泮渠新溜變清渾。

題朱四郊野

菌閣平窺倚杵天。綺塍鱗隰逗春泉。誰將六國黃金印，擬換東周二頃田。

呈成上人

佛國天花兩送春。歲陰何意重相親。勞師且置彌天論，鑿齒今纔敵半人。

熊上人見過談理頗未得盡憶王侍郎共加研討

柱杖蕭然陋廡開。茗花熬綠淺浮杯。清言未到忘言處，正待裴家驛騎來。

讀巷伯章

孤節區區是愛君。危言未達已危身。豺牙虎爪銛于劍。不爲詩人食譜人。
野路見棠梨紅葉爲斜日所照尤可愛

葉葉棠梨戰野風。滿枝衰意爲秋紅。無人解賞如丹意。拋在荒城斜照中。

小荷

踏溪分藕養新荷。鈿蓋斜臨瑟瑟波。自是天姿不汙著。本深泥濁奈君何。

月桂

月面鋪冰不受塵。緣何老桂託輪囷。吳生斫鈍西河斧。無奈婆婆又滿輪。

晏寢

栩栩莊園夢正酣。曙霞分色照東南。閉門更費當關報。已是嵇康一不堪。
康書七不堪其一臥喜晚起

小池

細溜沙渠逗曲池。碧潄餘潤漬蟻衣。風休浪靜如圓鑑。時有文禽照影飛。

雪裏尋梅

雪裏逢梅近臘時。梅姿雪態兩相宜。羨君此處留清賞。看徧溪頭南北枝。

戲答天休

元夜天休移簡云薄暮即還家繙老書酌酸酒以自娛耳

老書堆几寧堪讀。酸酒盈樽不用賒。料得君非貪九錫。短轅長柄趣還家。

紅蓼

花穗迎秋結晚紅。園林清淡更西風。纖條盡日差差影。時落釣璜溪水中。

泛渦水二首

川上輕風正滿旗。幽尋不憚進舟遲。蘭橈過後江烟合。卻見驚鷗自下時。
漠漠新葺上渚蒲。日痕波態共涵虛。無人解作江南曲。荷底田田自戲魚。

除夕

一杯芳酒夜分天。萬慮勞勞耿不眠。明日新春到何處。菱花影裏二毛邊。

望仙亭北軒晚思

北顧吾廬安在哉。天涯望眼到天回。碧雲向晚無情合。思殺離人未肯開。

中秋夜不見月二首

天上浮雲不肯歸。憑軒坐惜桂華西。一年此夕無窮恨。只是城鷗得穩棲。
萬里重陰晦玉輪。兔孤蟾遠託霄垠。世間未必皆同恨。亦有居心不淨人。

秋塘敗荷

去時荷出小如錢。歸見荷枯意惘然。秋後漸稀霜後少。白頭黃葉兩相憐。
東亭

檻檻餘涼日未斜。海天相合碧無涯。樵風不動檣烏靜。時見孤雲伴落霞。
溪上

杖策溪邊興盡歸。片雲何事逐人飛。飄然自是無心物。欲去還來上客衣。
秋園見蝶

撲粉曾過宋玉牆。一身生計託流芳。不須長結束風怨。秋菊春蘭各有香。
送葉蘇州

臥錦簪花飄夕棹。兩吳芳樹隱春旗。爲尋劉白高吟地。酒熟螯香左右持。
濠上

惠非蒙叟非魚。濠上全知魚樂無。春水未深魚易樂。要須真樂是江湖。
對獵

黃山橫鶩曉成圍。後騎蕭蕭萬弩隨。當路豺狼宜一發。不須回首問狐狸。
九日食糕

廳館輕霜拂曙袍。糗餈花飲鬪分曹。劉郎不敢題餠字。虛負詩家一代豪。

黃葵

黃葵貴麗不天饒。一朵新晴松下高。還似邇英臨黼座。曠曠曉日照天袍。

山橙花

故鄉寒食茶蘼發。百合香濃邸舍深。漂泊江南春過盡。山橙彷彿慰人心。

九日憑高有感

把酒憑高念歲華。此身流滯屬天涯。故園叢菊無人賞。露壓風欺只自花。

春帖子詞

皇帝閣十二首

康郊迎氣罷。暖信入嚴宸。暫遣星杓轉。令知天下春。

瑞福隨春到。穰穰正似山。君王寬大詔。自此徧人間。

穀管灰飛盡。金銜刻漏長。歡情與和氣。併入萬年觴。

日華初麗上林天。殿裏春花百種鮮。驅出餘寒還故臘。收回和氣作新年。

望春臺下春先到。獵獵青旂倚漢宮。水自北涯生暖溜。花從東面受和風。

蒼龍東闕轉春旂。絳羽林梢最早知。青帝回風還習習。黃人捧日故遲遲。
春風長樂地。春杖大明天。春酒皆千日。春枝卽萬年。
陽和今日到。景物一時新。陛下南山壽。長迎千萬春。
天上春先徧。世間人未知。黃金裝柳葉。紅密點花枝。
水暖蛟冰解。灰飛鳳管和。陽春與皇澤。併付女夷歌。
天矯蒼龍引翠旌。君王暫暇出郊迎。勾芒一夜催春到。萬戶千門歌吹聲。
宜春苑裏報春回。寶勝繪花百種催。瑞羽關關遷木早。神魚潑潑上冰來。

皇后閣十首

青郊迎淑氣。華闕報芳辰。瑞木梢梢變。珍禽哢哢新。
春前已歲換。歲後始春來。綵燕隨宜帖。繪花闕巧開。
曉天春氣淨融融。飛入天關第九重。靈沼水生初報鴈。蓬萊雲暖卽從龍。
宮裏春花纔灼灼。殿前春仗已峩峩。東風盡解天池凍。不及君王慶澤多。
誰道春從何處來。只從金闕徧瑤臺。蒼龍使人時巡仗。玉液還飛行慶杯。
嘉祐隨年至。皇恩共氣和。水痕冰處動。烟思柳前多。

曉佩搖蒼玉。晨旂亞翠旂。新年好春色。今日滿皇州。
暖碧浮天面。遲紅上日華。寶幡雙帖燕。綵樹對纏花。
迎春寶勝插釵梁。拂鈿裁金鬪巧妝。上作君王萬年字。要知長奉白雲觴。
雙闕鮮雲抱日光。朝來春意已昌昌。先從太液催波綠。後到靈和報柳黃。

夫人閣十首

雪罷雲初暖。天和日便遲。玉樓新燕子。祿下記來時。
春從何處生。先覺滿瑤京。冰解魚鱗散。雲飛鶴態成。
春天麗春旭。春酒獻春盃。樹待珊瑚鬪。花須羯鼓催。
銀闕崔嵬對未央。春來始覺好年光。風生禁苑無窮麗。日向仙壺一倍長。
東郊移仗曉迎春。已覺輕寒不著人。天瑞穰穰君澤美。併教和氣助佳辰。
春闕風光麗。春城歌吹喧。瓊蘇獻春酒。金薄鏤春旛。
瑞歷歲惟新。物華春可愛。雪盡林弄姿。冰銷水生態。
新年十日逢春日。紫禁千觴獻壽觴。寰海歡心共萌達。皇家慶祚與天長。
日照觚稜萬戶春。細風輕霧淡嘉辰。一番宮柳黃烟重。百種盤蔬紫甲新。

玉管輕羅和氣動。土牛青犢報祠歸。仙盤取露朝和藥。舞殿裁雲暝作衣。

余在北門時每立春必前索宮中春詞十餘解今逢茲日塊坐州閣追懷舊題續作六章

漠漠春從天際來。春旂已在望春臺。寒銷嶺上容梅落。暖拂江南放鴈回。
清曉東郊轉翠輿。蒼龍驅煖入儲胥。便回天上陽和氣。散作人間寬大書。
星杓夜壓禁城東。葭縠晨飛玉管中。撲撲烟花千戶煖。嘈嘈歌吹九門風。
漢宮節物重年華。寶勝迎春綽綽斜。不待東風吹煦力。剪刀催出上林花。
故歲猶長新歲晚。東君破臘便回春。花枝稍稍暗紅上。已覺輕寒不著人。
樓角紅陽上翠旗。釵頭新燕一雙飛。天將美景催行樂。剪盡春雲作舞衣。

景文集卷二十五

奏疏

詆五代篇

臣聞王者握命紀。操斗憲。題期立象。中天稱號。必有積德之祐。上凝霄極。不謀之言。下謠人口。或捍禦大患。身享其樂。或勤勞累世。后乃有興。是故勳氣後應。則泄爲曠瑞。洪休震動。則耿爲烈光。寒暄天淵。施虐金石。震如雷霆。燦如日月。所以神明其位。鞏固其祚。乘雲高躋。與天同貴。大業既定。垂世長久。後世雖有僻王昏主。猶得蒙業而安。爲此者非他。君道得而本基固也。臣草茅狂闇。弗達大體。不敢紬太古之事。角無用之文。竊怪士德之衰。五代狎主。何五代無道之短。而先王有道之長也。試迹其事。儻見其端乎。先王之興也。咸有絕異之姿。甚德之度。聰文敦敏。淵泉博厚。又有格天之佐。恢其謀。鷹揚之旅。輔其決。尙或憮然中昃。穆然深拱。瞿然如弗克。葦然而自戒。同寅協恭。致虛治平。五代則不然。臣主不肖。媮爲一切。自謂縮取備物。妄投天隙。庸人蹶張者。列侯土。中涓刀筆者。建宰相。材不逮古。謀不經遠。乃蕙蕙然相與臥積薪之上。倒太阿之柄。操持失統。斃蹠不振。一夫大呼。天下合而軋之矣。先王之始王也。以治易亂。以寬代虐。人情莫不欲逸。因以輕其勞。人情莫不欲生。因以遠其死。賞未始由情而僭。罰未始爲私而濫。其改制

也。使日就于正。如行舟焉。雖不截流。漸靡而往。其易俗也。使歲安其教。如種樹焉。雖未驟益。有時而大。是以四海洗心于更生之辰。萬民翹首于整綱之會。五代則不然。觀釁以動。乘時併起。桀詐桀。亂濟亂。拯人于溺。而水益深。投人于焚。而火益熱。收聚不逞。衰合失職之徒。以爲謀主。剽劫民屋。略奪金瑤之聚。以悅武士。刈民之命。若草菅然。視邦之易。若置棋然。大欲得矣。終不知嬰廉愧。反仁誼。程天下之豪。革馬上之治。徒乃戮無罪以威下。爵匪人以悅衆。將軍臭乳。都尉爛胃。民不見德。惟亂是聞。故下利其亡。上階其亂。雖勃然而興。亦勃然而廢。古之王者。皆父事天。母事地。子育人。明德恤祀。祈天永命。以垂無窮之烈。五代則不然。誣神沒禮。或不郊見。禩祥雜揉。不可方物。童山斬木。空虛地藏。殺人盈野。流血漂櫓。是以父含隕蝕之怒。絕其命。母馮震陷之威。告其變。子乘捐瘠之亂。挺其亡。不過一傳再傳。陵遲罔紹矣。古之王者。改姓易統。咸有以損益其政。故夏之敝。以野。商人救之以忠。商之敝。以鬼。周人救之以文。故前車已覆。而後鑿改御。彼琴不調。而此瑟更解。五代則不然。自唐家失御。藩帥迭侮。朝疏封寵。夕希姑息。甚者。自裨校而下。徧置私人。招來亡命。隸于牙帳。因國府庫。煽其異圖。鳥聲獸心。陰相鳴召。緩且傲法。急則稱兵。否乃煽山封水。與民爭利。方駕兼兩。輸貨無厭。覲面罔極。鈔食求飽。孰知有伏節之誼。死綏之守者哉。及罪盈情得。仰藥伏刃。尸元橫分。睢類滅絕矣。五代親罹其難。終不知損權柄。塞缺望。平鑄其邪心。漸出于公路。以謂勢之適然。亡具甚矣。自五代去。雖卽汴。建爲都邑。北據大河。西掩函谷。東漕淮泗。南馳陳蔡。皆天下勁

兵處也。地形便利，鎧馬犀勇。五代不乘時角力，削平天下，犁其庭，掃其閭，薪去不義諸侯，以虛其國。方且徧舞樂禍，沐猴而冠，遂使僞劉孽李，么膺數子，限長江，捶隄塞，闕高岸，踰短垣，倔強跳梁，坐飾邊幅，以黑子之地與中國抗衡。臣有以知五代之無能爲也。乃炕龍絕氣，非命之運，故天殃已加矣。臣昧死，臣聞夫吐珠于澤，人誰不含，集鳥之屋，理無妄止。是故太祖乘五精之運，契三神之驩，起而有之，撥亂世反之正。天下所以無敵也。且太祖以夏禹之敏，成湯之武，文王之小心，漢高之大度，又荷上真之眷，付畀四海，虓虎鳧藻之師，效其力，負鼎前箸之臣，贊其務。受命之後，寒心銷志，不明求衣，南取吳，西取蜀，荆湘閩越，以次誅剪，靈旗所指，黃鉞所下，若震聲蜚響，雲徹席卷，日出海隅，罔不砥屬，輿櫬銜璧，赦而不誅者，孱然成行，悍將驍帥，驕而弗制者，旋正其法。萬邦止景，羣饕檢情，剗其戾文，蠲其苛制，重惜府庫，弗崇宮室，軍雖數出，民不加賦。是時少府水衡見錢多矣，而又法明令具，吏知所守，與天下更始者，大功數十，臣所不能盡道。夫不鍾大亂之剗，無以啓至聖，不當弗友之壞，無以建明德。秦刑塗地，炎漢繼之，厥或享國四百年。隋酷稽天，黃唐受之，厥或享國三百年。五代殘殺，我朝承之，斬除亂徒，肇立人紀，卜世垂祚，與天無窮。此上帝所以重景命，與人聖之厚也。詩云：商監不遠，在夏后之世。五代有焉。又曰：上帝臨汝，無貳爾心。我朝有焉。雖區區唐漢，不得竝日而語矣。

贊曰：朱石不君，漢周亂倫，殄我蘇氣，煽爲妖氛，地厭流血，天蒙戰塵，長蛇薦食，險鹿橫奔，六國弱姬，三戶

亡秦皇矣上帝哀此勞人變絕亂命光啓聖真。

選郡牧篇

昔王嘉之言國家有急取辦于二千石二千石尊重難傾乃能使下臣嘗以嘉爲知言夫王者靖居九重之中獨運大鈞之上雖有喟然愛利之意下無由知雖有曠然寬大之令民無由曉故臨遣二千石以鎮郡國使其諭上之意以撫下紬下之情以聞上上下下之際沛然無壅此刺史所以與國休戚天子所以授任蒙成之意也宣帝曰與我共此惟良二千石乎故授受之間不得不慎國家茂稽天秩祇建王僚諧循吏以作民師進正臣而端治表番休遞上以仁佐賢振振焉鷲羽之集西雖子子焉旛干之紕良馬可謂得人爲盛當事立功然而政不加平訟不進理罪罟逾密涇源寢漓其一端殆二千石責任之不至也請試言之自太宗右文真皇執競陛下以光華重協清和有聲奮揚乾剛總擘天緯戎索不警方內又安邊吏耳不聞檀車之聲齊民目不睹贏糧之役四十年矣故所倚于二千石者特皆簿領之期會獄犴之文致無益之細政不急之常務積習成敝以爲二千石之職適如是耳故所任之意愈薄所假之權益輕或數月輒遷或暮年罷去送迎新故旣已騷然斷盜詆欺寢亦隨發且又敦薄參進廉鄙竝塗非有法度可循條教可紀也雖詔制凝密法網周設適足使中才懷疑內顧下才畏罪求免懷疑旣功無必成求免亦無所不至矣授受若是國何賴焉臣願一二以條其失臣聞春秋之義用貴治賤不以卑臨尊何也上下

有級。則勢不陵。表率素定。則人知信。伏見今列郡四百。皆雜取朝著。以充守尉。不課名實。不覈賢愚。第以久次。一切署遣。雖文敏肅給。不絕于位。而疲鴛貪冒。相繼已多。是使泥滓久濁。清流稂莠。寢害良稼。臣故曰。所任之意愈薄。意薄則官賤矣。所假之權益輕。權輕則器卑矣。威權既奪。而欲使人臨難伏節。義不內顧。不可得也。古者重名與器。非爲以虛尊加之。欲一民之歸。繫民之志。而後可使也。夫上有常貴。則缺望易裁。下無偷令。則善化日登。習安其教。中道若性。故使之忘勞。悅之忘死。蹈白刃。赴滄海。不辭也。其惠之有素。治之既定。今則不然。賢不肖魚貫。悉材諸位。名姓狀貌。未簡上心。循言治行。弗允清議。直使之模表千里。宣贊五教。其路亡繇也。夫生齒日盛。闢寓日廣。而不講禮誼。以示之泥軌物。以納之慎官。司以式之。欲望龔黃之政術。召杜之治最。沒世不可見也。且水旱天所代有。兵革邦之常備。假一有緩急。則經度財賦。倚辦于郡國也。安靜方略。藉成于守尉也。背邪趣正。勞而不怨。繫之于廉恥。張而風俗厚也。三者治之大。而二千石爲之本。豈不重乎。又況風澆化污。政垢令翫。人不嚮誼。家無完行。秉偷薄之意。待不擇之官。持益輕之權。化已敝之俗。臣不見其易也。陶唐三考黜陟。則九歲矣。天道五年大備。則再閏矣。漢家勵精政道。而苦守令之數易。其治八高等。皆賜金增秩。以慰厚其意。由是而談。郡守之屢遷亟罷。古所弗取。平津侯曰。揉曲木者不累日。銷金石者不累月。自謂期年而化。尙竊遲之。臣以平津虛爲勝談。以邀誤賞。可矣。非極摯之論也。治民之意。異于是焉。先威以制其情。後教以定其志。信浹肌膚。恩淪骨髓。然後示之君

臣之義。父子之節。曠然一變。導之正路。不數十年。民亦不信。金石曲木。無情之物。一化不變。故易制焉。民者。生之靈也。教者。民之紀也。不植則僵。不修則壞。憚其慮始。必怠。樂其既成。則安。故曰。難艱之業。當累日也。臣願國家與大臣。試圖其事。遴揀守尉。必得其人。辭去之日。缺半日之間。賜前席之問。陰察其言。退攷其行。練覈得實矣。然後久歲月以效之。必誅賞以信之。其治理轉聞。課品尤異者。賜金增秩。略循漢家故事。公卿空乏。以次升用。悉罷其年數月之命。不專常務細政之責。使其禮讓與于民。凌慢之心絕矣。賢才安于官。苟且之心塞矣。萬一邊場有重餉之警。畎畝有二鬴之困。則斯人惟上所命。順指如意。豈不快哉。贊曰。良二千石。教化是職。弊出輕授。理與慎擇。千里模表。十行方國。天子是毗。吾民滋殖。

本風俗篇

夫民聰明精粹。內函五常。之謂性。剛柔緩急。外繫四方。之謂風。好惡舍取。悅隨上教。之謂俗。聖人知俗之易失。故建之以師表。壹之乎中和。尊尊以示恭。親親以教愛。悌幼以訓慈。先長以興讓。示義以尙忠。嚴刑以威亂。然後可與適治平之路。興愷悌之源。故紫服長纓。潛移二國。廣眉匹帛。爭尙四方。水任孟圓。草逐風偃。傳曰。上有所好。下必有甚者。惟陛下體乾之粹。縱天之能。堯言成典。禹身爲度。聖讒說。放壬人。重力田。憫庶獄。恤祀事。愛民力。定心而物自服。三年而言乃驩。卽位已來。未聞有弋獵之娛。聲色之邇也。每方蜡遘沴。毛澤徵愆。則必瞿然克躬。怛然振乏。逮鰥寡。協孤終。率人以仁。摩民以義。禮注其耳目。樂淪于骨

髓。所以訓齊天下之理甚備。然而道化猶鬱。俗態尙陵。其故何也。殆郡縣之官類多俗吏。因陋就寡。拘文牽義。未能不揚陛下之本意。曉之于民也。是以百里不同風。千里不同俗。長民乏不二之懿。比屋無可封之期。父子德色于擾。鉏鳴鵠惡音于桑。黷齊民輕徙。異物屢遷。故臣前已言郡守擇任之之不精。今復見縣令授受之失實也。臣聞古人有言。郡守縣令。民之師帥。師帥不賢。主德不宣。且陛下所與治斯民。無愁歎之聲。驅一世于仁壽之域。欲安責乎。上宜倚于州。下宜委于縣。是縣令郡守與王者分挈教民權也。今之縣令。職廝祿薄。與匹庶無異。非才能驚頓。卽齒髮耄耄。力事上官。應塞詰責之不暇。何與論繩墨之外。語教化之原哉。此不稱陛下之治一也。就使豪英之士。薰白之人。欲懷行樹風。作爲條教。懷誠秉義。告之話言。而盜憎主人。更見指目。權輕不足自鎮。民蕩因以忘反。故四維張而不具。皇極建而未協。此不稱陛下之治二也。禮以防欲。樂以和情。政以正名。刑以禁暴。四者相須而行。未有知其所由來者也。今之吏治。一切以法驅之。媮合苟安。日閱而已。非有長幼之序。和樂之節。廉愧之砥。孝弟之行。以漸化之也。是以風尙頽替。姦僞波煽。棄禮者無畏。犯義者不刑。上下相毆。以多自證。此不稱陛下之治三也。自文考嚮學。髦士聚朝。廟堂謀謨。朝夕獻納。詔令所下。皆際天人之分。據古今之誼。兩漢深訓。五典常道。而縣吏膚淺。類不能曉。而欲使下情無壅。大教胥洽。人人感知上意。不可得矣。此不稱陛下之治四也。由是天秩久紊。邦教彌翦。賢者恥其冗。則不事以爲高。愚者甘其疲。則厚斂以自慰。孰肯爲陛下懇懇于收養。孜孜于教導。

哉。臣以爲當今之宜。莫如按舊章。定新制。悉取朝著。使典民社。厚其祿。以責其廉。醜其賞。以規其效。百里之內。有能興儒術。闢汙萊。明論詔恩。勒恤民疚。順孫孝子。日以眾多者。爲高第。逮捕盜賊。擊搏豪強。租更先期。獄訟無濫。操切下吏。文符如流者。爲中第。因循故常。無所澄正。不能興譽。亦無用咎者。爲下。又重選良二千石。使互相帖領。數年之後。上計大比。且觀其能。三第中者。擢于衆而選之。不中者。罰其劣而遣之。益儲時才。以待官乏。陛下于此。炳焉興三代之化。巍乎建千載之間。使術有序。黨有庠。歲時以鄉飲酒禮。而綴其驩。時時頒牛酒。以勞力田孝弟。恤鰥寡。問高年。建爲成規。授以方國。上有龔黃之守。以承藝極。下有蒲密之令。以勒宣布。出令若流水。傳命如置郵。陛下高拱以取尊名。不勞而定大計。推放四海而準。四維泰山而安。風俗敦龐。猶家至日見。威神振疊。若雷聲淵默。掃除五代之跡。而悉去之。蕭勺他腸。平鑄糝政。化業一定。千百載咀馨實。挹清名者。歌吟不絕。寧與勞心于內。無成功于外者。竝日而語哉。臣故曰。俗失由于官邪。郡守是已。官邪由于任輕。縣令是已。以犬馬畜之。彼將犬馬自爲也。以滅裂耕之。彼將滅裂報我也。君以民爲本。民以吏爲師。民不知教。則國本易搖。吏不奉承。則君命幾辱。且不材之士。自知爲清議所去。甘心處賤。忘懷廉槩。欲使之撫民屋。興化條。不爲國取侮者。無幾矣。

贊曰。震驚百里。王法是擬。建爾縣公。凝我民紀。官者寢輕。治聲沒振。不念牛刀。遂傷獸錦。

絕禁忌篇

臣聞爲川者決之使導。爲民者宣之使言。以言爲諱。最國之患也。昔姚虞能聳其德。以被四表。禹戒之曰。無若丹朱。成王克勤其身。以膺天下。周公戒之曰。無若王紂。此兩人者。非不知二后睿聖之親事也。非蓋君之美而不稱也。非邀忠之名以取高也。以爲神器之重。元首之尊。必推之大衰。乃可與言盛。必懼之將亡。乃可與圖存。故夫臨層崖不測之深。雖勇者知畏。足九京空墟之上。雖昧者知哀。舉危亡絕滅之世。雖上聖或懼。是以舜成王知苦言之可以發憤治體。切而不愧也。禹周公知至訓之可以鞏固後業。發而不疑也。古者大夫規誨。士傳言。庶人謗。商旅議于市。百工獻藝。位亡有典。倚几有諫。警御有箴。史不失書。瞽不失誦。近獻其辱。遠達其聰。神明不遺。而德被天下也。秦暴漢雜。禁忌始興。誹謗坐誅。妖言有法。宣帝中興之賢主。寬饒以五帝之劾。屍橫都市。章帝東遷之長者。梁鴻以五噫之刺。身竄海嶠。是時網目已密。而言路未榛。故劉向引驪山以喻成。蔡邕指七國以諷桓。轉移大謀。多所毗益。當時君上。亦不拘忌爲急。故文帝之詔曰。不敏無明。久臨天下。朕甚自愧。明帝之詔曰。方今上無天子。下無方伯。又反支日許。上章奏。斯亦罪己克躬之明效。故功成當世。名昭萬代。不爲諂子嗤也。且夫諱亂無益于治。而諍臣爲之杜口。文惡有害于善。而佞人得以取容。始皇推一至萬。胡亥惡言盜賊。不能救已危之基。宋明給三百年期。改駟避禍。不能損速顛之運。由是而言。則小數禁忌之不足任。亦已明矣。故善君人者。曠然深鑒其失。忻然樂聞其過。謀及藿食。擇于狂夫。謂天命難諶。則勤勤不寐。以趣太平之路。謂人心惟危。則栗栗如隕。以據大

安之勢。不諱廢興。不隱過失。則天下無遺慮。人臣無伏言。此五帝三王所以克荷鴻名而當爲稱首者。用此道也。

孝治篇

臣聞。火生于木。木盛于火。有子母相養之道焉。火之在氣也。蒸燠溫厚。萬寶以蕃。在精也。宣揚發暢。羣幽爭附。故謂之孝。夫孝者。天地之性。人之所由靈也。聖人因天之明。儀物之則。所以鎮天下國家。凝百度之體者。非孝無以用之。伏惟我朝。炎靈儲暉。赤制改物。得天正統。爲人元首。故感帝所稟。繼世尤盛。自太祖躬武節。對天下。太宗右文誼。興邦教。真宗建天封。垂大章。萬歲之後。皆以至孝冠乎大號。陛下躬萬國之籍。鑑三綱之嚴。上承東朝顏色之養。追嗣文王遙駿之烈。重華之德。斯協三年之言。乃驩再駕至陽位。躬接上帝。仍歲侑清廟。祇薦徽色。所以助宣火德。勤服孝治之道。可謂備矣。然而禮當行者。頗或未舉。政宜革者。尙憚更張。是以善物頽陵。末俗澆弛。故臣願爲陛下一數于前。臣誠至迂。未許所言。必當猶冀不隱下情。極上報之節。臣伏見漢家。取士有孝廉之科。以抗方正茂才之選。下詔有孝悌之目。以偕力田鰥寡之賜。是時。人得祿仕。咸矜節尚。言值模楷。行觸規矱。以化鄉黨者。不可勝計。乃至名臣輩出。節士相望。退修之家。進刑于國。飴變周原之董。黜革泮林之鴟。漢家得人。在茲數路。今四海之富。億姓之醜。士不以廉舉。家不以孝聞。蚩氓無知。流俗忘返。以爲孝愛之道。可得而廢。殆非克稱陛下助宣火德之意也。今胡不

揭爲科第。以勸其來。峻之刑章。以禁其弊。踞砥石。磨天下之鈍。振大本。觀百枝之搖。其誰不懍行樹。惇以企旌車之招矣。古者天子七廟。諸侯五廟。大夫三。士二。官師一。庶人無廟。祭于室而已。羞不踰牲。寢不踰廟。燕不踰祭。所以盡誠信。交神明。怵惕悽愴。志意嘆息。洞洞屬屬。而如將見之。所以教人思其親。示有先也。洎唐家有國。大臣猶得立廟于京師。五代相殘。其禮遂廢。朝家受命。猶循舊章。禮雖上建。型不及物。夫大臣國之四體。民之具瞻。而使亡其等威。下與人同祭室之禮。殆非邦家之寵也。今縱未能惇崇古制。猶當斟酌近禮而用之。自臺省大臣。咸許立廟于私第。祿微者祭近。位高者祭遠。使四方之士。震動其教。深雪其心。舉而措之天下。無難矣。昔之喪親者。葬之中野。不封不樹。後世聖人。稍制其禮。夏氏以聖。商人以椁。周家以窆。姬旦以祔。浴于雷。飯于牖。小斂于戶。大斂于階。祖于庭。葬于墓。諸侯五月。大夫三月。士踰月。有若防者矣。有若斧者矣。自叔葉菲廢。漸用火葬。父母之重。親舉而焚之。衣冠委于煙埃。骨肉熾于薪炭。神靈克懼。何痛如之。昔楚敗吳師。子期將焚之。子西曰。父兄親暴骨焉。焚之不可。彼當紛擾之際。尙憚其酷。今乃禮義之族。習以爲常。豈不爲長太息哉。傳曰。有焚其先人之室。則三日哭。又孝有傷足者。憂律有殘尸者死。況夫示遠之典。全歸之體。并焰而滅。與灰俱冷。非名方于傷足而惡等乎。殘尸者哉。今茲不制其防。臣恐孝誼之風。由茲微矣。臣願朝家明著律令。風諭天下。絕其委巷之禮。以全爲子之恩。亦以厭火德。當神祇之心。張國維。一民俗之變。經曰。明王以孝治天下。此物此志也。

詆虛名篇

臣聞天下之譽有不虞而至。天下之毀有無方而來。古今之常患也。惟聖人爲能察之。昔荀息晉國之柱。楹。獻公之肱。晉目女戎之內敗耳。恭世之前死。文惠以讒獲罪。奚卓以孽代宗。而息不能拂君邪心。除國大蠹。方且激忠亮之對。貫生死之誓。終輔二子。不食其言。是以爲忠也。臣謂之不然。夫知其所事之謂忠。得其所死之謂義。苟荀息爲忠。則惡來死紂。紛如死齊。皆可以爲忠矣。尾生一介之賤。奔三粲之誓。水至不去。抱梁而死。是以爲信也。臣聞五常無體。惟正爲體。所貴乎信者。內與道接。外與誠應也。若尾生爲信。則復關上宮皆可以爲信矣。此所謂不虞之譽也。漢王嘉身備上宰。忠正王室。疾佞幸之磐互。爭大誼而靡切。破壞姦黨。動寤上心。遭主不明。仆死牢械。何武都上公之重。踣廣朝之表。當哀帝卽世。王莽復用。炎崑之焰。雖始稽天之浸。尙微武與公孫祿。創外戚之厲階。懼帝劉之孤弱。圖任端士。柄持大政。謀雖不臧。誼亦無愧。而班固以爲一黃郛江河。用沒其身。是以爲貶也。若嘉武以喪生爲貶。則孔光褚淵。覲面全生。皆可以爲賢矣。齊管仲相。蕞爾之國。膺蕩然之運。然而內寓軍令。遂尊王室。諸侯震動。四夷賓輯。存亡繼絕。首乎五霸。微管仲。吾其被髮左衽矣。所謂爲臣之極摯。建功于當年。而孟軻恥于願爲。曾西慚于見比。揚子雲亦稱仲尼之門。五尺童子。羞比晏嬰夷吾。是以謂之霸也。夫言有累刻。無高而不躋。事有算實。居然而挺效。賢者遭遇異世。亦功名殊軌。必待堯舜之主。此言志士終無時也。若夷吾以立功爲羞。則迂闊

投閣皆可爲王者之佐矣。此謂無方之毀也。昔君子于春秋求名而亡。欲蓋而彰。非斯文之監乎。

景文集卷二十六

奏疏

論以尺定律〔案〕宋史燕肅言鍾律不調在祐元年祁時直史館遷太常博士

臣聞樂生于音。音生于律。律定于尺。尺成于黍。得黍不真。尺固不定。定尺無準。律亦自差。而望聲調。是南舟泝燕。北轅走越。愈亟愈遠也。故尺短則律從而短。尺長則律從而長。短者聲清。益上。長者聲濁。益下。清濁不得其中。而至樂遁矣。古者神瞽攷中聲而量之。以爲之律。所以立均出度也。黃帝命伶倫斷竹長三寸九分。吹之以爲黃鍾之宮。然後制十二律。以上下求而聽鳳鳴。司馬遷黃鍾之律長八寸七分之二。太簇七寸七分之二。林鍾五寸七分之二。應鍾四寸三分之二。班固司馬彪說黃鍾長九寸。聲最濁。太簇長八寸。林鍾長六寸。應鍾長四寸七分四釐強。聲最清。蔡邕鄭康成杜夔荀勗等所論。尺有增損。而黃鍾之宮。要以九寸爲定。始勗當武帝泰始中。校太樂八音不和。知後漢至魏。尺長于古四分有餘。勗乃部署著作郎劉恭。依周禮制尺。所謂古尺也。以古尺更鑄銅律。調叶聲韻。後汲郡盜發六國時魏襄王塚。得古周時玉律及鍾磬。與新律聲韻闈同。于時郡國或得漢時故鍾。吹勗律以合之。其聲皆應。時人稱爲精密。惟散騎侍郎陳留阮咸。譏其聲高。聲高則悲。非與國之音。必古今尺有長短故也。武帝以勗律與周漢器合。

遂施用之。後始平掘地得古銅尺。歲久欲腐。不知所出何代。果長。量尺四分。時人咸服其妙。而莫能措意焉。昂立千載之下。推百代之法。度數既合。聲韻又諧。亦可謂密切而有證也。而時人掘地之一尺。破周漢之二器。亦近夫貴耳賤目也。隋時始用木尺。律而定律。呂鑄壞前代金石。以息物議。惜其制度文議。沒于江都。無聞焉耳。是時尺有十五等。一周尺。二晉田父玉尺。三梁表尺。四漢官尺。五魏尺。六晉後尺。七後魏前尺。八中尺。九後尺。十東後魏尺。十一蔡邕銅侖尺。十二宋氏尺。十三萬寶常水尺。十四雜尺。十五梁朝俗間尺。後周氏達奚震等議。獨以鐵尺爲允。卽十二宋氏尺也。其說曰。今以上黨羊頭山黍。依漢書律歷志度之。若以大者稠累。依數滿尺。實于黃鍾之律。須撼乃容。若以中者累尺。雖復小稀。實于黃鍾。不動而滿。計此二事之殊。良由消息未善。其于鐵尺。終有一會。且上黨之黍。有異他鄉。其色略烏。其形圓重。用之爲量。定不徒然。正以時有水旱之殊。地有肥瘠之異。取黍大小。未必得中。按許慎解字。黍體大本。異于常。疑今之大者。正是其中。累百滿尺。非是會古實侖之外。裁剩餘此。恐圍徑或差。造律未妙。就如撼動取滿。論理亦通。今勘周漢古錢。大小有合。宋氏渾儀。尺度無舛。古者黃金方寸重一斤。今鑄金校驗。鐵尺爲近。未及詳定。會高祖受命而止。唐貞觀中。又詔張文收鑄銅斛秤尺。咸得其數。詔以其副藏于樂署。至武延秀爲太常卿。用爲奇玩。以律與玉尺玉斗舛合獻焉。開元中。將攷宗廟樂。有司奏請出之。敕惟以銅管付太常。亡其九管。國朝金石傳自周代。世宗常詔王朴累黍定尺。以爲律管。管旣不便作。準之尺寸。于今具

在而當時實錄。不論秬黍。未知何用。卽加酬定。且五代離亂。古器蕩然。雖欲制作。靡所緣傍。時無神瞽。孰敢取中。獨非莫知。獨是莫曉。工乎音者。不能言義。工乎書者。不能察聲。信乎音聲之難。不可以言曉者也。故曰。知之者欲教而無從。心達者體之而無師。方今去聖既遠。知音又寡。但取朴準。調叶八音。屬者太常。臣燕肅。以律準尺之三分。欲爲十二律管。而黃鍾九寸。遂不得聲。更廣空道。乃與律應。雖管內均厚未悉。如法。然深疑今尺比古差短。太常鍾石。遂及于清流。至法部轉用高急。臣以爲宜求索上黨秬黍。如達奚震之言。選其精圓。累定寸尺。求管得管。求聲得聲。以所管之聲合周時之準。苟高下符會。清濁無差。卽可遂爲定法。頒布方國。足以示陛下同律度量衡之制。脫有與準未合。卽乞募知音。別用新管。參攷中聲。檢攝羣音。制定雅樂。庶乎正歷代之謬。亦何憚焉。

禮院議祖宗配侑

(案)仁宗本紀。係景祐二年。祁遷太常同知。禮儀院時上歷代名臣奏議。作皇祐二年。誤。

臣等聞王者建廟祐之嚴。合昭穆之綴。祖一而已。始受命也。宗無豫數。待有德也。由宗而下。等冑之疏戚。以爲迭毀之制。使後嗣雖有顯揚。褒大猶不得與祖宗竝列。所以壹統乎尊尊。古之道也。皇帝陛下躬孝治。發德音。永惟三后之盛烈。際天接地而推尊之。禮有所未稱。明發悼懼。圖惟厥衷。使攸司得稽舊章。開羣議。據懿鑠。闡孫謀。將以膺合靈心。垂榮無極。非臣等孤陋所能及已。竊以太祖皇帝。誕受寶命。付畀四海。鋪敦燮伐。潛黜不端。夷澤潞之畔。兼淮海之味。東焚吳輿。右困蜀壘。湘楚閩粵。請吏入朝。當此之時。天

下之人。去大殘。蒙更生。卜年長世。不闡洪業。太宗皇帝。敦受具邇。席蓮下武。龔天之討。底定太原。由是慎九刑之辟。藝四方之貢。信賞類能。重食勸功。官無煩苛。人無恫怨。又引搢紳諸儒。講道興學。炳然右文。與三代同風。眞宗皇帝。乾粹日昭。執競維烈。重威撫和。休寧北方。順斗布度。先天作聖。遂攷夏諺。紹虞巡祕牒。啓宗。育穀冀壤。翁受瑞福。普浸黎元。肖翹跂行。罔有不寧。百度已備。眷授明辟。恭惟一祖。二宗之烈。歷選墳誥。未有高焉者也。昔成湯爲商之祖。太甲。太戊。武丁。實號三宗。后稷爲周之祖。文王。武王。庸建二祧。高帝爲漢之祖。孝文。孝武。特崇兩廟。皆子孫世世奉承不輟。我皇伯祖。經綸草昧。遂有天下。功宜爲帝者之祖。皇祖勤勞制作。皇考裁成治定。德宜爲帝者之宗。三廟竝萬世不遷。宣布天下。以示後世。臣等請如聖詔。至于升侑上帝。哀對先謨。本之周道。克厭典禮。昔太宗親郊。奉宣祖。太祖配焉。眞宗肇祀。奉太祖。太宗配焉。自爾有司。不敢輕議。今二宗同躋不祧之位。則禮無異等。伏請自今以往。太祖爲定配。二宗爲迭配。稱情適事。理實無嫌。其將來皇帝親祠。伏請以三聖偕侑。上顯對越之盛。次申遙追之感。聖人之能事。羣臣之大願。此後迭配。還如前議。昔唐高宗之上封也。以太武皇帝。文皇帝配昊天。明皇之封也。以高祖配天。睿宗配地。開元之著禮也。高祖配方丘。太宗配神州。此二宗迭配之前例。垂拱開元之間。高祖。太宗。高宗。同配昊天。眞宗登介丘。降社首。竝以太祖。太宗。崇配天地。此三聖偕侑之明準。其歲時常祀。則至日。圓丘。仲夏。皇地祇。配以太祖。孟春。祈穀。夏。雩祀。冬。祭神州。配以太宗。孟春。感帝。配以宣祖。季秋。大饗。配以

眞宗伏請皆如禮便。陛下重宗祧之事。鑒照前載。抑畏虔鞏。讓而不專。故令臣等得申愚管。謹用敷罄。惟
聖心裁鑒。

奏乞減編鐘事

(案)以下諸疏當在景祐三年命官校太常鍾律之時

准中書送下監鑄編鐘所李照狀。爲乞減編鐘十六爲十二事。狀後批奉聖旨。送修撰樂書馮某等詳定。聞奏者。右臣竊以作樂制器。取象非一。本乎律呂。播爲音均。用在極和。要歸協雅。而短長清濁。還相損益。諸儒駕說。各自名家。援據經師。資爲辯博。較其實至。孰有定論。昔伶倫命律。初無配類。后夔典樂。惟取克諧。究理益深。後人滋惑。原聖人立樂之意。豈獨執于一方。金石設縣。屢易其數。自鍾縣十二。以至編縣二十四。蓋八音之器。因物制宜。歷代相沿。遂多創述。若絃聲一倍。以至于五十。律聲一倍。以至于三倍。或減半以爲得。或備數而無害。變均度典。應和爲經。工師常員。雅鄭無辯。不足以備問對。擊考之度。第循其故。獨何曉于是非。周朝樞密使王朴。嘗造準以攷聲律。太常竇儼和峴。亦經參校。論者以爲尺度太短。雅聲過高。自此少能知音。莫傳其業。今止以照素識音律。使校定大樂。照又調合鍾齊。務要和聲。察其用心。良亦精密。且又請改編鍾十二。以爲與律數而足。但學者多所未嫻習。周官或乃失傳。下議以詢。博求至當。況禮樂之大典。方太平而後備。若竝采衆說。則有會禮聚訟之煩。若遽更古法。則有事不師古之戒。臣攷視圖載。皆有趣義。願聖上覽其意而定焉。

論太樂置雷鼓靈鼓路鼓備而不擊及無三鼗

臣按周大司樂之職雷鼓雷鼗奏于圓丘以祀天也靈鼓靈鼗奏于方丘以祀地也路鼓路鼗奏于宗廟以格祖也歷代用焉著爲樂令然則小鼓爲大鼓先引得作樂之漸故兩施無嫌也國朝崇薦郊廟但各設鼓于樂縣之內備而不擊夫有鼓無鼗于禮已闕設而不用在闕尤甚蓋上襲五代抗敵失傳有司持循罔暇論討臣以爲可詔本署稽舊典訪遺法作爲三鼗以備大樂祭祀之際其鼓若鼗皆使縣工播而擊之用諧音節如此則器備禮完神祇來格矣舊說鼗者如鼓而小以木貫中作柄雷鼗柄各四枚爲八面靈鼗柄各三枚爲六面路鼗柄各二枚爲四面旁以結皮爲耳搖之還自擊也以通雷鼓靈鼓路鼓掌鼓之工每面一人左手播鼗右手擊鼓云

論太樂署有春牘之名而無春牘之器

臣觀景德中李宗諤所進樂纂革部中著春牘其說曰周禮笙師掌教春牘應雅以作祓樂賓醉而出奏祓夏以三器築地爲之節三器謂牘及雅相也明不失禮也大五寸長七尺短者或三尺其端有空漆畫之以兩手築地今立于宮縣舞樂中用臣比徧問樂工言初無此器及責其樂器之籍則明著春牘而說與樂纂相符又景德樂工于今多在詰其所以乃云恐宗諤論著之時止憑本署簿文誤著于樂纂耳臣謹采三禮圖所畫春牘之狀大略可曉然檢覈著令及舊史其文武二舞諸工所用但有鼗鐸錞鏡相雅干戚籥翟

等器不著春牘。則知後人設采古名以爲空說矣。

論竽及巢笙和笙

臣奉詔與太常臣燕肅等圖畫太常樂器以備程覽。至匏部有竽及巢笙和笙共三種。按舊說竽長四尺二寸。三十六簧。宮管在中。形參差像鳳翼。巢笙十九簧。和笙十三簧。今據太樂諸工以竽巢和三種併爲一器。皆取胡部七十管笙爲之。但以宮管移徙左右用爲小異。其巢和二笙在景德中。李宗諤又奏定二義管。悉貫匏中。今爲十九管。臣曾索于樂署得鳳笙一種。樂工言此古器。今不可用。推驗形製乃古竽也。其長四尺有餘。三十六管。列管參差及曲頸皆爲鳳飾。其空悉在管外。歲久不治。有管無簧。今但祕而存之。爲無用之器。臣以爲可募知音者。修復古竽。以合正聲。革易當今署工所用淺俗恣濫之器。勿令亂雅。并按竽以合正聲。悉還舊製。傳曰放鄭聲。謂此物也。

論引武舞所執九器各有所用

臣按武舞六十四人。左執干。右執戚。雖爲八列。又別使工人執旌居前。次執鼗。次執鐸。次執鐃。次執相。在左。執雅在右。各分行夾引。至樂作舞入。則自鼗而下。咸振作之。舞工定位而止。及舞將退。又振作之。舞工畢出而止。臣竊詳鼗鐸之設。義不虛生。蓋舊史禮經。但舉其凡。不言其細。故輩出旅進。無有先後。且鼗者。所謂導舞也。鐸者。所謂通鼓也。鐃者。所謂和鼓也。鏡者。所謂止鼓也。相者。所謂輔樂也。雅者。所謂

陔步也。夫鎔于鏡、鐸在周鼓人四金之奏。以和軍旅也。武舞象功。故得以軍器參焉。是舞之容節。導于鼗。通于鐸。和于鎔。止于鏡。輔于相。陔于雅。義可見矣。寧有導舞方始。止鼓參焉。止鼓既搖。通鐸亂焉。進退不倫。終始無別。臣雖不習故事。竊以私意度之。謂當舞入之時。鼗鐸以先之。鎔以和之。相以輔之。雅以節之。及舞之將成也。則鳴鏡以進行列。築雅以陔步武。各分左右。與舞俱出。其鼗、鐸、鎔、相皆止而不作。故司馬職曰。鳴鏡且卻。斯之謂矣。如此。則允協樂意。庶復舊職。

郭正不應爲嫁母持服狀

臣竊惟禮者。叙上下制親疎。別嫌明微。以爲之節也。故三年之喪。雖天下達禮。至于情文相稱。必降殺從宜。故尊有所申。則親有所屈。不敢以所承之重。而輕用于其私者也。伏見前祠部員外郎集賢校理郭正。生始數歲。卽鍾父喪。而母邊氏。更適士人王渙。正焚焚孤苦。以訖成立。見無伯叔。又鮮兄弟。奉承郭氏之祭者。惟正一身而已。母邊氏適王氏。更生四子。今邊不幸而訃聞。正乃解官行服。以臣愚管見。深用爲疑。伏見五服制度。敕齊衰杖期降服之條曰。父卒。母嫁。及出妻之子爲母。其左方注曰。謂不爲父後者。若爲父後者。則爲嫁母無服。今詳邊氏嫁則從夫。已安于王室。死將同穴。永非于郭偶。而正既爲父後。則宜歸重本宗。雖欲懷有慈之愛。推無絕之義。亦不得爲已嫁之母。抗父而盡其禮。何者。輕奉父統。則郭之承重。更無他親。備執母喪。則王之主祀。自有諸子。臣詳求制旨。疑正不當解官行服。夫禮有所殺。君子俯就也。

義有所斷。聖人不專也。況當孝治。宜謹彝經。伏乞降臣此狀。下有司博令詳議。其郭正爲父後爲嫁母。應與不應解官行三年之喪。然後明垂定制。俾守其規。臣備禮官。不敢寢嘿。謹具狀奏聞。

上三冗三費疏

〔案〕歷代名臣奏議係寶元元年祁權三司度支判官時上

臣伏見西賊叛逆。未卽梟截。申命將校。警飭邊陲。陛下日昃憂勤。特軫調發。內經聖慮。旁咨羣謀。臣誠不肖。竊用感憤。以爲勇夫扞外。儒者計內。合爲威略。以行天誅。則跳梁小醜。指期烹醢。故敢妄陳愚見。以佐萬一。臣聞兵以食爲本。食以貨爲資。在易聚人。在書八政。誠聖人一天下之歸之具也。以天下取之。以下用之。量入爲出。故天子不得私焉。傳曰。足食足兵。民信之矣。今左藏無積年之鏹。太倉乏三歲之儲。南方治銅。匱而不發。承平如此。已自彫困。其故何哉。良由取之旣殫。而用之無度也。臣不能悉知朝廷之經費。且以臣素所見者言之。何者。大有三冗。小有三費。以困天下之財。財窮用褊。乃今更欲興數十萬衆。以事夷狄。無謀甚矣。陛下誠能超然遠覽。燭見根本。去三冗。節三費。專備西北之屯。尙可曠焉高枕。無匱乏之患。何謂三冗。天下有定官無限員。一冗也。天下廂軍不任戰而耗衣食。二冗也。僧尼道士日益多。而無定數。三冗也。三冗不去。不可爲國。今宜降詔。斷自今日。僧尼道士已受戒具者。且使如舊。其在寺帳爲徒弟子者。悉逮爲民。勿復歲度。今日以後。州縣寺觀。畱若干所。僧尼道士定若干人。且令後來之數不得過此。此策一舉。可得耕織夫婦五十萬人。則一冗去矣。今天下廂軍。不擇孱小。尪弱。悉皆收配。纔圖供役。本

不知兵。亦且月費廩糧。歲費庫縑。數口之家。不能自庇。于是相挺逃匿。化爲盜賊者。不可勝算。朝廷每有夫役。更籍農民。以任其勞。假如廂軍。可令驅以就役。方且別給口券。問望賜錢。二端相率。不便明甚。陛下若敕天下廂軍。今日以後。除州軍須要防捉。別畱三百人。自餘更不收補。已在籍者。許備役終身。如此。則中下之家。悉入農業。又得力耕者數十萬。則二冗去矣。國家郡縣。素有定官。譬以十人爲額。常以十二加之。遷代罪謫。足以無乏。今則不然。一位未缺。十人競逐。紆朱滿路。襲紫成林。州縣之地。不廣于前。而陛下官五倍于舊。吏何得不苟進。官何得不濫除。陛下誠能詔三班。審官院。內諸司。流內銓。明立限員。以爲定法。自今以往。門廕。流外。貢舉之色。實置選限。稍務擇人。俟有闕官。計員補吏。內則省息俸廩。外則靜一浮華。則三冗去矣。何謂三費。一曰。道場齋醮。無日不有。若七日。若一月。若四十九日。各挾主名。未始暫停。至于蠟蔬膏麪。酒稻錢帛。百司供億。不可貲計。而主者旁緣。利于欺攘。奉行崇尚。峻于典法。皆以祝帝壽。奉先烈。祈民福爲名。欲令臣下不得開說。臣愚以爲陛下上事天地宗廟。次事社稷百神。醴醑粢盛。犧牲玉幣。使有司端委而奉之。歲時而薦之。足以竦明德于天下。介多福于黔庶。何必道場齋醮。希屑屑之報哉。是國家抱虛以考祥。小人誣神而獲利耳。陛下若斷自聖慮。取必不可罷者。使略依本教。以奉薰修。開啓有時。賜與有度。則一費節矣。二曰。京師寺觀。或多設徒卒。或增置官司。衣糧所給。三倍他處。帷幄謂之供養。田產謂之常住。不徭不役。坐蠹齊民。而又競飾神祠。爭修塔廟。皆曰不費官帑。自募民財。此誠不逞罔

上之尤者。夫民藏于國。國藏于民。財不天來。而由地出也。役不使鬼。而待人作也。舍國取民。其傷一焉。伏望陛下。切敕州縣。普令罷止。則二費節矣。三曰。使相節度。不隸藩要。貪取公用。全濟私家。跡夫節相之建。或當邊鎮。或臨師旅也。公用之設。或以勞衆而饗賓也。今則不然。罷黜大臣。率叨使相。安居都邑。普蒙公用。取生人之資力。爲無功之奉養。坐糜邦用。莫此爲甚。伏望陛下。寶惜名器。使授受惟才。自今地非邊要。州無師屯者。不得建節度。已帶節度。不得留近藩及京師。則三費節矣。三宄已去。三費已節。數年之內。用度必饒。臣又聞之。人不率。則不從。身不先。則不信。陛下若能躬服至儉。風示四方。錦綵金玉。不得妄費。請自後宮爲始。衣服醪膳。無益舊規。請自乘輿爲始。然後天下嚮應。民業日豐。人心不搖。師役可舉。雖使風行電照。飲馬西河。蠢爾戎酋。可玩之股掌中矣。寧與今日誅求財用。課鹽摧茗。爲戚戚之計者。同年而語哉。臣誠狂妄。不曉禁忌。輕進愚策。惟陛下裁赦其辜。

景文集卷二十七

奏疏

請下罪己詔并求直言疏〔案〕歷代名臣奏議係寶元二年祁守刑部員外郎時上

臣聞王者父事天明母事地察政合而祥至道失而咎臻自然之應也然至亂之世不能絕祥甚治之代不能無咎僻君以祥自泰放益侈而趨亡賢主以咎修德故愈畏而蒙祉則祥無必慶咎無固凶視銷伏之如何耳臣伏見頃歲以來災眚數見依類託寓異占同符天本示法而尊乃有躑躅流薄之變地當安固而靜乃有都國震動之占陛下奉承郊丘歲豐月潔當蒙介福翻至大異何哉得非事有召釵法有階隙天子宋室諄諄存顧先幾豫慮以啓聖心欲陛下據易圖難緣微警著奮揚剛德固執主威厭銷未萌以光不業也臣伏讀前史五行志以驗于今累威重譴不可不察若乃羣星流散則民人蕩析之象也月行黃道地震州邑則邊戎窺間臣下擅恣后妃將盛年穀且饑之兆也去年火焚興國寺浮屠延燔藝祖神殿已而盜壞宗廟鉅器者再則神不昭格之意也自昔災異之發遠者十數年近者三四年隨方輒應類無虛已陛下何不暫平清慮推求其端方今典刑設張上下禔穆而臣便論危事必難取信然陛下試一念至假有蕩析以何策固安假有饑空以何理振救脫致窺間可任之將謂誰倘令擅恣可防之釵有

幾災異不驗。國之福也。苟使遂驗。則陛下禦之之慮。得不素具于殼中哉。然請先言其要。臣聞君以操柄爲重。臣以奉命爲恭。柄捨之。則重者反輕。命竊之。則恭者更僭。伏惟陛下。念爵賞之典。刑罰之權。雖覽羣言。一決宸慮。無委成假借。以開貴近牽制之私。書稱惟辟作福。惟辟作威。夫威福者。天子之所以固大寶制兆人之術。臣有作福作威。則害于而家。凶于而國。古之王者。亦何能使刑悉當罪。賞皆稱功。要之事出于主。則納忠者有歸。政出于臣。則植私者必衆。傳曰。倒持太阿。言柄之不可失也。又曰。吐珠必含。言失之不可收也。若夫後宮戚里。祈恩丐賞者。日月不乏。陛下且當斷而不聽。以示至公。內省黃門。給事左右。亦宜數加訓勅。使思不出位。此皆助陽抑陰之術也。臣聞伯禹三王之長。逢辜引慝。宣王成周之良。思患側身。故能感徹神祇。收還威怒。回沴氣爲太和。化已衰爲中興。陛下覽照今古。至詳至熟。今變告日著。中外暴聞。而罪己之問。不形于詔書。思患之謀。不畱于詢逮。委遠天戒。虛而未答。踰時越月。羣下默然。間者但引緇黃。晨齋夕唄。修不經之細祀。塞可懼之大變。人且未信。天胡可欺。臣誠至愚。竊恐銷伏之間。未爲得計也。伏望陛下。不以災之未應。遂爲宴安。不以歲之屢豐。便忘荒饑。普詔百執。各貢所懷。庶幾天下條貫。粲然先見。粗舉六事。以裨萬一。聯寫于左。如有可采。續當條陳科別。惟陛下裁赦其罪。姑垂省閱。臣無任。冀狂待罪之至。

議樂疏〔案〕此疏當係寶元二年。祁判鹽鐵院。回修禮書時。上歷代名臣奏議。作慶歷元年。誤。

臣伏視右司諫直集賢院韓琦奏劄子節文。臣曾將景祐廣樂記看詳。備見實紀。李照所造違古之樂。上薦天地宗廟。臣竊聞和峴減定鍾律等見今存在。欲乞特降聖旨指揮。下太常寺復用舊樂者。奉敕已差資政殿大學士宋綬等與兩制同共詳定聞奏。伏緣臣自景祐元年中。曾蒙差付太常寺。與燕肅等同共磨治鍾磬。後來親見李照重定律度。及相次提舉胡瑗別造鍾磬。臣于太常樂器粗知本末。苟有所見。不容隱默。謹用畫一如後。

一李照所造鍾磬。當時只是將太府寺布帛尺一面定法改造。比舊樂頓下四律。伏緣李照資性詭僻。辯論專固。莫非出自私意。不循古法。其尺約長王朴尺二寸。其斗法以六百二十黍爲一龠。六龠爲一合。古合龠爲合。今頓差四合。十合爲一升。十升爲一斗。謂之律斗。其秤以一升水之重爲一斤。比今太府見用官秤。一斤零十一兩。十斤爲一秤。今太府以十謂之律秤。又減鍾磬十六枚爲十二枚。自古經史中無十二枚爲一架。其鍾之形狀。並不依典故。聲韻遙長。掩遏羣樂。又李照自造大筦大笙。亦充大樂行用。皆愆濫新聲。不依古制。及有新降到雙鳳管。樂工吹之。竝不成聲。李照雖自稱曉達音律。其實與伶官賤工識見無異。遂敢敗壞祖宗以來舊樂。使朝廷以不法之器薦見天地祖宗。四海傳聞。莫不竊議。只如照所定黃鍾之管。乃是南呂倍聲。舊黃鍾九寸正聲。卻降在大蕪夾鍾之間。其大蕪商聲。君聲君位也。今君聲降在臣位。羽聲來處尊宮。三年有餘。于理尤害。天災人事。不合常理。皆不祥之大也。如此數事。人無愚智。所共明知。陛下況深達律呂。可以斷自聖慮。使

從改正。應于李照曾奏請添損。竝違今背古者。乞如韓琦所奏。一切皆令停罷。盡復祖宗舊制。一太常寺舊樂。本自唐昭宗時。雅樂亡散。器無子遺。尋有博士商盈孫。參約典故。更造鍾磬。其後五代相傳。習而不改。至周時。王朴重定尺度。略加添正。太祖朝。又詔和峴。以景表尺。重加磨治。稍令聲下。昨緣景祐二年。燕肅始乞修正樂器。其時只得王朴律準。又無王朴所定律尺律管。參驗音韻。而燕肅只據律準。與鍾磬見聲。按定高下。卽是此太常舊樂。比王朴時。已自不同。況和峴減定後。又經眞宗朝。景德中。李宗諤一次修飾。至燕肅。凡經三度磨鑿。然俱不先立尺度律管。所以後來無處根正法度音律。然其舊器。傳自唐末。祖宗三聖。無人輕議。用之薦享八十餘年。雖非的然如舜韶周武。法度明備。要之沿襲本末。實與典禮最近。非同李照率意詭妄。製作不經。今若陛下。且以攷舊典。差近法度。卽乞先取景表尺。裁鑄律管。以按王朴律。然後和峴當時所定聲律高下。確然可見。況舊鍾尙有七百餘枚。係本寺收管。略加磨鑿。令與聲律相協。所有舊磬。爲照定樂時。盡底界截破壞。無見存者。若且將李照所定石磬。自太簇以下。刻磨長短。亦與舊樂黃鍾以下。髣髴相近。及將本寺磬。朴二百餘片。相兼添補。亦可諧合音律。與鍾粗得三縣。卽可于將來南郊大禮前。一時了畢。不過數月。便可見功。其餘絲竹諸器。只是移正聲調。便成雅樂。況禮樂之本。出自天子。今陛下。縱容聖。通知音律。復古順道。何所致疑。伏乞卽下有司。速令修復。以旌善述之美。

一景祐三年詔令臣監領胡瑗鑄造鍾磬一架臣伏見胡瑗曉算法能將先儒所說黃鍾管內八百一十分爲方分算法竝與鄭康成周禮注及班固律歷志古法相合自隋唐以來諸儒辨論黃鍾一龠之法皆不及瑗相次于雜物庫請銅鑄之時忽于雜銅內得古鍾三枚卽不知甚年及是何州府納到臣與故翰林侍讀學士馮元卽時驗認其鍾古質精妙項罇皆有廉隅上有三十六乳餘外瑒雲氣爲飾有兩欒之制如鈴不圓正與周禮所說形制相符一鍾破損二鍾尙可叩擊遂子細洗滌于鍾上有篆文兩行其篆亦字體古簡推本其文不是近代所造乃是漢魏間所用者其文曰越作朕皇祖文考寶和鍾越思萬年子子孫孫永寶用享凡二十二字臣與馮元商量此旣古器又合經典除三十六乳與鄭康成說小異康成以爲鍾每面三十六乳卽一鍾遂畫圖樣進呈後一面勒令胡瑗悉依古鍾形狀製造新鍾成一十六枚其胡瑗所定律尺律管比王朴鍾只下半律鍾磬甚得諧韻其時不曾許當面進呈遂只送太常寺收係卽目見在後來又蒙別差官詳定李照胡瑗等律尺管其時議者皆云胡瑗實龠之黍或有大小不同以爲未盡合古遂抑而不行至于八百一十分之法則盡以爲然無有非者臣以爲胡瑗之尺黍雖有長短大小之差未盡合古然比舊樂又近法度如更使諸儒略加論討庶可施行而合雅正矣臣又竊嘗謂陛下用心詳定雅樂之日獲此古鍾乃是瑞應因此若便定律石律管使諸儒極意論難從其長者定爲尺法然後作鍾石以聲之有何不可而前來議者固執李照不法之器以爲此樂已經郊祀天地不可輕改更候有知音者然後改

之且祖宗舊樂相傳八十餘年經真宗東封西祀一旦爲李照狂妄率然敗壞卻無輕改之憚今欲依據經典裁正律度反以爲更候知音假如今世遂無知音則是李照下經之器便傳後代取笑千載此亦陛下昭然可判議者之大謬也臣以爲陛下既自明律度不須更以知音爲言夫知音自古難得非獨今也若世無夔牙則且當以法度自據雖有清濁高下其失不遠故臣願陛下只將胡瑗八百一十分之法詔取上黨柷黍擇其中者差一二精力宮官及左右一二信臣于宮中重加校定陛下因以餘暇親臨制決黍定求寸寸定求尺尺定則律度量衡四物皆正矣然後依古法將新尺試以推步晷景若合此一不謬也試以新管理地候氣氣候若應此二不謬也然後可以遂頒天下明告以律度量衡之法因之修定雅樂詔當今稍知音律經術者同加討論事無不齊然此一事雖非朝夕急政陛下能以萬幾之暇慮而定之亦千載不刊之美也其有先獲古鍾恐禁中忘記當時進呈圖樣今再畫到一本隨狀進呈右謹具如前臣以儒史爲業合爲文辭敷啓又緣臣久在病假既不獲乞上殿面奏今來事涉辯論不敢修飾文語貴要暢盡事理是敢直說本末謹具狀奏聞伏候敕旨

論乞別撰郊廟歌曲明述祖宗積累之業

歌詩之興尚矣自陶虞而上書逸其傳商頌概有存者而周詩大備竊聞班固之論也以爲商周雅頌上本有妣姜姬降乙履敏而高稷始生元王公劉古公太伯王季姜女大妣作合之德乃洎成湯文武受命

武丁成康宣王中興。下及輔佐伊尹周召太公申伯召虎山甫之屬。靡不褒揚。旣信美矣。聲始歌詠。而施及金石。洋洋颯颯。遂盈塞乎天地之間。使後世子孫。有以祖述稱頌。而摠之無極也。孤秦亂剗。禮亡樂缺。逮漢六世。始立樂府。采詩弦誦。多舉司馬相如之屬。造爲詩賦。略論律呂。以合八音之調。然其郊廟歌詩。未有祖宗之事。又不制雅樂。有以相變。盛德之音。寢以失章。史官追憤。深詆其非。南北霸雜。音謠哀怨。儻篇促節。以雕蔚相矜。唐家累盛。頗憲前烈。詔禮于野。綴樂于旒。然至郊廟詠歌。亦止一時之事。麗不逮鄭。正不入雅。累句庸音。商周之風衰焉。安巢挺亂。正聲兼失。或入河海。或淪坑谷。宋興承五運末流。繼千載紹業。受命之始。日不暇給。故未遑協律之事。而樂正禮官。又非夙儒故老。制作之懿。久無聞焉。雖薦侑大禮。別製辭曲。然皆襲沿舊體。未始改爲。遂使祖宗耿光盛烈。幽伏槁簡。天命靡昭。以爲神羞。而武穆文孫。春秋助祭。但習容典。不知王業之艱難。誠可畏也。臣朴野芻微。不達故實。竊惟太祖武皇帝。推閭位。膺正統。撥亂侮亡。以黜不端。東纓吳越。右攘蜀壘。大去荆讎。變伐蕃酋。士無離傷。邦用底定。罷諸道節度。以絕僭萌。收天下精兵。以強京服。太宗文皇帝。鋪敦武旅。遂定并汾。分遣良吏。綏靖萬國。斂才懋官。內經百度。平租躬耜。以勸四人。貶成讓德。卒罷封禪。肆我真宗。紹休聖功。于是匈奴穿塞。侮略邊郡。一戎啓行。射殪名酋。六羸遁去。厥角請罪。然而不念細故。許其歡盟。休寧北方。于今是賴。而又進妙道。迪靈篇。柴奉高。濟汾河。景光瑞福。歲蕤翕習。臣所不能盡道。商之發祥。周之監觀。方茲蔑矣。然而清廟詠歌。但紀寅恭。淳濯

之細。不推積德累功之本。千品萬官。靡所寄言。故臣願陛下。萬幾之餘。取三聖實錄。撫其武功。文德在民。耳目尤祥。極瑞非人力所至者。鋪棗發揚。作爲歌詩。別詔近侍。略依生民。公劉。猗那。長發之比。裁屬頌聲。使被金石。尙體要而去浮麗。根中和而矯淺誣。使言質而易曉。理懿而行遠。俾天下昭然。知祖宗造邦濟世之勤。子孫無滿假怠遑之志。臣下有祖述奉揚之美。超唐軼漢。遂躋三代。寧不盛耶。

論精選太常樂工及募能知音者備太常官屬

昔虞舜命后夔典樂。教胄子。其言曰。詩言志。歌永言。聲依永。律和聲。夔亦曰。於予擊石拊石。百獸率舞。自周以上。胄子出于公卿。聲工皆有明德。其爲樂可以道古。其爲舞可以動容。故能來格祖考而同合天地。道衰官失。政移諸侯。制度陵僭。音曲曼靡。然且晉有師曠。魯有師乙。判南北之風。執商齊之宜。援古驗今。若合符節。其後士人。則漢有京房。魏有杜夔。晉有荀勗。隋有鄭鐸。唐有張文收。祖孝孫。雖未能攷正中聲。以盡善美。其推本律呂。有足稱道。自梁訖周。尋亂不厭。猶使王朴。竇儼。緒求墜韻。哀合遺器。累黍定尺。造準寫聲。求七均。叩五音。以成八十四調。儼又著大周正樂一百二十篇。雖廣而不要。雜而無類。苗莠相敗。雅鄭同儕。然禮失求野。或有可采。而宋興。達者尙未聞焉。臣謂古之所以爲工者。皆精敏之人。後之所以爲工者。皆輿斯之賤。古之所以總司者。材堪責任。後之所以總司者。官達則遷。樂不逮古。責于何有。比來諸工尤爲淆混。或坐區賈子。或力穡農人。苟避乎丁。咸求著籍。未識所習。況責所聞。族居州處。兀如牆面。

雖誨以六樂。教以二南。亦不能諧神祇。和邦國矣。朝家不慕謨烈。咸事俊良。必不借才。無容慚德。顧求之任之。未至耳。且一日失官。尚及于死。三年廢樂。曾何不壞。故有其人。則樂存。無其人。則樂息。昔周官盡在。武坐。且或失傳。漢準具存。律家莫能取定。又況年禩綿曠。器用淪亡。賢者恥而不精。鄙夫濫以安處。而望樂正雅頌。奚由致哉。臣願陛下。明下詔書。且募天下知音之人。秩以微祿。使備太常官屬。賒其歲限。寢使討論。擇其所長。以備闕典。又按舊令。太常諸工。取年十八以下。資性可教者。使滿定員。明立章程。以判勸惰。如此。則不過十稔。官修事備。以須陛下。功成作樂矣。

乞禁便俗字

伏見朝廷。每有冊書詔令。布下四方。而便俗作字。不據經古。及題署宮殿。率多訛略。萬民所察。百官所瞻。誠非其宜。類不可悉舉。臣且一二言之。今之勅字。乃古勞來之勅。音發自唐以來。習而不悟。今若改以爲敕。義亦無難。議者便謂行之已久。變必驚俗。此非通論也。昔隋唐詔敕。以髻爲替移之字。後因顏師古摘發其謬。始議改焉。則當時以髻爲替。猶今以勅爲敕。夫髻替雖謬。尚是一音。勅敕相訛。遂乖兩讀。自宜稽古。改從本體。宮殿之署。標榜高嚴。遠人朝覲。注目觀仰。學在四夷。亦不可誣。漢丞相蕭何。自題蒼龍白虎二闕。後世署書。乃由何始。當時立法。寧苟簡耶。且如今紫宸垂拱。常所御殿。而殿字從屍。從父。今之左偏。遂尸下作共。垂字從士。今乃作山。紫應從此。今書作此。此俗宸應從辰。今書作辰。辰俗閣門以西爲而。外龍

門以有代旨。如此之類。不得不改。及詔制之語。以本音爲本。以母音爲母。以檢音爲檢。以開音爲關。斯則字訛音變。尤難行遠。臣聞太宗皇帝常詔右散騎常侍徐鉉。攷正說文。鉉之言曰。若乃高文大冊。則以篆籀著諸金石。至于常行簡牘。則草隸足矣。當時謂鉉爲知言。臣愚以爲詔文冊詞。府號官稱。宮室題榜。皆當垂示史冊。非尋常簡牘之類。願下大臣討論文字。更俗隸之失。求篆籀之真。昭示有司。斷從正體。

論國忌

伏見列聖忌日。沿唐之舊。百官伏閣。慰訖。咸詣寺觀。跪伏齋贊。謂之行香。仍置神位。進奠蔬饌。臣竊思之。禮尤不經。方外之言。本以懺罪求福。誘訓迷妄。臣夔委巷。不達死生之變。故于喪葬亦或用之。至于朝獻帝範。非若匹夫下俚。可行之也。臣愚不敢遠敷國家積累之慶。且自太祖而下。豐功鉅德。家至戶曉。生爲睿明。歿爲上神。何福之求。何罪之懺。求干非福。則是諂祭。懺于無罪。則是誣親。沿事索理。謬悠可判。且其諡在金冊。主在清廟。每春秋享祀。前誓有司。齋戒奉之。灌濯潔之。禮以相儀。樂以節步。尙畏不蠲。以爲非馨。今乃緇毳羽衣。輕接光烈。熟具粗餼。以希迪嘗。使在天有知。其不能下而臨享也明矣。願罷忌日百官行香。及撤去所設神位。必若國家難于驟改。則每及忌日。止令道釋二家。自率其徒。齋祓謂唄。列爲疏奏。問遣一使。馳詣陵寢。焚之。以伸蒼黔謝生之報。庶幾近于禮歟。

乞置太廟神御庫待制日奏

宗正寺奏爲趙希言劄子。奏太廟內神御物。有螭頭冊蓋牀燭臺等不用之物甚多。約金萬餘兩。銀八千兩。乞差官別爲處置。所貴盜竊不生。奉聖旨。令宗正寺相度。擘畫開奏。寺司檢會。太祖室內。有黑漆蓋二隻。元有折拽。下裝釘痕。見在。欲乞將不用者。蓋冊牀四十餘件。及螭頭等。依太祖室內素蓋。拆拽金銀。所有竿杖。竝乞依莊穆皇后室內神帳法物。焚埋。狀後中書批。送禮院詳定。臣謹按。神御之物。在祖宗之時。其數尙少。故就致夾室。不須他處。及時歷三聖。崇奉益恭。而寶蓋卸牀。充滿二室。今趙希言及宗正寺。乃欲除合用器物外。盡乞毀折焚埋。以防盜竊。質之禮意。殊未得宜。且天子宗廟之重。以金銀崇飾神御。尙畏招致盜竊。不知官司何用。條禁何施。況非時毀損。驚動羣議。又未必合祖宗神靈之意。竊尋周禮。天府掌祖廟之收藏。寶物世傳者皆在焉。伏詳今廟地狹隘。不可別爲庫室。欲望以宗正寺西偏。南直太廟。卽宮闈合廡屋。其地雖小。可建大屋十數間。將神御不用之物。悉移置于中。號爲太廟神御庫。令宗正寺一就管掌。責無毀瘳。兼合舊章。其灼然有敗爛什物。卽乞焚埋。使無褻瀆。取進止。

景文集卷二十八

奏疏

乞開治淠河

〔案〕歷代名臣奏議係慶歷二年祁知陳州時上

臣知壽州日。伏見本州安豐縣有芍陂。自古所傳。元引龍穴山水及淠河水入陂。每歲灌田萬頃。近年多被泥沙淤淀。陂池地漸高。蓄水轉少。龍穴山一派水源既小。今來只藉淠河注水入陂。後來淠河一道水渠。本縣又不修開。遂至水道堙塞。陂水淺涸。臣自到任後。併值二年乾旱。去年自六月放竭陂水。只是救灌得側近一二千頃。是以壽州米價踴貴。官私妨闕。臣竊聞得壽州正是出米之地。全藉此一陂。舊來陂水若滿。常無乾旱。是以縣名安豐。蓋取此義。臣欲乞朝旨。直下本州。委知州通判親往陂上相度。開治淠河。令水渠深快。于淠河內築隄。闌水入渠。注滿陂內。高築陂岸。及重開掘陂內淤淀之處。令稍深闊。其工亦不甚多。只乞就來春農隙之時。少借隣縣并本縣人夫三五百人。約工一月。可見次第。如陂水滿足。則溉田萬頃。永無凶荒。兼得陳穎至京都一路官私米斛有可供應。取進止。

言三路邊防七事

〔案〕歷代名臣奏議係慶歷三年祁知禮部郎中知制誥時上

臣聞病者療之未危。火者防之未燃。若已危已燃。雖有嘉醫力士。猶不能振殞爛之苦。是以思患預防。所

趨一焉。臣伏見河北河東陝西比年騷困。契丹規掠塞下。求索賂遺。陛下以天下爲心。屈己忍忿。與之通好。心紆倉卒之急。是以河朔生靈。晏然暫寧。此陛下權時之宜也。夏賊逆命。襲金明。殘麟府。破任福。敗壤多殺。吏卒數十萬。轉食屯兵。于今五年。士氣喪沮。每聞金鼓之音。皆股戰膽銷。有百走逃生之心。無一前鬪死之志。部署鈐轄。位均勢侔。不相統一。賞濫而不實。罰弛而不行。上下相蒙。微一切之幸。臣計二陲之憂。比病與火。可謂將危而且燃也。中外有識。無不寒心。臣愚以爲不速輿而救之。事一差跌。悔無及已。伏見中書門下樞密院。日入奏事。遵奉常體。但以官吏差遣。使臣遷轉。比例高下。計較錙銖。下至百司冗屑。申請無不關白。聖聰及宣敕行下。一署曰聖旨。至于邊境措置。安危大計。反不暇及之。臣愚無知。竊以爲過。夫不當行而行。是爲徒行。當憂而不憂。是爲必憂。今耶律君臣。包禍就毒。故馬放陰山之下。待隙而動。彼其旋玩河朔。如股掌之上。責貨不已。又將責地。禍根釁萌。章章如此。朝廷忽而不防。未知何謂耶。方今河北河東。不澄濫官。不闕冗兵。帥之才不才。未嘗擇。械之可用。未嘗選。自敵使繼至。便謂信誓可憑。謀臣高枕。了無爲備。可謂發篋啓筭。以待寇攘。今陛下盛德清明。大臣方正。協力獻可。弼違。朝無間言。不于此時。側席嘗膽。思所以禦之之術。急除弊政。圖刷大恥。乃欲優游自暇。日安一日。待病之危。待火之燃。救不晚乎。夫碎目雜務。非宰司職事。假令此等一皆不問。委之有司。尙無繫于治亂。若二敵挺變。更相影嚙。一出于北。一擾于西。國疲于轉輸。一夫餓斃。輿爲盜賊。憑高呼叫。環數百里。則天下安危。決于一日。

之間。推是而言。臣所謂不當行而行。當憂而不憂。果可信也。劉平石元孫輕脫寡謀。徑與敵鬪。師敗身死。損辱國威。今之爲帥。不鑒前失。尙守舊體。終無改更。其出師也。無鼓旗。則號令不行矣。其戰也。無行陣。則敗走不救矣。其止無營。暫自守。其行無輜重。自隨。烽候不明。間諜不設。不量人事。不察地計。爛于其脇矣。臣又願陛下詔中書樞密院。自今以往。取有司申請。不干大事者。許依唐時堂帖之比。直令堂判院付之。有司雜務。已有定例。便行不奏。其可以蠲除歸有司者。定爲永制。俾之奉行。若其大事。非臣下可得專者。然後奏請。自然綱提領攝。事亦希簡。使大臣得專邊境。盡慮金革矣。諸路部署以下。出兵之日。臣願依法。以一階一級。交相統制。令一則易行。官專則有威。無令貴臣監軍。牽制其內。將之與士。旣相習熟。則不可數爲替改。使得恩結其心。威統其違。緩急與之生死。乃可爲用。此其畧也。昔楚莊王區區之諸侯。踞卑溼之地。無日不討軍實。而數之。其戒于國中曰。人生之不易。禍至之無日。用能服鄭宋。抗強晉。威震中原。況陛下擁四海之富。攬天下俊乂。與之圖事耶。然時哉時哉。不可緩已。臣愚戇。不識禁忌。惟陛下哀憐省納。

減邊兵議

(案)歷代名臣奏議係度歷中祔爲翰林學士時上

臣本書生。不當妄言兵革。但以事勢料之。參驗今古。有灼然易了者。敢爲奏請。臣伏見自古以來。防邊守塞。未有屯結兵馬。經年亘歲。常在城砦。無有休息者。傳曰。久暴師。則國不足。雖有智者。不能善其後。只如

秦漢時與匈奴更相酬報。出入鈔掠。亦是兵罷卽歸。不令屯結。亦不如聖朝長令兵馬守備邊上。旣不出攻。坐費糧運。是故用兵未及六年。天下之財已告匱竭。良由邊將不知休兵。朝廷不授成算。億萬之費。耗散而不計。若更十年。未知多少財用可濟其艱。臣請言其驗。敵界自三月後。馬瘦。放在草野。不能負重。關陝人皆知之。則背春向夏。敵不能大舉。其驗一也。敵無餽運。每人漢界常因糧于中國。中國自三月以後。纔有麥熟。其餘禾稼未成。無糧可因。敵不能大舉。其驗二也。又有高山大川。溪谷相銜。春夏之後。雨水時行。霖潦爲阻。敵不能大舉。其驗三也。是敵兵銳于冬令而屈于春夏。其勢可見。臣欲乞朝廷詳度。許令于沿邊州軍城砦。每年自三月後。抽減一半兵馬。入內地州府就糧。直至九月。卻往元駐劄處。號爲防秋。況所抽兵士。雖在內郡。其校習訓練。一如邊上。此乃事之至便。不足多疑。一則邊上州軍愛惜。得年支糧草。二則兵馬有休息之時。三則兵士到內地州府。易爲裹費。四則關陝之民。免得轉般糧草。是邊上一年支準。可展爲二年也。識者必難。臣曰。敵知朝廷自三月後。抽退兵馬。必選擇壯騎精兵。出人不意。入來漢界作過。恐大段深入。鈔掠人民。破蕩城砦。何以爲備。臣對曰。假如敵人有壯馬精兵。能于盛夏入漢界作過。三五日。只是鈔掠得界上些小熟戶人民。且無糧草可食。彼又不會攻打城壁。朝廷但只令所在城砦堅守。不出兵。及州軍只增城立柵相對。不與之戰。則見在一半人馬。已是足用。萬一敵人竟敢謀深入。卽令內郡就糧兵馬。旬日內可以勾集。令大將將數萬之兵。結陣徐驅。往彼救應。亦只令硬砦相持。勿與彼爭。

鋒使之進則不敢退。又粘逐常擇便地自逗留。至二十日以上。彼必有糧盡。或雨水之阻。又何能破蕩城。崇大段深入也。但自來朝廷不肯明下成算與邊將。令抽退兵馬。是以邊將畏避責罰。長要占留在邊上。圖常有準擬。其添到軍馬。以死固執。無因肯減一人一騎。今若朝廷明降成算。使之遵守。如敵非時入界。萬一有少敗衄。朝廷自任其責。自然邊將必無固執斯議者也。伏望降付中書樞密院子細商量。取進止。

乞專刑賞狀

〔案〕歷代名臣奏議係慶歷中祁爲侍讀學士時上。

臣聞天子之所以能制四海。役萬民而臣之者。其柄有二。曰刑曰賞而已。洪範曰。惟辟作福。惟辟作威。惟辟玉食。臣有作福作威玉食。則害于而家。凶于而國。昔宋子罕謂其君曰。慶賞賜與者。民之所喜也。君自行之。殺戮刑罰者。民之所惡也。臣請當之。于是宋君失刑。後爲子罕所劫。且子罕纔得一柄。已爲主患。況兩得之哉。伏見陛下恭儉仁厚。憂勞聽斷。細務小物。一更聖心。近世守文之主。未見其比。然而任用臣下。主柄外移。委棄刑賞。不自總攝。凡有所進。必待臣下之譽而用之。凡有所退。亦待臣下之毀而黜之。夫毀譽行于上。則朋黨成于下。且黨人所惡。能得陛下之法而罪之。黨人所愛。能得陛下之賞而官之。則舉朝之人。重私賞而輕公法。舍其君而歸其臣。雖欲無危。不可得矣。龍之所以能飛霄漢。入淵泉。變化不測。以風雲爲之衛也。虎之所以能搏百獸。神空山。以爪牙爲之使也。使龍失風雲。則鱣鮪等其靈。虎廢爪牙。則麋鹿角其能。君失刑賞。則見輕于天下矣。況今四夷交侵。師不用命。財匱民怨。吏以苛刻相撻。官以黨與

相營。陛下何不收取二柄而自用之。假如罰不當辜。人猶知畏。賞不值善。人尙知恩。又況陛下之德之明。其賞必善。其罰必罪耶。魯國政在陪臣。春秋爲諱之。稱之曰盜。況擁九五之不構。總天下之機。知倒持利劍。以資斷割。忽洪範之至戒。襲子罕之覆轍。輕龍虎之神威。抵春秋之所諱。召衰促亂。何所利哉。比年以來。日無盛光。月行黃道。氛霧無時。河決地動。皆下侵上。上失權之應也。伏望陛下。上揆天形。俯觀人事。收威福以在手。破羣黨于私門。奮乾剛。振雷聲。行之一日。天下廓然矣。臣蒙恩深厚。不致愛死。輕進瞽言。惟垂裁赦。

乞知州轉運使三年理一任劄子

〔案〕歷代名臣奏議係慶歷中祁爲侍讀學士時上

臣伏見比來知州轉運使未曾在任得滿三年。民間利害及簿書文移。未知次第。卻已遷換。迎新送故。上下告勞。臣不知朝廷設官。欲爲理耶。如不爲理。臣故無可言者。若欲爲理。安得用此敝法。守而不改。今審官院差遣不行。便奏請京朝官。情願二年一替。且差遣得行。一司之暫利也。遷換不定。天下之大害也。故敗國家大計。使吏姦得行。生民無告。無出于長吏數易也。臣愚以爲方用兵時。財用調度。多出于民。知州轉運使不得人。不能集事。伏望普令臺省近臣。舉知州轉運使五人。轉運使知州三人。有材幹者。以上或在任亦許就舉充數。理三周年爲一任。不得只理三十箇月每歲轉運使索取知州功過。并自具功過。申尙書考功。考功逐旋聞奏。請別近臣爲考課。使精加考較。若三考俱優。改一官。知州升大州。轉運使升上路。三考俱劣。黜一官。知

州降小州。轉運使降下路。二優一劣。改一官。二劣一優。奪半年俸。大約以此爲率。以上賞罰并舉。主同坐。相除。其提黜刑獄使者通判。並比類。此年考。只令中書門下及審官院揀選充職。取進止。如何施行。其優劣格。臣乞差官

乞減稅劄子

竊聞山東關中京西河北。去冬無雪。宿麥稀種。居者愁困。去者流離。綿春跨夏。搏手無望。朝廷雖切勅長吏漕運鄰粟。然而財用久屈。倉庫半空。僅能濟軍。何暇及物。今州縣惟中戶以上。尙且懷土。以待有秋。而繇役百端。科率千計。必不可損。須出于人。以臣料之。私蓄有涯。官用無際。歲旣未足。民胡得安。陛下若不曠然垂恩。有以大慰其意。則蚩蚩之衆。飢弱者就死。強惡者爲盜。盜賊旣廣。討捕必嚴。兵盜相拏。邦國深患。臣愚以爲方今艱食之際。其災傷州縣。且詔豫減今年秋夏二稅。安集居民。更令力農。無失生業。推主上之惠。置黎人之心。羣心苟和。不逞自息。權救時急。深適事宜。取進止。

乞修復陂塘古跡劄子

〔案〕歷代名臣奏議係慶歷中。祁爲侍讀學士時上。

臣伏見邊鄙用兵以來。所急者莫急于食。食者出于力農。而國家未嘗留心于農事。天下郡縣。雖有陂湖塘堰。例不修營。轉運使知州通判。但帶勸農之名。畧無其實。及知州通判。令佐結銜兼隄堰溝洫。習以爲常。亦不復知是何等語。是以農困食艱。通天下計之。常無一年之蓄。且天下無一年之蓄。古語以爲國非

其國。況今大兵在外。水旱難調。脫若災儉相仍。臣知國用盡于軍興。則力耕之人。餓死不救。羸老委溝壑。少壯爲盜賊。貽患國家。非細事也。臣欲望朝旨。專下轉運使。知州通判。令佐等。嚴行曉告。使于部內。各按求陂塘古跡。可以利民救患者。竝令修復。量率夫力。限日計功。如能不擾村鄉。久遠利濟。竝與理爲勞績。優加酬賞。若因此取受。騷擾農人。所犯一疋以上。乞追官勒停。十疋以上。仍除名終身禁錮。以上如可施行。乞詳定條禁。又條制舊有五戶各一保。宜申明此條。令力農之家。五家相保。其中如有惰丁游手。不事桑柘。不勤五穀。田疇荒閒者。竝許本保申舉官司。明行科罰。遷配遠州。其勤勸農業者。國家每一二年。畧行優卹。或少放正稅分數。或免戶下差科月日。自然人務農業。國計必充。取進止。

乞損豪強優力農劄子

臣伏以摧豪強。惠小民。王者政教之美也。今天下力農之人。國家衣食取辦。然赦恩未嘗有一言及之。豪猾兼并之家。居物逐利。多蓄緡錢。至三五十萬以上。少者不減三五萬。滯泉貨。使不流通。美食高枕。坐視朝廷財用之急。不肯以一分毫佐助公家。臣以爲此姦猾之民。皆國家所宜禁切。陛下至仁。止令人粟與官。然所得至寡。不濟國用。臣愚以爲請自京師及天下。應有物力人戶。計直及錢一萬以上者。官司明諭詔旨。許令百姓各指實。自言有多少見錢。及他物實若干數目。先作簿抄上。然後官司普令十分中官借二分助軍錢。許于所在送納。仍各逐家給付州縣帖。開坐勅命。候將來邊鄙罷兵日。并支還象牙香藥茶

鹽許百姓任便于京師外州清算其所借到錢于遂州縣置彼處所出百貨輕齎入京付推貨務減市價收錢仍別立庫承貯以備軍須緊急如此錢稍有次序乞朝廷下詔普減天下租稅三分至一半以下以明國家損豪強優力農稱物平施之義

乞停開溝洫劄子

臣伏見景祐編勅應天開封府界宿亳曹單棣許陳蔡等州溝河遂縣令佐如能在任多設方畧勸誘部民開道通流別無時雨滄潦田苗竝許批上歷子及本處保明聞奏令佐與參選注家便官臣昨知陳州日體問得諸處縣令主簿爲見有此條貫只是逐年一度差公人下鄉取責戶長等狀稱勸誘到百姓開導溝洫河道竝得通快別不滄損田苗文狀申縣本州據縣狀批上本人歷子得替日依例保明便該參選注家便官其實每年無一戶一工曾開治溝洫本官亦不曾按行勸誘所有每年滄損田苗放卻二稅卻稱是外處橫水入界致滄殺田苗不是本處雨水滄潦似此不惟選人僥倖顯屬冒罔朝廷臣愚欲自今後停廢上項條貫更不行用今日以前已在銓參選人乞不追改取進止

乞復符節官劄子

符契之信天子所以拱斂威重檢防邪僞其在兵賦尤重自周官鎮圭以召守牙璋以興師漢氏始興郡國爲竹使符以代牙璋光武中興禁法疎簡但以璽書發兵于是杜詩建言以爲事有煩而不可省費而

不得已。請復虎符。絕紆端。朝廷更從其議。魏晉訖唐。罔不遵用。惟五代蹙弱。州國褊近。且命暮達。不容有詐。于是周顯德六年。始去符契。專以印章爲驗。國初受命。方事之繁。急于盪定。未暇修復。方今地大師衆。巧譎寢萌。承平旣久。民不知戰。緩急邊陲有警。而詔文單下。誠恐細人間牒。紆詐模寫。乘機徼幸。稽逗期會。無以察知。則國家亦當居安思危。先事立制。奪邪人竊發之便。願復符節。官以明慎國命。凡發兵百人以上。財賦百萬以上。皆待符與詔書雙下。使郡國合而後遣。百人百萬以下。則符契特行焉。據爲大信。誠有國之要務。其符之形製。乞下有司詳按舊典施行。

請募民入米京師劄子

去年江淮二浙。稻收七八。而淮南饑疫之後。戶口寢衰。縣無完村。村無全戶。纔足自贍。罔能及他。惟有江浙二方。天下仰給。臣以爲京師禁旅近數十萬。三年之蓄。不可不備。去年國家垂憫南土。遣茲薦饑。減漕粟之常科。軫斯人之艱食。上恩雖美。邦計未充。且足食足兵。乃可治國。我倉我庾。所以安人。夫江淮漕運之司。輸米上供。已有定數。若更多取。則官司不供。故臣願陛下明下詔書。募民能入米京師者。倍價而糶。三分其價。一分給錢。二分則以方摧茶準其直而與之。商旅利于化居。吏卒緩于程督。如此。則倉廩實。京師盛。郡國安矣。如允所請。乞付外詳議。

讓轉左丞劄子

右臣今月十八日。本州進奏院遞到官誥勅牒各一道。以唐書了畢。轉臣尙書左丞。聞命警懼。不知所舍。臣自慶歷中。受詔纂修。與諸儒討論。首尾纔及六年。便值臣差任出外。雖朝廷許將史草自隨。悉力編纂。其如極邊事務。荒廢轉多。皇祐中。史未有緒。蒙朝廷差歐陽修分總紀志。與臣共力。臣任益州。日煩差使。臣督趣列傳殘卷。及移鄭州。又蒙遣編修官呂夏卿乘驛就臣商較同異。催促了當。歷一十七年。書克奏上。書成淹延。職臣之罪。至如歐陽修撰列紀志等衆篇。各有法度。方成一家。范鎮王疇以下。譔次精該。一代大典。非修等不成。臣去書局已十有一年。修撰之時。不與諸儒研確。成書之日。又不與伏奏殿廷。臣于修書之勤。十不得一二。若然。臣有稽延之罪。無編次之勤。不可與修等均賞。伏乞陛下收還臣此來恩命。只旌賞修以下諸儒。庶責賞分明。允愜公議。

景文集卷二十九

奏疏

直言對

〔案〕仁宗本紀皇祐三年春三月詔求直言是時
祁由龍圖學士復爲翰林學士本傳作景祐中誤

翰林侍讀學士兼龍圖閣學士宋某昧死言伏以陛下躬至聖開大明數引近臣延謀急政退托不敏開
敢言之路日昃便坐以須告猷夫人君據安而念危則終不危操治而慮亂則終不亂何則幾微之兆成
敗之端森然前判于胷中矣臣向已被詔對所欲言書聞乎上未合明聽陛下赦其無狀再降德音以欲
竭盡下情以裨萬一顧臣敢無辭而對臣聞羣臣之所以有朋黨者何也由忠邪不早判耳且君子得位
必引其類使協濟忠力不爲私也小人獲進亦引其類使扇動聲勢不爲公也君子指小人所引固曰朋
黨小人指君子所引亦曰朋黨君子常少而小人常多此人君所以易惑而難辨也陛下何不質之以事
驗之以言其言也陰賊忌害巧爲迎合聽之似可用察之而無實小人也其言也質直蹇正多所補益聽
之似逆耳察之而有實君子也又以其言驗其人之行事與言合者爲忠事與言反者爲邪不黜其邪不
進其忠則朋黨終不除矣臣下之所以讒佞得行者何也由朝廷之言路太廣也夫正人能言邪人亦能
言古者稱言之無罪者謂有道之言也若邪人構虛以害有位架妄以間忠臣亦以爲不可加罪則是以

言喪邦矣。且邪人緣隙投詐。寄事造姦。詆人必以難驗之文。傷人必以似是之語。使進不得自辯于主。退有以離間于君。于是正人幽憤。有功抑退。如此者。陛下雖加罰焉。可也。正人則不然。殺焉中立。侃焉正論。引古今之宜。根刑政之本。質之衆則無害。措之事則可行。不爲勢傾。不爲利奪。如此者。陛下雖加賞焉。可也。故言路大闢。而正言不賞。妄言不罰。則讒佞終不去矣。今議者皆曰。朝廷誠安。且治。臣以爲不然。夫三患未去。安得爲治。直亂之未作耳。請試言之。夫與賢人謀事。而不肖者斷之一患也。重選大臣。而輕任之二患也。大事不圖。而小事是急。三患也。何則。賢人必爲國計。而不肖者專爲身謀。爲國計者。必恃至公。故言直而援少。爲身謀者。專挾己私。故喻巧而援多。人多不能察之。則姦詐行矣。于是言長利者。則破之。以小害。使終不能爲利。圖大功者。則急之以近效。使終不得立功。善令方下。而謬令移之矣。公議始行。而私議奪之矣。且不肖之人。已不能忠。而忌人之納忠。已爲不善。而能敗人之爲善。改白作黑。以是爲非。若朝廷已知其姦。不能斥去。郭公所以誠亡也。已知其賢。而與不肖者竝任之。劉向所以獲罪也。此方今患之最切者也。夫大臣左輔右弼。參贊權綱。朝訪夕對。彌縫漏闕。旣以爲忠。且賢而擢之矣。材且謀而任之矣。是宜待之以無貳。責之以一心。今或指纖瑕。采飛語。小則被疑。大則賜罷。朝爲臯夔。暮爲樛杌。遂令家無全節。人無完行。何其有道之世。而賢者之乏耶。誠任之失其理矣。徒使繼至者瞻前畏後。偷合取容。事存形跡。日防猜阻。舍國事而不慮。苟身謀以自安。大臣如此。陛下何須賴焉。且君視臣如手足。彼將以手

足爲報。君視臣如路人。彼亦將以路人爲報。此患之次也。聚天下莫急于財。鎮天下莫切于兵。制四夷莫神于機。任天下莫謹于官。今財已匱而不肯計。兵甚冗而不能擇。機至而不敢謀。官濫而不知選。而執事者。但且計小利害。責小經費。羣對而旅前。取旨而奉行。日徇一日。歲偷一歲。陛下又不念此。寧是朝廷福耶。此患之又次也。假如萬一邊境有事。盜賊相挺。甲兵宿野。寇發在路。此時三患不去。誰能出身爲國。與陛下共處安危耶。誰能執節抗慨。爲陛下前死不顧耶。臣故曰。非能治也。直亂之未作耳。陛下詔中書門下。使擇天下之冗官。澄清流品。詔樞密院。去天下之冗兵。寢明紀律。斷自宸慮。必取成功。不使渙汗。復收匪石中轉。則縣官之財。有數年之饒。爲萬一不虞之備。策之善者也。機制夷狄。臣前對已嘗具之。猶有可念者。臣聞馬者。兵之大也。邊庭之所以常取勝中國者也。今監牧弗謹。牝蓄無課。而自蕃入中者。既有定價。則駟駿不至。而疲鷲實來。地非所宜。死者如積。河南河北。草地數萬頃。爲郡縣所侵。挑田伐樹。半入民產。且中國之兵。步多騎少。騎兵利平。步兵利險。夫自河以北。地若砥平。日與天盡。不見堆阜。此非用步之利也。雖步卒百萬。詎能抗戎馬之出入乎。故莫如養馬。與之馳逐。則契丹懼矣。夫馬政修舉。牧養得人。五年之中。可致良馬十萬。外可以罷西邊之入中。令得與民通市。內可以侈人心之馳突。與契丹爭衡。此誠用武之急也。臣又聞南方鑛冶。地寶不乏。但轉運司與州縣。莫適爲謀。昔之本錢數十萬。慶歷以來。爲官司侵耗。畧盡矣。今旣無糧貨。不能聚人。上下掩閉。止以坑穴不發爲解。采鑿烹煉。反爲姦人所盜。利奪于

下貨失于官。禁帑之錢。日朘月削。今若留數十萬緡。置于饒信。權爲本錢。精擇材臣。委之經度。自令舉吏。專建官司。庶幾銅溢于山。錢流于府。此可以責數年之效。未可取驗于目前也。銅足錢多。此亦富國之一助耳。臣智識庸暗。不足上當清問。輕率狂狷。惟陛下裁貸其誅。

論羣牧制置使

臣伏見舊制羣牧使。令以樞密院一員總領。臣以爲國之大事在兵。兵在馬。今但以兩制以上領羣牧使。其于小臣浮議。易爲更易。若樞宥大臣兼總之。不惟要見國馬登耗大數。準量騎軍所用。又免小臣狂妄議論。所貴牧事寢重。速致成效。

論復河北廣平兩監澶鄆兩監〔案〕歷代名臣奏議係嘉祐六年祁爲羣牧使時上

西北二敵所以能抗中國者。惟以多馬而人習騎。此二敵之長也。中國馬少。又人不習騎。此中國之短也。每至敵來作過。則朝廷常以所短禦所長。是以十戰十負。罕有勝理。今議者但欲益兵破敵。不知無馬且不能爲兵也。用兵七年。終不聞講牧馬之制。此寧朝議未之思乎。今羣牧司管河北凡十監。其五監畜孳生馬。五監畜大馬。然未嘗有數登十萬匹者。何其弱也。今河北洺衛相北京五監之地。皆水草甘涼。可以蕃息。但官非其人。不能盡法牧養。何者。馬數雖增。未之賞。馬數雖耗。未之罰。急則括買民馬。苟以充數。既不可用。徒有芻秣之費。驅之邊境。未戰而凍死者十八九矣。又聞河北洺州廣平。舊有三監。今惟一監存。

焉。欲望朝廷差有智識近臣。按求舊地。復爲三監。澶州舊有東平監。水草地氣與洛相一體。亦可興復。此二監合河北五監。迪爲十監。每監以一萬匹爲定額。如國家牧養得人。則五年之間。可以自養及額。餘數則可以分入河南鄭許西京三監。及在京驛院天駟天廐諸監坊矣。同州沙苑一監。地尤宜馬。令卻只畜大馬。不令孳育。殊乖所宜。欲望朝廷許將孳生馬五千。就沙苑分左右兩監。委官益占官地。謹加牧放。五年之間。亦可得數萬。七年之後。可支陝西緣邊諸州戰馬之闕矣。

又論京東西淮北州軍民間養馬法

河北陝西河東出馬之地。民間皆宜蓄馬。而近年黔中土兵已多。耕農數少。難行民間養馬之法。伏見京東西緣淮北州軍地不純熱。馬之種類與北馬小異。若令民間養馬。朝廷緩急差可濟用。臣今略爲養馬法如下。

一、民間能養馬二匹者。免半丁科率。三匹者。免一丁。五匹者。免二丁。仍州縣不得尋常專擅差借。其有第一等第二等二戶全無丁者。勒養馬三匹。一丁者。勒養馬二匹。其力及一丁養馬戶。比有丁養馬戶。免一半科率。

一、所養馬州縣爲立籍。許令提點刑獄與知州一歲一閱。以知實數。如有死損。仍委本戶置買及數。

一、民間如有力及人戶能養馬及十匹以上。其戶下科率十分與免七分。

一、所養馬不得夾帶川蜀淮馬至小怯者充數，竝須堪任負載者。

論養馬劄子〔案〕歷代名臣奏議以下四首俱係嘉祐六年祁爲羣牧使時上

臣等近知河北孳生諸監馬例各低小不堪戰陳。蓋自來馬種雜亂，或翁大母小，或翁小母大，配放時不曾揀別，是致無由生得高大好馬。實恐緩急有誤，諸軍分配。昨有判官寇平因點印時，曾揀好翁母馬七百餘匹，送淇水第一監別立羣分配放，已準宣命施行。續據都監李知和乞于逐羣內揀出五匹大馬，破草養餵，好母馬配放。又蒙宣命許依。臣等參詳，逐官各見用心揀別馬種，然終是未得盡善。今欲乞將孳生監與一例分作二等，其骨格高大堪充戰陳者爲上等，骨格低小有諸色病名者爲下等，各別立作羣分配放。仍今草地相遠，不得交相混雜。如此必生得駒口格式入等，堪任披帶。至于雜馬亦自無關用，其自今以後，生得駒子亦便依此揀別，各歸等第。內上等馬翁竝乞依寇平等奏請，于不配放時破草料上槽養餵，所貴及時遊放，不至羸怯。兼臣等不佳將諸州上京馬內揀選迭格好翁母馬，小作番次逐旋，差殿侍押赴諸監。如此分開等第，不出三年，必須大改收得迭格駒口，以備戰陳，取進止。

又乞養馬劄子

臣頃年爲羣牧使，其時曾擘畫欲于諸監市母馬，合見馬共成五七萬匹。一歲大約得駒五萬，不出五年得二十五萬。就中破死損十分之二，得駒二十萬。于二十萬中選出負馱馬十分之五，得戰馬十萬匹。以

爲中國有此馬。可與敵人相馳逐。使聞風畏威。不敢有窺邊境。意是時西事已定。朝廷求安。便忽畧此事。有司指擿臣奏。以爲迂闊。但言放牧之地。侵損民間膏腴田疇。有損無益。于是寢廢。且馬者兵之本。倉卒求之不可得。若無事時。歲月孳養。臨事自無闕乏。臣欲乞選左右名臣。議羣牧養馬法。收還牧放舊地。多列廢庠。檢詳新舊條約。擇取便宜。如臣所請。且爲新制。及罷河東陝西馬禁。許民間與蕃落自相貨買。及許天下民養馬。勅州縣不得計在貲財之限。其牧馬。臣且以十年爲期。若歲歲孳養。當得二十萬匹。而天下百姓所養馬。亦益多。假令西北二邊敢爲風塵。則我兵足馬健。與之角戰。誠不足畏。取進止。

帖黃云。今天下馬軍。大率十人無一。二人有馬。而所習技藝。與步兵不同。緩急不堪移充。步人使喚。使軍人無馬。是國家虛養此兵。有名無實。又云。臣舊知牧馬數不多。于中選取戰馬。卽今數目益少。此事最爲用兵切務。伏乞朝廷深以爲意。

論買馬劄子

河北孳生監馬母數少。逐年有妨孳配。勘會麟府州馬最宜孳生。准先降條貫。其馬作五等收買。第一等一十八匹。端至第五等。各減一匹。後來宣命于逐等上例。各減絹二匹。第一等馬見今只有十六匹。端蕃漢興販人戶別無利潤。致驟馬轉少。竊恐諸監每年漸見孳茂闕額。有誤將來支配諸軍。本司今相度。其麟府州所置五等驟馬。欲乞權于舊條未經減絹收馬五等價內。將第三等以上。各特添絹二匹。第四等

五等。各特添一匹。仍令逐場買馬。及三五十匹。旋計綱上京。且估馬司交割。從本司再行揀選。分爲好馬。雜馬兩等。轉送孳生諸監。添助蕃息。臣等又見漢武帝時。爲將軍騎馬少。乃令天下諸亭養馬。歲課學息。卽知權宜立法。古今一體。如將來諸監母馬數足。卽卻依元降條貫施行。一則招來輿販人戶。將好馬中官。二則三數年內。孳生駒口漸多。準備緩急支填。戰馬無闕。取進止。

又論配馬劄子

階文州買到省馬。舊來牽送上京。近因本司擘畫。奉聖旨。竝令送陝西轉運司支配諸軍闕馬。伏緣今來孳生諸監闕小上等馬。翁馬母蕃息駒騾。本司相度。欲乞今後階文兩州買到第一第二等馬內。如有迭標格。好結裹及事藝別無病名。堪充作馬翁馬母。委自本州長吏。躬親揀選十歲以下者。令依舊押送上京。于估馬司交納。從本司填配諸監。其餘揀退不入。今來色額者。自依近降條貫施行。取進止。

議西人劄子

臣伏見趙元昊遣使進納誓書。西人在館。以待答報。伏知朝廷議欲降詔。遂相開納。止留冊命。未便舉行。又聞俞青使回北庭。謂本朝若必行元昊封冊。勿令使命深人。恐契丹兵馬一例殺傷。又其答書有俟平定。西鄙遣人來報之意。此皆含糊未決之辭。包紆蓄怨之語也。臣愚不敏。不知大計。竊謂機危之會。理須審思。事脫一失。悔將難救。且西北二敵。連兵構難。中國之利也。方當整勒兵馬。陰拱高視。候其大傷小亡。

乃可以逞。今若便許元昊同其誓文。則二國要約固已先定。不待封冊。方正君臣如此。則元昊之貢獻必且續至。朝廷之金幣亦便頒分。假使北敵能勝西。則契丹必歸曲朝廷。以爲撫彼叛臣。逆其來信。負力恃慢。勢必稱兵。而元昊得朝廷誓詔。必且取重外鄙。市怨耶律。肆其狡獪。因爲間諜。得我金幣。以救敗亡。是乃紆敵禍于一時。嫁外怨于中國矣。使西能勝北。則二敵之怨必深。契丹士力更當讐養。則朝廷卻與元昊歡盟厚賂。安得不動敵情哉。契丹之怨朝廷益深。則元昊之結朝廷益固者。非謂與我爲金石交也。彼藉我之賄。假我之援。全境激敵。以誓劫我。使吾邊戍束手瞪目。熟視流散。不得侵畧。然後首鼠窟穴。養成豺虎。斯其謀也。臣又料契丹未能得志于元昊。先且取償于河北。避強擊弱。有何不可。是朝廷免西鄙之小衄。結北方之巨釁。輕重之擇。安得不懷。且契丹言恐一例殺傷。又云俟平定西鄙。此何等語。朝廷忽而不計耶。臣伏見元昊誓書中。要結天地。誓及子孫。言雖夸險。勢亦窘急。何者。彼蓋迫契丹之用兵。畏我境之乘便。畧其邊寨。取其老小。重以詛誓。務在速成。必知朝廷已賜開許。不肯先違信誓。則彼一心捍北。永無東顧之虞。此賊昊之計。事在目前。確然可辨。臣以爲當今計者。不如且遣彼使。賜以存問詔書。詰難誓文。更令修正。遷延來往。以賒後期。兼令雄州騰報北帳。俟其雄雌之決。更議拒納之宜。撫西懷北。兩得其便。伏望畧回聖慮。一賜裁擇。取進止。

乞宰相監修唐書疏

(案)歷代名臣奏議。係仁宗時。祁知成德軍時上。

臣先奉詔修定唐書。是時賈昌朝罷執政。丁度以參知政事嗣總其任。度比罷免。而書局不解。今度不幸薨謝。臣又遠守邊郡。本局止有刪修官王疇以下四員。至今編纂遲延。紀志俱未有草卷。誠恐書無統制。諸儒議論不一。淹引歲時。欲望朝廷許依前例。以宰相監修。竊以一王大典。垂法千古。今功且垂成。而其間褒貶是非。出史臣等。須藉當國大臣。商榷訂正。爲斯文之重。庶書成行遠。無愧前人。唐特修晉氏一史。亦宰相恭總。彼偏方陋國。制度殘窳。尙以輔弼領之。比今唐書。恢大光明。爲不侔矣。伏乞特賜詳度施行。

請復唐馱幕之制

(案)歷代名臣奏議係皇祐四年祁知成德軍時上

臣聞唐時出師用兵。每什爲五馱法。馬牛任從所便。其間隨行什物鍋幕之類皆具。故師行萬里。經亘歲月。無所闕乏。自五代之亂。更相侵擾。其兵不出中國。弱者輕齎。強者因糧。遂失五馱法。至今相承。不復討尋。臣伏見朝廷之制。每指揮五百人。指揮使得夾幕一具。副者得單幕一具。馬軍得葉鍋布行槽等若干。步軍得鍋若干。自軍員以下。更無帳幕。或出次野外。雖甚風雨。亦無所庇。又戰士被甲。所將衣衾。悉自負荷。馬軍則孟杓之類。悉在馬上。然則行數百里。人馬強力。皆已先疲。脫若逢賊。安能挽蹋擊刺。與爭勝哉。故無幕帟。則士卒無所休庇。無馱物。則士卒須自負荷。此于軍戎。亦非小害。臣乞詔近臣。檢求唐馱幕法。下殿前馬步軍司。議可復與否。明條利害。上稟朝廷指揮。

論復監地必有羣臣以百姓稅地爲言

國家今廣置騎軍而無馬給之。騎軍所習既不可爲步。則是數十萬衆無所施用。常坐費糧廩而與無軍同也。臣固以爲不如復監地。多畜戰馬。以給其用。計之使者也。凡監地有及千頃。五七百頃者。其間附山包野。陂澤菱草。非耕種之地。今若復之。則羣臣浮議云。害百姓良田。使農不得耕種。臣以爲不然。假使牧馬之地。一監有五千頃。皆爲稅田。國家所收。歲未及數萬石。以數萬石之粟。于軍之虛實。未有所益也。使有牧馬數萬匹。則三軍之氣。可以坐增。由是言之。國家急須軍馬之時。雖良田尙可變而爲牧地。況今之牧地非盡良田者乎。臣伏見洛陽單鎮兩監。曾廢爲民田。議者知皆以地之肥美。及經一二年。民之佃不及一二百頃。其餘盡爲荒野。無人請佃。牧地之中。樹木數千萬株。皆爲百姓所伐販賣。而官司明知。上下相蔽。不爲糾發。俄而卻復。此特倖人邀一時之利。議者之過。此則監地墾廢之一驗。事已見前。惟國家詳酌而行。

上便宜劄子

〔案〕歷代名臣奏議係皇祐五年。祁知定州時上。

右臣伏念行年五十有六。素自衰怯。不逮人。宜內治一郡。習刀筆。薄領計。校米鹽。與俗吏爭課最。以報萬分。不意陛下過聽。乃使守邊。居眞定。不半年。徙定武。任過所能。早夜震惶。然常聞天下根本在河北。河北根本在鎮定。以其扼衝要。爲國門戶。且契丹所欲得者。惟定與鎮。二軍不戰。則進薄深。趙邢洛。昨脆撞虛。無有患矣。臣所以日夜深計者。以爲欲兵之強。莫如多穀與財。欲士而練。莫如善擇將。欲人歆豔樂鬪。莫

如賞重而罰嚴。欲敵顧望不敢前。莫如使鎮重而定強。夫恥怯尙勇。好論事。甘得而忘死。河北之人。殆天性然。陛下少勵之。不憂不戰。以欲戰之士。不得善將。雖鬪猶負。無穀與財。雖鎮金城。定湯池。勢必輕。今朝廷擇將練卒。制財積糧。迺以陝西河東爲先。河北爲後。非計也。夫西戎兵銳士寡。能畧邊。不能深入。河東天險。敵憚爲寇。惟河北不然。失長城之防。自薊而南。直視千里。敵鼓而前。如堯禋上行。故曰。謀契丹者。不得不先河北。謀河北。舍定與鎮。無可議矣。故臣願先入穀鎮定。鎮定已充。可入穀餘州。列將在陝西河東有功狀者。得遷鎮定。則鎮定重。天下久平。馬益少。臣請多用步兵。夫閔然聚。霍然去。雲奔颺馳。抄後掠前。此馬之長也。強弩巨槌。長槍利刃。什什相聯。伍伍相遮。大呼薄戰。此步之長也。臣料朝廷與敵相攻。毆而去之。及境則止。然則不待馬而步可用矣。臣請損馬而益步。故馬少則騎精。步多則鬪健。我能用步所長。雖契丹多馬。無所用之。夫鎮定一體也。勢不可離。今判爲二。恐謀之未詳。自先帝爲一道。帥專而師不分。故定搃其胷。則鎮擣其脅。勢自然耳。今其顯顯有害者。屯塞山川要險之地。裂而有之。平時號令文移。不能一。敵脫叩壘。則彼此不相謀。誰肯任責耶。臣請合鎮定爲一路。願以將相大臣領之。無事時以鎮爲治。所有事則遷治定。指授諸將。諸將權一。而責有歸。無苟且意。策之上也。惟陛下與中書樞密院。當居安慮危。熟計所長。必待事至而後圖之。殆矣。河東馬強。士習善馳突。與鎮定若表裏然。東下井陘。不百里入鎮定矣。敵若深走。以河東健馬佐鎮定兵。掩契丹之惰。若歸者。萬出萬全。此一奇也。臣聞事切于用者。不可

以文陳。臣所論增步兵及入穀分兵隸裨將等諸條件目繁碎。要待刀筆吏委曲可曉。臣已便俗言之。輒別封上。至擇善將。多蓄財。乞委樞密院三司條具以聞。臣一諸生。弗知軍旅事。偶有所見。不敢隱。特以大恩。思亟報也。恐議涉迂暗。有司疑詰。更乞付臣。令悉意條陳。然後施行。

景文集卷三十

奏狀

繳進升祔慶成詩狀

右臣等伏見今月九日。章獻明肅皇后。章懿皇后。升祔眞宗廟室。禮畢者。懿烈順躋。慶儀交展。恩流即日。歡懌緜區。恭惟皇帝陛下。凝命宅中。協華稽古。雖誕敷于一德。常有懷于二人。向者。闕寢別祠。翠華躬謁。依違累歲。博徇羣臣之謀。稽合靈心。用舉先朝之舊。制書前降。典冊嗣宣。遂自儀坤之廷。竝升清廟之祔。緣情得禮。因孝示人。回曠蕩之洪私。顯劬勞之永報。鑑奩易具。交深顧復之思。牲俎薦芬。足慰蒸嘗之感。臣等共塵法從。參攝事經。仰欽陟佑之儀。難默揄揚之素。謹各撰成升祔慶成詩一章。繕寫別封上進。干冒宸覽。無任省循媿汗之至。

南郊乞異姓恩澤狀

右臣幸班禁近。獲造光華。凡再侍于明禋。得推恩于異族。敢援新制。以寵私閔。伏念臣有舅進士朱某。幼習藝文。世承絳冕。未預鄉華之薦。久懷家食之慙。以臣永歎涓陽。希榮母黨。願筮仕途之籍。以光孝治之辰。誓罄涓埃。共期酬補。

南郊陳乞男彥國恩澤狀

右臣籍塵祕禁。身託近藩。天饗在辰。職來預慶。緣從官之舊比。有任子之公條。輒忍覲顏。更申妄請。竊以臣男彥國。甫當蒙孺。粗訓義方。未專一業之勤。遽覲千齡之盛。不能自達。庸丐賞延。幸當朝需之覃。冀預士名之食。儻榮于嗣。獲寵而家。願交勵于朴忠。得參酬于覆育。丹愚所誓。殞跡無忘。干冒宸嚴。臣無任震惶俟命之至。

乾元節乞男定國等恩澤狀四首

右臣叨華禁從。逢聖誕期。輒丐餘榮。更延賤息。伏念臣有男試將。作監主簿。定國。久踰冠齒。粗習儒猷。向因臣兄以猶子之親。得參士食。逮臣蒙持橐之列。已及蔭條。顧緣試秩之初。未齒爲真之籍。敢因盛節。就冀仁恩。庶獎稗蒙。益敦義教。省身可勉。收報爲期。

右臣叨服近聯。慶逢誕節。例容任子。情切庇私。內揆干踰。舉臻震懼。伏念臣有男試將。作監主簿。靖國。甫當羈鼎。纔習藝文。向緣世父之榮。已參蔭籍之末。逮臣冒寵。自獲推恩。敢因星濟之辰。更丐童衿之幸。許從真秩。俾獎蒙姿。誓忠教之日勤。答上天之仁覆。恧愚內勉。殞越爲期。

右臣久玷凝嚴。訖無云補。尙因誕聖之日。敢援任子之條。仰竚恩華。俯私舐愛。竊以臣男惠國。年方朐佩。習始書觚。未克辨經。稍任典謁。屬羣臣之上慶。顧賤息以自憐。距躍所逢。推求例賞。儻童蒙之擊志。獲孺

策以聞榮。共勵竭忠。歸酬再造。

右臣久塵法從。均服朝禱。每緣慶于誕辰。許推慈于蔭籍。內惟丐請。有憐情顏。竊以臣男輔國。甫在童羈。未從傳習。雖教之執卷。而未能負薪。不勝私懷。願從舊食。幸電樞之紀節。徧荷橐以頒恩。冀啓任階。以獎家訓。如牛舐犢。幸慰于衰悵。雖犬若豚。敢期于有立。共圖忠瘁。上答恩仁。

讓翰林學士狀

(案)本傳祁以龍圖直學士知杭州。留爲翰林學士。在慶歷三年。

右臣今月十三日。準閣門承受韓文昭報告。爲已除授臣翰林學士。今授告敕者。聞命側躬。旣榮且駭。竊念臣昨知制誥日。以經夏抱疾。願守便藩。本冀寧居。得養羸喘。俄叨改職。尋以敍辭。比令兒息。搬取家屬。伺其歸室。偶未赴官。僚友具知。宰府同亮。今者忽蒙誤選。升備禁扃。文翰近班。臣子至願。當不俟駕。卽日造朝。但念臣因病自言。蒙恩輒止。不惟欺冒朝聽。必恐滋致人言。便謂臣巧作遷延。陰規次補。有妨賢路。專取身榮。啓偷競之風。瀆承平之化。一罹斯謗。容得自安。伏望皇帝陛下。察臣外補有因。亮臣知分有素。且依前詔。早遣出麾。況餘杭闕官。已逾三月。學士供職。自有數人。若得申沛俞音。收還新命。憫孤蹤之羈。悸息浮議之紛囂。上穆朝僉。下紓憂悃。雖停褻澤。自荷大恩。無任祈天俟命。戰懼之至。

再讓翰林學士狀

右臣今月十五日。準中書劄子。以臣陳讓新除翰林學士告敕。乞且赴杭州。奉聖旨。不得辭讓者。恭聞敦

敕參抃誠。貸其輒辭。勛以嚴旨。便當奔走朝路。冒卽寵章。誼有未安。不容無訴。伏念臣今年三月內。以天章閣待制歸朝。尋蒙改知制誥。又于七月中。因陳乞外郡。蒙轉龍圖閣直學士。無勞被獎。自臣爲始。尙錄餘杭舊例。未速人言。臣是以上殿敘辭日。乞在任滿二年。成三十月。依常參爲例。冀圖考績。少答容私。不意今者再被制書。擢臣爲翰林學士。此則一歲之內。三次遷除。緝典蕃數。未有臣比。一介之操。知分甚明。若便懼命。忍慙。覲然祇受。悠悠仕子。偷競同興。雖微臣苟一日之榮。而廣朝被多士之議。損大益寡。顧不重哉。今拒詔當誅。昧進亦罪。罪無足憫。誅有可矜。敢率愚誠。罄敘茲窘。伏望聖慈。特許收罷新命。且令赴任杭州。控仁援天。更無別理。如朝廷必以學士院乏人。不令辭免。則臣願只以內閣職名作直學士院供職。俟滿年歲。方冀敘遷。二事之中。乞賜矜允。臣無任虔祈懇禱之至。

審刑院斷絕公案奏狀

(案) 祁知審刑院據神道碑在慶歷四年

右。臣據大理寺狀。申日奏司。今日日以前。送下公案。竝已斷奏。訖無見在者。舜刑惟恤。漢讞號平。屬九夏之清和。訖四方之論報。至仁不洽。中典著聞。允非甚盛之期。疇臻幾措之會。恭惟皇帝陛下。燭知治總。懋建民彝。受支日之奏封。謹齋居之闕實。軫人命之重容。有不經詔。天下之平。許從中覆。至于法防素員。吏禁易遵。示以簡孚之嚴。窒其旁緣之隙。懿條交舉。庶獄寢希。甫當時燠之初。靡餘決事之請。畫冠斯格。本上德之好生。丹筆屢停。顧攸司之何力。臣誤膺審克。祇觀熙隆。願咨繫月之文。備著約章之簡。聿光在宥。

永照方來。

謝對衣金腰帶鞍轡馬狀

右。臣伏蒙聖慈。以臣加前件職。特賜對衣金腰帶一條。金鍍銀鞍轡馬一匹者。經幄詳延。甫塵于祕職。規庭需賚。更藉于殊私。內撫肝膈。舉臻榮腆。竊以解衣示寵。莫美于漢臣。錫馬從遊。最榮于唐世。而臣仰丁盛旦。早服華階。因擿句之備員。侈除書之在始。方其伏謝。敕以頒分。煥紋襲于襜裳。爛鏤環于摺帶。材駒半漢。釘轡玲瓏。惟賜予之兼常。實芻微之增詫。誓當夙夜。祇力造次。爲仁俯觀。珮璲之長。參惕乘軒之貴。有如皎日。無忘茂恩。

又

右。臣伏蒙聖慈。以臣入院。特賜衣一對。金腰帶一條。金鍍銀鞍轡馬一匹者。近司被召。錫品需華。祇受寵頒。叢臻媿緒。恭以命賜之設。眷厚是將。安吉美于詩人。蕃庶表于侯象。洪惟聖世。務尙前猷。美禁署之始除。煥儒林之新式。因其衆謝。侑以多儀。筥服裁鮮。鑲金飭具。斥衛鞍之寶鉸。解材駟于天閑。下拜神墀。爛盈私室。而臣猥從未至。甫望清光。視書詔以未能。假器章而太甚。人斯誤舉。已無收汗之期。賞復冒叨。安道滯鶻之訛。誓墜盡瘁。少答詳延。

又

振擢云初。頒分有典。恩雖將意。媿不容顏。伏念臣久去嚴深。弗專辭贊。蒙收還于玉署。復修潤于繕言。而怡儻塵容。支離病骨。謀無故勇。貌有新衰。方深舊貫之慙。更侈多儀之貺。襲衣聯褚。梁帶橫金。侑以材騶。副之寶鉸。雖朝稽成式。本優待于峻良。而士有冒居。迺例蕃于錫子。仰循異渥。內揆無堪。服以光軀。慶揖私之有煥。乘而致寇。惕觀象以蒙譏。荷寵兼常。撫衿充感。

又

右臣伏蒙聖慈。以臣前件職。特賜衣一對。金腰帶一條。金鍍銀鞍轡馬一匹者。侈袂光軀。寶釘照筒。斥內閑之半漢。副釘鉸之精良。併侑茂恩。庸褻近職。胡寧輜轡。遂忝頒分。伏念臣本以避親。特蒙換秩。始踐鳳阿之祕。方陳鳧藻之歡。而朝循舊章。賜存成式。匪爲人而廢禮。姑異數以勸能。麗服橫金。爰重寘行之寵。材驂耳轡。居爲執御之華。被錫于茲。撫躬何幸。儻屯愚之可勉。圖尺寸以爲酬。

定州謝對衣金帶鞍馬狀

右臣準中書劄子。以臣除前件職。奉聖旨。賜臣對衣金腰帶鞍轡馬。仍差殿直李宗偉就定州給賜者。寵名冒進。賜品臨頒。使者發齋。邦人改觀。伏念臣年塗衰遠。襟府塵蒙。違去清廡。保障窮寒。報政無日。待罪再茲。本緣假節以非真。宜與過更而皆罷。迺蒙皇帝陛下。垂矜久戍。特改近班。因加秩之命云初。舉有分之錫。惟舊襲衣圍帶。釘轡名駒。本三朝之餘珍。重兩驂之私駕。曳焉稱體。知露冕以非榮。乘以按屯。遂據

鞍而忘老。撫恩云厚。有殞爲酬。

讓敕設狀

伏覩仲夏以來。苦雨爲瀟。河流泛濫。民堵墊傷。上惻容襟。分馳羣禴。方交修于至德。將迎召于太和。臣比荷顧存。召還禁近。蒙循舊體。盛錫宴羞。旣親耳于焦勞。難自私于樂衍。願停慈渥。以適事宜。其敕設欲望特許寢罷。

謝班次狀

〔案〕祁于慶歷五年罷翰林。改龍圖。八年復翰林。此狀與下謝宣召皆是時。

右。臣準中書劄子。奉聖旨。令立班在張方平之上者。因舊蒙榮。沿恩進等。懇辭弗聽。媿切參懷。伏念臣術學空單。年姿衰槁。自違禁署。四易歲陰。絕窺鈴索之華。寢忘赫蹠之式。屬無嫌避。再沐召歸。合真下陳。以從甲令。而方平等。更因近例。追敘前功。屈朝次之明規。崇仕途之美讓。洊煩諭詔。俾進上聯。畏再瀆以取訶。輒忍慙而就著。以新訂故。誠非素朽之長。雖去卽還。遂竊塞人之福。仰銜垂容。曷用仰酬。

謝傳宣撫問狀

右。臣伏蒙聖慈。特降中使傳宣撫問者。冒寒得疾。積損成虛。伏枕迷魂。偃牀在告。尋交薦于惡石。冀自救于殘軀。洒蒙皇帝陛下。齒記不忘。慘矜過厚。特迂使驛。傳諭玉音。許輟高手之良。以濟負茲之困。特大恩之下屬。庶營魄之重還。自此更生。盡歸論報。

謝官召入院狀

命節及門。褰綸在耳。踞聞振擢。交腴榮慙。伏念臣素稟朽疎。親逢昭泰。由累勤于舊史。獲通籍于從官。深入玉堂。慎司雅告。無能云補。第憇于空餐。有誘攸箴。已當于襍被。會臣兄庠。猥叨武政。例合避親。亟用請閒。懇祈去職。尋蒙可報。對易美名。跂華閣以通班。仍露門之擿句。宿官少責。用拙正宜。安于之筆。遂乾。絕聞名命。裨謔之草。雖在無復討論。適以樞務缺員。昆親補乏。垂矜舊物。靡涉他嫌。復收液構之材。人齒禁林之綴。矧違近密。回賀寒溫。其間緣疾召衰。乘憂失壯。學殖逾落。辭緒若抽。心忘五誥之醇。目眩十行之細。曷以再承大對。參潤遠猷。深惟洊至之華。抑本千齡之會。斯蓋皇帝陛下。仁無頗覆。惠等曲成。眷去馬以還駢。激倦禽而重翥。寵光完士。歆豔羣倫。尙當景式前修。繹尋故業。漢風彌郁。冀循爾雅之規。蘧齒已高。況屬知非之素。撫躬揆遇。濱殞爲酬。

授知制誥舉歐陽修自代狀

右臣蒙恩授臣依前官知制誥。準敕舉官自代者。伏見天子中允集賢。校理歐陽修。志局沈正。學術淹該。棲遲懷寶。不詭所遇。措辭溫雅。有漢唐餘風。如得擢在禁垣。委之潤色。必且粉澤王度。布于四方。親言責實。臣所不及。願回授受。以允詳求。

授兼龍圖閣學士舉施昌言自代狀

右。臣竊見天章閣待制施昌言。識邃慮遠。見推倫輩。歷司繁劇。沛若有餘。尤宜蒙三接之召。備萬乘之器。材能已試。臣且不如。願改恩章。以允朝渙。

舉楊安國自代狀

右。臣蒙恩特授前件官。依舊充職。準敕舉官自代者。伏見天章閣待講楊安國。質厚淵懿。邃于經術。勸道帷幄。有裨大猷。循名責實。過臣遠甚。乞回清授。以穆朝告。

修撰舉趙師民自代狀

右。臣蒙恩特授史館修撰。準敕舉官自代者。伏見尚書祠部員外郎天章閣待講趙師民。性理沈敏。恬于榮進。博記多識。殆無比倫。據經援古。措辭雅健。推名責實。臣所不如。召回甄授。稱是惇頌。

授諫議舉魚周詢自代狀

右。臣蒙恩特授諫議大夫。準敕舉官自代者。伏見天章閣待制魚周詢。外和内正。不憚強禦。頃排異議。辨正誣冤。毅然風采。聳于朝路。臣嘗景仰美行。心服其長。願回恩典。以光賢舉。

授翰林學士舉高若訥自代狀

右。臣蒙恩除授翰林學士。準敕舉官自代者。竊見前天章閣待制高若訥。資性謹厚。文詞淹敏。值物照理。物無庾情。與臣偕第。同班稔其履尚。若擢寘近署。足潤大猷。願回新命。以光清授。

再授翰林學士舉官自代狀

竊見某官志尚冲遠。風局精強。久次詞垣。晚成國器。材望既出。臣右年輩亦在。臣先願還濫及之恩。回副類能之選。

授兼侍讀學士舉張錫自代狀

右臣伏見天章閣待制張錫。安節懿行。講貫如流。進侍經席。有助咨問。願回新命。以光崇簡。

授待制舉賈昌朝自代狀

右臣伏觀先降敕節文。每授官許舉官自代者。竊見司封員外郎天章閣待講賈昌朝。學優文敏。操履堅正。質其望實。過臣遠甚。乞回茲授。以允公言。

薦劉絳狀

臣伏見應茂才異等科劉絳。生于遐遠。系出寒素。結髮從學。逮冠有成。研覃六籍。上下千載。多所論次。頗有指歸。固窮守道。不祈詭遇。向緣就試。六論文限敦促。偶因小誤。被黜有司。生平襟蘊。有所堙闕。絳嘗著春秋三傳析要并皇極書。凡四十五篇。皆鉤撫幽奧。會萃異同。思排異端。取質先聖。據其揚推。信足多尚。按絳行年方二十有五。若令齒德寔茂。藝術益深。必能擬迹惇儒。自名所學。欲望朝廷特許收試。授一直講職名。俾在國庠。敷述經旨。養成令器。進備譽髦。其析要皇極等書。謹同封。取進止。

薦張定方乞收試狀

右臣伏以良工構材爲廈。明主構士爲國。而材須求集。士待舉知。然後落成展采。功與時立。伏見應沈淪草澤科張定方。年三十八歲。識慮沈敏。氣直行範。文尙體要。不工聲病。涉知韜略。兼明遁式。甘足貧槁。久無仕心。昨爲鄉黨敦推。入應詔舉。六論程藝。非其素心。有司報罷。怡然引去。閉關卻掃。不干州閭。立言愴慨。指摘民弊。臣知壽州日。以禮致問。延至公門。觀其議論。卓焉切至。因取其所著書。得卻敵復戎戰書等篇。質多采少。紀實求當。臣亦指文索事。與相辯詰。觸機應變。籌策有餘。非但角空言。競華論而已。臣以爲如定方等輩。不可多得。或蒙召赴上都。程其所長。授一職事官。令往西北邊郡。必能研究術略。參贊帥臣。討論營陣。商摧攻守。至于撥煩幹蠱。又其緒餘。臣旣知其人。不敢有蔽。謹錄定方所著三軸并封上。如有可采。伏乞特賜收試。果無所取。臣甘苟言之罪。

乞知亳州狀

右臣竊以爲君務達下情。爲臣貴在無隱。雖有煩請。猶不蒙誅。臣之敷懇。正託斯義。伏念臣福庫材下。爲祿所浮。陽年四十。便若衰憊。纏綿宿疾。出入五年。氣迂脾倉。邪客胃府。觸暑犯寒。則飲食頓減。溫中實下。則藥艾未良。自念綿疴。屢求外補。昨領壽陳兩郡。凡一歲有餘。旣便養頤。漸克強勝。不期戎帥內鎮。蕃方臣蒙恩入朝。歡喜上道。庶能自力。還服近班。遄叨書命。寢華名級。而厓悴之質。果未遑安。舊痼有源。新疾

復動。春夏之際。痊劇無常。舉家竭急。時煩省問。羸露有素。班列具知。自非出守。胡能寬疾。臣伏見亳州去都至近。總務非少。亦須選任。俾往撫綏。欲望聖慈。許令臣知亳州一任。臣雖質課計最。有愆吏師。然恪奉詔旨。謹察邦政。于下流之比。尚有一口之長。幸其餘閒。盡力治料。儻蒙帝力。爲天所支。耗氣稍完。迷魂來復。尚更求自試。無憚諸煩。涓埃萬一。以圖云補。今茲祈叩。實迫疋殘。言拙少文。止冀矜遂。

乞解鄭州還京求醫狀

右臣伏以。臣子危急。必干朝廷。祈君父。雖誅戮在前。不敢避也。伏念臣自去年五月。脾胃寒泄。服暖藥過度。虛風客熱。結成沈疴。發歇不定。經一年有餘。臣以所領州路當兩京衝要。誠欲盡瘁死節。官下。是以不敢請假。牽勉勾當。偶無曠敗。昨自六月中。寒溘頓作。不復支持。經四十餘日。飲食減少。出廳不得。肌肉銷盡。惟有皮骨。左腳麻木。行履艱難。情志昏塞。委實勾當不前。遂于七月二十一日。牒公事與本州通判管勾。已奏聞訖。人情病未及死。須思治療。伏緣外州難得醫藥。坐待死亡。臣欲望聖慈。念臣從川途替歸。往復萬里。年老病甚。將就溘然。特許解罷鄭州。令還京師。就求醫藥。以救殘喘。或得一閒散主判司局。所貴易得假告。休息衰骸。萬一疋殘之軀。未填溝壑。再得陪服朝序。卽異時朝旨。別有差遣。不以遠邇。聞命卽行。以答陛下再生之賜。

景文集卷三十一

外制

王堯臣可三司使制

敕經九疒之入。以制國用。籠萬貨之羨。以謹邦財。平時倚成。使領爲重。況邊鄙未靖。饟調亟興。舟楫所輸。項背相屬。商總用度。彌見其艱。擇才而任。僉言茲允。以爾王堯臣。器閎質茂。行淑履方。比冠烝髦。寢膺優仕。歷階詞禁。俾代予言。倬爲文章。近古風烈。向假命節。再撫西人。綏慰流庸。宣導嘉美。已試之效。有位具聞。宜旌幹蠱之能。往諧主計之劇。仍華內署。增秩左民。朕惟師興之繁。食足爲本。出納矜吝。旣付于攸司。有無懋遷。當視于成訓。圖善而職。對我茂恩。

國子博士楊文友可尙書虞部員外郎制

敕具官楊文友。慶善承家。方廉絜矩。心通吏治。志服官箴。屢關決于郡條。久逶迤于朝紱。課成有狀。賞協當遷。俾陟朕虞之曹。且光郎宿之選。

國子博士魏琰可尙書虞部員外郎制

敕具官魏琰。夫馭吏之方。責實爲效。殿旣成罰。善亦當遷。循而行之。官則無濫。以爾簪裳華緒。文牘美才。

擢輟朝紳之良。克成縣譜之治。課目來上。歲次亦周。宜由經庠。往踐郎位。服我榮典。無廢舊勞。

國子博士向繹可尙書虞部員外郎制

敕具官向繹。積慶之餘。階廕而仕。綢繆吏閤。僉免朝榮。比倅州符之煩。且齋官簿之要。課皆應攷。歲亦當遷。朕虞之司。郎選爲重。往升華秩。無廢舊勞。

杜惟序可知滄州制

敕朱閣凝敞。便聯尤貴。劇選要任。庸得實才。以爾具官杜惟序。代閤忠規。蕃衍沈濟。服在近列。夙暮告虔。河朔之區。繕守完備。方事之總。擢委价藩。悉心振職。謀無遺謂。輿議歸美。達于予聞。特推寵章。超踐華局。弗遷他領之舊。益圖來譽之升。露服以行。足詫方郡。

郝元規可西京左藏庫副使知辰州制

敕郝元規。材秀膚敏。照機無帶。朱閣中殿。勤事有年。陝都而西。假節將命。糾讞詳簡。藹于予聞。進貳使聯。且付州任。矧辰陽之控。蠻落在焉。綏徠荒梗。參責威愛。往念榮寄。懋哉不忘。

楊告可右諫議大夫知鄭州制

敕諫省華要。從古爲重。比來以位遇既顯。言責難專。故寵其器名。以宅良峻。雖不蒞職。要爲邇臣。具官楊告。慮敏以精。器適而濟。嚮煩所使。用觀其能。而漕引東南。輸入都內。歲有羨餉。役無淹期。飲予足食之術。

時乃析豪之效。僉質公議。應圖厥勞。俾升七諍之列。且藩三輔之邇。懋率忠力。光對寵靈。

李知和可西京左藏庫使制

敕李知和。性挺柔良。志安謹力。祇事宮闈。夙夜以須。服勤扃帶。左右逾恪。嚮閱功次。久待歲成。持從優除。式示蕃獎。離都豐帑。名要地崇。欽踐使華。仍總餘職。

張庚充開封推官制

敕。畿輦華翼。庶邦式瞻。幕廷參諏。乃僚是寄。具官某。礪淬敏行。發揮雅才。祛煩體遠。洞無盤錯。首公絜矩。樹爲風聲。率西之行。宣力彌劭。俾進京服。益光賓儀。左右長人。叶濟嘉績。往念襄擇。勉毋怠忘。

侯禧可節察推官制

敕侯禧。率勵追胥。捕格姦盜。全伍就執。賞目應條。改升賓筵。參寵朱紱。往服褒擢。增最爾嘉。

尙書司封員外郎直集賢院麻溫其可開封府判官制

敕具官麻溫其。京劇居中。尹正須輔。必擇士彥。參舉政綱。以爾優學麗辭。清規遠概。早階科等。見重俊游。屬膺官簿之勤。外樹藩條之最。稍遷省戶。還集書林。蘭聞彌薰。井德無改。宜資緣飾之美。俾贊浩繁之寄。

呂公綽可刑部員外郎制

敕呂公綽。風猷華劭。材力淹舉。務時儒術。邁訓義方。間從劇使。復專清貫。樹聲宣力。所往必諧。夫結課之

條。須最而陟。旣挺明效。竄符遴選。宜進司刑之曹。庸光滿歲之法。

袁易可比部員外郎制

敕袁易。踐揚朝路。肅給事經。向委守藩。式敏從政。滿年獻狀。論績當遷。聿圖勞動。用秩勾比。揆榮思報。懋哉不忘。

戚舜元可比部員外郎陸仲息可國子博士王逢士郭承祚竝可殿中丞李從夏侯錫竝可祕書丞制

敕戚舜元等。三歲之限。天道小成。朕課吏勞。稽法于此。以爾等文敏強濟。業于官下。經營旅力。謹我詔條。事無度情。文不諉上。年比如令。朝次遞遷。省闈庠戶。芸簽盾局。資踐有等。褒進則同。各仍前蒞。益昭來譽。

柳三接可大理寺丞制

敕柳三接。向榮儒第。久課吏勞。所知之薦。應條而至。銓覆有實。擢敍爲宜。往丞卿曹。用啓榮序。

陳紹孫寇仲温竝可大理寺丞制

敕陳紹孫等。竝率勤恭。專幹煩監。如職而辦。閱歲宜遷。丞佐寺卿。勉罄賢瘁。

商泰可大理寺丞制

敕商泰。淹試吏勞。綽著材譽。監司廉狀。保薦交章。參質課條。已事皆驗。俾遷卿屬。彌勛乃勤。

陳德之可大理寺丞制

敕陳德之。以材自將。所蒞時當。監司廉狀。保牘上聞。以其幕府卹淹。治目參實。俾丞于理。用獎宿官。

李定柳灝可工部郎中制

敕三歲大比。令甲有條。覈實最科。庸信吾賞。以爾定秉尙淳固。典學人官。宣力幹裕。華皓一志。爾灝履吉。林茂廉智。自將美實。積中暢于事業。偕籍祕館。參爲吏師。或權節財賄。以資仰給。或班布恩詔。倚成嘉靖。灼有見效。暴于攸司。用置郎選。式光考課。竝仍事局。益念懋功。

鎮安節度判官黃炳可太于中允制

敕黃炳履操清劭。局力精強。歷贊侯藩。休有嘉問。所知之薦。交章以聞。宜升儲案。用階榮序。當念褒寵。毋廢前勞。

蔡亶梁堅竝可監察御史制

敕監察之任。舉視行馬外事。職峻望清。匪才莫允。以爾蔡亶志美謀劭。安節而不流。梁堅識精意果。蹈道而能立。竝試可有狀。淹外累年。比臺屬缺員。邇列騰薦。朕觀其所舉。叶于攸聞。咸易法冠之華。俾增朝路之肅。毋過毋怠。時又爾中。

鮮于亨可祕書丞制

敕鮮于亨素挺時幹寢揚仕塗最升有狀文飾無害攸司考課年所如條書省有丞序進尤美尙宰劇邑勿懈爾勞

辛若渝可衛少卿制

敕向科夫家充籍和璧明課衆寡以列募科能辦其事吾必而賞以若渝方守近輔克稟朝規悅勸趨力樂從符伍以狀自上閱數應條宜遷卿棘之副以旌吏材之敏

宋忠臣可水部郎中制

敕宋忠臣敏于爲政恪于守公不憚諸煩汔有成績三歲獻狀申令著文俾正郎曹以旌吏課益宣爾力毋忝茂遷

蔡襄知諫院制〔案〕襄知諫院在慶歷三年三月時祁方知制誥

敕蔡襄識詣冲遠履業端方含章立言望古爲偶而讐正祕籍棲遲累年懷國之寶戢而未肆朕方永惟闕政思聞讜謀增員諫署高選才傑是用振爾淹卹光我簡求進丞祕聯參幹言責噫諍引之道今昔異宜蓋論高者虛而難從議瑣者卑而無體裁訂其要俾可底行往哉惟虔欽遲中益

奏舉人平江軍節度推官王罕可大理寺丞制

敕具官王罕迺者深詔列位竝舉所知雖頗限吏資而實取才劭以爾早勤官牒游結歲勞比籍幕籌之

能遠光縣綬之選。而名列薦狀。課在最條。宜循賞階。入備卿屬。修方永譽。以稱寵章。

奏舉人前權興州軍事推官樂富國可大理寺丞制

敕具官樂富國。夫舉吏之格。以監司爲先。蓋其試行能。察臧否。審于他部故也。惟爾上課比牒。薦名。皆將曹之計臣。糾獄之專使。泊于郡將。濟之朝紳。保任一辭。鉤校胥協。宜疇幕畫之最。俾預卿僚之選。

奏舉人前楚州團練推官蕭固可大理寺丞制

敕具官蕭固。朝廷謹保任之科。求才用之實。覈乃最狀。委于銓衡。爾修辭策名。效智從政。頃以善畫。介于列藩。而準詔之臣。連章署行。參觀閱式。允褒嘉。宜備屬于卿曹。且勸能于吏啓。

奏舉人前平海軍節度推官知福州懷安縣李昭選可大理寺丞制

勅具官李昭選。彘絲銓條。擬戎介。墨以漢綬。宰於閩區。而薦能交章。覈課如詔。朝有面命。恩不容私。宜丞卿曹。用勸官最。

鎮南軍節度推官知袁州宜春縣廖宗禮可大理寺丞制

勅具官廖宗禮。彘假賓簪。往紆縣綬。課無殿日。薦有連章。銓審以聞。旌疇有次。宜遷聽棘之屬。用廣甄材之路。

前鎮江軍節度推官知蘇州吳縣聶德一前蘄州廣濟縣令張保衡并可大理寺丞制

勅具官聶德一等。咸以通經。備于補吏。或列藩奉檄。兼委于字氓。或大邑腰章。游較于異課。而行充薦牘。年及赦條。宜疇銓格之勞。俾率卿丞之職。勉欽并命。毋忽攸箴。

前邠州新平縣令裴愿可大理寺丞制

勅具官裴愿。早服吏資。薦循選格。彙勤縣譜。雜有薦章。銓簿以聞。賞科無廢。宜入丞于理署。且仲勸于宣成。

前江陵府佐司理參軍余貫可大理寺丞制

勅具官余貫。藝文中科。肅給將事。比參府掾。分幹理曹。獄無頗辭。攷有連最。質于銓審。名在薦延。宜備刑卿之聯。且光材吏之舉。

光祿寺丞集賢校理趙宗道可大理寺丞制

勅具官趙宗道。夫銓審之最。著于甲令。所以育人材。而旌職業也。以爾門緒華膺。機靈敏秀。早程賦札。遂預書林。自服鉛黃之勤。多分豕亥之謬。汔茲歲滿。嘉乃官成。宜易漢勳之聯。進丞理法之署。尙資是正。以對褒榮。

奏舉人縣令韋輔堯可大理寺丞制

勅具官韋輔堯。學古而官。庇身爲邑。政均疲俗。名在薦章。選格較勤。吏資應賞。俾丞卿法。用勸銓流。

刑部試到詳覆官縣令劉永錫可大理寺丞制

敕具官劉永錫故事。上臺秋曹。覆天下辭案。凡置佐率屬。必先試而後命。亦以觀吏文。責最目也。以爾擢自縣邑。俾替坐曹。能服簡書之詳。且周星歲之限。恩有成例。賞不爾私。改丞理官。尙典刑局。

奏舉人前同州觀察推官張維師可大理寺丞制

敕具官張維師。早服吏銓。序參賓畫。勳贊名藩之重。實兼他部之勤。且有連章。稱宜厥職。載稽官簿。仍獲考年。俾改卿寮。以振才滯。首公絜矩。勉副所知。

刑部試到詳覆官司理參軍劉直可大理寺丞制

敕具官劉直。故事。天下具獄上書者。皆本曹置屬。覆視而審覈之。將充其官。必試乃可。惟爾擢自州掾。隸于邦刑。紛披科條。檢結凡最。竭慮無懈。質歲有成。宜疇吏勤。進補卿寮。勉續成績。思稱茂恩。

奏舉人試祕書省校書郎前宿州司理參軍黃孝先可大理寺丞制

敕具官黃孝先。早服秀科。洊署勞牒。勳治郡獄。參飾吏文。訖無郇豐。多所澄雪。使臺陟狀。銓簿類能。宜入替于理官。且申勸于公路。

奏舉人前眞定府司錄參軍焦盛可大理寺丞制

敕具官焦盛。經明服官。吏久隨調。勳參綱掾。能督府郵。守將狀其廉端。州案申之慰薦。稽于銓審。應我賞

科。俾改卿僚之華。勿孤士類之舉。

掄選人前永興軍節度推官知河南府長水縣事張昭文可大理寺丞制

敕具官張昭文。間命都銓。擇吏之勤廉者。假以部從事。而參宰劇邑。實有允令。圖其後勞。爾今來思。具質成課。既符信賞之目。宜服當遷之命。往丞聽棘。彌厲飲冰。

內制

除婉容張比封貴妃制

〔案〕封貴妃事。仁宗本紀。在慶歷八年十二月。后妃傳。在皇祐初。

門下。朕聞王者始風。本乎妃德。天下內治。模厥人倫。咨擇邦媛之良。餽敷嬪壺之懿。茂推異數。誕布公言。婉容張氏。陶翕闢之和。生慶善之族。玉粹其度。淵靚爾衷。以阿保之法。自閑以圖史之誠。攸服先贊內職。叶升大猷。力蘋沼之至恭。襲珩佩之旋矩。禮以爲絢。謙不忘勞。用嘉冲徽。顯啓優渥。進膺綸翟之貴。參亞軒龍之華。於戲。謹于順承。陰教惟穆。勤乃輔佐。王化所經。爾其念夕。惕之虔。躬日休之裕。樛木之逮乎下。然後稱仁。彤管之紀其言。于以垂美。往席寵命。毋忘訓辭。可特進封貴妃。仍令所司擇日備禮册命。主者施行。

封寶壽公主制

〔案〕宋史公主傳。寶壽係仁宗第十二女。此云第十三女。未詳孰是。

門下。朕聞自家所以型國。治內本乎先親。況天挺王姬。邦著封典。舉循厥舊。今也惟時。皇第十三女。儲光

婺躔肖順坤極。未覽古而知教。故在姆弗勞。雖尙幼而好仁。故處躬惟恪。德範已就。褒冊難稽。是用涓選。休辰。焜照蕃渥。順格景風之懿。播聞穠李之華。商錫嘉名。護成淑質。於戲。周推車服之異。漢啓脂澤之榮。非曰親私。繫乎治體。無替前習。更竚來恩。

除張耆太子太師致仕加食邑實封制

門下。朕寵遇舊德。欽揖高年。罔勞官職之務。俾逸股肱之老。特申沖概。庸厚邦風。具官張耆。資量沈雄。規猷隱濟。被遇先聖。宣力四方。旣昭元戎之毅。遂幹中樞之劇。實有茂伐。居無間言。進視乾台。彌寵師節。肆予纂紹。益復倚成。入則參勤王家。出則是憲方國。能守其貴。屢省乃躬。固將繫魁壘之良。罄謨明之懿。竚誨前席。須績景鐘。遽披至誠。願還所事。勉諭已悉。遜執不回。且念大臣重違。雅志難奪。與其屈任。孰若便安。宜改儲師之華。聽上使旄之領。衍其爰入。尊以朝儀。於戲。抗請辭榮。推恩就第。鎮天下之競。于以稱賢。保臣道之終。茲焉有體。勉荷殊渥。恬嗇太和。毋專高蹈之介。有俟悼言之益。

除皇叔德文武軍節度使加食邑實封制

門下。朕仰紹鴻烈。惟懷永圖。每糾宗族之恩。疇先伯叔之懿。用推厥愛。以展予親。具官德文。道與粹和。天俾忠謹。有言而踐。百行成章。而暢四支。早建將牙。兼穆台鉉。邦洽斯譽。神勞以祥。歲艾而精明不衰。爵隆而侮吝彌遠。比詢朝論。已啓王封。尙圖久勞。更膺異獎。改疏假璧之奧。進服溫貂之華。仍廣轅疇。以大租

入於戲。修人道之睦。我惟惇敘。閱天下之理。爾實老成。益美翰垣。參重宗稷。秉德陪義。是惟顯哉。

除皇兄允讓寧江軍節度使加食邑實封制

門下禮重祭膳。寵伯仲之國。詩標棠棣。廣親族之愛。稽古教睦。朕能行之。具官允讓。器令而固。志和而立。懿作休德。奮爲嘉猷。早秉中權之雄。復正大宗之領。協我公姓。光于前人。間侍郊宮。參獻彝瓚。服攸箴而惟謹。攝爾儀而罔愆。向者已徇朝言。特疏王爵。載惟褻渥。尙慊成勞。俾視秩于台階。且仍華于將闔。優實多戶。併示隆恩。於戲武穆文昭。其流斯遠。元戎茂宰。注意所兼。爾其浚明日孜。蹈道時敏。欽助予治。丕續膚功。

除皇兄允弼武康軍節度使加食邑實封制

門下朕惟一二兄弟。屏翰吾家。每推骨肉之愛。以強本根之託。矧在邇屬。早休厥聲。適及剛辰。進膺異數。具官允弼。甚德而度。參仁以和。居貴而罔流心。訓恭而遠祇悔。間陪郊獻。佐庀宗司。抑抑攸儀。舉皆率履。綽綽斯裕。內無違言。成子敘親。時乃修職。比者雖疏王爵。未厭寵名。宜停後務之繁。俾領元戎之制。增食爰賦。兼實幹封。於戲磐石而宗。寄莫重焉。扞城于國。義莫先焉。可壯非猷。可順非迪。仍輟就藩之遠。姑隆綏族之恩。往惟懋哉。顯對嘉命。

除皇弟允良安德軍節度使加食邑實封制

門下堯惇茂族。於變是雍。周建懿親。時雍展愛。朕參式先憲。襲序吾宗。僉同公言。誕舉恩冊。具官允良。氣韶質美。憑信厚之餘。體和履順。遠冲孺之習。早經留務。常止上都。以爾考有叔父之尊。帝室之屏。助昭彝器。慶裕後昆。向嘉冢嫡之承。已疇王爵之顯。斷自予志。申付節旄。因具官儀。衍實封社。於戲。古有謙訓。汝其念聞。夫寵不期驕。而驕從謙。不待益而益。附修也可以思。永慎也可以寡。尤務孝圖。忠欽服茲命。飭躬靖位。以卽而藩。

除皇弟允迪安靜軍節度使加食邑實封制

門下朕聞立愛莫先于親。繁支實庇其本。每念攸訓。匪伊異人。用推敦序之典。期光夾輔之體。具官允迪。承燾天祐。衍慶宸孚。舉動嚴方。趨覘閒敏。思長富貴之守。寢肄朝夕之虔。向畱使華。允穆公路。頃以王邸殂謝。予懷悼驚。念其堂構。眷深橋梓。維城有寄。墨經還朝。載隆近屬之恩。俾領中軍之節。仍增邑食。且實戶封。於戲。乃考之忠助。四邦是式。乃兄之光寵。十乘有儀。爾偕厥榮。毋或茲忝。欽卽殊獎。祇勵遠猷。

除皇弟允良加功臣食邑實封制

門下朕率祖宗之常。謹郊廟之饗。迎日涓選。重燎告成。衍三靈之歡豫。肆萬民之慶告。既飲其至。因賚爾勞。矧一二兄弟之親。參陪夙夜之恪。宜緝恩典。以寵懿藩。具官允良。履尙詳華。機采明悟。世不忘于濟美。孝乃移于事君。王社以光。帥節云重。向因侍祀。爛見協恭。闐然陽氣之休。稽如盛服之美。我禮尤具。惟神

克敬特緣。膳胙之頒。首篤棣跗之愛。進加功號。兼拓爰封。且詢中石之規。更增多戶之實。於戲。自天介祉。既輯于上儀。爲國懋能。敢私于同姓。往祇異數。勤劬壯猷。

杜衍加食邑實封功臣制

門下。朕祇飭齋輅。躬款泰壇。昭事天明。交脩地察。佑升二后。賓延萬靈。昭鑾次于都甸。欽紫焜于霄極。越惟雋輔。相我盛容。方錄解嚴之勤。疇先讓假之愨。用信賞典。以告治朝。具官杜衍。清明以和。諫達而敏。有罔伏之亮。奮于知恩。有含章之美。發于事業。向圖克祀之愆。允賴若時之庸。假節太庭。告謚慈祐。奉瑤冊而虔鞏。祕金鎮之邃嚴。而又率籲攸司。奉行故典。牲脗博膺。玉幣精純。接神明以歆馨。塞穹壤而凝祐。遂頒大慶。肯洽衆歡。永言皤髮之良。欽從屬車之至。職勞而賞。惟敏則功。宜增號表之榮。仍崇階等之貴。廣開厥邑。優實乃租。於戲。靈眷備成。恩章差沛。所期君臣有以相戒。休息有以無疆。熙其未明。瞭其未睹。俾又予治。聿暢爾。

賈昌朝加食邑實封君臣制

門下。朕昭事天地。哀侑祖宗。九州四海。畢來助祭。千乘萬騎。并摠上儀。眷我輔臣。相惟元祀。乾紫營之升燎。肆王軼之解嚴。差鉞厥勞。疇先爾賞。具官賈昌朝。挺秀崧漢。儲精本元。撓之彌澄。宏德量于無際。汰焉不耗。植忠質以自強。台樞踐更。文武參式。自善祥之歲習。凡用度之日咨。間臨路朝。前遣鴻冊。實膺使節。

之重。往祕后祔之藏。至于入侍齋居。出陪奉引。官師象物。供帳無勞。成上帝之居歆。綿中區而敷慶。竣于大事。時乃協恭。是用著美號。以表勳。敘崇階而峻等。卽邦進爵。衍食疏封。萃爲寵章。式顯優數。於戲。祭而受祉。眇躬難乎獨饗。賞弗淹日。同體示乎仰成。益圖夙夜之虔。交修大小之務。靡否不替。有猷而爲。永孚天休。茂對嘉獎。

王貽永加食邑實封功臣制

門下。惟天祐德。惟辟事天。率三歲而合享。總六飛而出次。雖居有常處。用有定規。至于訪逮典彝。粉飾容采。眷吾近弼。預有勞焉。惟是圖功。實無留賞。具官王貽永。行本和懿。謨函寅亮。公忠交奮。賢戚兩華。叶修對越之虔。參陪陟降之恪。事皆如素。人罔告勤。普羣望以懷柔。震萬祥而翕習。已敷鴻慶。遂策茂勳。嘉夙夜之方將。顧臣鄰之同底。是用益以寵號。冠于美名。拓井邑之故封。實租食之新數。於戲。神貽繁祉。旣惟倣于兆人。朝論獎冊。遂敷施于有位。尙當念治之所由治。處休而勿自休。共守治平。滋懋丕績。

特授李德政加食邑實封保節功臣制

〔案〕德政係交阯郡王。

門下。朕躬執玉幣。祇見郊丘。率萬官以承序。職百神而有次。薦誠以德。蒙后皇之竝臨。推福爲恩。塞穹壤而偕抃。眷言列位。助戴上儀。內則相禮之虔。外則獻力之恪。用當飲至。均第有勞。具官李德政。秉心懿恭。執義光大。昭啓王社。妥安裔人。載甲令以輸忠。航貢品而綿險。一我尉候。保茲東南。屬欽柴之告成。前景

風以覃賞。爾乃作扞。時予不忘。宜益表功之華。俾旌守方之重。陪敦封邑。衍實幹租。於戲。天瑞神祺。紛流于中野。朝俞國霈。敷錫于列藩。尙膺典冊之榮。愈圖彝器之績。懋哉夙夜。永綏爾邦。

景文集卷三十一

內制

賜中書門下詔

敕中書門下。朕聞至治之世。天下向化。元凱共朝。不爲朋黨。房杜相濟。不爲比周。君明臣哲。垂榮無極。何其德之盛也。朕旰晷銷志。每用庶幾。思所取法。未知厥路。而承平之弊。澆競相蒙。紆隨法生。僞逐情動。假我王爵。樹爲私恩。所憎則同口共訾。取一切之快。所善則併辭迭譽。希不次之遷。遂乃人務交遊。家爲激訐。至于陰開納賄之請。陽託薦賢之公。居下而圖柄。臣順非而動偷。俗附離交扇。流蕩忘還。更相援接。以沽聲譽。由是人士以行怪爲美。辭賦以訕上爲能。放肆異言。詆斥前聖。謹流羣口。虧紊爨倫。又頃正按察之名。謹推擇之選。俾將明命。以慰多方。而奉使不稱。繩愆過當。恣苛刻以搖羣怨。織纖微以構罪端。守倅則互責刻廉。令尉則更容伺察。上下疑貳。奏鞠交橫。未益治平之風。反成多辟之暴。向申勅戒。殊未奉行。朕疾夫爲國生事之徒。背公死黨之俗。推狂濟果。去簡成煩。況長吏者。務在全安。刺舉者。素有條禁。民如馭馬。安得駭驚。理猶亂繩。弗宜遽急。當求大中之順。漸致清淨之原。至于屬文之人。體要爲急。苟專非聖之論。寧免疑衆之誅。自今者。詭激邀名。浮薄連茹。用察以害良善。倚法而峻誅求。雷同私論。營罔朝聽。竝

委中書門下御史臺采察以聞。故當責其不悛。懲乃敗類。罰之無赦。令在必行。咨爾有司。咸體予意。故茲詔示。相宜知悉。

賜中書申明先帝賜文武臣七條戒州郡詔

勅中書門下。湯德至盛。著具儆之言。漢功方茂。下督責之詔。于時中外協念。以趣大康。朕顧眇躬。託王公之上。明弗能燭。數有未通。每念付畀之勤。治平之詔。日慎時惕。罔敢自安。庶臻至治。無差先烈。是以畿府州軍監縣之長。居常推擇。部分總督。屯邏之委。一皆僉求。亦冀羽翮參翔。腹背偕奮。手足迭扞。心膂獲寧。今乃聞郡邑庶官。未能稱職。紀律耗廢。真僞混淆。或自謂謹柔。既難集事。或矜爲強濟。又匪恤人。或朝夕詭激。而望改遷。或歲月因循。以濟貪冒。或廣飾廚傳。掩簠簋之瀆。或曲奉監司。逃簡書之劾。緣令作詐。倚公殖私。頃者。以邊鄙未寧。師旅四出。旣不獲已。調發于民。隨輒戒勅。勿令煩擾。然而斗粟未漕。民有一鍾之費。匹帛暫輸。吏有數縑之入。與我共此。所望責成。爲上斂怨。任將安寄。以至盜賊屯結。公行劫掠。上下畏懦。弗能擒討。驚騷閭里。盜弄庫兵。士非素習之專。患無豫防之禁。永言茲事。寧忘朕懷。跡夫弊生。實始官濫。恭以先皇帝欽睿明翼。達見治宜。親著三條。垂戒百執。每辭去之日。普令拜賜。凡從政于外。舉得奉行。羣臣亦有刊石傳文。題屏示坐。朕以爲旣能尊戴。曷若踐言。幸獲親聞。便當立事。其外任文武臣僚等。自今以來。務革前失。聿新後圖。以聖考七條。更相誨勗。置朕此訓。亦復研尋。爲仁由已。取則何遠。上尊先

甲之諭。次謹申命之虔。攝爾頽綱。綴我漏目。使美課歲茂。善狀日升。則隆名顯秩。朕將何吝。必若奸宄弗禁。農晦卒業。論報誣冤。徭役重困。不恤士伍。不訓武經。邦有明科。朕當必罰。咨爾有衆。無謂食言。故茲詔示。想宜知悉。

賜北京留守資政殿學士工部尙書程琳并知相州宣徽南院使保靜軍節度使王德用撫問詔
勅程琳等。卿謀略沉濟。忠款精強。眷言守屏。方倚風力。而邊州上奏。屯旅鞠凶。雖遣招懷。亦資防遏。綏訓士衆。犄角封陲。明爲指蹤。以俟安堵。

賜新除龍圖閣直學士知成德軍府事田況詔

敕田況。省所奏。乞罷龍圖閣直學士。只以舊職知成德軍府事。及有河北經度機密事件。欲乞暫乘遞馬。赴闕入見。敷奏事具悉。卿有仲舒之文。翁歸之武。毅然施政。萬夫所觀。故易以近職。殿于大邦。克矜方略。寢擔邊陲。遽露至懷。願仍舊秩。擇才而授。羣議所同。往諸官守。毋或勤讓。比又邊臣失御。戍伍卽擒。眷惟都會。尤須鎮輯。特蠲入覲。便卽之藩。當體眷期。益奮忠力。

賜任布詔

卿年德兼艾。憂勤是力。向者憫煩機劇。是用許三城之行。雖使齎神。亦資坐鎮。何所謙避。卽以將老爲言。惻于朕襟。似未深諒。且洪樞之佐。黃髮之良。非與庶工。輕于得謝。宜安吉履。第守奧藩。臻蕃福胙。以副衡

倚。

賜知鄆州宋某詔

勅宋某省所進奉阿膠一合重五十兩緋羅夾復裏事具悉膠品之貴阿井爲珍卿適茲守土勤于作貢順時熬液凝劑甘新恪稟爨規參旅方物區產云美料洽所須推處厥誠嘉歎何已故茲詔示想宜知悉

賜知審刑院事丁度詔二首

勅朕念細人無良庶獄未措每于決事憫然疚懷卿鑑融機敏駢無停奏平疑錯枉洞得其情乘此長贏託夫論執況海區甚廣按訊日來能致少閒固亮勤職願紀直筆彌悉至誠歎悅所兼不忘于意仍依奏宣付史館

敕丁度省所奏今月二十五日已前送下公案竝已約法斷絕了畢別無見在文案事具悉嚮以官師既衆賅冒相尋廉刻之奏猥騰論報之文四出每加申勅無及細苛卿有服念之勞簡孚之謹鞠讞雖畏報下無留旬歲之中停奏于冊削章歸美宣力有勞嘉其悉心之功成我措刑之漸載惟歎尙弗忘于懷仍依奏宣付史館故茲獎諭想宜知悉

賜杜衍乞退第三表不允斷來章詔

省上三表乞保餘齡授以散秩事具悉卿有隨會之忠任隗之正易之甘節洪範之有猷是以叶都公議

付俾樞管。方事之總。勤勞王家。夫推之同心。不容有閒。久于其任。乃克懋功。游閱奏函。殊乖茲指。且卿屬疾。雖屢揚休不衰。魁然華皓。爲朝耆碩。用及四載。便欲引身。徇高全亮。是安沖養。使天下之論。謂朕輕于進退。貳于眷毗。得無傳聞重吾之不德也。況謀謨未究。方當匪躬。邊鄙云騷。詎獲高枕。昭體大誼。卽斷來章。定志宿官。熙我不績。所請宜不允。

賜權知開封府吳育乞解京府不允詔

敕吳育。省所上表。乞解京府。授側近一郡事。具悉。卿志力開濟。飾之文敏。京轂操決。號爲詳明。庶邦是則。繫乃之寄。胡遽披請。願去浩繁。況具獄報論。卽情甚細。從宜報據。在職當言。雖不果從。要之有守。宜祛嫌慮。以副眷期。懋哉夙夜。式永休譽。所乞宜不允。故茲詔示。想宜知悉。

賜章得象讓職第三表不允斷來章手詔

省三上表。乞解重柄事。具悉。朕聞君爲元首。臣作股肱。相須爲體。是能有濟。朕荷祖宗之構。臨制萬方。不明不敏。每用自愧。賴天之福。寓內以寧。惟一二柄臣。輔其不逮。丕承執競。以克厥庸。卿毗佐七年。終始一節。鎮浮以雅。伐叛以謀。載其清靜。紓我勞疾。俾朝威主惠。震疊光明。時乃之功。冀懋台德。今確徇沖尚。引避宰司。求申所懷。未喻前答。永言大誼。當存至公。何嫌何疑。自期獨往。若然。則元首之眷。股肱之司。得無用違。以忝成訓。毋或封執。容適大中。卽斷後章。式副朕意。所請宜不允。

賜田況讓識不允詔

敕田況省所奏蒙恩授起居舍人陳讓事具悉向有邊臣無良戍伍亂挺殺害官吏驚騷里閭懼而歸命罪乃斯得卿適往臨撫善處便宜蘊夷渠惡分北支黨曠然按堵後無餘災嘉此成效已令進秩何循謙執乃乞讓還賞惟值功朝靡收汗當祇厥命方職爾勞所讓宜不允故茲詔示想宜知悉

賜王貽永生日詔

譜閎華勳風猷沈力親則副馬幹惟中樞帝錫子佐實表賢運仲月之魄厥生記辰世祉蕃昌家宗歡籲就頒牢飲茲異寵光俾壽且祺敷暢助績今賜卿生日羊酒米麪等

賜韓琦生日詔

謀府強濟忠概沈詳幹予樞筦允穆王路時惟生日有煥慶宗家情美于高門邦論寵其名世特頒多物庸示褒懷牽釀有常體粲兼列合而姻族續爾期頤今賜卿生日羊酒米麪等具如別錄至可領也

賜杜衍生日詔

思皇雋輔對我盛期遠跡名世之來顯符賚弼之比予治云洽乃功不忘克生紀辰肯慶參貺雖緣顧復之感方樂艾耆之華用遣使人就頒牢品既昭恩眷且及爾私

賜宰臣章得象生日詔

帝賚茂宰。與朕同心。翁受九德。修明百度。享期賢運。交相爲華。今茲誕日。固有常禮。饗人酒正。各俾往頒。一以申祝。永年一以助樂。私闡錫爾難老。副我眷毗。

賜宰臣文彥博生日詔

崧極憑粹。實啓周朝。昂躡融照。是生漢輔。眷我良弼。挺厥世祥。式倚爾才。以佐台德。日惟載育。禮厚有初。俾洽宗黨之歡。用頒羞飲之具。旣推異數。具熾茂齡。

賜參知政事賈昌朝生日詔

挺秀民鬯。協美賢運。盧合著蔡。道侔絲繩。參裨讓假。穆我元化。今茲誕日。尤驗世祥。況稱壽親闈。交慶私室。宜頒多物。以助胥歡。仍續永年之祉。圖終亮采之績。體予褒曷。卽當祇膺。

賜參知政事范仲淹生日詔

八月二十九日生

蔚有雅才。生此王國。參幹萬務。朕與嘉之。載誕及辰。糾族胥慶。宜有優禮。以重邇臣。旣昭名世之顯。兼資式喜之具。申續難老。滋奮大猷。

賜樞密院副使晏殊生日羊酒米麪詔二首

進止方重。謀猶粹果。變定台繹。參決樞華。民瞻國論。浩然胥協。天挺俊乂。符我治平。知及誕之辰。懷顧復之慶。宗戚歡祝。宴喜相存。特此頒分。以重褒眷。今賜卿生日羊酒米麪等具。如別錄。至可領也。

碩學冠時。清心照理。昔侍帷幄。在衛翼以勤勞。擢貳樞機。當論議而沈正。載聽惟崧之頌。適臨生甫之辰。俾永屆于遐齡。用特頒于禮餼。膺茲寵異。諒體眷懷。

賜樞密副使張士遜生日羊酒米麪詔

貳職天樞。同寅相室。忠勞允著。廣益居多。屬茲生育之辰。特舉匪頒之典。式介眉壽。永佇嘉猷。

賜陝西四路沿邊經略招討都部署司敕

朕卹軍旅之苦。寵邊陲之良。事從優寬。情無遴愛。至于常愆細過。竝許功除。煩文苛法。罕由吏議。昨滕宗諒。張亢。竝緣事任。合給公用庫錢。俾其宴享賓僚。犒飫軍伍。而乃用度無藝。簿領失防。陽託貿營。潛有牟入。攸司言上。遣使卽推。如聞逮繫。頗多鞠劾。彌廣本其冗費。寧足深誅。已罷案窮。悉令原貸。其滕宗諒等。止免一官。量降差遣。雖屈吾法。期慰士心。且夫盡用市租。美推趙將。來從我取。誼表漢臣。每慕前風。思全大體。尙慮諸道帥守。便以茲事爲懲。或損狹餼牽。或裁量藥餌。苟存畏避。謂免譏彈。胡益至公。亦非朕意。但當循經費之式。去自潤之私。取仰于官。均惠于衆。由茲底績。夫何閒然。安節坦懷。毋或疑憚。

賜南平王李德政歷日詔

按卽交趾郡王。

頒歷之義。以初爲常。俾一天下之歸。用謹人時之授。以卿列壤南裔。率職本朝。宣我恩化。慰彼黎庶。每屬歲元之會。必榮廟朔之藏。朕亦推處禋祥。裁輔舒慘。申命太史。分次左方。宜按象以奉行。表布和之胥泊。

特茲馳錫。勿怠欽承。

景文集卷三十三

內制

賜樞密副使王堯臣生日禮物口宣

識裁精深。器懷冲邵。典司內密。參慮幾微。惟素籥之導寒。屬左弧之屆旦。禮優近府。恩著上臺。加惠餼牽。侑驩醪酒。庸厚樞庭之數。且爲族宴之榮。當體寵私。所宜祇受。

賜樞密副使孫沔生日禮物口宣

才居上哲。地在內樞。懋宣一德之規。協贊萬幾之務。迎長紀候。載誕協辰。錫以縹醪。頒茲生餼。用示臺恩之厚。且資族宴之榮。當體眷私。所宜祇受。

賜樞密使宋庠生日禮物口宣二首

俊乂大臣。耆明舊德。首正開序。載誕協辰。爰命寵頒。所宜祇受。

元精異稟。大雅克生。蔚輔本朝。亶有盛德。誕惟吉日。慶屬首正。國體同休。臺恩著範。餼牽有碩。醪酒惟醇。用助宴私。式精禮意。

賜宰臣劉沆生日禮物口宣

任重台司。寄深時柄。爰屬誕辰之吉。用稽蕃錫之文。式示眷懷。且昭毗倚。

北京賜賀正旦兩蕃人使御筵口宣

卿等遠涉歲陰。竝趨元會。馳軺永路。彌節離都。乃眷歡勤。俾均宴勞。

班荆館賜契丹賀正旦人使到闕御筵口宣

卿等肅持邦聘。祇會歲元。載驅使牡之華。已舍郊郵之邇。用伸宴犒。參慰歡勤。

賜王德用酒果口

卿持節之藩。出車遵路。已涓良日。宜重祖行。飲具臨頒。予懷增眷。

就驛賜契丹賀正旦人使錦褥被銀鈔鑼唾孟孟子等口宣

卿等馳止使軺。憩茲賓館。勤勞備至。休沐攸宜。特頒器服之華。用適宴居之便。

賜契丹兩蕃人使賀正旦酒果口宣

卿等已展聘儀。稍淹賓次。年華集貺。節物多歡。各適所懷。無嫌樂飲。

賜契丹賀正旦人使迴北京御筵口宣

卿等肅馳歸傳。還舍離都。得無道路之勤。加涉陽和之始。宜申宴衍。式慰征行。

賜王德用御筵口宣

卿肅持瑞節。近撫价藩。出宿在辰。祖行增悵。宜申異眷。敷錫宴羞。
雄州白溝驛。傳宣撫問契丹賀乾元節。人使兼賜御筵口宣。
卿肅將歡幣。來會慶辰。涉遠已勤。入疆云始。俾陳宴豆。少憩征郵。

北京賜契丹賀乾元節使副御筵口宣

卿等竝飭使華。恭趨朝慶。已舍離都之近。諒多持節之勞。俾洽宴慈。用昭眷渥。

撫問契丹國信使兼賜御筵口宣

適當盛暑。遠駕輶軒。惟辭命之是恭。勤道途而罔憚。特頒宴具。聊示歡慈。

賜王貽永批答

樞宥之地。任切喉襟。朕選爾忠慎。參此機劇。自頃狡寇時擾。五邊屯戍調發。事多平日。卿宣力念治。義無不爲。方倚斯猷。以底嘉績。何所嫌間。堅避寵名。況易退者士之細概。責成者國之本務。惟卿深識。宜諒朕懷。累嘗批復。理無順許。往安官守。卽斷來章。所請宜不允。

賜杜衍乞退第二表不允批答

西土未靖。師久留屯。朕賴卿忠果。幹總樞軸。宣力四載。既有成勞。今抒懇奉章。願去機任。夙昔惟念。未得其由。將謀者精而聽之粗。獻者衆而從之寡。歟。中行亮節。得微有嫌。間言飛詆。朕無聞焉。何遽卷懷。欲

徇沖潔。雖安小諒。有缺大猷。況柄臣進退。繫民休戚。幸勿煩執。方倚咨詢。所請宜不允。

賜章得象已下批答

南方壽星。每歲爲候。今見于庚寅甲夜。澤潤焯明。揆占惟應。君其逢吉。卿等樂聞瑞兆。鋪述慶辭。欲以美祥。遂刊實錄。勉從所請。良用缺然。

賜章得象乞罷第一表批答

卿識度閎邃。謀謨淹正。比圖舊望。爰冠上司。而勤勞王家。朝無異議。翊戴寡德。朕所自知。雖輔政七年。已究不績。永惟萬務。方倚厥成。邊閔奏封。願歸宰柄。詳觀所啓。憮然動懷。且軍革尙興。權綱須乂。實賴元弼。偕陟大猷。儻獨徇知止之高。而外愆爲國之計。君臣同體。旣不云然。進退大方。亦將未亮。姑停遜執。以副眷期。所請宜不允。

賜王貽永讓恩命第一表不允批答

卿有林父之忠。吳漢之謹。匪懈于位。無伐厥勞。自幹樞庭。多歷年所。參和以濟大事。先計以敘諸戎。功成弗圖。報于何有。用膺置使之重。以疇基命之勤。誕告廟廊。亶無異論。遽披露奏。方切沖懷。誠有敦于雅俗。詎所期于同體。官不容曠。命則惟行。往哉爾諧。昭體予志。所讓宜不允。

賜杜衍乞退不允批答

卿更踐劇職。遂冠內樞。鯁亮之素。底衷無隱。朕得朝咨夕訪。克又權綱。比日以卿懇愾致辭。感慨祈罷。因有前旨。欲賒後期。冀介節孤操。終爲事屈。忽閱今奏。殊乖此心。且詩重老成之謀。史稱魁壘之輔。皆作時模表。寄國典刑。未聞茲人以年爲解也。矧疆陲務總。軒餉日疲。共濟艱難。萬賴忠力。宜徇公議。毋滯沖懷。所乞宜不允。

賜杜衍第二表乞退不允批答

國家左宰府。右樞省。二三執政。皆諸臣之選。朕所與均休戚。責謀謨。任天下之綱維者也。其于進退。可輕議哉。卿直清方嚴。明銳開濟。裁抑私謁。達練事經。洒然羣望。推爲碩老。朕方倚以機管。隆乎治平。而累章求罷。弗亮敦勉。何專以已伸而不爲邦屈。重于獨往而忽此共濟耶。矧年高慮精。道勝疾損。固當務近醫劑。參實陽休。安服而官。姑惠予采。所乞宜不允。

賜皇叔德文第一表不允批答

卿茂親夙望。台鉉將牙。澹焉沖遠。躋于華皓。聿圖庇本。特用推恩。僉疏郡封。光啓王爵。宗盟爲重。國論旣孚。何列謙辭。尙停寵冊。便當祇受。以副褒懷。所讓宜不允。

賜皇兄允讓第一表不允批答

朕惟強幹之誼。公姓攸先。列爵之等。王封茲重。以卿志力宗謹。屬望親賢。庀秩本宗。領節戎鎮。休有令譽。

當圖爾勞。用擇蕃要。以光書社。何煩露奏。尙執謙懷。況定命旣頒。公言肯協。毋淹寵數。速卽欽膺。所讓宜不允。

賜杜衍等批答

保章視夜。南極告祥。雜候靡差。圓暉有爛。聞之典緯。屆乃壽祺。卿等幹掌內樞。歡逢嘉應。露封率籲。溢美形言。徒亮勤誠。尤增慙德。所賀悉知。

賜皇兄允讓第二表讓恩命不允斷來章批答

卿屬懿地崇。望華志美。朕所以推常棣之誼。重盤石之宗。始啓王藩。聿茂恩禮。尙披沖蘊。再列讓封。況普告官師。布聞方國。頗稽典命。未副眷懷。容略常讓之執。卽光外日之授。所讓宜不允。仍斷來章。

賜杜衍陳讓加恩命第一表不允批答

朕躬祠于郊。蒙帝之福。推爲慶典。徧第衆勞。以卿總秉中台。顯相大禮。謹有司籩豆之具。罄三事夙夜之虔。值功而賞。有國常典。何煩露奏。願寢茂恩。況普告于外朝。方驛騰于成命。便略牢讓。往服寵章。所讓宜不允。

賜杜衍第一表讓恩命不允批答

比虛右弼。以須峻望。卿清約忠壯。華皓一節。出入諷議。靡事不爲。挺然公實。見于有政。朕志先定。成命惟

行。況萬幾處可百職修理。朕所倚辦。卿宜知之。遽閱讓函。猥徇謙槩。且誕告羣方。不容顯辭。久曠台路。便廢擢遜。欽服寵章。所讓宜不允。

賜賈昌朝讓恩命第一表不允批答

卿曩侍經筵。已知國器。歷守京邑。則風績早樹。進領邦憲。則威名流聞。陽休山立。自處中道。朕以爲履正識敏。材任輔佐。引預機政。參貳台司。曾是踰年。休有成效。觀行則懿。俾謀則臧。斷自予志。冠升樞省。誕告百執。初無異言。猥露奏封。深存擢遜。況訓諭已熟。典命難淹。速卽欽膺。以光朝舉。所讓宜不允。

賜杜衍讓恩命第二表不允斷來章批答

向以戎醜尙桀。師伍留屯。公私乏匱。不可費省。又官濫于外。吏欺于中。苛察過當。浮競成俗。濟水無益。治絲愈焚。圖所振整。未知厥序。以卿久在樞禁。習總事經。年耆識茂。盡瘁事國。是用選自予志。對秉台衡。藉敏材以康調發之艱。褒介節以懲進取之弊。朕旣寡德。方茲仰成。尺奏薦聞。能讓猶固。已嘗批諭。宜體眷求。毋煩費詞。早膺寵典。所讓宜不允。仍斷來章。

賜皇叔德文陳讓加恩命第一表不允批答

上帝居歆。億祉叢介。朕不欲專享。衍爲太和。遂差慶典之錫。均逮懿親之序。以卿耆德碩望。帥節王封。藩翰維持。宗盟磐石。已從僉論。俾進寵章。何需奏之遽聞。列謙懇而尤至。但自絲而紵。已告于朝。惟名與器。

靡虛其受。便當速拜。毋久留恩。所讓宜不允。

賜賈昌朝王貽永皇弟允良陳讓恩命第二表不允斷來章批答

饗帝勞旋。錄功論賞。叶同輿議。肆舉恩章。卿左右有庸。授受惟允。尙牢所讓。洊露乃情。況朝冊久淹。詔文已報。當膺繁異之數。卽竚對揚之華。深體眷毗。毋致謙執。所讓宜不允。仍斷來章。

賜陳執中韓琦讓恩命不允斷來章批答

朕比執珪幣。祇事神祇。至誠所向。鴻釐如答。是以推衍天祉。沛流茂恩。徧錄侍祠之勞。悉從進律之典。卿卓有成效。協于僉言。而臨榮引讓。稽恩未拜。閱露章而旣熟。非公論之所期。便可欽膺。卽廢謙執。所讓宜不允。仍斷來章。

賜賈昌朝讓恩命第一表不允批答

朕聞元首明哉。股肱良哉。治之所隆也。元首叢脞哉。股肱陪哉。弊之所基也。惟德不敏。承久安之餘。淑慝混淆。紀律抗敗。思所以振弊興治。光輔朕躬。惟卿內挺剛正。外體和順。不疚于利。自時厥中。參陪宰司。則夙夜以虔。幹總樞會。則細大畢舉。爰立作相。用乂我邦。公言穆中。浩然肯叶。用擇剛日。誕告外廷。何徇光謙。尙崇至讓。冲懇雖列。允領已頒。毋執難進之規。速副具瞻之美。所讓宜不允。

賜賈昌朝讓恩命第二表不允斷來章批答

卿慮經王體氣陶天倪。挺處淄磷之表。不從燥濕之變。鎮定大事。贊襄遠猷。朕用希則。哲于前聖。俾實相于寡德。僉都輿論。亮成庶工。比程尙方之封。猶堅匪席之讓。況典策中出。朝野具聞。使廢道風。往穆台路。所讓宜不允。仍斷來章。

賜王貽永讓恩命第二表不允斷來章批答

朕以二陲雖靖。五兵未燬。總幹樞劇。實賴忠藎。以卿久副機務。用正使名。外詢諸朝。內斷于志。用降茂冊。初無異言。何執沖避。游騰章削。況官以懋德。非可專辭。言惟作命。詎宜淹拜。使屈謙槩。往服朝恩。所讓宜不允。仍斷來章。

賜皇叔德文讓恩命第二表不允斷來章批答

夫先睦九族。後協萬邦。朕常夙夜。庶臻斯路。況卿信厚舊德。華皓高年。師學彌惇。懿行無擇。比詔王爵。未塞公言。亟進常伯之崇。兼易許田之輔。成命旣告。有位具聞。何飾讓懷。游列需奏。且茂冊備物。不可久停。孤風介尙。無容封執。宜卽欽受。仍斷來章。所讓宜不允。

賜新除皇兄允讓讓恩命第二表不允斷來章批答

卿風素詳劭。識理淹該。協綏同姓。預有成績。向啓王社。未極寵階。特視台宰之隆。仍增戶食之衍。涓日誕告。付外遂行。何列奏封。再執謙固。且作藩之屏。誼切先親。自絲而緡。理無中止。往膺冊命。卽斷來章。所讓

宜不允。

賜皇兄允弼讓恩命第二表不允斷來章批答

先親右戚爲國通規。讓牢退易。處躬常介。向以卿雖列王爵。未副眷懷。申付將旄。庶重藩屏。再閱來奏。殊味所期。況國典朝章。不容停拜。家情邦禮。安得顯辭。使略冲儀。往諧茲授。所讓宜不允。仍斷來章。

賜章得象乞罷第二表批答

朕以涼寡。統制萬幾。涉淵俟濟。凜然祇惕。是用擢卿俊望。熙我庶工。而謨明弼直。早允羣議。隱正冲坦。自表素襟。懿德所孚。不仁肯遠。朕庶幾同底于道。克綏永圖。而游騰露章。來諉時柄。已降諭答。尙執所懷。況獨行之高。未足多美。勿貳之倚。何容執嫌。當略謙言。任安宰政。孤風靜槩。徒與嘉焉。

賜郭承祐批答

朕以卿有初載之遇。有離衛之勤。毅然能力。久而弗懈。用建戎節。聿圖爾功。告于外廷。亶無異論。何飾宰讓。再列露封。夫服謙冲。語崖分治。躬之偏亮。膺名器。建助伐。徇國之大方。所宜欽副疇咨。略去常執。況師兵寄重。河防事叢。董訓有經。領護云劇。毋淹定命。趨服茂恩。所讓宜不允。仍斷來章。

賜皇弟允良讓恩命第二表不允斷來章批答

向咨公論。大敍懿親。緣卿王社。申付戎節。成命誕告。多方普聞。游啓讓誠。尙執冲介。況渙汗已出。備物久

稽宜廢沖懷。時膺恩數。副予眷厚。卽斷來章。所讓宜不允。

賜皇弟允迪讓恩命第二表不允斷來章批答

朕敦睦懿親。差次寵典。年長者崇爵。屬近者尙恩。眷爾忠賢。用加節制。公言斯協。朝渙旣殞。何執常謙。欲遂素守。道風雖亮。允令難稽。往哉惟諧。母或煩請。所讓宜不允。仍斷來章。

賜賈昌朝讓恩命第二表不允斷來章批答

朕惟師旅久興。邊境弗瞻。憊然日旰。靡遑祇寧。卿材謀有聞。政事已試。疾風弗偃。晦雨不渝。用加寵秩。回總樞載。至于轉調兵食。結納邊庭。伐謀授算。攸寄斯重。何徇常禮。再列奏封。以嘗敦勗。心難開許。往諧爾職。卽斷來章。所讓宜不允。

景文集卷三十四

頌

皇帝神武頌

〔案〕仁宗本紀乾興元年六月。誅雷允恭。七月。貶丁謂。此篇當是祁未登第時所作。

或稱皇初之世。不賞而勸。不罰而懼。豈簡冊之彌文哉。議者云否。彼固未識夫震耀之飭天威。剛健之奮乾體也。粵若聖人制海內之命。據天位之尊。總秉權綱。章叙典憲。不有威辟。不足以震元愍。不有變容。不足以開至聖。用能消弭殄行。嘉靖多方。闡皇靈。憲宗軌丕天之大律。一民之至權者已。巨宋在宥。列聖繼統。際天不冒。亘地砥屬。仆威械以去殺。襲道樞以訓儉。恩裕洪暢。容典飭畫。萬寶取足。合祛于皇極。百靈隕社。震動于殄物。然猶右賢左戚。均權布寵。百辟箴闕。內平而外成。五紉在邊。番休而遞上。防儉來患。蠲滌多辟。勲懃懇懇者。非弭亂之謂歟。然而善制未能無敵。有憂所以固國。迺者先帝違俗。羣邪濟凶。寄朝家之威。席鈞宰之貴。侔尙方以制器。狎神巫而締紱。乃至易守帥以漸醜圖。徙陵兆而投天隙。拂戾蜚語。恬有姦計。遂欲包禍心以竊發。執左道而干紀。餌梟羹以未盡。礪豺牙而密噬。神靈震赫。姦宄呈露。輔臣建白。醜黨震壞。赤車具獄。而來上。凶豎伏鑕。而前死。允恭事敗。先謂伏誅。皇帝陛下。深拱諒闇。覽照前典。重當國之職。慎退人之禮。詔曰。冢宰之任。萬樞所係。今丞相謂自底不令。其上大司徒印綬。于是三事百

執抗疏以請曰。無將必誅。列辟經制。與衆共棄。常苦無赦。謂今所犯。惡不可聞。願墮天刑。以寒羣議。帝曰。朕不忍致于理。其放于朱崖。然後起跡。弛之。臣明枉結之獄。培克之貨。輒上于官。附離之黨。肆赦一解。漏鯨彗于網目。摧虎吻于市道。浴白日以升景。投紫蜺而霽氛。惡草絕而善苗興。清風翔而羣陰伏。人靈紓憤。道路相趨。旣而薦紳之徒。相與喟然。竝稱曰。前日末命微梗。擊臣乘間。潛搆不類。陰傾時柄。食豔靡化。指莠待滅。陛下探觀時變。先斷宸慮。倚文母之聖。攬列辟之議。廉考劓殄。介不終日。未減澄洗。蕩無餘災。定寶業極南山之安。殲渠魁易家人之召。智不回慮。惡未旋踵。事已決矣。昔滔天殛而虞功劬。流言放而周德奮。觀闕誅而孔制列。寶瑟僵而漢基永。皆撥亂之盛準。長世之懿冊。所由來舊矣。是以烈祖二宗。墾菑防害。蕭勺衆慝。若彼之躋也。太后聖上。建威銷萌。祇遙先訓。如此之備也。宜乎勵無前之景鑠。暢不殺之神武。正春秋謹始之制。釋洪範作威之害。開賜無疆之眉壽。摛著不朽之尊名。此其時矣。蓋天子穆然初載。財成仰定。未遑論制作之事也。下臣儻擬末品。不足弦次新頌。輒敢述輿人之詠。簡康衢之詩。亦擊轅折楊之比耳。其辭曰。

眞宗御天。休息羣元。委裘上仙。茂功全兮。皇帝纘務。惟新百度。尙文右武。鴻基固兮。擊豎柄臣。矜權取勳。與妖放命。託禩神兮。上公列辟。協忠宣方。摧兇殄惡。清君側兮。曰恭曰謂。銜刀投裔。神武不殺。退以禮兮。或附或離。橫貸敷施。脅從罔治。董之威兮。氛開禳收。美澤雲游。荷天鴻休。德旣優兮。昭雪忠良。輿頌風翔。

寅威舊章。恤無疆兮。

大有年頌并序

客有問臣曰。民生有本乎。臣曰。力田爲生之本也。王道有初乎。臣曰。養生王道之始也。客曰。方今表裏悅穆。上下充足。竝祝之瑞。翔集太和之氣。浩作億姓。字遂萬寶。登成震無疆之休。獲有年之瑞。抑此之由乎。臣曰。唯唯。有之。願客少暇。請舉凡而述焉。洪惟巨宋之有天下。垂祀六年。卜世彌億。道暢于不宰。澤寢乎無垠。御羣生之重畜。始乎兢業。治大國之小鮮。終以清淨。薰然化成之文治內。殺乎不殺之武治外。神禧蒙被。黔庶蕃息。格于上下。唐堯之允恭。及乎昆蟲。周家之忠厚。滿恩宣洽。醲化普暢。聖人有以探天下之賾。成天下之務。屏華處厚。抑未敦本。服絺衣以訓儉。黜拱璧而進道。碧斲文鉞。弗輸內府之貢。珍禽皓獸。罔充內閣之玩。齊官省三服之費。長楊罷周陸之侈。土事不作。無執扑之謳。木功不彫。有翦茨之陋。關三面以弛罟。措底劓之刑。班十行而滯渥。懋景風之賞。足食去兵而信立。旣庶加富而教備。何則。薄來之財。易豐也。悅使之民。易勸也。較畫之法。易守也。無爲之道。易化也。若夫域民而爲之限。勸農而置其使。勤恤人隱。不冒海隅。候田星而建祠。謹農事而紀節。惟穀是寶。務實九年之蓄。經界旣定。式資什一之法。萬倉箱之攸積。俟禮節之興。一夫婦之弗勤。懼飢寒之至。不猶狘乎鳥獸。四靈以爲畜。不童竭乎山澤。萬物得其所。罔禁弛而芻往。海租免而魚出。備物優裕。嘉生報降。螟螣銷厲。畝澮流惡。崇朝之雲。遂遍。納麓之雨。

弗迷。其豐年之祥。有如此者。仁博而愛。貌恭而肅。角民而不亂。木作而曲直。以正春令。禮大而易。視明而
哲。徵事而不曠。火烈而炎上。以蕃夏物。義宜而斷。言從而順。商臣而不壞。金利而從革。以肅秋成。知崇而
周。聰聽而謀。羽物而不危。水流而潤下。以畢冬氣。五陸不擾。四時丕廢。彝倫灼而可序。順氣凝以成象。其
豐年之感。有如此者。昀隰彌望。鮮原相亘。秬粳畷而舉趾。桑閑閑而樹宅。邇子之稻成藉。周兄之菽可辨。
異畝同穎。有方阜之堅。一椀二米。無滅裂之報。地錯如繡。渠決成雨。多稼不害。著曾孫之謠。滯穗靡收。伊
寡婦之利。田峻之饒。迭洎黃冠之蜡。畢達菽粟之衍。譬水火之可求。耕耘之速。若寇盜之將至。其豐年之
獲。有如此者。事以中舉。斂以時入。鄭人無爭承之賦。漢倉有相因之粟。以實府庫。則錫予之用饒。以懷夷
狄。則震疊之威立。以爲祿廩。則烝髦之士在位。以恭祭祀。則祖考之神來格。執萬國之帛。清明而會朝。按
六龍之馭。徜徉而展義。漢復逮于鰥寡。周醴露乎老壽。戶興穆若之頌。民無蕭然之費。其豐年之報。有如
此者。宜乎勤恁方穀。滋育毛澤。備乃庶物。美魚留之多。占于牧人。協旗旒之吉。四輔羨食。九土相宜。生齒
益繁。數溢司農之版。墾田彌廣。籍物尙書之曹。逢年之力在茲。草萊之歎咸弭。下令無壅。甚流水之源。惟
民孔懷。思天保之報。畢曩聖之能事。總列辟之通術。雖甚盛德。疇以懿茲。蓋仲尼以春加于王。奉天之謂
也。箕子謂王省惟歲。教民之謂也。至若祈年孔夙。方社不莫。探精禋之相盪。杏臍蠻之如答。非奉天乎。省
耕以補不足。省斂以助不給。俗毆躋于壽域。人轉緣于南畝。非教民乎。古之王者。有一于此。尙或奮藝乎。

細簡垂美于金刻。矧我后循而致之。篤而行之者哉。言未終。客乃避席而謝。臣曰。未既也。將授子四篇之頌焉。客其卒業。乃歎曰。昔之聞帝韶者。肉味都忘。語霸道者。諛詒潛愈。況夫鋪懿鑠之不烈。訂豐懋之芬澤。懇菑除害。含甘吮滋。若此而已哉。而今乃知上德之難名。生民之受賜矣。頌曰。一氣敷。百華始。澤無垠。物咸遂。

右一章春頌三言。據木數。

南風之薰化以融。乘離司夏。火方中。朱明誕布。福來同。庶生茂豫。告成功。

右一章夏頌七言。據火數。

西顛沆碭。素律凝秋。商含芬垂。穎豐楹登嘉祥。九園清淑。祕祉播無疆。豆登祇薦。景福垂穰穰。

右一章秋頌九言。據金數。

霜降兮百功成。歲周兮庶績凝。富萬民兮愷樂。赫丕德兮昭升。

右一章冬頌六言。據水數。

景靈宮頌〔案〕宋史真宗大中祥符五年作景靈宮仁宗天聖二年奉真宗御容此篇當是祁登第後所作

臣聞有開必先。大樸爲神器之本。率義而上。九皇爲聖人之祖。然則往來不窮之謂變。陰陽不測之謂神。其精甚真。強名曰道。故其高出太虛。深際六極。冠三儀而稱大。亘上古而難老。帝鴻得之升雲天。伯陽得

之爲教父。遙源寶系。接正統以延鴻。錫羨貽謀。啟靈心而孚佑。非天下之至賾。其孰能預于此乎。真宗文
明武定。章聖元孝皇帝之在宥天下也。基命靜淵之樞。繹思光明之懿。順攷古以遵妙道。聿懷福以祲羣
元。雖有佳兵。不矜其忿鷙。雖有拱壁。常寶乎慈儉。詔爵磨砥石之鈍。官惟其人。齋居錄賤星之囚。刑幾于
措。絕金鑠。次農書。惠孤終。優老壽。彌文郁矣。監二代而可從。大孝熙矣。放四海而皆準。疵癘不作。寵綏有
截。于是呼韓就序。竝會清明之朝。戊己撤候。咸羈荒忽之服。蕭勺四暢。粉澤交綯。旣而藁晨真蔭。接乎常
明之寶。蘭宇祕圖。流于主文之辟。援絕瑞。按秋游。縱雉鬱蒼之椒。奠繪堆堀之上。典禮之記三百。翕習而
攄容。神靈之封七千。昭明而受記。下之報禮也。旣重。則上之降康也。彌速。當其蒼水前戒。紫宙博臨。踰然
象載之美。飄如風馬之下。嘉夜四馥。順拜晬清之容。流霞載斝。躬聞聲臭之載。皇基遏悟。颺遊上賓。天子
乃稽靈心。極能事。以爲誓誥所不及。則稱事裁典。故我金聲玉振。制儀號之當。天人之相交。必知意合德。
故我鏤版藏鑽。爲積累之先。盡物之多。不足以稱德。于是總鴻鑠。薦高廣之稱。自外而至。不止于無主。于
是度寶構爲密靖之都。則景靈之作。乃國家所以陳錫木支。優裕淳烈者也。故其測星廟之祕緯。卽珍坤
之寶勢。磬鼓不勝其樂。靈臺勿亟于成。宛延鴻紛。上軼倒景。靜深神麗。仰法太微。時大衆之會。據神區之
隩。煥若飛樓之十二。接層城而在茲。兀如神鼈之三番。負五山而不去。祕殿博敞。繚垣盤亘。珊瑚玉樹。恍
陟閭風之顛。溝水蒲池。差勝渭陽之廟。採詩供清夜之誦。持節候神人之來。惟清靜之庭。以觀其妙。不攜

貳之爽以爲之宗。蓋天子穆然思所以獨烝上神。申固百祿者。又可得而云矣。先是上棟協吉也。倚雲筑而流容唱。銀榜將署也。泚壺墨而霏仙翰。考室大備也。洽藻臆。晞蕭露。漢錢差賜。下逮乎門闌。周醴潏觀。徧露乎歌臺。此樂成之三物也。典領置使。咨于台宰。神靈標節。著之休令。六羽基德。五雲御歷。受民者十四姓。長神者三百年。則見于先天之紀。雲日衆變。天淵盈塞。郡國所上者數百千所。羣臣將順者千有餘篇。則存乎降聖之記。此昭荷之四物也。禘所自出。王者之配。益作原廟。大孝之本。于是竝詔方國。建天慶之祠。生民厥初。歆然著其盛。有物混成。寂兮爲之母。于是嗣薦瓊冊。推懿后之尊。典鑄尙方。摹瑒黃冶。作爲上帝之神寶。分鎮列郡之殊庭。此隆孝之三物也。若夫赤精下教。陰隲乎九宗。朱光以渥。遂開乎百世。事隔人理。故宮而不廟。儀參僊品。故薦而不血。禮有因造事兼節文。則先聖御製贊載之備矣。恭惟皇帝陛下。奉承審訓。祇遙孫謀。允執厥中。純亦不已。方穀旣富。樂鳧鷖之守成。祕過不移。善春秋之順祀。方且載主卒業。見羹永懷。故卽位之二年。詔迓先帝眞像。于是宮建寶殿。以奉安之。其後再郊委粟之場。大合清廟之主。先甲而告。按齋輅以右回。肆夏之趨。飭卸金而一獻。又以見聖者之作。明者之述。周家之世世修德。復命武王。虞民之烝烝克孝。重協于帝者已。原乎萬世不毀。是之謂有功。非人所致。是之謂受命。五運迭起。雜霸德者。蓋斗精之餘。千載肯會。守天聚者。必盛德之後。我宋之興也。基乎溟滓。颺乎遂始。挾宇宙以制物。載降爲皇。絕天地而屬民。用佐于帝。及夫氣開于嗜欲之至。兆應乎精神之嚮。太祖經武攻昧。

躬文王之一怒。於變時雍。太宗執競題期。訓神禹之五事。莫匪爾極。故真考之纂大也。百度累盛。羣公交告。仁閔之監。臨我而無貳。博厚之寶。涌出而不愛。有積善爲之長發。有列真迪其凝命。屹神壇。謹馨粢。度九筵之堂。枚枚而有倫。瞻八景之馭。飄飄而下臻。聯壓神皋之奧區。震顯舊邦之新命。萬八千歲。俾爾壽而無疆。十有五王。靖我民而斯久。與夫漢纂堯後。立唐山之祀。而文獻不足。李出柱下。尊瀨鄉之宇。而獨恭不優。非同年而語矣。而臣濫首詞禁。躬閱瑞圖。猥奉方底之音。謬當成功之告。重念永定宸刻。冠映三辰之章。溫維祕文。稗合五星之老。矧敢軋稽緩之蒙思。贊顯承之真躅。剡皇墳之未揚。天律之大哉。姑述下武之欽崇。粗標底績之和會。至于奕奕寢貌。奚狀萬楹之多。縵縵帝容。但繼百工之和。躑躅流汗。敢次頌云。

於皇巨宋。得天之統。絕瑞雲照。繁祺山擁。福祿總兮。粵在三葉。虛晨夢協。青閣籠霄。朱文委牒。人神接兮。帝心祇遙。沛容善述。圓封累礫。奠琮侓栗。東風秩兮。道蔭孔彰。颺游下翔。歌緜悟甍。執競日強。命歷長兮。真宗曰咨。咨爾羣辟。揚庭薦號。剝圭聯冊。首宗祐兮。真宗曰咨。咨爾疇工。仰觀星定。大度瑰宮。罄爾邕兮。炳丹激射。飛仙圖寫。邃軒拖虹。回阿舞馬。表神舍兮。氈罽周張。瓊糜油嘗。雲旄芬樹。罷案凝鏘。奠青場兮。天錫神寶。飛榮妙道。美鏐冶質。福庭分告。尊有昊兮。帝署嘉名。宸藻樂成。媧天鏤石。奎畫羣星。襲六經兮。兩宮纂服。上儀繁縟。不失舊物。聿懷多福。似以續兮。先聖丕律。美假洋溢。消像頽長。棲神曲密。降之吉兮。

千旄之旗。惟皇厥都。有龜而書。有龍而圖。杳珍符兮。五城宛延。館御列仙。淵然其泉。健然而天。亘永年兮。

皇帝幸玉津園省斂頌

有序 案仁宗本紀天聖三年五月癸巳幸御莊觀刈麥此篇當是邠未之復州推官任時所作

臣聞六氣時乘。統以乾元之首。一游爲助。表乎夏家之諺。王者法順動以省民教。闢囿游而寓稼政。車輿每動。則攸徂相慶。侯我后之來蘇。羽旄載揚。則百姓欣告。庶吾王之無疾。厥有其道。非聖不舉。恭惟皇帝陛下。勤憊道甫。妥綏民極。斂武旌而匪怒。陳廟器以戒盈。湯旣執中。周先登岸。際日出以丕冒。罔不維序。爲天下而守財。于以克儉。洪惟坤育之蔭。叶贊天元之治。繹思高拱。澹深淵以惟默。凝覽泰定。鑠清光而無際。麟題信厚之族。章敍于內。鷺羽羣飛之賢。夷儀于外。方木倉陳粟之屬。水衡見錢之多。又何以加。旣富矣。簡則易從。有親矣。信可以紓散否滯。頤養精神。詔警蹕出入之嚴。慰臣民僥倖之望。雲霓大旱。鐘鼓飾喜者歟。若夫南直斗城。外敞琨苑。勵儲胥長楊之禁。均郊野近蜀之富。先時斥官墻之地。以收課穀。領勾盾之職。因爲弄田。每丘麥旣登。原師至喜。則必按徐鑾之節。省斂穰之勤。因見三老力田。差賜百戶束帛。供帳留飲。極歡而罷。勤民之恤。累聖爲常。月惟蕤賓。日次東井。竊扈謹九農之政。貽甍告萬箱之收。天子樂由庚之得宜。問大昕之夙退。前除隱樵之道。右清連籟之落。官以辨物。儲不改供。于是廓霄宙。賓賜景。洞應門。引祕駕。短簫鏡吹。沸渭而夾引。師兵弩箠。隱鱗而軍裝。風清九九之塵。雲擘央央之旆。呼鞭凝響。切神光而盆入。穀騎流緒。繞黃山而斜趣。蓋天旋辰正。以降于行在焉。觀夫周原砥平。漢鍾雲荷。甸師

清野以獻狀。峻夫滌場而作勞。俾彼大田。是觀銍艾。饁乎南畝。遂成茨京。揉耒以識帝農之來。棲糧而歌東戶之泰。曩也昏作。今焉翻載。既而美恩下屬。借雲而族。總氣相因。助風之薰。散遺秉爲寡婦之利。豐四鬴爲上歲之食。皇襟兌悅。帝暉日潤。乃詔環星之法。從普合需天之宴。慈帷牙九張。飲烽三燭。外饗獻歲嘗之膳。太師侑日舉之奏。千唱萬和。自成葛天之歌。式晏以遊。竝拜鹿鳴之賜。懿哉是舉。可以推聖人之心焉。昔之重雍在辰。多歡作豫。則必大縱芟苗之獵。靡旃未還。多從外夷之客。過都輒賜。雪宮獨樂。不與衆共。鹿囿增築。虞其非正。陛下駿惠先辟。慎修思永。方且愆事之小。塞政之遠。獨紆神行。樂登歲取。因一夫之獲。恤下之有勞。推一穀之登。劭民之足食。豈徒燕出入以爲樂。自滿假而居逸。況時令之旣嘗新矣。先薦寢廟。春秋之不書他者。惟重麥禾。陛下上以薦馨嘉。下以勸耘耔。一出而兼二美。非聖人其能哉。若夫愛心自中。不待弦匏之感。至教廣運。無須家戶之至。況臣廁技儒肆。寓目車塵。道之不談。咎將焉執。輒次康衢之頌。庶知上帝之力。詞曰。

君之來兮吾民休。倏如雲兮驟玉虬。君之樂兮我田良。積如坻兮豐太倉。彼都之人兮宴以喜。官扈民兮無落事。自今以始兮日益寧。禹躬稼兮莫我京。

乾元節頌有表

臣某言。臣聞至聖出乎千載。由旦暮之逢。升歌本乎百工。盛光華之唱。惟乃神之宅后。標載震之發祥。庶

物謝生。籲頌聲而樂正。兩宮介福。襲天算之萬斯。褒贊所先。承平爲盛。恭惟皇帝陛下。丕功建極。明度塞
遠。置方國于阜安。暢祖宗之純烈。南北郊之祀竝。薦于馨香。一二日之幾靡。忘于兢業。屬清和之戒侯。樂
化育以延祺。揭著神靈。題名節物。荷鴻休之長發。應禮享之多儀。公圭男璧以在庭。金鑑珠囊而備物。霞
凝壽飲。山立舞干。呼聲者三。與嵩神而協應。探策得一。示天極之同符。而臣叨迹下僚。欽聞絕瑞。愛心所
感。雖近發于和柔。峻德難名。詎周知于巍蕩。輕投悴曲。仰祝皇齡。謹齋戒。撰成乾元節頌一首。

於鑠巨宋。茂德聳于四世。聖文睿武。仁明孝德。皇帝聰明寬裕。清和溥鬯。擁蘿圖付畀之重。奉椒極供養
之勤。玉色視大昕之朝。乾綱統萬樞之政。斗精布度。氣毋襲常。徹橫草之誰呵。措爰書之齋決。茨梁露積。
樂華黍之年豐。芻蕘往畋。謂文王之困小。于是後宮無珠玉之玩。尙方罷蜀漢之器。遴柬多士。則自楚而
刈萋。寅亮柄臣。則增堂而及陞。方且遙寧先訓。總攬大猷。東面訪尙書之文。支日受漢家之奏。黎民納我
之軌物。百神據我之馨香。宿離仰澄。黃瑞湧出。于時徒歌者迷。上帝之力。謝生者懷。天保之報矣。粵若仲
呂鳴瑄。炎官執衡。軫躔中昏。月魄幾望。元后誕聖之日也。先時有司刺經取制。援天叩聖。願以乾元冠于
節首。制曰。惟霄系駿發之遠。皇階錫羨之厚。重熙襲哲。朕與嘉之。況累聖之舊章也。盛典也。其每歲百官
効露囊之饋。福庭嚴蒲饌之供。內宮醴九行之觴。戚里上三服之貢。臣隣和會。黔細禔福。若此而已矣。臣
祁昧死再拜而言曰。夫天宰默定。生民而樹之君。帝期感會。出震而齊乎巽。且圖緯存必著之感。故神靈

無虛發之應。昔者電樞北繞，軒祖得之，以款塞門，接萬靈，渚虹下流，少昊得之，以官鳴鳥，卓五典，河龍出游，丹陵感之，法天以爲大，祿乙臨降，景毫受之，奮那而爲首，生民厥初，詩人推之，以尊后稷之載育，在震不憂，太史謹之，以驗文王之夙成，或赤光照室，卯金復四七之祚，或紫氣充庭，仙李兆本支之蔭，此可畧而道者，纔數十君，受命之難，不其然乎？至唐開元，有臣曰說，始建千秋之號，名爲白帝之養，爾時自謂詫休烈，侔景炎，作古于我，無慙來葉，然未有殊尤絕迹，震寤黎獻，可攷于今者也。伏惟陛下體兼二儀，精合五老，當履武之始也，至和薰于太史之瑄，及誕彌之期也，清瀾冽乎馮夷之宮，祥雲入房，神龍視浴，故生而岐嶷，握襃著其文，長而敦敏，甚德包其度，宥密而不敢康，功業以見乎變，及夫宅端命，繩假武，日出而天下明，風興而羣陰伏，成王訪落以謀廟，文帝銷志而求衣，皇矣上帝之監，一哉王心之協，九歌叙，四維張，然後顛顛叩叩，如圭如璋，以奮乎天子之光，議者述夫南訛之交，君嚮以治也，盛德在火，式乘其王也，炎精挺其命，則真人應其期，覆視圖諜之兆，宛如符節之合，天之啟宋，不惟舊哉，是日也，候華暉，闢層禁，積陽之雞三唱，雲龍之幄九張，樂羽芬庭，虎戟夾陛，謁者治禮，以次奉引，噦鑿皇紱，拱乎有定之著，襲玉卓馬，陳乎旅百之實，夷酋裘長，竭歡致福者，膜拜以俟，羽裳毳侶，續壽無量者，列奏以聞，肅然若百靈會，帝于鈞天，翹然如十月朝漢之長樂，俄而呼鞭傳警，雕輦出房，神扶太庭之居，天臨絳辰之坐，上下臚句，內外傳傳，望堯之心若雲，慕舜之德如螳，視不登衿，天咫于顏，一以贊下武之丕承，一以樂天命之陳錫。

薰風可馭。薄翠蓋而裴回。香雲攢柯。衛赤旂而容與。旣而人聲之歌作。堂下之樂奏。惟一二元老。上千萬歲壽。誕育之慶。推于母儀。壽昌之算。還于天極。使聖人富而多子。三祝可兼。食天子日舉以樂。大平爲盛。然後合需雲以賜法酒。晞湛露而宴諸侯。幣帛以將之。慈惠以示之。神鼈傾首之抃。王魚莘尾之躍。與下同樂。克洽萬邦之歡。卒事不規。義陋六王之享。煌煌哉。嘉祚之鉅麗。豪飫之飾喜。非我后其疇離之。夫日月不紀其初。則無以重寶精之序。頌嘆不布于下。則無以示王澤之深。下臣區區。敢忘斯義。其詞曰。

昊天之命。於穆不已。挺生我皇。赤帝之精。感乎孟夏。昭迪殊祥。惟乾之健。配元之始。嘉節允臧。上公拜首。稱千萬壽。涸醴是將。帝謂三事。股肱同體。舉君之觴。百執和會。陽休樂凱。奉承親光。天乎悠久。地乎博厚。我君無疆。

景文集卷三十五

頌

太一新宮頌

井序〔案〕仁宗本紀天聖六年九月祠西太一宮宋會要雍熙元年建東太一宮天聖六年建西太一宮此篇當是祁已改大理丞國子直講時所作

臣聞昔者宅命之駿。索百神以徧祭。降生之嘉。鼓萬物而均福。然則祀典載其羣族。禮文領其盛節。疏之則氣縱而靡震。狎之則精攜而不物。上聖于是揖歸運之孚佑。倚太虛而參變。慎齋精意。洞洞屬屬。旁求于幽闈。爇蕭煑鬯。芬芬苾苾。烝進于馨香。是以封君錯居。守神靈者七千之廣。冢宰制用。備祭祀者什一之仇。誠欲異而不瀆。建爲有極。鼓舞至妙。祛合無垠。以億上帝。以庇生民者也。粵若體粹亨之元。奮希微之妙。厥存主宰。以司變化。上驗祕緯之次。總按萬靈之圖。何言而善乎應。象先而不爲老。肇稱太一。尊有十神。毫忌啟奉祠之方。天官著常居之記。化截羣有。輔蓋高之監。文包幽室。啓無窮之命。疇祀恤而不昌。罔置神而能永。若乃瑰宮奕奕。礪砥而孔曼。嘉壇崇崇。藉闕而四合。藁笈真籍。按循醮式。草樓上士。奉承薰濯。沃酒茅以示潔。默牲饗而撤腥。蒐三代之文。有所未秩。肇羣條之極。制定其當。質不及野。儀不過物。鎮神華以作固。舉裨海而蒙祉。非巨宋之善制。疇克臻于此耶。恭惟皇帝陛下。高拱密清。共規洪鬯。得天統以播憲。括地象而經野。建大中之治。陳之浹日。訂丕承之烈。肆于時夏。尺一信牘。重撫樹惇之鄉。六齊

佳兵更鑄大農之器。回霜收電。而欽刑之恤。鍼疽委轡。而慎赦之數。合質劑以一度。同土炭以均風。捫箕
舌而聖佞讒。攬倖指而黜纖巧。于是都人擯蹠嚙于贅聚。女紅後纂組于絰織。薪械美官人之盛。鱔魚譬
萬物之多。光明緝熙。上下充格。儒者之喙三尺。訥于抒頌。從臣之橐千翰。禿于宣美。方復澹然無治。幾而
不康。可以震珍見怪者。罔不祈。可以蒙嘉獲豐者。罔不序。由是種祠舊時。悉領縣官。嘉幣偶馬。以爲歲事
者。不可載已。乃詔建太乙宮于都城之西南。順禮文。介熙事。且言時也。先是。筮龜既同。天星既中。圭以湖
景。臬以攻位。鎮沈輿之厚載。據神明之積高。審曲有經。倅圖中覆。陛下以爲崇奉真陰。導迎祕社。不可屈
外府之財用。取祝史之辭忱。乃命損乘輿張飭。發少府藏。償其調度。因過更冗卒。覆將作善匠。給其員程。
既而隴材千章。周版百堵。督墨爲雨。叩磬成雷。法大壯之上棟。憲斯干之南戶。人不扶勉。工以雄成。未踰
二時。大告考室。述夫祕殿。則崔嵬博敞。鬱律鴻紛。翠蚪齊首以負棟。海鷗窺尾而銜瓦。玉碣重荷。文璫四
注。陽宗倒光以納景。陰祇濛霧而扶傾。犀塵不游。螟風無隧。乃有皇邸五色。黼帷九張。爲之真寢。乃有雲
梢三素。綠輿八景。儲乎仙衛。甲乙異帳。辛壬殊秩。衆殿竝列。十座如一。煥紫宮之是環。玃赤霄而可挹。其
左右。則飛宇回帶。修廊班屬。雲塗百層。芝栴萬狀。因其真畫之品。竝繪羣靈之跡。恍然覺神仙之可以致。
肅然知鬼神之易爲巧。其前則藻局連觀。抗爲重門。樹松隱椎。表其馳道。揭示篆銀之榜。列坐鑄鐸之狄。
所以震疊焜照千祀也。其外則繚垣白盛。靈囿封殖。甘露騰文于茂樹。醴泉側出于陰溝。間以九層之臺。

五城之樓。榮曝倥傯。袂挹浮丘。所以範圍鴻洞。九清也。及夫嘗烝戒旦。剛柔涓辰。祓惟淨之場。哀列真之對。于是乎水土和氣之實。玉帛二精之虔。泚毛紛旅。洞潦滄漑。仙漿挹斗。香雲薄霄。像以鸞輅龍駒。器以鈿金華蓋。瑞祝發中而臨遣。使者持節以侍祠。靈璫絳幡。導乎謁款。則盥而不薦。稽大易之象。坐工合樂。陪乎夜誦。則昏祠至明。采甘泉之制。高真竝享。啐福如儀。飛龍秋游以格思。胎鑿興作而歸福。數百千所。聊記符瑞之多。七十五來。更邁神光之異。猗歟盛哉。濬哲之能事。神明之鉅典也。蓋制作之本。我朝舊矣。始太宗徇史官之請。胥宇于國南。以開拜貺之館。今陛下按故府之法。度筵于都右。以敞集靈之庭。俯仰其前。不失夏家之舊物。陟降于上。越成周邦之新命。有由然也。夫神能專福。不加于鮮德。君能專祀。不殖于非禮。且如黜其刳血。豈爲覲觶之愛。而懿德改薦。遂介無疆之休。探乎祕經。不徇拘攣之義。而層構昭事。自成一王之典。捐金斥幣。紓執事之滯。而民不益賦。升壇奠粢。爲百姓之請。而過無移下。由是言之。寧不善始善述。雖絲衣其紆。高子誌星尸之繹。夢蛇下屬。文公作鄜畤之瑞。待我具五。始標黑帝之祠。嚮坐而拜。躬接高門之享。一何區區者已。下臣陶乃文之化。覲告成之蹟。固非大夫之能賦。實虞薪者之多誦。輒次輿頌。升之有司。其辭曰。

兔焉層構兮。鎮我都之夾右兮。我稽神宗之舊兮。

右一章

肅然上靈兮。戾我宮之靖冥兮。我據昭德之馨兮。

右二章

帝宥黔黎兮。匪孔禱之私兮。與神哀是對兮。俾物之阜而滋兮。

右三章

天眷聖皇兮。執周道之疆兮。俾君壽而臧兮。配天之久且長兮。

右四章

耕田頌〔案〕此篇是仁宗明道二年祁直史館時所作。

皇帝再紀元之明年春二月。率羣臣耕于東郊。恤愷祀。祈豐年也。前此詔書示有司曰。自我太宗。襲熙厥功。億神裕人。宥命方國。肖翹跂行。亦莫不寧。永惟土著之本。民天之重。乃躬耕田。以倡農先。震地房之滿。告導改政之長懋。柔嘉令芳。于是乎孚胥。鹵莽滅裂。于是乎復敦龐。穗滯秉遺。見糧如坻。我真考因其累盛。重以明德。故能步師百萬。狩鬻閭。見武節。高世八九。升突遼。建元封。奉符隕祉。以攄無極。肆余承緒。祇率厥典。則熱蕭布幣。固有常所。監農狎野。厥存舊章。惟一二執事。率循而懋明之。方春作時。百穀革始。姑使斯人悅羽旄之美。重見漢官。後嗣諗稼穡之艱。不失夏物。無贅聚儲峙。無煩勞供帳。趣合于禮。劭吾農焉。前期則修飭神壇。按除膏壤。夷道如砥。呼蹕填街。稍夔獮以護野。雜荆牟以守燎。阡陌繡錯。原隰龍

鱗。蒸膏冒檄。協風回春。于是旄頭先馳。屬車齊躅。奔星舞于旗旂。行月棲于羽箭。壽犀注鎧。肅給乎師營。蒼虬範馭。秋游乎天轡。瓊鋌流景。金根照塗。帟幕周張。紈綃綷繡。旣而揉耒剡耜。載保介之間。先種後稷。靡播植之器。官分無諉。事具不教。天子乃以丙午之旦。升華輅。由大庭。顏行山則銜枚無聲。龍虎見象。堪輿奔警。盆閭闔。切囿游。乃徜徉乎層城之外。五精來同。七聖景從。鑿聲佩節。次于帷宮。上旣澆濯圭潔。儲思淵默。昧明乃頓。大次款嘉壇。索先農以享之。因教稷以配之。血毛幽全。金石鏗訇。躬接妥佑。加祠官之一等。禮重沿襲。具祖宗之遺意。爾乃降靈塲。儼先紘。物覩于聖。天健其行。星田彌望。紺轅儲駕。洪縻序進。玉步有容。三推成禮。邇臣告備。上曰。朕志在敦本。充其強力。旣可以勸。何憚于勤。遂推而進之。有司以義固爭。幾十墜而後釋。乃始弭節容與。御夫觀耕之臺。三公羣后。班趨次耨。靡然從風。邁五踰九。大農灑種。庶人終畝。官師扞手。行內天旋。于時都人熙熙。駐望皇軒。或歌以壤。或擊于轅。不圖叢雲之旦。復見東戶之年。日華晏溫。天心憑豫。奉斗極。御應門。翔雞樹竿。墜鵠宣制。大賚四海。與之更始。虧除臧辟。存問高年。振淹修墜。平徭闕賦。中外百執。告至而策勳。踐過三更。以差而賜帛。膏以解雨。鼓之巽風。不崇朝而周萬國。先是羣臣繹丕懿。潤鴻名。將琢之玉版。納于金匱。至是則回雕輿。坐前殿。震照儀矩。翁受典冊。皇哉茲禮。真帝世之希闕。臣工之旦暮者歟。儒臣學于舊史。竊明載芟之詩。甸師之職。在藉之義。有三說焉。一典籍之常禮。二籍履以親事。三借民而治之。所言雖殊。要之驅天下之民。棄末而歸本耳。且古者謹察天廟。

申赦陽官田之不闢。辟在司寇。作爲御廩。鍾而藏之。其故何哉。以爲奉薦粢盛。非無良農。不如親之愈也。課督耘耔。非無猛制。不若勸之善也。夫祭莫大于備物。物備而百神據之。兵莫大于足食。食足而四夷懷之。人莫急于豐財。財豐而有生聚之。是三物之濟否。在此舉也。且周宣缺之。戎軋其衰。漢文用焉。民阜其宜。唐后勤止。以豐易饑。洪惟太宗光迪于前。陛下述宣于後。皇矣同底于道。烝哉不隕其聲。方且九扈勤民。三事就緒。擬擬其盛。陳陳相因。糧餘可棲。草殖弗奧。民一于耜。家萬斯箱。遂駕五帝。軼三王。奮甘實而攄馨香也。敢作頌曰。

倬彼鮮原。帝藉于田。匪藉其勤。我爲民先。悠悠春旗。覩士于畿。陽膏澤澤。邁乎三推。有壬有林。亦莫不祗。我疆我理。載耘載耔。實苞實阜。菲厥豐草。田峻至喜。祈年伊早。我穀用成。我倉旣盈。我倉耽耽。鍾于東南。其用伊何。事神薦馨。爲酒爲醴。爲粢爲盛。蒸之浮浮。釋之洩洩。上帝居歆。降福孔休。降福伊何。我民旣蕃。室家溱溱。三事不諼。食足武奮。震疊爾功。蠻夷來同。罔不率從。帝猷昭升。式于九圍。兢兢業業。以迄萬幾。在豐念匱。在飫思飢。子子孫孫。勿替引之。

陽郊慶成頌

〔案〕仁宗本紀景祐二年十一月乙未祀天地于闈丘。祁時爲太常博士。此篇即其時所作。

臣某言。臣嚮者幸得以博士奉侍大祠。清廟闈丘。恭導升降。伏見陛下接神措事。飭躬備物。饜饜夙夜。如不敢康。至誠上通。靈貺如答。釐出殿幄。而瑞霰先塗。齋款宗祏。而祥飈迎輅。景至之夕。步自帷宮。改衣雲

散登壇月皎。收戢凄凜。煦如陽春。旂無蕩旂。燎無搖景。已事還軫。官不告勤。三靈洪洞。交相爲慶。滌穢蕩瑕。納于昭清。此則上帝所以顧諟。陛下所以欽奉。天人之際。不爲遠已。臣親覲盛禮。昧于知量。輒訂詩人之義。作陽郊慶成頌六篇。義大詞褊。無以游揚萬一。庶幾佞童謠漢。擊轅慕韶之比。竊用繕錄。冒昧以聞。瑰宮朝景靈也。屹瑰宮。帝下都君來饗。六龍徐羽。籥羅金石。揚儼然進薦。嘉觴靈之歆。肅陰陰徧觀。此愴羣心。旣安坐。唵青黃。紛上馳。爛遺光。賚孫謀。永延長。

右四章。三章章四句。一章六句。

我將裸饗太廟也。我將受命于祖于宗。洞洞翼翼。物有其容。物容備矣。帝心嘉矣。有壬有林。駿奔走承事。夜如何其。我不敢寧。萬舞洋洋。九奏備成。燎薰以裸。復降在庭。毛炰竝進。亦有和羹。帝酌而獻。工祝善詞。優然如聞。孝有餘思。神飲我福。弃胙而餘。辟公亞薦。就幄以須。禮成七祀。不敖不竦。徂來于孝。嗣福禱總總。純嘏以溢。我受而施之。駿惠不承。寶我大龜。

右八章。章四句。

枚枚祀奉慈也。〔案〕仁宗本紀景祐二年詔奉慈廟遷莊獻莊懿附于莊穆之次故此云紀奉慈。

枚枚闕寢。三妣厥靈。以肖柔德。〔案〕原本但籥不干有磬無罇盥而又薦我孝我虔物以志誠不在牲牲貳盥嘉止百福蕃止無不或承以保我天子。

右四章章四句

嘉壇合祭天地。侑以祖宗也。熙嘉壇兮泰尊。藹竝饗兮坤元。祖與宗兮侑純嘏。百神膺兮壇之下。千枝列炬紛秀華。微風蕩漾月金波。樂遵舊物金石和。帝造新曲揚清歌。鬱華聯案醪品酌。馨聞既達封血陳。黍豆甘實燔蕭春。璧精粲粲琮黃煇。三垓升降玉銷鳴。裴回常羊延上靈。至誠感通對殊休。諄勤此路符所求。燎籠盤空幣煙舉。天極餘歡篤純祐。紛紜六幕雲施普。

右五章四章章四句一章三句

南闕肆大告也。南闕爵連天。翠華此臨馭。靈心交胥蠻。鴻恩思慶豫。培璵上雞竿。籠童下鼉鼓。翠綉儼糜至。赭按軒霞舉。比屋篋予后。婆娑聲或路。滌穢天瀉波。崇朝解爲雨。束帛勞衆士。三錢發中庫。下蒙不貲惠。上錫無疆祚。俾壽萬斯年。南山均鞏固。

右一章十八句

垂鴻受徽冊也。惟帝垂鴻法上天。推名讓德紀初年。溫瑜祕篆金滕聯。涓成吉日膺鴻冊。申羽刻商諸樂石。冠劍相趨紛動色。帝徇羣心答天意。珠旒粉袞拜容備。不休顯號光神器。功躋皇王黜雜霸。不自矜功無滿假。翼翼虔虔對天下。

右四章章三句

明堂頌

(案)頌作于皇祐二年本紀所載祀明堂月日俱與此合時祁復爲翰林學士太常乃其兼官

臣某言三月戊子制詔季秋有事于明堂臣以太常與禮官博士詣垂拱殿議配饗事卽建言周有臣日且始嚴父配天仲尼是之唐并諸儒說竝祀六天帝不敢損陛下幸訪有司請如古使四月乙丑詔若曰夫禮稱情適文今議者言周唐則善至牽制所聞褊而不優宋亦一家讓不制作如來嗣何且事天不及地配父而遺祖朕甚陋之水旱不時羣神預焉今賴天之力方內以治朕能合饗天地以三聖侑臚報百神咸秩竝修況祖宗郊雩不爲無比有司無諱以勞務稱朕意臣伏誦聖訓久乃開曉以爲前古所缺羣臣不逮陛下獨得于心其所以事神訓人使萬世子孫無以加者至于作聲歌琢圭邸帳帟無文夜鑿弗嚴以竭恭致敬者尙數十物臣愚且不能徧知若今詩頌不傳是陛下盛德神功不盡主天下耳目聳動四夷聲隱乎無疆也謹撰成明堂頌一篇辭淺義直可使戶曉壤翁輶童皆得歌謳臣昧死再拜以聞頌曰

天有明命以聖付聖太祖太宗燮伐大定誰僭而王孰擅而士左披右攘罔不就緒厥角在廷四夷無侮眞考顯承受報收成休休厥寧震震厥聲七十而五號以大榮皇帝纂武有庇于下兵燹不銛簞委而羽一農之饑吾飼以哺一夫之寒吾暖以楮日寬租徭歲貸囚庾協氣四薄順暘若雨原高隰下百穀騰騰二十九載惟秋九月迺卽大慶度筵度室寶字署顏震照多物置使有五悉詔輔弼旣款靈宮亦享廟祏

天兵桓桓。羅列衛營。有闔有旂。龍輓螭衡。耳耳其驅。雅雅于行。旖旎連蜷。風舞雲縈。士若銜枚。驂牡不鳴。吉日辛亥。進祀于堂。衣畫袞然。環瑤瑜瑜。六帝二祇。三后侑旁。醴滫牲肥。嘉罇鉅房。芼醢果棗。淨潔芬香。營熾胖升。以迪厥嘗。我鐘欽欽。我舞俛俛。天妥于坐。百靈來序。奔精哆光。芻霍層宇。山靈瀆怪。顯幽馳驚。或旅諸墀。或席諸廡。(案)此處疑脫一句。但文有羶斯飫。相維辟公。既敏而度。帝拜稽首。柴烟上舉。祝有鑒亦同。別無可攷。姑仍之。有羶斯飫。相維辟公。既敏而度。帝拜稽首。柴烟上舉。祝有嘏言。皇帝受之。產百斯祥。哀萬斯禧。其藎如山。其積如茨。皇帝曰咨。朕不專有。且神端門。百執奔走。其赦天下。新邦之舊。賙乏錄勞。刮濯痕垢。官賞兵賚。金爵是富。驛歡四海。問弗容晷。天謂皇帝。感實火德。火德在孝。宗祀惟極。其還而功。卹嗣千億。而子而孫。長有萬國。天謂皇帝。安我羣元。投蜚斥螟。稼溢于廩。厲訖疾攘。人樂躑躑。皇帝眉壽。永錫萬年。前祀三日。區霧如閉。皇帝既齋。一夕而霽。六幘掃除。若埽逢彗。天清地晏。夜星騰晰。皇帝小心。恭與虔并。徧見神祇。拜跪送迎。久立于次。須樂之成。器必全玉。牢不愛牲。制爲諸安。以正和清。夜鼓徹嚴。敷致厥誠。明明皇帝。惟先訓是式。惇睦懿親。其馨如石。存問齟耄。容受讜直。振淹登峻。毋或失職。惟慈惟仁。不厲聲以色。皇帝有言。克己則興。豐守吾儉。尊捨吾矜。惟日之升。瞿瞿兢兢。無不此或承。

尉氏縣呂明府創修洩水渠頌

神州之地。積高于西北。而庳下于東南。尉氏直其坤隅。故上薄周疆。側負鄭鄙。汗瀆所蕩。行潦所趨。注我

西偏匯爲大浸。異時縣官往往募民開田渠入之惠民河。今自江以北溝漕總目爲河因灌淮楚人雖在勤水不爲害。

太平興國初。或建言惠民河瀕尉氏。折東而北。地泐墊漏。水多壞決。迺西竝崇岡。更開新道。長隄右移。衆渠咸塞。于是水無所洩。則沮洳淵淪。鍾爲回澗。每水潦不時。必壞官亭。漂室廬。害膏腴之田千八百頃。其大者則韓溝護軍二陂。以名自達。輪廣三十里。他脈連股引。延緣葦間。溝遂之小小者。尙數十百所。匯民厥壤。邑吏選奕。蔽不敢聞。歲趣其租。人用重困。蓋水留四十年。狎爲常玩。事窮而復。理固然也。聖上初元之年。大理丞呂君長吉始爲政于茲邑。旣視事。卽按行堤闕。周知其要。乃嘆曰。河漕中都。堤不得弛。陂盤善地。水不容止。潰陂注河。則舟廢。繕河限陂。則農奪。長吏不謀。土其魚乎。于是度楊橋之北。累石編木。以爲竇口。規引積水。潛出河下。東因廢洫行七十里。與惠民下復合。水有所放。漕亦無停。君卽倅圖上言。于計便甚。事下丞相府。復詔中貴人段微明。與寔內察按使者李識。張君平等。興作水工。覈實程員。無慮用材五百章。碁甃數萬。膏壑稱是。工四千人。度三十日罷。條陳中覆。悉蒙可報。明年正月。遣內侍臣譚好古領徒護作。君參掌焉。衆以子來。匠以心競。任器成雲。環材若林。不急不徐。如期而畢。以佚道使人故也。二月。渠成水下。漣澗轉騰。曼羨紆餘。灑其沈災。導其流惡。數旬而牛馬辨。經時而桑田復。是歲。未耨所刺。排水澤而居者。蓋以大半。三年。水涸地沃。畝率收一鍾。流庸還占。參倍于舊。過是而獲者。則不書矣。于時和氣網緼。闔邦如春。繞爲景風。結爲油雲。終古沈斥。一朝茂殖。昔之勞人。今焉樂國。夫善防者水。厥之善溝。

者水激之。因地則氣不壅。達變故民不倦。惟呂君畢給政術。舉無後艱。肆水之走下而奠其歸。乘人之曹好而興其利。縣令之任。今所輕已。君而重之。敝政之改。衆所難已。君而易之。探古舊章。圖我新政。復地力。阜財用。民餽不愆。神糈可懷。禦蓄鍵蠹。莫匪嘉績。朝旌厥能。秩君宮坊大夫。佐郡二千石。民去思者八歲矣。穀益以殖。年益以豐。億萬之口。并蒙厥福。旣而邑之耆耄。雜然共計曰。呂君功緒章章在人。其可歌也。盍琢金石以鋪其馨香。予從事于斯文。宜倫次輿誦而存其梗概。頌曰。

天畿之南兮下田良。壅流弗洩兮漂我疆。地環萬井兮原其谷。歲踰三紀兮租弗屬。我有賢君兮來何遲。累磻疏竇兮河之麋。注潢引汗兮渙東溱。鮮原畎畷兮農其耦。水反歲定兮黍稷華。耜載斯箱兮紛滿家。去我茲久兮田益廡。手之足之兮聲在路。何以報君福穰穰。明神所勞邦之光。樹樂石兮渠之旁。攄德音兮永不忘。

景文集卷三十六

表

太常寺進案到鐘磬一部表

臣聞。鳧氏之爲鐘也。已厚則石。已薄則播。故以弇侈之量。齊焉。磬氏之爲磬也。上則磨其旁。下則磨其端。故以清濁之法。制焉。是則器先利而音調。民已和而樂應。禮著夏歌者。實先于人奏。詩次商頌者。本依于磬聲。然後奮豫飾情。統同布度。盡韶之美。黜武之慝。諧下管以九成。絢崇牙而四合。聖期累盛。至範交修。恭惟皇帝陛下。攷古立均。披圖迎律。大猷翕作。韶象嘉成。推至樂以求音。本乎在治。顧攸司之合奏。容有失傳。所屬以聞。發中垂可。特頒明命。俾攷正聲。臣等共率惇冥。仰祇推擇。昧阮咸識微之妙。非文收調啞之能。淹久日時。咨求典故。方且校堵肆之全缺。參宮羽之重輕。或鑪其銑鑠。均疾舒之所在。或鑱其鼓股。取擊拊之有宜。曩惟周臣。肇營律準。張絃列位。代管還宮。居有雅音。取爲定法。今已攷齊鐘磬一部。與律準之聲。悉無差異。七均有敍。九變告和。詘然能終。純如可縱。惟夫金有大定之德。石無可轉之文。苟二器應以克諧。則八音受而爲度。上符不律。有煥懿綱。竊惟眞聖之朝。已嘗修正雅樂。舊章故在。年所聿遷。遺我成規。以啓淳烈。況今穆清多裕。聽覽餘閒。幸得樹羽充庭。瞭人肄業。慮治音之有誤。丐善聽之所裁。庶

使靡靡遺聲。不容于五降。悖悖王度。來格于三神。永示方來。以矜能述。臣等無任省循。干冒激切。屏營之至。其鍾磬謹隨表上進以聞。

進藉田頌表

臣某言。臣聞王者必藉千畝。庸勸九農。載御耦于介間。脈陽膏于廩左。借民之力。時闢于甫田。爲神之倉。歲儲于馨稷。睿明在御。容典交修。茂遵文祖之規。遂庀陽官之舊。恭惟皇帝陛下。菲衣訓儉。重穀教人。乘春官之載陽。按大田而惟正。追循先烈。祇展上儀。綴萬騎于中營。抗九旗于先道。農祠訖享。神甸就耕。服黛耜以天臨。紆朱紘而身勸。本宜一墾。逐過九推。揭不律以自新。冠前王而絕擬。自昔車牛馬耦。僅出偏方。鉤盾弄田。罔稽正典。訂茲之盛。曷擬于倫。臣陪列祠宮。宿官道室。竊興盛禮。敢廢徒歌。願因風土之餘音。少識樵蘇之談道。謹夙夜齋沐。撰藉田頌一首。干瀆宸扆。

賀乾元節表五首

〔案〕仁宗本紀。帝生日爲乾元節。在四月十四日。

臣某言。伏以金魄就盈。龍杓建巳。紀爲誕節。允煥休辰。盡日月之照臨。祝乾坤之悠永。恭惟皇帝陛下。膺符受籙。出震體元。乘火運以興王。生正陽之令月。體萬物之長治。三光之庭。俗樂成康。刑措文景。梯山航海。咸知中國之聖人。就日望雲。悉禱後天之遐筭。臣滯守邊圉。徒詠聖辰。阻奉萬年之觴。但極雙鳧之躍。臣某言。伏以夏序始交。月靈幾望。儼明堂之朱軾。式煥帝容。紀華渚之流虹。用標聖旦。恭惟皇帝陛下。茂

熙至教。通駿先猷。孜孜厥心。則九功竝敝。烝烝其孝。則四極爰臻。混車書而極和。塞天淵而浸福。那歟之盛。尚矣罕偕。屬千載之應期。固萬靈之輸貺。誕彌有始。延祝同寅。九賓在庭。殊鄰拭目。如山之委。擁漢瑞而勿休。侔天之剛。冠義圖而彌永。臣雖邦未幾。荷寵最深。但傾景于葵園。阻稱觴于莫祀。

臣某言。伏以帝出紀乎震方。聖生符于里社。揭爲亨會。以懷洪休。歷古爲儀。迺今尤盛。惟長羸幾望之日。實丕后厥生之辰。嘉序標名。歡聲綿宇。恭惟皇帝陛下。奉承基構。精厲憲章。嘉祐順乎天時。羣生庇于上德。飭躬必儉。令下弭奢侈之端。禦戎以和。納民于仁壽之地。化孚無外。恩浹有知。每電樞之及期。徇露囊而飾典。大爲和會。廣給宴遨。措筭相趨。交修于鉅禮。呼嵩爲壽。均祝于無疆。慶運有華。萬靈肯抃。臣向陪近列。今退私闕。苦盭蹠之不良。隔班綏之序進。姑勤丹悃。永固熙圖。

臣某言。伏以夏籥啓和。辰躔幾望。本聖生之初旦。著天會之昌期。令節垂鴻。縣區交慶。恭惟皇帝陛下。丕承寶序。駿惠先猷。萬靈接乎馨香。羣氓舍于仁壽。撫不羈之服。未始加兵。獻又新之銘。居常待旦。化含無外。恩激有知。每屬電樞之辰。肯抃露囊之舊。大披路寢。普見羣臣。執玉奉觴。罄歡心而如一。後天緝月。續景算以無垠。震動休符。昭明鉅禮。臣向陪禁闈。今滯侯藩。溯昕景之鴻階。隔王官之鳧藻。姑勤抃祝。永固熙隆。

臣某言。伏以帝出紀乎震方。聖生符于里社。揭爲亨會。識乃洪休。惟丕后克生之辰。當正陽幾望之日。萬

靈輸祉。九寓祝延。恭惟皇帝陛下。膺赤伏之祥。據綠圖之會。天付所授。罔有不臣。世貽厥謀。用侈斯慶。掩刑書以幾措。斂威械而就囊。物無天傷。俗致仁壽。謝生靡所。名德無階。是用企電樞之期。相與徇露囊之典。式披瓊館。或叩金祠。括輿地以投誠。後璇穹而歸老。呼韓薦幣。夷獠奉珍。雖舊而新。常茂居安之業。俾萬斯億。永膺昌大之期。臣久服內聯。今乘邊候。溯君門之萬里。隔觴會之九行。姑抃昌辰。內翹歡素。

正旦賀皇太后表

臣某言。伏以上朔攸開。微陽肇布。蒔月莫而頒歷。旅星柏以陳觴。恭惟皇太后陛下。教本至柔。道孚俾熾。贊天元而布度。包坤順以蒙禱。方屆端辰。彌昭景祐。臣違顏左城。假節東侯。阻陪觀象之趨。但結干旌之思。

長寧節賀表

〔案〕仁宗本紀。天聖二年正月。以皇太后生日爲長寧節。

臣某言。伏以玉燭開年。協風播序。寶月上弦之始。祥沙啓繇之辰。著令有嚴。多儀云備。恭惟皇太后陛下。秉文駿惠。襲道至沖。肇百度之樞。用孚有極。慎五刑之誥。乃統至慈。皇矣而荷帝觀。隤然而示坤簡。屬茲善旦。爰紀聖期。訂千秋之舊章。擁三靈之丕祉。當陽稱壽。于以教孝于人。列辟相趨。于以後天之算。并包無外。蒙被大禱。臣久濫邇行。近分優寄。睇日升而增禱。參鼈抃以無階。

賀壽星見表

秋分謹候。旦見爲常。惟明潤之成文。告壽耆之介旼。允丁至治。不應祥躔。恭惟皇帝陛下。駿惠先猷。寵綏庶物。敦仁而用錫爾極。深拱而罔測其名。訢合三靈。震動殊祉。爛焉南極之宿。載于太史之占。視弧之前。踞內而出。騰華緯表。鑠景天垂。絜見象之甚明。屬攸司之奔告。聖期開賜。諒增千萬之遐。皇格重雍。方闡一平之盛。仍咨良簡。俾獲信書。臣等親遘嘉辰。榮觀美瑞。內循歡悃。實倍常情。

賀冬節表

臣某言。伏以寶典綫長。盛儀杓亞。步璧珠而聯景。挺芸荔以參萌。恭惟皇帝陛下。執競是皇。纂圖惟大。澹冲猷于堯屋。懿新德于湯盤。協氣順躋。慶辰昭會。方薦恭而欽燎。式擁瑞以如山。臣逃守五符。阻陪萬玉。注遐情于望鶴。羨餘抃于歡鼈。距陌于茲。選言非喻。

賀生皇子表

〔案〕皇子卽鄂王曦。時係慶歷元年。祔在壽州上。

寶祐叢休。天支毓秀。慶騰祕禁。歡溢中區。恭惟皇帝陛下。受命溥將。凝圖丕赫。權綱相乂。根乎克念之虔。簡素所安。表于不勉之懿。且復欽刑薄賦。重穀弛畋。一方少饑。則急馳使節。方金稍乏。則輒續禁錢。民用靖嘉。神罔恫怨。是以上帝歆佑。三后顧存。詒美孫謀。昭衍無疆之烈。歸功元首。茂啓多男之祥。誕協仲商。挺生哲嗣。星弧具禮。天第交華。惟翕闢之儲英。固覃訏而絕異。迷聆詔諭。竝仰獻儀。薦笏相趨。忭吾君之有子。珪璋流愛。宜天下之繫心。臣始去近聯。遽承吉語。賡歌緜庶。早知周德之遐。參祝祠祿。罔逮漢臣之

幸。

賀南郊禮畢表

〔案〕仁宗本紀慶歷元年十一月。祀天地于園丘。是時祔在壽州。

臣某言。今日馬遞到敕書一道。以南郊禮畢。大赦天下。臣當時集本州官吏軍民宣讀。并下管內諸縣。塞施行訖者。帝儀訖饗。朝渙推慈。飛驛疾傳。庶邦叢慶。竊以天郊之重。國制有常。凡萬乘躬行。必三歲間。往不煩不怠。由列聖而持循。以妥以虔。合諸神而復對。容圖累盛。繕典勤修。恭惟皇帝陛下。纂大合華。既中布度。抵金璧之玩。率儉示人。收霜電之嚴。措刑于下。克勵明德。格于皇穹。交熏太和。冒我羣品。顧懷時億。瑞應日來。亟戴上儀。若祗舊典。戒期百執。頒詔九州。曳雲罕之常羊。服翠蚪之半漢。殊庭一獻。清祏徧躋。遂自陽靈之宮。往會天元之旦。羽旄四合。垓陸參登。上璧左琮之華。合祛而信祝。祖絕宗題之次。更侑而迭嘗。拜嘉胙于席垂。烈欽柴于雲表。靈心合答。熙典備成。然後還坐中天之闈。普肆隨風之澤。改頒大號。崇冠初元。昭神之祥。祈命惟永。賞功赦罪。已責逮瘵。咸與惟新。牖民衷而遷善。聿懷多福。導帝社以繇區。盛際有光。彝倫咸賴。臣嚮觀舊史。殫見往朝。或不愛牲玉爲恭。殊非明薦。或所過租賦爲復。蓋出重勞。語昔罕全。訂今絕擬。所恨清塵在望。自苦周南之畱。紫臺仍持。不與甘泉之從。第班恩諭。均浹歡悰。

定州賀南郊禮畢表

〔案〕仁宗本紀。係皇祐五年事。

臣某言。今日馬遞到敕書一道。以南郊禮畢。大赦天下者。臣當時集本州官吏軍民宣讀。并下管內

諸縣寨施行訖。嚴燎煬薰。翠輿旋軫。慶騰觀魏。歡浹黎苗。竊惟報本以誠。莫尊饗帝。就陽而祀。是謂因天有國以來。三歲爲法。合萬靈而賡享。窮四海以職來。乘茲治平。用舉能事。恭惟皇帝陛下。丕承正統。奄治中區。惟古與稽。有典咸秩。旣揚翊萬物。乃嘉享三神。前會諸儒。討定新樂。俄頒制詔。悉侑聖真。謂周以后。稷祀郊祖而忘考。唐引睿宗配地。親而未尊。參對上神。自我爲古。推處大孝。卓冠彝倫。爰卜景至之初。克申躬見之禮。三后居左。自外止則。匹行兩儀位中。由天明則地察。蠶豆惟旅。簫石告諧。祓馨德于神衷。委純祺于霄極。萬乘淵默。百禮休成。茂對剛辰。用肆大眚。揭日破葭。注海濯癘。繫係有更生之歡。廢錮得自新之路。賞幣丘垤。屯旅藻旆。歡驛疾馳。不崇朝而徧羣心。保合置天下于安。臣適護窮邊。阻觀鉅典。惟軍旅而未之學。久塵攝帥之行。知鬼神之所以然。方隔受釐之間。姑宣上德。明諭遐毗。

賀日蝕日降雨表

〔案〕仁宗本紀。至和元年朔日庚午。日有食之。或禱在定州。因雨不見耳。

臣某言。臣所治定州并轄下州軍。去三月二十九日。雲氣晦暗。至今月二日午鼓。降雨盡酉刻未止。及尺以上屬縣告足。臣伏尋近降德音。以有司言朔日日當食。有詔避正殿。輟膳改元。示天下自新。引咎太切。三靈震動。重陰蔽霄。日景不見。夫不見者。與不食同。臣誠喜誠忭。頓首頓首。伏惟皇帝陛下。纂成四葉。憂勞萬方。日月祇惕。罔有懈忽。辰晷回薄。大抵有常。今近推變異。厚自克責。天監在順。神佑者謙。感無旋且。轉祥爲福。前此六月不雨。麥禾枯悴。及茲滂沛。遂冀有年。天完太陽。地茂多稼。君道尊安。旱災訖息。敵使

在道親觀感應。震畏盛德。抑伏紆謀。上推古昔。無今倫比。臣乘邊在遠。不獲與羣臣稱慶闕下。謹奉表陳賀以聞。

定州賀聖體康復表〔案〕仁宗本紀。係嘉祐元年事。

臣某言。今月八日。得進奏院狀。報聖體康復。已于二月二十三日。御延和殿。親見羣臣者。六氣順宣。偶愆常裕。萬社交薦。施舍太和。便坐天臨。列辟鳧藻。恭惟皇帝陛下。躬甚盛之德。繼下武之期。悉攬權綱。罔憚宵仄。百度已治。舉器而置于安。一物未宜。無災而為之懼。聽斷逾勵。頤攝稍愆。仙劑暫嘗。客疹俄解。前頒曠蕩之澤。過會清明之朝。帝祐神扶。陽熙玉色。勤在謀始。雖有強不息之勞。福及報成。方介萬斯年之享。均乾宏冒。與日長躋。臣忝服近班。欣聆吉語。且念處無為者。當簡于事。謂沖用者。莫嗇于神。望略繁幾。永光丕祚。

代中書乞降御製詩付編修所表

伏以國有大事。所以訓恭。帝庸作歌。是稱盛德。況且鋪棊天藉。頌嘆慈闈。宜首信書。以傳不朽。恭惟皇帝陛下。勤宣衆甫。祇建大中。澤浸有生。誼柔絕黨。遵端拱之舊。惟永樂之尊。教必有先。爰劭農而勸穡。古由我作。不愛禮以奉親。誠動天淵。聲震金石。因紆寶裘。申述盛容。據體要以成文。包猗那而同美。臣工廣和。方夏敷聞。華日月以昭回。被風雲而翔舞。臣等職當細績。親覲文思。聖典不昭。攸司任咎。是敢仰祈副簡。

垂錫書筵。揭爲大猷。俾永鴻烈。布之天下。遂抗于堯言。藏在名山。永光于漢策。其御製耜田禮畢及親皇太后恭謝太廟詩共二章。伏乞降本。付外編修。

代進新稻雙竹詩表

伏以層城仙籟。順動于王游。區稻町篁。紛函于天施。仰趨中召。與覲嘉生。奉衢飲以屬厭。激蓬心而感發。恭惟皇帝陛下。勤勞訓道。閒豫凝神。聯漢氏之離宮。有周家之靈囿。特侔滂浸。臨籍香滋。務知五稼之艱。式扈九農之勸。箭筈其茂。睢苑所珍。強籜挺敷。秀莖岐出。本至仁之普及。萃靈物以旋鋪。警蹕紆行。臣隣拭目。樂崇丘之允殖。藹折俎以均施。內荷帝慈。竊推天意。一禾實穎。準歲取之且千。衆節共苞。示世支之維百。臣等共慙樛昧。適遭亨嘉。敢抒費詞。少陳大德。慶千齡之累盛。維以遂歌。愆五降之容彈。安能中雅。方塵睟覽。交集覲顏。臣等謹夙夜齋沐。各課成親稼。殿新稻儀。鳳閣雙竹詩二章。干冒宸嚴。臣等無任省循。狂斐慙懼。屏營之至。其詩謹繕寫隨狀上進以聞。

景文集卷三十七

表

謝改待制表〔案〕本傳祁次當知制誥以兄庠方參政乃自天章閣待制在寶元二年十一月

臣某言。臣伏奉制命。特授臣依舊充天章閣待制者。命發于中。擢非其任。懼先襄集。感與愧參。伏念臣早以恹冥。陶于文教。在阿蒙育。易仕代耕。由薦牘以應條。齒經生而挾冊。提給尚書之禮。升直道家之山。間屬成書。亦蒙進秩。不挹漿而持斗。舉畏叨名。未司牧而逢牂。居慚何力。仰含天造。未委官刑。猥濡墨于螭均。兼倅籌于鹽筴。清光在望。更無咫尺之遠。至治丁辰。時紀殊尤之事。內修幸會。疇敢越思。迺蒙皇帝陛下。錄以芻微。記其狀貌。慎行獎數。超寘邇僚。弗緣左右之容。特出顛卬之眷。披霄延澍。破滂回光。惟寶閣之神深。祕珍圖之璧積。創爲美秩。庸竚惇儒。寧茲僕邁之才。可重清閒之地。卑微驟列。辭控無從。昔之待詔承明。陪游金馬。無聞定著。尙詫榮階。詎比亨嘉之辰。專爲顧問之選。第驚茲授。偶值無庸。謹當佩訓。自強。飭躬思勉。馳無泛駕。雖千里之難期。益靡望天。冀一心而論報。倘施涓瑤。敢吝靡捐。

謝賜金紫表〔案〕表內有屬司容局云云。當屬祁爲待制判太常禮院時事。

臣某言。今月九日。蒙恩改賜臣金紫者。戒塗近對。綬品更華。祇佩寵靈。內深榮懼。伏念臣行能無算。孤拙

自知振鷺珍羣。居慙籛羽。太官美食。遂嘆浮人。久含藏疾之慈。未獲酬恩之所。屬司容局。面控感懷。俄被句傳。曲膺蕃錫。袍文染蒨。魚飾垂金。服不值庸。忍慙于安吉。力微稽古。貽望于儒先。還紵無從。光軀何幸。斯蓋伏遇皇帝陛下。重隳常體。業置邇聯。特假身章。俾隆官等。庶奉稽如之賜。益圖叢爾之酬。

壽州謝上任表

〔案〕本傳。祁知壽州。即在庠罷參政之後。爲慶歷元年六月。

臣某言。伏奉去歲六月十一日敕書。差臣知壽州軍州事。兼管內勸農使。卽于今月七日到任。禮上訖。初違侍臺。出總州麾。地控翰垣。政兼民稷。引章揆寵。處閣知慚。竊念臣本以孤生。仰陶上教。措辭簡斐。少不名家。投策猥并。遽叨署第。用沿仕牒。寢剽宸猷。匪智也愚。自知其天分。謂多而拙。罔待于人言。朝不汝瑕。誼無過廢。料于未至。靡有先容。次補者六官。乃正臺郎之秩。內遷者四職。遂玷從臣之聯。朝夕參承。歲時賚予。親逢云幸。平進罕階。故嘗晝昃。夜分置寢。算勞念得。則微橫草萬分之勤。計過悟非。則有坎檀一介之刺。內訟左數。寧舍靡遑。昧死聞陳。乞邦自試。書下丞相之府。久已見俞。筆閣承明之庭。茲焉獲遣。洪惟盛世。慎擇長人。中勗表乎詔文。共治形于宸歎。俯循極陋。曷稱敷求。此蓋皇帝陛下。善育人材。勤恢教職。謂屢經于策勵。審一出于忠愚。特委細文。俾臨善地。況楚疇沃衍。淮產夥豐。潛聖作藩。國封攸啓。元戎疏鎮。帥節甚雄。憬彼東南。此實都會。臣敢不悉心庀務。安節首公。宣諭本朝之恩。刺候斯民之瘼。冀逃諉事。姑服彝箴。但念夙侍軒墀。未嘗去國。自同犬馬。寧不戀君。魂棲交戟之嚴。心結觚稜之邃。儻使賜環。

仍在踣履終收。則奉計來朝。敢三年而憚遠。省躬論報。雖九殞以猶生。感惕自中。涕衷橫集。

謝書目成加階勳表〔案〕晁氏讀書志崇文總目于康定二年告成。祁亦預修。同加階勳。是年十一月改元慶歷。康定二年即慶歷元年。表內有中請爲邦語。是祁時已出守壽州矣。

臣某言。月日。進奏院遞到告敕書各一道。將授臣朝散大夫。依前官加輕車都尉。封賜如故。仍放朝謝者。祕錄終篇。鴻都第賞。例需徽數。垂料餘勤。授受交虛。榮憂兩萃。竊以廣內之奧。中經所藏。自四聖相承。凡七紀而遠。積丘山而盡在。糝朱紫以未分。金匱深嚴。牙籤叢舛。攸司傳失。有詔部分。疇簡名才。總製都目。體漢家之流略。概見所從。參史氏之藝文。種分必類。討論既定。統紀悉周。而僚輔他遷。纂修交集。臣猥緣懵學。俾預末行。素自憇冥。動咨典領。雖片詞殘牒。時竄左文。且雜語諸家。尙悉全載。訖慙戮職。中請爲邦。遂專刀筆之煩。益忘緹油之習。不謂芸編卒業。黼幄程文。嘉衆籍之有條。美諸儒之競力。因褻邇列。施及孤臣。聯文散之近階。賜朝勳之優轉。揆榮至渥。撫已無堪。閣筆居多。早戢鍾絲之恨。殺青偕上。敢叨劉向之功。汗漫不收。天高難訴。但能銘于肝膈。或論報于涓埃。恐疑不誣。明神是質。

謝加階并爵邑表〔案〕仁宗本紀慶歷元年十一月郊祀加恩百官祁時在壽州。

臣某言。今日日。進奏院遞到誥敕各一道。特授臣朝請大夫。依前官仍封臨洛縣開國男。食實封三百戶。勳賜如故者。緝儀交展。信賞第頒。緣策從勳。汎濫異數。罔功被貶。尸寵蒙慙。竊念臣本以辱羈。誤膺識拔。

雲章乏使。荷橐見收。束帶而奉朝趨。居常三省。戴盆而仰天極。決匪兩能。止竭樸愚。以圖稱報。寸勞未効。公議遄興。出屏近藩。尙通祕籍。適會于郊之享。爰修以職之虔。法有侍祠。雖預甘泉之簿。身方守土。遂阻玉關之歸。負結戀深。心馳魂震。迺蒙皇帝陛下。廣歆馨之福。推舍爵之仁。疇庸以差。均澤于下。眷孤臣之補外。助經入而有常。錄此餘勤。沛爲慶典。進階越等。啓土肇封。聞命若驚。修顏罔寘。且掃除奉引。未始請行。而於穆猗那。無從抒嘆。坐沐光榮之集。例承深潤之褒。難拒大恩。姑銘丹臆。儻云酬之有所。誓至殞以無忘。

陳州謝上任表

(案)續通鑑長編慶歷二年。右僕射張耆。以魚周詢奏于七月丁亥。判陳州。九月甲申。徙壽州。耆自陳徙壽。故祁自壽徙陳。

臣某言。月日。進奏院遞到敕書一道。就移臣知陳州軍州事。兼管內河堤勸農使。許辭謝。取便路疾速發赴本任者。睿慈垂濟。羈僨見寬。許停遠方。俾守近屏。拜命云已。感涕交沱。臣卽以今月九日。還付故章。假領新節。恭趣便道。罔敢畱行。以二十五日到任。禮上訖。眷茲宛丘。陪邇京邑。譬周寰內。均漢右扶。氓俗敦龐。閱盜稀簡。臣旣與吏民相見。卽告以朝廷撫育之厚。鄉縣期會之常。最厲惰勤。整比綱目。況穀食豐賤。閭里阜安。儻謹奉條。稍畱考課。雖臣庸賤。保致靖嘉。伏念臣比荷簡求。擢在親近。業以狷直。初無援私。寵靈設加。倫比驚媚。臣亦知險塗易躓。孤枿難林。尤避譏嫌。居常寢默。冷司閒局。自分歲時。寸劄片文。不干臺省。冀緣謹敕。弗累採收。然飛語無根。狙彀潛擬。條違法從。外典守麾。倉卒去都。靡遑自辯。問關居外。誰

肯爲言。而譖不亂聰。昧果蒙照。未踰再禩。俄及內遷。幽荻賜萌。朽骸蒙肉。城闕在望。頓比玉關之歸。傳瑞交華。決非淮陽之薄。抑臣又聞。簪屨至賤。所收本乎君德。狗馬何預。所戀在乎主恩。物誠有之。臣可無似。敢不勉懦爲力。旣力而忠。竭肝膽之愚。基分寸之責。生年死日。質聖誓神。疏屏方虔。造朝云阻。躬畱心企。感悅叢并。

謝替赴闕表

〔案〕本傳。祁由陳州還。知制誥。時係慶歷三年。

臣某月日。都進奏院遞到敕書付臣。爲差宣徽南院使保靜軍節度使王德用判陳州。令臣候交割訖。發來赴闕者。節音垂召。詔底前頒。弗棄而收。釋憂爲怵。拜恩匪次。戢感無涯。伏念臣本以空疎。誤蒙記識。課勞未驗。竊寵已華。遂自吏員。入塵禁閣。水淺舟膠。勢有必然。馭拙吻傷。理無容濟。果煩正議。將責罔功。伏遇皇帝陛下。廣覆由天。至慈如父。謂樹立之始。實出羈平。雖進擢以來。不由黨授。排讐擯刻。屈憲回仁。俾千石以出塵。促萬分而自贖。甫踰年律。特改近藩。墜葉重春。摧轉復載。會須輔鎮。將授帥臣。因得代還。以圖收齒。聞命歡踊。撫己震慙。且念蕞爾孤生。覲然去國。長而多病。衰不須年。鬢雪紛斑。目花眩黑。越在遐外。積有流憂。尙恐狗馬道窮。先填溝壑。江漢天限。無復朝宗。敢期踣屨之餘。倏被召環之賜。光華下集。首領生歸。威靈改加。殞越奚報。但念九閩。在望。十舍而遙。雖否運已傾。決無終塞。而清光可仰。敢俟駕行。甫訖交符。卽當就道。欣榮參會。澁訥難宣。

謝知制誥表

〔案〕表云三月詔書乃慶歷三年之三月也是月蔡襄除知諫院祔有制詞見本集時祔年四十七故云臣踰強仕者六年

臣某言伏奉三月壬辰詔書授臣依前官知制誥者有命自中無階申讓。怔忡卽忝。感憤交顏。竊以星署嚴華。是司書贊。帝猷粉澤。專寄彥髦。故言之簡煩。視人之賢否。比綸而演。如汗弗收。絢日星而森垂。薄天淵而充塞。號爲盛選。宜值難才。伏念臣天畀以愚。學陶所習。本緣薄技。倫比諸生。待罪文林。薦紳朝笏。預成六典。見謂少勤。因得點筆夾階。注言于左史。前籌倅府。商利于縣官。會臣兄某。越自禁扃。擢貳公府。伏蒙皇帝陛下。憐臣淹久。記臣樸忠。方以避親。尤難試可。天語宣示。台宰具聞。邊內交戟之深。實兼待詔之美。此爲異等。絕駭常均。遂使羣議坐謹。夸者陰媚。得無忌克。時澆聽謀。葑屋夜脂。觸太陽而銷散。幽萌朽枿。託厚地以兼容。迭爲二藩。不遠千里。而賜環垂洎。趨節生歸。不圖誤恩。復齒中禁。荷寵惟谷。捫襟若醒。且臣踰強仕者六年。廢辭業者三歲。慮窮刀筆。氣耗風波。壯爲病侵。衰先老至。任焉不稱。謗又將興。矧今鸞鴻筵庭。蘭蕙交畹。檢之禹律。粹以唐文。慶霄光明。萬物丹采。安可細事菅蒯。厠之色絲。簸揚糝糠。先乃嘉穀。撫孤生之匪次。寧樂育之當然。此蓋陛下先置不能。以來多士。罔遺篤物。庸示至仁。策十駕之庸駑。班四戶之凝近。上循感會。俯視官箴。敢不勉惰爲虔。拂昏于瞭。浚明惟恪。絜矩以須。稍裨慎令之行。冀免知臣之諉。臣無任循榮抃遇感惕屏營之至。

謝轉吏部郎中表

〔案〕本傳不載此職。又歷代名臣奏議。自慶歷三年。祔爲尙書禮部郎中知制誥。上三路防邊七事。本傳亦不載其職。今據表內誤直禁殿及直尙郎臺之進秩云。

云似總在知制誥之日
未授龍圖直學士之前

臣某言。伏奉制命。特授臣尙書吏部郎中。依前充職者。課容歲比。官得例遷。華秩誤躋。愧襟罔措。伏念臣本緣羈遠。誤直禁嚴。病與生俱。衰先年至。問抱風波之悸。實依山藪之藏。牽勉拙艱。婆娑歲月。攸箴未驗。不職應誅。敢圖公府之署年。直狗郎臺之進秩。報聞既允。付外遂行。拜獎綍以驚魂。躡華塗而抃股。此蓋皇帝陛下。天無擇覆。春不檢和。謂陟明之格普頒。且宿業之勤必錄。遂容孤蹟。亦被優除。謹當潔雪而煩。彰施厥采。和羊腸而叱度。觸雞雨以長鳴。苟昧是言。有如茲日。

謝龍圖閣直學士表

〔案〕本傳。祁以龍圖直學士知杭州。留爲翰林學士。此與後一首皆在慶歷三年。

臣某言。今月四日。閣門拜受官告。敕牒各一道。除臣龍圖閣直學士知杭州者。層禁叨榮。大邦蒙委。恩叢非願。愧溢乃情。恭以聖考上文。寶楹肯構。大開天策之蘊。分置金匱之藏。間召名儒。入當清問。因璇題之華構。冠學士之美銜。罍爲峻資。罔非崇柬。如臣者。器資樸味。學術迂孱。幸有親逢。記無報稱。四年待詔。姑奉凝嚴之游。兩郡佩符。不絀循良之目。賜還邇著。俾演大言。扞格衰齡。疋綿宿疚。胡廣不愆之舊。動輒有忘。左史能讀之書。舉皆未學。茲焉弗職。況也自知。適會要藩。慎求缺守。宰司誤啓。制詔聞俞。旣籍內于神深。又節假其蕃翰。誼非輕外。治實責成。目見河圖。遂過宣尼之願。名留禁闥。更無汲黯之嗟。斯蓋皇帝陛下。續短于長。勸能以否。謂雖一介。自有鳴吠之專。借曰萬分。亦收涓埃之補。庸加技拭。垂逮未愚。敢忘夙

夜之恩。以忝身修之永。神而可質。心不難銘。

謝宣召入院表

右臣。今月二十五日。翰林書藝董皓。至臣所居。奉宣聖旨。召臣入院充學士者。驛使猥臨。天辭垂諭。齒收單跡。引內禁林。列讓靡從。寘顏無所。竊惟凝密之署。誥命所司。朝選慎其咨俞。士類託乎清切。非有羽產之懿。嚴徐之才。曷以對揚邇言。傳爲成訓。衍膏潤于方夏。鼓笙簧于典謨。是惟能賢。足暴公議。伏念臣懦冥素稟。蹇拙衆知。偶緣雕篆之微。久被菁莪之育。親逢聖誘。自力攸箴。有事素風。遂安所習。向從青簡之列。越綴皁衣之聯。縹緲組爲邦。賜環上計。入陪星掖。祇演繹詞。而扞格長年。尪劬稿質。故疴新疹。痊劇相尋。淺學空文。廢忘幾半。間伏蒲而自乞。願剖竹以再麾。遽沐俞恩。仍遷近職。天誘其願。人及爾私。方具扁舟。徑趨守屏。不謂玉堂任缺。寶詔中畱。還駭栗之飄危。補持荷之空乏。卻其訴避。敦以恪居。旬歲內而三遷。貫情涯而載惕。此蓋皇帝陛下。過循虛譽。降飭屏姿。枉頒召節之華。俾蹈高門之複。歛躬圖勉。揆獎思酬。誓以澡祓蒙心。釋求丕律。體齊人之編棧。謹迪身修。探義易之隨風。慎裁憲令。萬分可采。九殞爲期。

謝兼侍讀學士表

(案)本傳。祁徙審官院兼侍讀學士。表內云。自去歲收還郡符。是時當爲慶歷四年。

臣某言。伏奉今月十一日制命。授臣兼侍讀學士者。命由中發。職匪次加。揆寵自循。無顏容愧。竊念臣天賦愚樸。地託羈單。去歲中收還郡符。引內自禁。以多病之後。乘早衰之餘。昏眸眩于臨文。倦舌喏于論事。

而堯章煥日。漢律丕天。形過照而自窮。馭已鉤而必蹶。方將免冠頓首。自劾曠僚。託迹塵纓。復從冗職。何言大度。併赦弗聞。遂令散木之流。獲預複門之祕。恭惟上德稽古。至聖多能。當決事之少閒。託不明而訪逮。尤須練達。上副咨詢。詎容孤生。遽謬高選。何以披文玉版。擲句清廂。覘師尙父之書。尊其爲道。觀太史氏之策。知所以王。匪曰值才。居然過聽。此蓋皇帝陛下。愛同芻狗。冒若陽膏。方詭效于寸長。不殫能于再割。遂令鰕質。進爾清光。誓且窺管于天。自涔而海。漸識三墳之大。稍知二首之疑。俾免多言。是酬洪造。

授龍圖閣謝恩表

〔案〕本傳。庠復知政事。罷。翰林學士。改龍圖學士。庠復參政。在慶歷五年正月。

臣某言。伏奉制命。蒙恩特授。臣兼龍圖閣學士者。停直複門。徒恩層閣。本緣親而自乞。蒙引籍以對除。揆寵兼常。無顏容愧。竊惟先聖有作。叢構實興。鬱律辰居之嚴。襍積霧圖之廣。踵華創職。稱是取材。肇允榮塗。何嘗輕授。伏念臣識庸淺。術學膚孱。入忝玉堂。間陪講殿。加以樸忠無飾。孤耿自將。附湜湜于涇清。守嚶嚶于雨晦。賴天燾煦。曠日保全。適以臣兄庠。召自外藩。復參大政。理所宜避。地不處嫌。稽首請閒。素言敝懇。丐上還于禁籍。得專侍于經帷。伏蒙皇帝陛下。見謂由衷。特從換秩。罷茲要近。處以清閒。拂怡儼之塵容。磨蠶蝟之寶字。伏況臣出入三歲。便蕃五遷。四叨學士之名。罕見從官之比。雖素領焦禿。病榦疋。羸器極斗筭之容。利止鉛刀之割。尙當勉懦爲立。續短俾長。尙有補于涓銖。矢不忘记于隕躅。

謝復侍讀學士表

〔案〕本傳。祁以張貴妃事出知許州。甫數月。復召爲侍讀學士。表中止。停數直。猶屏大藩。曾未半。薨。歿。頌成命。正指是也。張貴妃事在皇祐元年。又慶歷八年五月。

序爲樞密。祔復爲翰林學士。此
時祔當有一謝表。今集內未見。

臣某言。今月十八日。馬遞到官誥。敕牒各一通。授臣依前充翰林侍讀學士。仍放朝謝者。左符待罪。方做常箴。中制疏恩。邊還近職。祔前尤之。詿謬豔來。寵之便蕃。撫已銜榮。無顏容愧。伏念臣福祚單狹。性局慙煩。距躍至愚。坯陶上教。因隨士夫之課。謹修官學之方。入直文林。進簪侍筆。從鷄翹之游。豫備虎觀之討論。薦許爲邦。俄蒙納節。序躋天掖。祗演王綸。再忝複門之游。久奉華光之學。至于刪定條約。豫法家之議者。三年。整比京司。牧縣官之財者。萬計。止貪云補。罔避謗囂。仍因擿句之間。嘗逮邇言之訪。質當今之謂利病。靡敢度情。語前世所以存亡。或蒙稱善。以孤遠之質。荷顯印之知。播于傳聞。寧無妬媚。何者。一金被賞。來衆口之毀。銷寸的取。褒啓百夫之決。拾名盛難處。援寡易危。況復因希闊之儀。抵忘誤之禁。緣爲飛語。遂淩至聰。所賴公議原情。眷慈合垢。憫一眚之失。義有相除。在三赦之科。愚最無害。止停嚴直。猶屏大藩。曾未半基。亟頒成命。舉已除之籍。復署禁扉。慎數易之宜。仍畱州閣。孤心按堵。蹇步良行。此蓋皇帝陛下。養以至仁。納之大度。忍令久棄。俄與自新。冒陳檄以流膏。破幽盆而逗照。故綏更飾。足追露冕之矜。新組交垂。遂免寒灰之辱。況臣素探前載。粗識大方。謂事君之盡忠。不忘于外。知獲罪之無禱。有私在天。水雖折而猶東。石可磨而弗撓。謹當宣明厥守。湔漑爾疵。夙夜匪告于勞。淄磷不昧其節。河湍日皎。有私自誓之言。弦勁韋柔。參服攸聞之戒。獲收涓效。歸報洪私。

景文集卷三十八

表

讓恩表

〔案〕宋史仁宗本紀皇祐二年九月大享天地于明堂殿今據表內欽柴已事灌露函禱及進三品之美階加八柱之榮數云云蓋即讓進封常山郡開國侯恩也

臣某言。欽柴已事。淇露函禱。叨預祕樞。均推渥典。席恩徽之累等。捫心極之有涯。敢援吶辭。啓停蕃錫。竊念臣久塵幾綽。無補顯猷。仰就德以日躋。罄小心而昭事。悖崇秩禮。震動殊休。歷款先祐。而遂見闕宮。哀對上靈。而升侑文考。光華接于旦暮。汪濊塞乎天淵。內慙衰殘。法當侍從。猶如進揖。寧善于魯儀。肅若動心。但欽于漢瑞。獲紆不敏之咎。已銜大庇之仁。敢冀睿明。首襲機管。錫之崇號。訓以懋功。進三品之美階。加八柱之榮數。靜言匪服。祇足增慙。且夫禮行于郊。孰非展案。勳在于策。斯可歸勤。苟曰罔功。率爲不稱。矧當三接之地。尤寄百度之宜。寵旣自叨。勸將何有。伏望皇帝陛下。矜立志之難奪。靡問于匹夫。察過令而必收。罔論于渙汗。丐還虛授。庸息羣言。叩善聽之彌高。露危情而偕極。期于從欲。是免濫官。

謝覃恩轉給事中表

臣某言。伏奉制命。授臣給事中。依前充職。進封常山郡開國侯。加食邑五百戶。散官勳如故者。休成懋祀。恩賚庶工。錄臺蕝之少勤。枉帝緡之平施。進升官著。申衍侯疆。榮雖例加。愧實中積。伏念臣性分疏拙。學

習空虛逢時盛明與衆倫比向塵詞署自抵禁條嘗從解籍之科亟沐賜環之召老馬無棄姑結戀軒之勞楹木未殫已辯代檀之誤專陪勸講彌邇清閒居嘗刻肌坐或忘食以爲鍛翼方奮勢不高飛折足始痊誓無疾走冀保全于晚節慚云補于厚恩會國家推放上儀懋竣宗祀福不專饗澤乃普頒眷顰薄之孤生忝光華之旅賁瑣闥增秩望郡陪封追論講求之功適當容典之局禮有因革皆中詔自親其文議或糾紛故上心制定其當合任墮官之咎顧借躡等之遷此蓋皇帝陛下德暢多方仁包有截和氣中律庶彙竝甄太陽垂光萬影同見遂令羈宦豫齒襃章步區舍之重深食戶租之優富罔功被賜誠無獨讓之階累日儲勞願補他年之最涓分可効糜殞爲期

謝復兼龍圖閣學士表

(案)本傳祁以祀明堂遷給事中兼龍圖閣學士今集內表謝兩次必當時亦兩次加恩本傳統言之耳

臣某言臣伏奉制命授依前給事中翰林侍讀學士兼前件職者恩洗曩愆寵還故授緣榮得忝顧忝成慙竊念臣識局慙冥學機扞格久塵法從再直禁垣謬誤墮官徬徨去國遽瑗之老何止于知非石建之愚自甘于抵死永言孤跡俄軫上慈外停刺史之符人引露門之籍用是晝分忘饋夜艾輟暝收擢短才詭成來效報深恩于骨肉掩餘諂于防川伏遇皇帝陛下修祀合宮均釐環海幸參圖始沆視告成普賚侍祠例蒙扶秩尙念過雖一解職未盡歸再紆泥紵之褻仍廕霧圖之祕債膏沃朽破藪延暉靈駕復騷漸習安行之謹傷禽已奮益懲虛墮之虞敢不祛拂蒙襟中尋典學服攸箴之訓匪懈厥躬有如日之明

不忘于素。涓分可効。蹟殞爲輕。

亳州謝上表

〔案〕表內云二月者乃皇祐三年之二月也。據本傳及續通鑑長編。祁坐其子從張方彥游。出知亳州。庠亦以不戢子弟爲包拯所奏。于三月罷相。出知河南。但觀祁表。宿疾

繼作及難參法從。願守外藩等語。係因疾乞外。並無爲子引罪之語。疑祁知亳州尙在其子事未發之前。庠知河南。則在其子事既發之後。

臣某言。伏奉二月詔書。差臣知亳州軍州事。臣卽于三月二十八日到任。訖。渦陽舊里。譙社勝區。聯輿二京之間。參雄三輔之亞。長人如此。銜賜無涯。伏念臣學本迂疎。性非通曉。叨塵禁近。久歷歲時。惟悉心以事君。不因回而取福。居常斂分。動輒省身。正以所得之名。多浮于實。匪衷之服。易用致災。比年以來。宿疾繼作。兩鬢紛白。餘日何幾。雙目眩昏。飛花無數。難參法從。願守外藩。伏蒙皇帝陛下。裁貸恣愚。記憐面目。申擇善地。俾總化條。顧臣此州所領七縣。盜賊數發。流亡尙多。所賴首麥向登。膏澍仍降。介農相怵。比屋寢安。仰惟清衷。無及多軫。臣亦早侍祕幄。屢耳聖言。以四方宣力則和。雖一夫失所爲負。敢不勉責吏事。勤諭詔恩。向冀刑罰稍衰。手足知措。倉廩向實。禮節可興。勉衰債之殘軀。報光榮之誤寵。違顏方邇。結戀徒深。

定州到任謝表

〔案〕續通鑑長編。皇祐五年正月壬戌。知成德軍宋祁知定州。與本傳及此表俱相符合。其成德軍到任在前年七月。故表云甫及牛葦。更忝茲授也。

臣某言。伏奉正月日制詔。就移臣充定州路都部署兼安撫使兼知定州。臣以二月二十五日到任。訖。由中被詔。益北護邊。外循衰癯。陰訟庸短。強顏臨部。捫感充膺。伏以中山之區。河朔爲劇。作國垣扞。壓敵喉

襟高墉峯而雲聯。諸屯班以基置。風俗質儉。氣尙強雄。從古以還。號勁兵處。自四道分帥。大將須才。韓琦以舊臣之勞。實首茲選。出入六載。經營百爲。補綻成完。斂頑就法。聲績明具。綱條設張。考課上聞。居治第一。伏惟皇帝陛下。精覈吏事。畱意塞防。謂琦報政之成。進易其地。惟定代更之重。謹擇于人。過聽腐儒。俾嗣前最。伏念臣稱自寒素。得廁班行。所習簡牘之功。不知軍旅之務。比嘗出守。止責親民。故于歲成。偶紆官坐。自塵真定之擢。遂總中權之華。定命不可以固讓。還遠戍不可以不才解。徑趨所莅。甫及半朞。詎謂僉言。更忝茲授。官併二組。地綿九州。且臣自揆所能。出羣臣之下。遠甚。潛計其齒。去六十之年。幾何。論公則應黜。乃遷。語私則當閒。反劇。懼溢于喜。榮弗蓋慙。況此州遭水潦之餘。困儲廩之積。且食先軍足。士以馬強。今乃庾乏億秭之饒。牧微駉牝之衍。賢守未辦。況臣至愚。謀夫深憂。況臣淺識。斗筭陋器。蒲柳餘陰。倚以成功。判于諉事。然聞生者士所重。徇義則輕。兵者器則凶。忘教斯怠。臣旣粗識前載。數剽大猷。雖旅力復弗強。知忠孝在所尙。當悉心細大。自力宵旰。奮練戎行。綏育生聚。有如緩急而可用。曾是掎克之靡加。至于事當便宜。物有長利。奉上無隱。據義固爭。敢冀睿慈。每賜裁赦。乘鄣在遠。拱立賒期。心溯凝宸。魂棲清戟。

謝加端明表

〔案〕本傳祁在定州。上禦戎論七篇。加端明殿學士。進論在至和二年。見歷代名臣奏議。誥勅在八月。見本集轉端明殿學士謝執政啓。

乘塞無狀。增秩蒙褒。賜予侑頒。心顏交靳。伏念臣才弗振俗。仕偶違時。備內朝臣。十有六載。學不足膺天。

子之問。文無以代王者之言。遂圖外遷。冀云少補。惟定武一道。直契丹右廷。咸平以來。號勁兵處。自夏竦分建四帥。韓琦始領九州。節制中軍。部分諸將。琦旣進律。臣實代居。以一介懦儒。當萬夫要任。誼難辭劇。奮靡顧愚。然臣所習者藝文。未曉者軍旅。用非所習。雖勤而弗效。責于未曉。故技有必窮。用是再葺。居無底績。在法云殿。惟黜是宜。迺蒙皇帝陛下。憫久成之勞。排彼譖之侈。雖遠猶錄。謂拙可矜。收雲閣之故資。著丹殿之新籍。仍秩經省。未易守藩。叢沓徽章。夸嫖鄙邑。重降嚴旨。切卻讓封。臣亦內揆愚心。旁諗公議。若循禮疊請。則恐涉不誠。或固節還恩。又似規早罷。不有粗使。誰扞邊疆。例格除音。孰尊寵數。輒昧涯分。祇服器名。日三省以自營。身九殞而奚報。但臣所念者。邊務至重。敵詐益滋。得人失人。繫今日輕重。知己知彼。爲天下安危。而有司特用苛法相撻。守臣類以生事爲解。封候畏怯。不敢搖手。倉庫虛乏。正可寒心。建明累上。而朝省未從。姑息小虧。則謗囂立至。況臣衰晏。素自慙冥。判無成功。徒忝休命。望審擇于豪俊。俾臨統于方隅。設張遠謀。羈制驕狄。因罄敷于感臆。竊附列于瞽言。朔壘地卑。君門天阻。被符蠲謁。攬綬知榮。

益州謝上表

〔案〕祁知益州在嘉祐元年八月到任在次年二月

臣某言。昨被嘉祐元年八月詔書。授臣吏部侍郎。仍舊職。移知益州。臣以九月解定州符印。十月過闕下。又奉詔旨。許朝見而賜訓敕。自見逮辭。凡一月。卽乘驛趨官。以今年二月二十日領州事。旣見官屬。卽徧

詢閭井病利。皆言稼穡蕃稔。雨暘順時。人安常業。物無翔價。吏下如律。邊尉弛虞。事便于宜。人重犯禁。無
遯與邇。式舞而歌。臣身所聞見。與言符驗。伏乞睿慈。少寬勤卹。責臣治理。保致嘉靖。伏念臣蚤蒙記識。得
籍近嚴。惟知悉心事君。未嘗枉道從衆。是以將賀而弔。至未譽而毀。從一去朝聯。四易藩守。前日鬚澤。變
爲華顛。向時疆力。鬱已疋瘁。今又走五千里之遠。委西南面之雄。躡進華資。冒取豐秩。斷斷之仗斯罄。悠
悠之言云何。此蓋皇帝陛下。翁受庶工。善養多士。容螢助日。收壤培山。料錄穴微。俾充器使。然臣愚有所
稟。志不可遷。故直尺若尋。自視無愧。食荼而齋。罔有憚行。況茲圖政之辰。敢負惟良之委。昔王尊一叱其
馭。便詫忠臣。何武轉而上聞。粗裨盛德。臣于茲事。未謝前人。假節方初。造廷云阻。叢感斯望。臨文罔宣。

謝龍圖表

〔案〕本傳。祁知益州。還以包拯言其兄方執政。不可任三司。乃加龍圖閣學士。據本集四州。張載系題云。自嘉祐初來州。已閱再奉。則此時當爲嘉祐四年。祁自慶歷三年知制誥。

授龍圖直學士。至此已歷十七年。至表內所云。翰林端明者。各再龍圖閣侍讀者。三。今本傳。惟再爲翰林。可攷。端明則一見于知定州之日。未詳其再龍圖閣。則一見于罷翰林學士之時。再見于祀明堂。遷給事之時。侍讀則一見于徒知審官院之時。再見于許州復召之時。俱未詳其三。

右。臣伏奉今月七日中書劄子。以臣陳讓龍圖閣學士。奉聖旨。令臣依累降聖旨。不許辭讓。便令受告。敕者。危悚數陳。嚴音三卻。拒命難固。蒙寵增慙。伏念臣天俾忝愚。性止崖介。時借其運。實不副名。然十七年中。徧踐美職。爲龍圖閣直學士者一。翰林端明殿者各再。龍圖閣侍讀者三。今又叢資累華。併爲異數。當今兩制兼職。皆不逮臣。材劣衆賢。而恩冠近列。是以亟剖丹若。上格詔文。渙汗弗收。匹夫終奪。昔三綬爲

侈兩印自矜。未若臣祕禁經筵。寶圖重構。銜置重複。班級高華。此蓋皇帝陛下。垂憐衰殘。早經驅策。因避嫌之請。增通籍之榮。卸鉸旆駒。稱服珍帶。山岳施重。螻螳命輕。論報何階。撫躬如隕。

鄭州謝到任表

(案) 祁知鄭州在嘉祐四年四月

臣某言。伏奉四月十九日詔書。授臣依前官加龍圖閣學士知鄭州。臣見乞免所加職名。候朝旨外。已于今月二十四日到任。上事訖。讓還劇使。恩與近藩。始冀避親。終成冒寵。伏念臣器識迂暗。年事頽侵。前日護邊。用非所習。向來治蜀。煩不值能。蒙賜代符。進遷計職。適以臣兄庠。冠樞近之秩。參調發之繁。誼不處嫌。理容上訴。果沐中旨。許收誤恩。復以華資。寘于便地。陪京甚邇。舉族自安。此蓋皇帝陛下。大造曲成。至慈善養。釋臣多懼。惠臣更生。臣敢不奉揚化條。刻誦聖訓。尙期寸效。歸謝上仁。

謝加常山郡開國公表

(案) 仁宗本紀嘉祐四年十月癸酉。大禘于太廟。大赦。戊寅。加恩百官。祁時知鄭州。故表內有盛修合食及守士之拘等語。

臣某言。十月二十三日。進奏院遞到敕誥。伏蒙聖恩。授臣常山郡開國公。加食邑實封者。制出中天。恩臨叢品。捫躬匪稱。拜命載兢。伏念臣才不適時。智非周物。坐逢熙序。歷踐華塗。會國家追講曠代之遺。盛修合食之享。孝思上格。臣職駿奔。俯惟守土之拘。莫預奉璋之助。魂馳龍辰。魄集鶩驚。恭惟皇帝陛下。凱澤一均。至仁四被。靡間孱陋。例霑寵榮。集超列爵之高。益厚加田之目。涓塵微効。夙無補于聖猷。穹壤殊私。遽併膺于獎典。重恩難讓。愚悃奚安。徒鏤骨以自期。庶粉軀而論報。

謝轉工部尙書表

〔案〕本傳唐書成。祁遷左丞。進工部尙書。進唐書。在嘉祐五年六月。時祁尙在鄭州。至次年始進謝表。故云。奉去年六月制詔。又祁有讓轉左丞劄子。見本集。

臣某言。奉去年六月二十三日制詔。授臣工部尙書。職任勦封食實封賜等竝如舊。仍放朝謝者。成命臨下。愧汗交顏。伏念臣性本迂疏。能有涯分。論撰清選。每得竄名。雖邊要至雄。亦叨假節。奏課弗效。誤眷無酬。向以衆力成書。特恩進秩。避讓旣卻。冒受尙新。俄錄歲勤。更偕省坐。名品尤峻。遲暮難堪。但四載敘遷。已成定制。一辭祈免。恐近取名。輒服褻言。肅祇官次。此蓋伏遇皇帝陛下。廣無遺覆。照必逮微。垂記孤臣。普加陟典。敢不益勉。屏陋。愈探典刑。肌骨昭銘。涓埃厯效。

讓加承旨表

〔案〕續通鑑長編嘉祐六年二月甲辰。詔翰林學士承旨宋祁。遇入直。許一人主湯藥。祁以羸疾請之也。加承旨在五年中。祁卒則在是年五月丁酉。

右臣。今月二十二日。閣門降到誥敕各一道。授臣翰林學士承旨。依前兼端明殿學士翰林侍讀學士者。聞命震驚。撫躬愧汗。伏念臣病求解郡。恩許還朝。獲便醫藥之良。以救桑榆之晚。是爲再造。舉戴深仁。然自休偃于私居。尙苦纏綿于舊疹。深虞盈滿。遂致顛隕。今茲詔除。尤出望外。且承密旨者。或膺疾召。或訪欲謀。法從翠華之嚴。恭持紫橐之重。必資該敏。仰副眷求。如臣者。年事頽侵。氣力衰耗。且責于必不能者。敗加所不宜授者。僭實累公議。致速身災。自知甚明。人言將至。伏望皇帝陛下。推雲戢霈。破葑延光。許回誤恩。少安危悃。誓堅九殞。歸謝鴻私。

景文集卷三十九

表

代章集賢讓拜相第二表〔案〕章得象字希言歷官承旨景祐三年知樞密寶元元年同平章事

臣某言確摯上陳危言若訥猥煩勅曉尙闕俞從內省冒升罔諧寧舍臣聞力不勝而強用者儻石益之則躓視既勞而猶察者輿薪值之亦昏何則才局于素定之倪效屈于用多之廣早明茲理敢誓固辭伏念臣本自諸生不經遠物雖圖筮仕止望易農嚮緣邇禁之聯遂忝鴻樞之領投醴嬰屢缺之畏躡足微必勝之籌衆不可誣事皆已試寧足越司天宰之柄上憲乾台之華昏于已窮躡乎強用名器者天下之重師尹者列辟爾瞻濫始于茲下安取法抑又聞宜負而乘小人之盜實招不狩有鶉無功之祿爲刺巧于室者弗令撓而貽壓愛其器者非欲滿而就傾如臣所懷舉皆類此況今權綱俾乂憲度交修方當訪弱翁之賢總領衆職資胡廣之間練達朝章無令蕭枕之餘首玷論思之地伏望皇帝陛下念任人之尤重諒省分之足矜實臣以彼己之言許停贊制免臣以疾顛之咎俾示曲全蒼哲在廷俊髦布列枚功而舉謀國必臧瀝危款以罄聞仰睿音之垂可

代楊太尉讓加節度使第一表〔案〕楊崇勳字寶臣明道元年授檢校太尉山南東道節度加樞密二年同中書門下平章事

臣某言。伏奉今月某日制命。以修葺大內了畢。加臣某官。落成在旦。懋賞均禱。由置局之有經。枉推恩而異等。罔功已甚。拜賜不遑。竊念臣自闢茸之中。邁亨嘉之會。器非適用。食乃浮人。惟頓少文。罔裨于紀律。樸忠自任。僅宿于官箴。猥蒙大度之容。進貳中樞之職。一昨大營層構。別建攸司。領使以上公之尊。咨副于邇臣之列。不圖推擇。偶及妄庸。臣于斯時。罔及崇讓。誠以二宮側身之際。百役僇功之辰。冀率寸長。仰寬旰食。其如庶民樂勸。百堵竝興。有茂宰以建規。有勞臣之宣力。臣但參陪廟算。奉行符節。無黍稷之重。無涓塹之勞。訖太紫之雄成。寒天淵而渙汗。猥紆成命。序進寵名。錫號以紀庸。爰田而衍食。本兵劇職。疏社近藩。而臣退省其私。何力之有。掩上之功。則在體不順。掠下之美。則多謗其興。取身之災。爲國深悔。兩失其道。人將謂何。伏望皇帝陛下。收已澍之仁。據循名之實。許還誤賞。無俾濫官。責其陳力之微。紓以害盈之咎。日有三舍。或遇感而必移。志在匹夫。信有誠而無奪。援天惟切。得請是期。

代楊太尉謝加節度使表

臣某言。近以虔奉制恩。驟膺寵數。尋露章而再瀆。冀還賞于至公。游沐慈音。仍斷來表。祈天靡諒。拜命知榮。竊念臣論品下中。賦材弱植。緣先朝之誤寵。收一介之微勞。感會風雲。汗塵名器。執戈外禦。適遭偃兵之期。涉級序升。遂竊登壇之拜。總提師律。拱衛宸居。積日爲慙。無勞可紀。不圖聖獎。擢貳近樞。坐席未溫。營宮勿亟。咨宰庭而命使。挾戎帥以領徒。曾是妄庸。亦參經畫。逮落成之告始。顧居逸以興懷。百詔攸司。

聿陳盛禮。應天以實。哀對于廟靈。與物惟新。茂宣于雷解。祈年易日。集福推恩。而臣底績至微。備員有素。因端闈之第賞。紆溫檢以開榮。視秩本兵。建藩維翰。益勳臣之殊號。增采邑之眞封。矧基命預聞。邇臣同體。上方引咎。克謹于盈成。下或分功。何顏于啓處。寵靈踰分。震怖裝懷。瀝懇固辭。成命難寢。亟煩褒諭。祗益罪尤。斯蓋伏蒙皇帝陛下。變復在辰。寬仁布度。姑厚惟平之施。勉從寧僭之科。臣敢不祇服訓言。罄輸忠力。防幾事之誠。無俾害成。佩進忠之言。更思盡瘁。永惟素守。用質幽神。

代上皇太后第一表

臣某言。斯干勿亟。式壯宸居。麗澤遂行。首褻樞管。省貪天而冒賞。舉踴地以增憂。竊念臣智效有涯。親逢爲幸。宜疏而裨。濡翼于梁。倚上聖之兼包。遏煩言之舉劾。擢于宿衛。外佐樞衡。間屬完復。宣溫繕圖。輪奐事資。尊達別建。攸司官必有聯。用均底績。臣始從末至。遽貳敷求。冀千慮于參禪。希萬分子報稱。而寸長自驗。任重咸知。上則祇稟于謀謨。次乃倚成于衆力。秩未加而爭勉。功不日以慶成。千門疊飛。百堵山立。而臣委此在列。拱默居官。訖乏儻功之能。仰裨煩使之任。今乃溫辭誕告。列位徧聞。特移近鎮之崇。兼領上公之秩。任官密勿。廩食豐融。曾是冒居。疇能安處。雖含垢者。天道姑務樂成。而缺望者。衆心無容厭服。伏望皇太后陛下。察其退省。惠以克終。追改命書。弗加虛飾。必若篤臣鄰之分。懋功賞之科。則陳力有期。或容于積日。陟明無濫。更俟于宣勞。臣止乞比類近班。例外彙序。庶乎不僭。以肅無厭。願回從欲之仁。垂

采薄言之訴。怔忡于此。俞可是期。

代第二表

臣某言。臣近以崇進寵章。輒騰讓奏。大言垂答。成命未還。慙衷所并。懼處無措。竊念臣材姿蹇淺。地望單平。獲對聖期。遂階樞柄。汲深綆短。自審于無能。材敗錦傷。慮墮于有典。值國家從周考室。嗣禹卑宮。獲贊事經。亟成不績。惟當陽之引咎。因肆眚以翔仁。首眷近班。竝推異數。鴻私交委。危懇匪寧。何則。密勿之司。體均休戚。彌縫之任。責在臣鄰。當九重旰食。以勵精。寧百執晏安。于受爵。上虧治表。俯畏人言。伏望皇太后陛下。垂照危悚。曲全瑣質。重名與器。罔俾于官邪。收絳以綸。特從于人欲。儻道易盈之責。實銜再造之私。

代謝皇太后表

臣某言。近膺制命。崇進寵章。再瀝危悚。冀回誤賞。俄枉斷章之旨。俾遵踐次之規。徇守莫從。拜嘉何幸。竊念臣本由羈齒。獲遵亨期。頃在先朝。已嘗劇職。協華繼照。圖舊見收。擢領干城。畱參離衛。漢臣少贖。僅乃過之。林父盡忠。自知底止。偶偕天幸。遂貳帝樞。親佩疇咨之言。預聞甚衆之事。營宮度室。權使慮功。匪伊乏人。姑願宣力。而靈臺勿亟。斯于落成。惟翼翼之小心。答高高之深戒。肆類霄極。祇格廟祧。沛爲鴻恩。賚及羣品。薰至和于有截。示昭德之不違。乃眷臣工。竝推獎數。而臣揆庸最淺。進律首加。奄土宇之版章。擁

名器之烜赫。疾顛是懼。薄訢載勤。而孤根莫隔于青春。幽盆遂均于白日。循牆罔獲。濡沫增慙。斯蓋皇太后陛下。協暢懿綱。輔成至治。謂已行之賜。寧僭而不收。俾無用之臣。未勞而先祿。敢不力希汝弼。務告斯猷。式是柔嘉。保乎慎密。循孤生而有託。喻厚報以無涯。

代楊太尉讓樞密使第一表

〔案〕楊太尉即楊崇勳。

臣某言。伏奉今月五日麻制。授臣依前官充樞密使。餘如故者。躡等之恩。猥加葺質。本兵之地。超以宗工。聆誕告以不遑。撫危心而如灼。竊以天人感會之要。夙夜宥密之嚴。號爲樞衡。罔私名器。自匪安世之慎。林父之忠。履無重剛之疑。進有九鼎之重。必程茲效。始免冒居。如臣者。根柢微材。斗管近器。親逢聖旦。假歷要塗。將將之仁。上依于漢度。師師之序。久玷于堯官。中寢告成。攸司何力。例蒙霑寵。改就近藩。讓不獲從。坐猶未暖。旋頒渙號。俾正使名。總異數以大來。匪孤臣之克荷。且臣聞之。愛官同乎美錦。用士異于積薪。使人皆學製。則百度且虧。後而居上。則有功不勸。而況擢于數臣之末。抗乎三事之尊。力且未陳。進仍無漸。伏望皇帝陛下。據其器使。貸以滿盈。追罷徽章。許仍故處。用勤補過。少冀于萬分。歷級升階。況存于有典。庶全邦體。恭俟天從。

代上皇太后第一表

臣某言。隆名烜赫。異數便蕃。辱誕告于王庭。俾顯升于樞府。缺然無狀。惴若臨淵。竊以運動二儀。本之樞

軸昭明萬事責在股肱。自置使以居中。匪得人而莫可。況乎下武。尤慎曠僚。伏念臣系本孤平。材微開濟。由驂之靳。四服于馳驅。如山出雲。偶邀于期會。任圖大事。蔑報萬分。因考室之微功。辱改藩之茂渥。號封兼列。錫予孔蕃。方且澡雪慙冥。講求故實。俟愚者之一得。塞小人之攸箴。而成命游頒。榮階逾緝。由數臣之後。進領上司。未三旬之間。再煩大覲。顧惟冒處。實速多言。且用在材表者。有必窮之期。賞超功外者。無能守之實。下取四夷之哂。上紊百工之倫。祇悔旣多。害盈可待。伏望皇太后陛下。諒其悃悞。輟乃寵章。且延積日之期。俾竭寸長之效。漸希有補。乃議敍升。在授受以爲宜。亦等威之不僭。倘蒙順許。是免顛隕。

代楊太尉讓樞密使第二表

臣某言。昨以肅膺茂典。進列上樞。亟露奏函。願還賞典。叢爾之誠。無感往哉之訓。不移夙夜以思。慄慄罔寘。竊惟官可以闕。不可任非其人。邑雖與多。無容假之以器。何則。十手甚衆。百度所叢。允當則丕命其承。虛授則浮言肯動。況幾微開策。左右仰承。累苟及邦。身焉賴寵。臣甫從末至。未究大猷。猥屬建元。例蒙進律。已忍慙而冒處。冀陳力以少疇。寧謂宸衷過私。贊畫旋降。正名宥密之署。財或一二之幾。內揆妄庸。曷先勝處。夫棟幹或撓。則困于衆材。馬力已殫。必要其所駕。國之闕政。常必由之。士有食功。亦宜底止。伏望皇帝陛下。追收允令。改命能賢。暴刻牘于百工。紆賤軀之九殞。罄數危控。虔俟兪從。

同前上皇太后第二表

臣某言。近膺明制。擢拜上司。入竝宗臣。對執樞柄。尋露情于尺奏。冀收縛于誤恩。答命雖頒。兪音彌阻。省循至再。震越無從。臣聞善持器者。不欲滿而就傾。巧度材者。不使曲而強直。物宜尙爾。人理則然。故責功者過量。乃傷陳力者不能而止。敢援斯喻。備述愚衷。竊念臣慮靡經邦。官纔宿業。獲階近綴。未及半朞。爵與衆而例加。讓蒙恩而弗聽。療官之誚。曷日可逃。不圖含垢之仁。復舉揚庭之典。知小謀大。任重道悠。國有曠官。身餘後咎。脫致彝倫之紊。寧容一介之誅。伏望皇太后陛下。體斷斷之能。居然箴短。察縷縷之請。罔俾官邪。許停授受之恩。實荷平成之賜。

代楊太尉謝樞密使表

臣某言。昨以叨膺茂典。入管鴻樞。伏省戶以陳章。丐綈囊之收霈。危悚再瀆。明制必行。懼煩失以致尤。輒進思而冒處。臣聞佐王基命。簡在臣隣。秉軸居中。本之兵柄。非有號令風采。爲下所瞻。則必愜臆謀。謨熙天之載。異于茲道。孰匪曠官。竊念臣材庸乏施。地寒寡援。與顏行之下。因得累勞。陪周衛之中。罕嘗進熟。見容漢皇之度。久總軒師之營。貳宰繁機。佐經中寢。會落成而不日。因愆祀以祈年。汪濊深仁。導迎協氣。而臣弗從。災異之變。更加名器之多。寢默懷安。委蛇就列。內循無狀。自詭必酬。何月律之未淹。沐天私而載造。擢于未綴。遂正近司。輒成奏以讓還。枉深辭之切勅。薄言匪控。進拜增羞。助百姓之昭明。行虞辱國。千六符之疏闊。舉畏談天。斯蓋皇帝陛下。養以至仁。赦其少戇。同五帝之親事。不及有司。俾一介之孤臣。

無空大位。敢不益勤。緜力罔伏。舊章期有補于萬分。敢自紆于九殞。

同前謝皇太后表

臣某言。近叨恩制。俾正樞司。伏閣上言。願還于成命。斷章催拜。再枉于慈音。固讓莫諾。冒居何幸。竊念臣液。構材散培。塿地卑獲。對聖期。屢揚劇任。敵王所愾。既會于偃兵。積日之勞。何從而塞責。洪惟職覆。深諒由衷。斯謀斯猷。罕嘗入告。予求予取。不議汝瑕。惟先帝之舊人。貳禁庭之幾事。屬圖考室。兼議僉功。燕寢乃安。顧成竝享。紀年肆眚。舍爵計功。首膺無戲之言。已援于宣之數。僭夫國典。布在人言。豈謂天眷。謬加寵章。尤渥靡倫。彝序超據。上游壅薄。訴于危心。隔蓋高之善聽。光華異等。震抃裝懷。三接謬詎。未識主臣之對。萬幾處可。曷臻密靖之風。乘是泰來。缺然升授。此蓋伏蒙皇太后陛下。道敷善養。人不備求。貸衛綰之孰何。取子顏之謹質。特捐厚禮。期責寸長。顧懋賞以不貲。誓捐軀而有所。

代楊樞密謝加恩第一表

臣某言。廟藉葳儀。竝修于典業。飲勳論至。申告于治朝。顧無狀之具臣。濫本兵之右職。便蕃荷寵。慙媿交顏。竊聞賞以功爲重輕。官用能爲次序。故公器者假之于下。則伐檀之刺興。天秩者授之以庸。則緇衣之風勸。上關損益。昭見典章。如臣者志抱樸忠。任非文敏。攀鱗附翼。實出親逢。壯事老謀。驗于已試。擢升宥密。未閱歲時。蒙舍垢之至仁。遏空殮之橫議。曷惟天幸。亟相帝容。陪醜乘以清塵。從春旂而賑士。徧升七

室用劬九農。而臣自始屬圖。則乏倪寬之建白。逮于相禮。則有孟僖之坐慙。奉凝蹕之還衡。琢温瑜而升册。曾微千慮。少答萬分。免戾爲多。開榮非覬。又況崇階異數。衍食陪封。卽舊以表其新。臨懼更延其寵。臣躬雖幸。國體謂何。儻腊毒以冒居。實敗材之行。及伏望皇帝陛下。推明有典。詢逮羣言。用必役其所長。賞不加于非次。收還成命。昭示倍官。弗興鐘鼓之妖。俾緩冰淵之懼。探情非飾。瀆聖奚逃。

同前上皇太后第一表

臣某言。廟筵升祿。陽土就耕。竝成希闕之儀。徧第臣鄰之賞。顧惟輶眇。猥玷近樞。優渥首加。震惶罔寘。竊念臣器非適用。材不及中。感會風雲。湔除埃壘。歷更華劇。滋驚歲時。曾不能僮俛宿官。從容進執。建明事望。練達政宜。徒以上麻晏晏之仁。中懷齷齪之謹。曲輪直桷。有性分之專。乘雁雙鳧。無盈虛之係。人司機管。參決謀謨。屬以慈極奉先。長君勸穡。枚枚闕宇。薦一德之馨香。咄咄大田。震九陽之滿告。禮兼今昔。聲塞天淵。而臣但荷親逢。絕無云補。將順其美。則當國之輔在焉。屬圖其儀。則搢紳之儒戾止。安可因飲至之際。遂竊崇階。無計功之差。例增采戶。使勞臣缺望。多謗沸騰。尙貽戮于代天。諒胡顏于接晝。伏望皇太后陛下。察其知止。惠以有終。協贊當陽。垂收渙汗。且夫物過于鑑。則照有必窮。鼎渥其形。則餽將必覆。願回慈護。矜允危悚。或免戾之可期。實捐軀而知報。

代宋資政謝大學士表

(案)宋綬字公垂。歷官參知政事。資政殿大學士。

臣某言。伏奉制命云云者。大言申獎。清職踵華。揆寵欲驚。寘顏靡所。竊念臣稟生臆弱。循志樸忠。典學在勤。課功寡要。惟仁與義。慕大夫之求。匪智而愚。爲有道之累。逮事真考。已列從官。愛不汝疵。舉知帝力。伏惟皇帝陛下。適成丕烈。樂育謏材。專錄文林之勤。召升嚴署之邃。嘗令守屏。旋詔歸臺。肇啓祕宸。顯標通籍。時惟輔相之缺。忝貳論思之餘。躋聖在宸。備員取悔。蒙收還于機務。乃厭息于謗言。改服禁班。別陪經省。仰緣簪履之舊。奉望帷幄之中。然而志以憂摧。氣隨懼奪。煩心易感。末疾間乘。孰爲四體之勤。纒煩三月之免。彌年無狀。有衆具知。敢圖則哲之明。更濫惟名之假。矧茲峻等。創自先朝。未始平除。蓋無常置。本臣鄰之均逸。故位絕以至優。寧容孤生。冒處茲任。竄景風之餘曲。取鞞佩之深譏。斯蓋陛下。夙諒孤危。審非讎黨。大明垂燭。蔀屋之家。罔遺和氣。債蒸拔楊之柢。重茂靜循榮渥。負絕常均。儻可效于寸長。誓無忘于夕隕。

代謝加恩表

臣某言。昨以虔貢露封。讓還渥典。訥辭雖達。善聽靡回。煩深詔以爲言。俾斷章而趣受。拒恩難瀆。拜賜奚勝。竊念臣稟質至愚。逢辰最舊。久參宰政。訖乏寸長。嚮屬三歲常郊。萬靈介祉。翼翼文考。推以配天。實實闕庭。盟而竝薦。得陪顯相。協葳上儀。居謝徐生之容。無裨伯始之問。何言飲至。亦與疇勞。內積冒居之慙。慮開缺望之隙。丐收茂渥。用穆彝經。而遴布俞音。慎行出令。廢其悃愾。敦以寵靈。表雲臺之美名。賁巖壑。

之要望。階章魏品之峻。動柱楚官之華。參萃于斯。爲榮尤至。得非寧賞而僭。在邦體之則然。匪汝爲疵。恃君養而無恐。輒膺敷錫。增激懦衷。此蓋陛下欽待臣鄰。懋明憲度。祿以爲砥。冀磨鈍于人。賜不踰時。示勸能于後。遂令緜薄。首被慶私。惟百慮以勉修。期萬分之稱報。

代孫侍郎謝加龍圖閣學士表二首

〔案〕孫奭字復古。仁宗即位。遷工部侍郎。天聖中。加龍圖閣學士。

臣某言。天臺封劄。忽被于擢。姿神閣直圖。俾陪于清綴。卽支離之病叟。參汗漫之仙游。崇讓無從。省躬增愧。竊念臣材非傑出。世本曠僚。志安草茅。望隔青紫。逮事真考。擢備從官。預擁橋門之經。俄待承明之詔。力非稽古。陳車服以旣多。義乃不耕。食困禾而太厚。託上仁之廉養。匪予取以見疵。訖乏寸長。以終無補。陛下丕承在旦。善貸均休。念舊物以軫慈。由至愚而取信。每緣沛洽。游辱進升。出則陪清道之遊。入則奉邇言之問。龍光所集。儒者罕偕。頃緣匪服之災。迭遭負薪之疾。氣一交還。體不自支。涉月臥廬。移書請急。方將再拜歸道。漸露乞骸之求。百工咸熙。少息瘵官之議。雖私惊內斷。會成命已頒。謂寶構之嚴凝。號文林之極摯。青蒲規地。近接禁林。朱葉藏文。居然帝所。以原簪之未棄。俾龍署以叨榮。嘉亨允鍾。夙暮深計。且臣忝識大分。久服近班。伸于至明。誼不徒讓。又被寵先帝。結犬馬之戀深。歸報二宮。慮桑榆之日短。苟遂巡違命。偃蹇懷安。上孤圖任之私。下取自高之譽。臣雖無狀。寧味所歸。輒拜祝以自天。誓糜軀而有地。儻神明之觀未耗。而筋力之能可求。尙當夜思晝行。克守無邪之誠。早入晚出。懋敦時敏之方。展四體以

上酬。泯百生而後已。

臣某言。華戶病居。方累支離之歎。蘭圖祕構。忽塵清切之司。駭細劄之已行。躍羸軀而祇受。一辭罔遂。三省增慙。竊念臣學術本疎。行能無算。起家東鄙。玷跡周行。紆眞聖之誤知。偕邇臣之旅進。淺謀料事。無助幄中之籌。直道干時。常貸道邊之死。計功未效。僭賞云多。恭遇皇帝陛下。察無他腸。垂矜舊物。忘其逢顛之陋。飾夫犧木之文。超狃神深。洊陪講勸。而臣將身寡術。匪服挺災。及此首冬。繼成淹臥。造朝希闊。伏枕纏綿。且念舊章不忘。臣則無胡廣之智。大事垂問。臣則乏仲舒之才。在九罏以不盈。去雙鳧而非少。宜先引避。以肅儒貪。私計未行。洪恩俄降。罔示汰澄之責。更階嚴近之資。臣夙夜自惟。揆卜宜審。且下知止足。蓋一身之謀。上所懋官。爲百辟之舉。苟曰圖大。無容後公。詎可遠忘先帝之恩。近矜小讓之節。臣知非是。物誰謂宜。用僂俛以拜嘉。勉婆娑而陳力。冀調醫齊。益就平疆。厲乃樸忠。絕其吐茹。庶追玉堂之汗。少裨黃髮之詢。一死可畱。期報恩而不朽。三軍能奪。誓刻志以無渝。至禮不文。感悚奚隱。

代鄭公授知制誥謝表

臣某言。伏奉制命。蒙恩特授。臣本官知制誥。并賜金紫者。祇居宰庭。猥具代言之草。參華掖署。邊塵通貴之階。寵溢所涯。畏深餘慄。竊以隨風之命。本鼓舞于庶方。成綍之言。實權輿于四禁。張官至重。責實惟艱。自非業廣器闔。文深職敏。揆雅奧之明義。屏愆忘于舊章。則何以參直祕曹。對司允令。慎徽布度。克成近

雅之風。給藻會機。仰賁彌文之化。親逢景運。避東惟人。若臣者。篆刻偏才。簪纓墜緒。紆先榜之占籍。叨神壤以陶風。不觀非聖之書。僅承遺業。竊冀上農之祿。庶代寒耕。會天歷之初元。舉貢條之舊式。猥緣薄技。升冠甲科。一命卿僚。貳參郡政。逮及瓜之趨節。旋給札以試言。超踐宮坊。入塵史觀。承人之乏。遂贊計籌。邁天之瘥。自嬰家釁。痛上恩之未報。分餘喘以斯淪。哀紀俄周。槁骸故在。辱台符之振敍。復朝紱之光華。荐居勾失之司。仍貼記言之局。歲逢會課。例及當遷。陟諫省以尸榮。彌縫未効。坐禮闈而辨秀。衡藻無裨。靜言備位之慙。宜寘黜幽之典。迺蒙皇帝陛下。敷求介善。樂育羣材。念久次于書林。絕先容于仕路。特頒俞旨。改命清司。因程奏之升聞。紆睿辭之訓勅。就加金艾之服。以獎朝廷之容。況職業所存。典章可復。各居一戶。非人則上動祕躔。分押六曹。直日則專司進畫。詎伊庸懦。可稱恩華。然汗令之已行。顧驚筋而思勉。謹當奉循丕律。輸罄樸忠。寢階寡悔之方。用畢捐生之報。臣無任戴天荷聖。激切屏營之至。

景文集卷四十

表

代中書謝表

五芝封檢。忽頒星掖之文。六枳維邦。遽貳夏卿之秩。驟叨成命。若蹈嚴淵。竊念臣材不逮中。生惟薄祐。遊協華之聖旦。託聞道于先師。淳濯槁梧之暝。蒙被菁莪之育。洪惟真考。顯訓儒猷。滌天覽于書林。匯化源于璧沼。誤咨艱拙。入備詳延。誠雖厲于月將。慮曷周于天咫。以規爲瑱。訖無助于四聰。有祿乘軒。但貽譏于十手。大明繼照。時敏聿修。識姓名于皁衣。軫慈憐于踣履。忘其多悔。擢以近班。日參桓郁之擁經。孤奉漢家之前席。矧惟兼領。殆有數司。外則閱四方之副封。次乃主一王之儀典。虞庠弦誦。領厥官聯。駟野驪黃。專其使局。顧寸長之易竭。徒多口之成尤。且復強力弗支。華顛寢薄。第家移病。時容襦被之歸。蒙笏書思。每代臨文之忌。賴九重之矜體。免萬坐于刑章。況在榮名。敢懷貪覬。迺蒙皇帝陛下。至仁格物。大度包荒。茲因愆祀之升禋。更錄微勞于飲至。以爲寧過而立。固愈于廢人。大德曰生。無容其歸報。罔僉羣議。特出宸謀。頌溫潤之厚辭。極龍光于邇著。下收枯木。備用于皇居。未極景風。先行于賞典。三循牆而靡讓。九復貫以何言。謹當內激誠明。仰祇猷訓。參一二而交戒。蔽三百于無邪。白璧可爲。慎守先儒之行。鳴雞不

已。庶無時夜之渝。極爾葭軀。期于上報。

代中書謝不允降官表

一昨緒求天意。傳致國章。引咎曠僚。祈恩貶秩。冀以奉大君之罪已。塞黎獻之攸箴。洪惟上仁。務全治體。諭以包荒之德。斷其昧死之章。違命莫諧。循幸兼極。竊念臣等共陳臚仕。獲對顯時。邁容化之日昭。乏深謀而夕訪。罔能變定。迺及薦饑。屯甘澍于西郊。漫貪蝗于南畝。江淮土著。靡室靡家。齊魯力田。爲凋爲瘵。百賈皆震。九扈大殘。上軫如傷之懷。申濟何辜之困。切敕長吏。還定流人。振廩化居。緩征闔賦。因復省大庖之舉。聿遵古訓。減備冊之號。以獎至誠。過不下移。誼無文應。而臣等繫同休戚。均下慘舒。進見巖廊。與知彤日之誠。論思前席。親覲雲漢之憂。蔑陳稱報之方。自保宴安之地。遂圖降品。聊示責躬。答皇矣之臨觀。助勃然之興化。言關清覽。情盡懦衷。伏蒙皇帝陛下。深護汝疵。罔譏彼相。奪其小節。納以大猷。責孟明之忠。俾增厥政。重張武之賜。式愧其心。赦煩瀆于免冠。諭溫純于細札。靡加明黜。趣勉微功。臣等敢不進撫玉辰。退求百度。開陳熙綽。革剗便文。漸臻玉燭之和。規復茨梁之積。少寬昧旦。免玷代工。庶依觀過之仁。得及知非之路。他官有始。捫舌何言。

代宰相謝傳宣入伏月令午正歸私第表

右臣等今月一日。中使傳宣。自入伏日。令臣等午正歸私第者。炎隆秉序。慈哲推仁。以畏日之方陽。且揮

汗之相屬。特容夙退。俾便私居。仍盡伏金之辰。始舉常參之限。仰銜優遇。交極感懷。況臣等曠位居多。計功無補。晨趨暮出。自有成規。趣駕先期。猥煩寬詔。欽服從人之惠。諒無蒙暘之荷。共誓交修。少圖稱報。

代石太尉謝令安州照管表

臣某言。八月日。安州進奏院遞到中書劄子。奉聖旨。已令本州常切照管者。寬大之命。下濟于天光。燄燄之軀。甫還于策魄。發誓若輝于龍燭。釋憂如出于虎蹊。撫續息以幸存。奉絲言而增惕。竊念臣本惟樛昧。獲遴會昌。乏千里之折衝。憚四夷之方畧。程材六郡。獲預於良家。待罪天符。詎知于尺籍。先帝軫其單賤。勗以勤劬。靡試異于外庭。遽編名于衛署。宣威亭毒。屢分四牡之華。弭亂巴寶。曾預一夫之勇。未能陳力。深懼曠官。伏遇皇帝陛下。蒼震承休。珍圖纂業。將懋功而致賞。方右武以勸能。俄辱寵章。游膺渥洽。乘輅出使。蔑施橫草之功。飲至勞旋。濫預策助之爵。自爾奉簡書而祇畏。飭師律以申嚴。克完犀利之兵。上副穆清之寄。累勞未驗。乃眷益隆。尋復盜起坤維。妖興玉壘。吳蛇薦食。竊弄于庫兵。泮楫未懷。敢稽于天討。而臣謬當深詔。躬佐下軍。受堂上之奇謀。制目中之醜敵。帝赫斯怒。貔貅方議于奮威。人得而誅。蟻蝨已聞于相弔。天聲大震。月捷繼聞。俄申戮于凶渠。俾維新于汙俗。集成巨伐。皆稟睿謨。若專微臣。幾誤大事。乃至邊陲屢警。戎索戴嚴。慶兵老上之庭。斬級雲中之塞。宸旌直指。殄蟠冢之星。狼革輅親征。見漢家之武節。分屯介士。防遏盛秋。臣實妄庸。獲膺任使。敢不深惟一得之慮。載施十駕之勤。備重耳之艱難。謹武

侯之節制。披堅執銳。志竭于寸長。斬將搃旗。誓當于一隊。旋屬穹廬納款。左衽通驩。兜零罷照于邊烽。督
充遄歸于內地。肇建和戎之策。茂臻偃伯之期。遂復第賞靈臺。酬庸盟府。當陽三接。屢榮錫馬之侯。列國
十連。均仗齊壇之鉞。繼頌成命。出領大藩。而不能恪奉詔條。勤修職業。畔官離局。妄肆于矢言殄行。震師
果罹于昭憲。既具王庭之獄。請從蕭斧之誅。豈謂天意好生。皇明獨斷。屈成刑之端議。申肆眚之大猷。止
外竄于遐圻。俾俯存于餘喘。念一介之賤。不忍加誅。廓三面之羅。與之更始。洪推大賚。曠絕常均。此際仰
舜法之大寬。荷堯仁之不殺。挺身萬里。甘淪禦魅之區。齋志九泉。用塞喪元之責。未周成歲。尋滯鴻私。自
臨賀之炎陬。徙房陵之內郡。假青宮之道候。給長府之廩錢。擢于鉗釵之中。齒乃衣纓之列。棄籜之賤。特
軫于上仁。涸轍之波。彌涵于麗澤。仰絜大度。克庇微生。敢期再歲之間。復降自天之命。改陞環衛。徙置方
州。蟠朽迴春。頓茂九陽之氣。幽潛發蟄。驟驚百里之音。夫何流宥之餘。獲覩光華之旦。斯蓋陛下阜昌景
化。不闕寶慈。以臣久在戎行。屢持師節。管穴之見。雖無前筭之勤。犬馬之勞。不捨敝帷之報。特形隆旨。昭
示守臣。俾自勵于操修。且深加于存卹。不寒之慄。潛釋于冰淵。垂暮之年。免墮于溝壑。事踰初願。恩極更
生。再念臣抱釁以來。撫躬至熟。誠由爵位太厚。尸曠居多。失漢臣醇謹之風。冒道家干進之忌。寇至誰咎。
器滿則傾。垂貽折覆之凶。上玷清寧之化。然而事君無隱。靡有于他腸。食肉寡謀。薦招于祇悔。由物情之
靡協。致陰譴以自貶。每念前辜。敢忘終食。謹當上遵彝訓。克勵迺誠。用酬觀過之私。循致寡尤之地。屬桑

榆之日索懼螻蟻之命輕雖貪祿鶴軒深貸百鏹之贖而裹尸馬革愈堅十死之心臣限以拘留不獲躬詣闕庭無任感激屏營之至

代晏尙書亳州謝上表

〔案〕晏殊于明道二年以禮部尙書出守亳州

初違四近出守一麾祇稟詔條奉揚民政擁左魚于官次僣疲馬于君軒揆寵循躬兢榮慚刻竊念臣本性孤遠獲對盛明因緣篆刻之微陶被師儒之誨先皇帝憐其稚齒獎以片文長育中陵之阿每誠素絲之習遂用謹敕進服寵光塗飾朱丹湔除埃塈乘人之乏每食輒浮始自書林寢階辭掖屬星渚之武極參震邸以爲僚此際出入兩閨遭逢千載寧無越思之過或有奇中之讒大度兼容多言訖息入躋內署彌邇清光伏遇皇帝陛下重協睿華不承淳烈軫其舊物謂無他腸斷自宸衷佐經樞筦室大柱小罕不撓之期車重馭煩有必顛之勢果停密務近守留都旋沐召還再加收試南臺風憲之地祕殿侍從之榮咸叨踐揚蔑有論報擢司邦計顯領使權雖籠天下之財罔紆縣官之急遽蒙中詔參預宰庭忘申侯之有疵用王譚于下第論思在日僂俛踰年曾不能卓爾建明毅然處可引俊良而咸事放險謁之庸違開陳治端總領羣職而廊廟之任方夏具瞻政之無良臣任其咎陛下弗詢徐昉之免罔責石慶之歸人言則姑務納汙天災則不令移過括囊耽祿久已自知傷錦瘵官居然衆驗洪惟濬哲終賜保全屬當明辟之初例舉均勞之典懋官加等作翰疏通道路甚夷風土差樂恩護其短誼不忍誅再生之慈有死無答

重念臣夙陶雅化。粗識大方。蓋知一心事君。四體率職。惟書盡信。舍道弗營。動保廉隅。進非紹介。受命于地。乃冀于不凋。獲罪乎天。奚取于他禱。但以孤特少助。依違取容。獨木不林。衆怨如府。積爲拱默之罪。上孤振拔之私。往咎深惟。胡顏自處。所賴回霜申宥。涵海蒙禱。廢格典刑。矜憐愚忝。乾坤施德。厚及于謝生。犬馬日長。誓思于補過。收桑榆而可待。摩頂踵以爲期。宿業云初。乃情增悻。

代加大資知相州謝表

臣某言。佐邦無狀。解務云初。併帖華資。峻加茂秩。寵光溢望。愧慚交顏。竊念臣智不周身。材非經國。曩緣亨會。超進仕塗。興于孤生。越致三事。先皇帝獎其狂直。申以保全。擢居震邸之僚。豫識龍顏之表。時惟巨慝。搆乃厲階。忘臣以樸忠。閔臣以艱拙。潛坐黨人之議。嗣罹醜地之遷。萬里去邦。朝非謀夕。一身許國。死且猶生。冀其虺毒斷臂而窮。獸噬得人而止。伏遇皇帝陛下。日華升照。天德爲剛。除堯羣凶。纂禹舊服。垂念投荒之窘。亟推修廢之仁。罷解驚羅。洗除痕注。頻更屏守。復拜臺司。而臣壯以懼銷。氣爲憂耗。傷禽墮于虛引。仆木衰于望秋。再奉疇咨。訖無云補。果連他坐。上紊彝章。言盈外庭。罰有平典。而陛下止收丞相之印。尙進司寇之曹。始命爲藩。遽令回節。改升祕殿之職。留侍西清之筵。當責推恩。在尤逃悔。悉排公議。曲暢宸慈。斯蓋不冒好生。清衷念舊。將收後效。特濟餘齡。謹當澡雪煩襟。激昂懦節。昏矇寢濁。尙能讀夫九丘。病骨已銷。敢自疲于三陌。惟心內誓。有殞爲酬。

代張屯田兗州謝上表

臣某言。昨蒙恩差臣知兗州軍州。兼管內勸農事。卽于某月某日到任。訖初違北闕。出領東藩。千里而遙。萬夫爲長。卽宣寬詔。用慰斯民。竊念臣門素地寒。器枵識褊。陶師儒而有漸。苦扞格以無成。逮事先朝。已參寧定。親逢下武。繼被采收。有皆短之五能。乏至愚之一得。蒞官未效。滿歲輒遷。比濫使軺。獲提京邑。式瞻周道。慶在隰之有華。祇率漢條。期墾田之可問。雖希盡瘁。寧厭用多。合首次沙。用懲竊祿。伏蒙皇帝陛下。葦然善養。豁爾兼容。山有疾以務藏。日容光而必照。黜幽未寘。疎渥更優。頒禮上臺。假麾廣魯。伏況量衡所協。近經虞后之巡。壤賦有差。悉載夏家之貢。禪閭在望。儒泗成風。家被復除。人知廉愧。謹當奉揚成訓。昭體至仁。舉燭解琴。冀動咨于典訓。振苗傷錦。敢徼罪于官刑。淪髓在茲。析肝何喻。

代轉戶侍充職知廬州謝表

〔案〕陳堯佐字希元。歷官翰林學士。參知政事。明道二年。以戶部侍郎知廬州。

臣某言。伏奉制命。特授臣戶部侍郎。充龍圖閣學士。知廬州軍州。兼管內勸農事者。寵加無狀。願出所涯。渙汗不收。捫心增愧。竊念臣忝煩材品。扞格藝文。早汗署堂。繼持從橐。慶親逢之在旦。託私蓋以如天。旣負又乘。宜疏而裨。書思朝簿。絕念夫均勞。計過夜分。未知其寡悔。且復稟生多病。中年早衰。目苦眊昏。氣多輜結。惜惜臂肉。計日減分。種種頭毛。從衰得白。或臥廬請告。或伏枕彌旬。極味死以陳章。願出藩而寬疾。洪惟慘愛。終爾依違。如臣至愚。自卜已審。非不知高門之地。邇帝所之凝嚴。承明之廬。爲仕塗之極摯。

而命奇智困。福過災生。跛倚不足以相儀。忘誤無容而置對。起訖還臥。自取晉臣之嗤。否終弗傾。誰任義
爻之咎。罔虞三瀆。頻紊四聰。祈天必從。誓恩不朽。伏蒙皇帝陛下。深仁念舊。大度匿瑕。收電霽威。回春振
槁。憫其尸居之氣。察無他惡之腸。更進文昌之貳官。尙領河圖之祕禁。擇其善地。許以再麾。本緣偃息之
私。更遂便蕃之數。臣敢不勉修治體。徧諭上仁。循致樂蘇。少寬旰昃。至于遵宣尼之慎疾。訪周氏之全醫。
冀及平疆。再陪訪逮。出奉會稽之最。非敢告勞。歸成麗正之書。誓無私恨。逢辰論報。沒齒爲期。

代知兗州謝表

臣某言。驟達天咫。祇率星言。趣四牡以載馳。戾萬夫而樹政。大東之奧。剖簡爲榮。竊念臣智本顛蒙。數惟
奇隻。早辱縣官之使。遂代上農之耕。曾乏所長。仰裨乃事。支離有素。居延受粟之譏。樸楸而生。久玷能官
之詠。連更郡寄。再覲宸嚴。清明會朝。預陪于有著。好醜必上。令盡其所言。復加王品之章。以示百城之寵。
洪惟幸會。夙絕擬倫。此蓋陛下仁篤好生。惠深藏疾。扶盧直罇。各盡于有能。益海附山。或取其微益。俾茲
恣野。尙玷寵私。矧汶上之名藩。本魯初之奧壤。承平在旦。富庶敦風。臣敢不律乃叢軀。撫茲善俗。中庸厥
履。日夜以思。束矢鈞金。體欽哉于庶獄。杏華莒葉。誠勤止于斯民。少寬當展之勞。上答包荒之賜。

代謝加勳表

臣某言。今日日本州進奏院遞到官誥一通。敕牒一道。蒙恩加臣上騎都尉。餘如故。仍放朝謝者。神墮二

襲肅陳天燎之儀。溫詔十行。誕布王絲之澤。渙汗式均于近署。策勳爰及于具寮。對昊命以知榮。循官箴而憎惕。竊以真行之寵。遠自于周班。疏爵之勳。近從于唐制。皆以增隆分數。徵序國章。慎康服以酬勞。靡賓賢而分職。聿當亨會。必副輿僉。如臣者。尤治無聞。曠僚滋久。超肩牆而展窠。貳符守以出藩。徒堅斷斷之心。未洽優優之政。幸屬國家撫重雍之景運。展甚盛之帝容。卽大次以告成。御琯輿而飲至。天闈第賞。允示于推仁。侯服均禧。誤叨于進律。顧光華之曲被。實俯僂以無從。謬玷寵靈。彌喧物議。敢不劬勤職業。率勵典彝。夙夜在公。謹守舜兪之訓。彌縫其闕。免招漢習之譏。

代薛資政謝許住京養疾表

〔案〕薛奎字宿藝。累官參知政事。明道二年十月。以疾罷爲資政學士。

臣某言。近以久疾。陳乞外任。伏奉批答。且令在京就醫。藥將治者。臥疾彌年。未諳有損。乞藩上奏。冀獲白私。狀危懇以不支。枉溫辭之垂答。深仁下濟。槁質重蘇。竊念臣偶籍嘉亨。入陪丞弼。師師之訓。無補官箴。兩兩之符。屢于臺象。緣食浮而取謗。遂福過以延災。肺腑爲疴。踵息交臂。獲解中樞之任。尙叨祕殿之名。特免造朝。以便藏疾。官無三最。亟煩予告之恩。祿乃百廩。居畏無功之責。綿跨燠涼。嘗備苦甘。前愈未臻。後劇還甚。竊謂已疲之馬。難望君軒之前。遂枯之根。決無犧器之望。輒祈近服。庶續殘齡。蓋且不得而去。邦非無情于戀主。孤心如隕。危涕自零。陛下大惠不貲。至誠時克。曲矜舊物。昭布大言。慮下國之旣遙。乏上池而取效。俾留神縣。庶就嘉醫。屈原之魄九升。招還有漸。魏嬖之病三百。距躍可期。獲延朝菌之餘。誓

畢夕冰之報。

代李副樞生日謝賜羊酒米麪表

〔案〕李諱爲樞密副使。在明道二年四月。

危心締感。永念于劬勞。多物有容。茂昭于慶賜。夫何庸懵。有玷寵私。竊念臣偶以薄材。累更煩使。入佐本兵之地。亶逢偃節之期。恩有墜而無酬。力不能而將止。聖猷天縱。大度山藏。弗暴所疵。冀收云補。推御人之爲大。記射矢之有初。寵以稻糴。申之醪餼。況臣箠箠在疚。齷齪叨榮。懷顧復以滋深。荷匪頒之尤異。竊同騷客。私有記于庚辰。何幸絳師。上乃知于甲子。惟內捫于肺腑。冀匪懈于仕塗。獲報萬分。無忘九殞。

代鄭公謝生日賜牲餼表

臣某言。伏蒙聖慈。以臣生日。特降詔書。賜臣羊麪者。至仁垂眷。多物分頒。副中詔以申褒。來王人而臨諭。省恩尤渥。被覲滋慚。竊念臣夙以羈屣。遘于熙盛。比塵皇揆。參決政樞。仰含天覆之容。未責人言之刺。矧惟生日。自志私懷。不謂上聞。更煩眷記。遽斥醪牽之厚。且沾稻糴之甘。充衍家甕。光華里旅。糾宗示惠。雖感于己孤。續老蒙慈。遂同于再造。此蓋皇帝陛下。待臣隣而有體。崇予錫之載蕃。雖值譴才。亦容異數。追念親懷之遠。仰明聖養之隆。俾艾不誣。歸醴有所。

代集賢相公謝生日賜物表二首

沃若使華。奉將明命。賁然賜品。森照私庭。荷鴻造之顧存。撫煩悰而震忭。竊念臣親逢千載。逮事兩朝。再

辱營求。訖無稱報。聖神天縱。憲度日躋。曷嘗不心慚于開陳之端。汗流于主臣之對。方虞墮職。仰玷代工。迺蒙皇帝陛下。俯諒謙材。特恢大度。推邇臣之同體。記生日之有初。橫錫餼醪。紛頒宮筭。佐庖爲具。出乃眷之茂恩。列鼎分滋。結所生之深感。內期中瘁。少答涓埃。

上恩躡等。多物陳庭。俾同氣以奉將。實有家之深幸。竊念臣誠微練達。資適會亨。先帝察無他腸。擢充汝弼。功非可記。寵已不貲。屬兼調護之臣。預識徇齊之表。伏蒙皇帝陛下。曲憐舊物。再敍上司。曾是愆冥。闕然風采。平章百姓。則罔助堯功。鎮撫四夷。則但循漢法。託于大度。偶及寡尤。敢圖乃聖之仁。垂念所生之旦。斥華紈于內府。分精器于尙方。乘馬權奇。衢鞍熠煜。侑其私慶。續乃衰年。竊比絳人。僅知于甲子。本慚周輔。弗紀于崧高。銜有昊之至慈。啓孤臣之再造。誓于九殞。仰答萬分。

代生日謝賜羊酒米麪等表

臣某言。禮本自生。劬勞之常感。寵加多物。錫予之至慈。荷居所之頒分。動私門之距躍。竊念臣系承單素。仕遘亨嘉。緣樸移忠。因儒儒武。進貳惟幾之地。間聞甚衆之言。舛命自嬰。親闈見背。亟蒙勉詔。還攝攸司。楚臣離散之魂。胡能立事。漢后回容之庇。居不爲瑕。屬震肅之初辰。動沈綿之深嘆。陔蘭隕露。遂無欲報之期。門矢生塵。長結已孤之想。敢謂陛下。俯矜餘息。申獎有家。雖當惕景之餘。亦侈陳庭之賜。仰緣滋旨。更極摧號。收景西山。還齡司命。不家而食。頓荷于扶衰。有踵可摩。敢忘于陳力。苦言增吶。感膈奚宣。

代參政生日詔書賜牲餼謝表

臣某言。伏蒙聖慈。以臣生日。特降詔書。賜臣羊酒米麪者。驛使紆駢。綈封墜眷。旅臻錫品。紛照家庭。銜惠靡貲。捫心知愧。竊念臣叨陪宰政。再賀歲躔。庶務所繁。淺謀不輯。託包荒于天地。未罷賜于丘園。載育在辰。早孤集感。方資緣寵例。推行恩華。分碩畜于牧人。沾美醪于酒正。屑體珍潔。導米粲甘。榮所自生。私訂累茵之歎。俾于爾艾。更蒙全領之慈。此蓋伏遇皇帝陛下。道茂養賢。誼深愛禮。忘其愚短。假乃褻優。佐家食以屬厭。闔宗盟而循省。誓勤夙夜。歸報涓分。

景文集卷四十一

表

代參政謝賜神武祕略表

〔案〕晁氏讀書志神武祕略十卷係仁宗御撰

臣某等言。今月六日。中使至私第。被聖旨。賜臣等御製神武祕略一部者。睿機研綜。善志裁成。包曩術以無遺。訂祕書之不布。叨恩有請。拜賜爲榮。恭惟皇帝陛下。錫勇自天。上謀靖國。每戒危于忘戰。乃圖備于有文。編覽緹油。悉該韜略。因兵家之四種。彙以名章。欲師律之萬全。授而爲法。並刊繁廣。以便奉行。無何備位之臣。遽忝發中之賜。竊闕篇部。粗見指歸。乃知畏此簡書。豫制軍行之勝。不學古法。終貽天幸之嗤。聖作惟精。經謀有賴。誓納楹而傳遺。或佔畢以詳求。少探淵微。罔孤褒錫。

代謝進五箴獎諭表

〔案〕宋史馮元傳景祐三年上金華五箴帝示詔褒答元字道宗時爲侍讀學士

臣某言。伏蒙聖慈。以臣所進金華五箴。并遂特賜詔書獎諭者。誓言通諷。竊扞夫危衷。善聽作謀。猥煩夫褻答。荷擇焉于乃聖。赦斐然之所裁。訓獎垂頒。榮悻參處。伏念臣稟生輜蔽。典學迂疎。亨會相偕。仕塗寢。臚。早緣估畢之伎。久侍擁經之游。天縱睿姿。日躋茂德。泰山盤鞏。無俟埃壙之增。時雨沛流。安施浸灌之力。委蛇就綴。拱默窮年。瑁瑁者佩璫之長。尸官自審。坎坎者河檀之伐。浮祿旣多。因綴講以偃休。偶臨文。

而采獲。以爲千慮而得。罔間至愚。百官攸箴。趣無闕政。堯仁率俾。有謗木之求。周道其興。存庭燎之戒。由是旁緣前誼。紬繹費辭。宣之使言。本由善治之及。入告于內。終謝斯猷之宜。迺蒙皇帝陛下。綜成務之閒。察邇言之陋。貸夫淺慮。諒乃朴忠。收爲瑱之寸長。乃均犀璧。枉出緡之慈諭。迺比日星。刻誦載周。孤危知免。誓雖從于九殞。靡忘補于萬分。

代謝起復表

危喘視陰。方濱死所。明恩變禮。俾復近班。荷言綍之惟行。隕涕靡而增感。竊念臣早緣孤技。獲對顯時。姑務易農。非期臚什。智殫簿領。慮彼己之不濡。力殫簡書。亦食焉而罔避。寢階華劇。特出愛憐。有三釜以逮親。誠一枝而足志。比屬邇臣均逸。宥府缺員。猥蒙不次之恩。超佐惟幾之地。果緣浮祿。延致害盈。鉅痛終天。餘生觸地。慈襟垂軫。賄布涖頌。內迫方寸之危。徑露匪莪之請。見星奔舍。蓋有前規。枕塊窮號。願終哀紀。乏便文之營喻。俟微欲之矜從。伏蒙皇帝陛下。斷自睿謨。召還故職。且謂孝存其大。可得而移忠。恩在所私。不容于掩義。本兵有始墨之主。比事無以家之辭。訓勗載敦。阨殘何幸。敢不奉承異數。澡雪至愚。決其已涸之流。煥以重燃之焰。但慮爨爨槁骨。玷列辟之趨翔。戚戚煩悵。昧洪樞之關決。苟寸長之可詭。庶再造以仰酬。

代謝落起復并加上柱國食邑表

臣某言。祥期甫畢。詔諭垂頒。俾改權恩。並循吉制。屬因變禮之始。仍推懋賞之榮。省循于中。快報無寘。竊念臣出于羈馭。邁是會享。先皇帝擢之下陳。寔在榮伍。謂材可育。寢飾于朱丹。忘駕之驚。毋勤于驅策。協華撫旦。念舊知人。煩使而觀其能。初無可紀。高位以速其謗。未始越思。乘天務之空員。躡皇僚而備任。適以親庭。卽世哀曲。纏憂。鞏鞏總筵。奄奄蒿息。亟蒙慈覆。敦救窮生。興被經之厄殘。責秉樞之密勿。薄言無感。罔獲家事之辭。欲報無追。遂激忠臣之慕。然而荒疚潛潰。神明莫還。處可特昧其方。彌綸弗亮于采。所賴聖神親事。丞弼克咸。匪汝爲疵。同底于治。今者霜露云易。燧穀載新。偶延溢至之期。永畢禋安之紀。迺伏蒙皇帝陛下。推明至治。惇序彝倫。俾夫誼有以斷。而從中禮不得過。而爲僻。託三年之通制。正一切之便文。且軫危襟。久嬰屯象。特遷勳等。仍衍爰封。蔚儼木以重春。駭攬蓬而更肉。蒙天之力。但仰于曲成。揭日所餘。盡期于上報。刻心潛誓。自口奚宣。

代樞密院謝傳宣入伏後午正歸私第表

王人臨泊。天誨垂頒。仰荷推仁。豁如解慍。竊惟宥密之署。關決至繁。蓋有朝夕之虔。非容燥暑之避。而臣等猥叨善任。時奉詠咨。蔭漢闢之高明。居然清暑。候羲躔之中。斐罔若探湯。宜徇官箴。仰遵日恪。迺蒙皇帝陛下。闡垂裳之嘉治。申蔭樾之至慈。尙以交會之辰。蘊隆爲甚。稽不韋諍事之典。變郭牙晚出之常。俾便私居。特爲優典。君心省事。務敦常簡之風。臣道在勤。是稱矜憐之賜。共期瘁盡。以補涓分。

代謝夏藥表

臣某言伏蒙聖慈賜臣某藥者。星使俄臨。天言誕布。靈藥爰頒于上品。微軀曷載于鴻慈。捧受兢榮。罔知裁處。恭惟皇帝陛下。曲回久照。優寵外臣。屬茲清暑之餘。慮鮮攝生之術。無嗇丹劑。普及藩方。載加亭育之私。併示便蕃之錫。寘榮懷而增祕。奚疹癘之可虞。誓罄涓埃。上酬眷渥。

代謝衣襖表

冬籥乘辰。裘官著令。疾馳使驛。臨撫塞屯。並頒齊筥之良。均挾吳綿之煖。被躬且吉。束帶有華。伏惟皇帝陛下。至德誕敷。深仁普愛。念官師所以卒歲。恐天下有受其寒。居秦軫窮。當舒慮慘。況淒其戒序。必惻然動心。特以濱塞。亟嚴持兵。鞞露。句傳溫詔。緘褚紋袍。爛然晝鮮。煦若春至。矧部校什長。賜各有差。僻壘窮郭。悅而忘苦。振裾交抃。聯襪相趨。和氣暢肢。顧折膠而何畏。大恩壓已。憂稱服以爲難。有可仰酬。不知輕隕。

代昭文爲飛蝗乞罷免第一表

臣聞燮贊陰陽。茂遂萬物。宰相之職也。銷伏災異。劾免三公。朝廷之法也。若夫得士乃昌。始可以捍患。匪人必黜。是之謂應天。應天者不取于浮言。捍患者必挺于成效。敢沿先事。俯瀝危悰。竊念臣材不逮羣。慮非經遠。偶階薄伐。進服寵光。乘時乏人。備位當國。所啓者故事。旣昧奉行。莫急者朝章。未能練達。括囊自

守既犯史官之譏。俾民且迷。庸孤師尹之望。遂乃招致沴氣。挺爲乾災。蝗蝻放紛。菽粟彫罄。郡國所被。千里而遙。原田其咨。何恃不恐。上貽焦勞之念。垂布憫惻之音。減膳深思。側身引咎。並走羣望。弗愛斯牲。卓然至誠。宜荷不應。然而善祥未得。嘉頌弗興。以臣策之。其則不遠。蓋由宰政乏効。愚慮奪明。處可昧于大中。總領乖于時當。下民失職。長吏曠官。便文自營。多瘠罔詔。茲謂不聰之罰。則有介蟲之妖。臣叨相邦。誰任其咎。天監孔邇。人言莫懲。伏望皇帝陛下。責謨明之罔功。暴承弼之無狀。顯效衆異。俾解上司。賜之鯨輪。許就私里。然後改求哲乂。升備股肱。導迎太和。振除後咎。抑臣又聞。春秋考異曰。蝗者貪擾所生。京房占曰。其救也。舉有道置于位。如臣待罪。向涉再期。奉人不貲。賜予相繼。既見乎貪擾之應矣。若陛下矜照危迫。回命峻良。順時天工。俾乂民極。又合乎有道之救矣。如此。則上帝悅豫。崇迓無疆之休。綿宇順穰。普蒙咸一之德。感于旋日。少慰愚衷。得請爲期。所念靡極。

代中書爲飛蝗乞降官第一表

臣某等言。恭聞應天之變。誼不以文。均國之憂。理難賴寵。而況譏蝗雜會。疵瘼洊臻。民殫見糧。野乏青草。任責躬之懼。既無以萬方。稽失政之原。然本之四輔。尙安有悔之地。實愆同德之風。輒祈降階。少塞無狀。竊念臣等器慚過遠。慮匪及幾。誤奉聰謀。進叨弼直。號令風采。不足平章。庶尹奔走先後。無以感會。萬幾一昨。沴氣成災。大田奪食。孽蝨紛擾。淋澍怨咨。南捷江淮。東薄齊魯。吏雖火馳而重撫。民且狼顧而易遷。

皇帝陛下至仁如傷。睿志先定。發倉氏以調乏。督輸粟之期。募國人之毀家。濟蒙袂之困。分遣詔使。還定力農。聞復走四方之種祠。捨六祝之移過。凜然馨治。貫乎有神。又謂修德。莫如身先。于是減帷辟之常舉。動民不取徒善。于是損乃聖之全名。斷自至誠。祇承天意。臣等既微。云補徒用具員。亟昧死以自陳。願黜幽而賜罷。陛下惜邦之體。爲下受愆。悉掩罔功。俾還視事。臣等重念動危辭位。則淺于納忠。赦罪責成。則銳乎修政。遂相敕厲。期獲靖嘉。然以據廊廟之甚崇。假器名而見覲。善祥靡答。威怒未還。尙容容以自安。寧昭昭之垂戒。伏望陛下諒其至懇。責以協恭。許臣四人降官一等。明著燮調之失。俾圖消伏之方。在國典以甚宜。冀人言之少息。然後叶宣綿力。徐叩大猷。計一得之微勞。投萬分之深報。援天于此。得請爲期。

代乞自試表

臣某言。臣聞能銘能賦。古可爲大夫。自銜自媒。士或譏醜行。然則被彌文之化。咸欲露其中。蘇赦大言之尤。姑議程乎豪俊。敢訟茲誼。俯導微衷。竊念臣代系單平。藝能空閭。曩由鄉品。上預計偕。親逢正寧之明。覆實攸司之奏。擢于寒目。列在秀科。禮局補郎。方州從辟。未操使割。舉迷從政之方。不穡而禾。坐費代耕之廩。在寬闡教。惟疾是藏。幸紆萬坐之刑。入會三年之課。斷溝枯木。宜絕齒于犧樽。荒萊特苗。豈望成夫嘉穀。然臣自幼承學。逮長從師。久剽緒風。罔遷異物。自恪勤于簿領。頗廢志于緹紉。至于洮汰舊疑。踐循雅俗。促曲欵轅之末。細辭呻畢之餘。時著于篇。未能自默。譬之采綠。且無襜帚之盈。均乃鳴蛙。奚助官私。

之地。伏遇陛下。順稽古制。駿惠先猷。溢衡石以程書。交公車而受奏。稗家九百。實俟從容之求。書錄千餘。追復文章之盛。鴻徽所鑠。緜宇嚮風。矧惟孤臣。久陶上教。宜進陳于南闕。答厚養于中阿。竊用連章。具存別錄。表求自試。敢邀過聽之私人。不廢言。或埃聖謀之擇。輕塵皇覽。悅集深憂。

代人乞出表

臣聞物勝于權。則衡爲之殆。馬竭其力。則御速于顛。蓋以器循量而易施。材過求而難勉。是以功名之際。惟髦士可居。疆力之容。匪暮年勝任。將傾危懇。敢援斯言。竊念臣本以丘樊。託于經術。幸逢先烈。超備從官。服上教之彌文。因至愚而取信。出入丹禁。無所建明。履歷蕃宣。蔑聞條教。伏遇皇太后陛下。皇帝陛下。奉承謨訓。過聽空疎。簡服在庭。兼容如地。雖百度之治。咸使預聞。每萬幾之餘。常參勸講。七周成歲。訖乏寸長。惟君知臣。足以驗其無用。惟國有典。不可遁于黜幽。且臣自知甚明。內省尤熟。以一介之鄙賤。丁千載之會昌。邑戶餐錢。非祿之不厚。高冠大佩。非位之不崇。同僚皆賢。非志之不合。處奏多可。非言之不從。固當勉服攸箴。謹修爾職。答乃聖之眷遇。爲斯文之寵光。其如犬馬齒衰。桑榆景薄。中年則病奪其壯。晚節則務傷于神。辨色立朝。足居多于跛倚。書思記命。目不辨于馬烏。而臣頃自去秋。願辭近職。上恩不聽。寵渥就加。逮僮俛以及茲。且恹昏而益甚。事皆忘誤。疾愈尪癯。顧四體之已疲。宜一辭而後止。重念臣之鄉籍。世占鄆州。旣託粉榆。薄營產利。不勝首丘之志。願諧剖竹之行。庶及餘年。聊蘇疲瘵。況前朝邢昺。本

貫曹州亦自禁廬得臨鄉部臣今所請似有前規伏望陛下念舊物之不可遺憫孤生之老且至特垂寬詔俾守先廬諒亦大君進退之閑微臣止足之分萬無纖介可貽累于至仁一切便宜尙力思于臥治仰于睿鑒伏俟嚴誅

代人陳情表

臣某言聞父之子子天性也親才而下無能君之于臣善養也進賢而絀不肖蓋智昧于物必問乎在室之言矧位浮于人曷遑乎爲邦之典所宜知退敢用敷言竊念臣先故芻微謀猷局隘神宗之啓英毅早玷采收眞聖之御寶圖繼膺進拔預聞外廷之議供奉層禁之中申侯之取不疵本緣君愛隨何之儒旣腐寧濟事公會新廟之顧成啟長君之善繼伏遇皇太后陛下寵綏大業慈護羣元參日慎之繁幾迓太平之至治俯矜無狀之吏是爲最舊之臣未忍遐遺更加進越勸華光之講每踐禁規非倚相之能曷裨王度居多三陌以自勉庶幾一得而上酬其如槁質早衰窮年多病舊疴每作請告移旬賴天造之好生俾爾齡于未泯罔許乞其骸骨姑復峻其寵章拱著寢降害盈可畏臣逮茲歲晏愈覺體尪鬢髮雕殘齒牙缺墮每書笏進對則物物忘遺或聞雞夙興則岑岑昏眩膝搖多痺目銜有花習靜有若于尸居強飯不知其肉味常慮先犬馬之一旦玷鷄鷺之多儀孤繡辰之詳延煩霜毫之糾劾儻不知止人其謂何重念臣家本力農世居汶上先疇咸在編戶未移自束帶立朝去里之情彌結且小人懷土樂生之願茲深

迫此桑榆之期。願諧符竹之請。先朝成例。故府可求。伏望皇太后陛下。推憫怛之至慈。憫幽憂之舊物。謂少盡其力。則藉彼驅馳。及老無能爲。則終之收恤。特垂開可。俾即便安。然後治將蕪之田。爲有歸之地。勉茲殘喘。奉乃化條。嵇康之積損成衰。儻諧養療。漢人之不死而活。敢忘糜捐。罄瀝由衷。仰希得請。

又代陳情乞尋醫表

臣某言。臣聞周家作誥。首誠于療官。漢氏著儀。許從夫移病。蓋大君寬疾之念。推至仁善養之風。三最有聞。乃嘉其與告。千石共治。詎可以尸居。迫此尫殘。所宜引避。竊臣材姿么譚。系代鞴單。乏典學以名家。濫諸生而充賦。親逢乙覽。遂中丙科。屬家難之繼。鍾逮龍躔之十改。一命尉乎南部。載調掾于比軍。當三輔浩穰之間。森乎條教。會萬乘齋居之隙。多所平反。棘署尸丞。芝函僭賞。升佐鳳岐之郡政。俄假邛蜀之使符。舉畏亂繩。坐虞傷錦。伏值陛下不承在旦。渙號均禧。擢于六尚之班。隸乃一王之局。孰何貸責。寢舍如地之容。極陋揆能。終費坎檀之刺。庇于大度。及此再歷。當江漢之方思。得土風之樂甚。修方有序。論報無階。而臣屬自去秋。寢嬰末疾。臥閣相繼。握臂鮮惊。髮從白而得衰。目視朱而成碧。步趨興齊。跛之謂。沈痼均漳。竄之嗟。乃至束帶愆儀。班春闕政。事委承掾之決。食失匕筯之滋。每廢忘于臨文。專幽憂而玩日。曠僚已甚。竊祿何顏。誠以臣荷寵至深。謝生無所。身非稱服。自速子臧之災。少不如人。矧追旧光之老。豈可抱枯株之蕞質。叨細札以長人。竊飽于太倉之糧。據貴于東方之騎。汲黯之病甫力。以治莫能。楚客之魂。

久迷些招徒爾。輒圖藏密。以便養痾。欲乞聖慈。特聽解所居官。許令尋訪醫治。伏望陛下曲成在念。憐愛疑懷。俾得謝于中年。且博詢于高手。益調名劑。丐永餘齡。仰恃生符。苟焄蒿之未泯。誓于死節。罄精力而仰酬。係戀無階。震惶惟極。

代鄭公乞外任第一表

臣某言。臣聞名不可倖取。過實則浮。人有以自知。弗能斯止。矧萬幾密勿。任切于論思。一介娑婆。力窮于補報。是用去位。以儆瘵官。仰恃至仁。罄敷危訴。伏念臣學非全古。才不逮人。擢始布衣。寢陪書筮。贊爲名命之重。入階局籍之華。曾是拙艱。惜于進取。謀而三省。常自勵于爾躬。狷不一爲。卒見憐于乃聖。俾參天下之務。因預幄中之籌。試可罔功。輸年賜免。已豐之駕。奚望于再駢。方汲之淵。何圖于續綆。召從外守。復貳繁機。適屬邊保休寧。調輯衰息。民獲其所。物以有年。列辟交修。日新于所治。當宁親事。天健而愈強。因容具臣。久忝高位。俄使樞管。遂正宰司。光榮所崇。位遇彌峻。竊惟三公之責。吏事安可冒居。聖主而督。愚臣不容無悔。重以福基素狹。年事日侵。外則公言可虞。內則宿疾時動。而又一歲之內。二息云亡。悲憂自中。氣志俱耗。安可尙聯袞職之貴。分揖槐庭之嚴。身不自聊。政于何有。且鳥飛者不宜上。在易有凶。鶉懸而未嘗敗。反物爲恠。前鑒旣爾。來者謂何。伏望皇帝陛下。念稟數之早奇。憫匪材之難強。許停重柄。回授近藩。愛小器于未盈。免其必覆。乞槁骸于將殞。俾遂更生。君臣之間。終始爲託。投誠無隱。須允爲期。

第二表

臣某言。近露奏封。願還重柄。苦言無感。善聽愈高。戰悸交中。啓處無次。臣孤生下品。惜學淺謀。雖陶文治之風。本無富貴之願。容聰過聽。顯任益躋。參大政者五年。總中樞者逾歲。緣榮掩咎。恃乃聖之兼容。持短裨長。驗不能于已事。更階人乏。遂正宰司。臣亦知步蹇無以亟趨。器盈難乎多受。棟而弗幹。招可撓之譏。斷且未工。無不傷之累。尙依至治。勉服攸箴。然而官責未加。私釁先及。悲憂耗氣。疾疢乘衰。卻顧百骸。內外之攻非一。仰惟三接。論思之任奈何。況古有避賢。非容冒處。仕而知止。乃保克終。伏望皇帝陛下。察臣尸祿之已多。矜臣稟祐之初薄。許停右弼。退守列藩。陰紓不衷之災。顯避無庸之謗。況盛爲衰倚。譬朝暮之必然。弔與賀偕。殆門閭之相望。願紆慈惻。垂亮孤危。儻速解于衡機。是得全于要領。委誠傾訴。須命開俞。

代石資政乞外任表

臣某言。臣聞力止所勝。是爲知分。任適其量。迺無敗材。故上揆能以命官。下揣己而受職。有一異此。誰不致顛。臣之危悚。正本茲喻。伏念臣稟生單薄。賦性慙冥。曩在弱巾。卽沿仕牒。太宗以舊臣之子。籍寘朝闈。真宗以斯文之興。引內儒閣。問膺煩試。因用稍遷。寧無吝瑕。訖賜全獲。伏遇皇帝陛下。繼承在旦。清明有初。因料羣材。并收無似。蓋十年不調。方冀罷歸。而三世爲郎。猥爲上識。寢司書命。冒入禁林。式金之度無

稗不稼之困。奚取越陪機政。噴竦輿言。果以非人。亟蒙賜免。尙緣踣屨之念。入塵華殿之資。臣之親逢。未見前比。然臣薄祜有底。頽齡早侵。今春以來。臥疾尤數。久蒙假息。虧奉朝參。臣非不知寵難冒居。病當劾去。上還印綬。退伏丘樊。奈何聚族苦多。治生無素。先產耗竭。私帑單虛。惟卻俸泉。以辦家事。是以節爲貧奪。愚恃眷忘。冒行鐘漏之餘。苟圖溝壑之濟。洪私再造。有忝無酬。茲者羸憊所乘。趨走尤梗。屏居難久。公議必興。欲望聖慈。許臣知潁州一任。爲歸老之漸。旣緣近輔。且便泝流。稍入足以亢宗。僻左可以藏疾。儻蒙從欲。是獲更生。臣又聞。出者以作守爲優。處者以入朝爲重。事非相反。趣各有殊。上哲詳觀。物情非遠。如臣者。結髮從政五十餘年。未始一朝輕去。雙闕今焉昧死。非曰孤恩。直以迫知分之言。畏敗材之辱。秋葩離榦。理有適然。老馬辭軒。願非獲已。伏望陛下。好仁本于觀德。善始念乎愛終。開錫俞音。就成素願。委之臥理。敢自比于昔人。勉乃奉揚。尙力希于循吏。抱誠至窘。赴訴不文。忼日翹懷。仰頌垂可。

代陳州章相公乞致仕第一表

臣聞器有所極。強之者必顛。志有所安。違之者將敗。是故智士不窮量以邀受。仁君無拂願以責功。內顧危悚。敢援茲喻。伏以臣姿力鷲下。術略迂疎。蒙幸中人之材。待罪宰相之府。寵與時進。負隨日深。謀謨弗良。彫紊相踵。羌夏有未纓之醜。關陝多無聊之人。萑盜跳梁。篋酋煽結。杼軸罄于編戶。杆皮盡于遠方。上貽焦勞。外謹謗誚。咎不臣執。罪將孰歸。比者。涪灑肝膈。願乞骸骨。冀蒙不職之竄。以贖安用之辜。皇帝陛

下包納荒遐。親諭戒敕。須訖郊丘之享。乃許印綬之還。褻亮所加。諄慈兼至。臣此時外迫大誼。中忘至愚。敢優游以自安。輒惶恐而視事。然而智慮淺局。年鬢頽侵。短臂屈長袖之前。疲足困新羈之左。覩然尸位。倏又彌年。所賴陛下以百姓爲心。天下爲度。捨末爭而納戎帳之款。捐滯積以撫遼左之和。克展上儀。遂布鴻慶。永惟橫目之庶。方就覆盂之安。臣之及茲。可謂天幸。過此不止。其如罪何。雖大度之見容。在輿議之難遏。抑又聞當退而進者。悔必及。宜黜而用者。傷必多。高位乃身殃之媒。厚祿爲衆怨之舍。借令臣冒厥明戒。苟畱上司。玷廊廟之儀型。被史家之貶戮。死有餘咎。仁弗忍爲。伏望察如丹之誠。憐指景之暮。遂容納政。早獲省私。亦不必窮喋喋之言。乃垂許可。惜齷齪之謹。妨用俊良。虔冀曰俞。誓無但已。

代南郊乞姪男恩澤表

臣某言。伏觀七月五日御札。以今年十一月十七日有事于南郊者。協華之盛。茂擁于神祺。拜祝之行。親紆于詔蹕。始戒嚴而措事。先誕告以揚庭。發號崇朝。均曠有截。臣某伏惟陛下。嗣聲遙駿。覃化淵泉。躬夏后之勤邦。體商家之恤祀。會先玉帛之至。樂包天地之和。紺席圓壇。講令芳于百物。寒門治谷。交盼饗于萬靈。善制允諧。先庚惟謹。極承平之巨麗。究卓越之盛容。頑醜飲和。宵翹企澤。而臣濫名郎舍。繫籍京臺。延望玉關之門。阻從甘泉之簿。尚傾危款。仰託至仁。竊念臣有親姪某。早習義方。粗親章句。有年及室。無祿代耕。而臣終鮮銜悲。亢宗靡託。惜其孤苦。勵以進修。不勝猶子之情。願遂起家之志。庶及禮成之日。許

推世及之恩。伏望陛下。閔臣以服事四朝。哀臣以年踰七十。獨茲童孺。久漏恩私。儻參一命之餘。俾紹闔門之慶。則臣少盡其力。知有報于敵帷。死且猶生。誓無忘于結草。